

唐于闐國三藏沙門實叉難陀 譯經
唐清涼山大華嚴寺沙門澄觀 疏義
明匡山法雲寺憨山沙門德清 提挈

大方廣佛華嚴經綱要

第貳冊

〔卷第二十〕卷第二十五〕

佛陀教育基金會 印贈

一切佛經，及闡揚佛法諸書，無不令人趨吉避凶，改過遷善。明三世之因果，識本具之佛性。出生死之苦海，生極樂之蓮邦。讀者必須生感恩心，作難遭想。淨手潔案，主敬存誠。如面佛天，如臨師保。則無邊利益，自可親得。若肆無忌憚，任意褻瀆。及固執管見，妄生毀謗，則罪過彌天，苦報無盡。奉勸世人，當遠罪求益，離苦得樂也。

大方廣佛華嚴經綱要卷第二十

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

十行品第二十一之下

佛子。何等爲菩薩摩訶薩無著行。佛子。此菩薩以無著心。於念念中能入阿僧祇世界。嚴淨阿僧祇世界。於諸世界。心無所著。往詣阿僧祇諸如來所。恭敬禮拜。承事供養。以阿僧祇華。阿僧祇香。阿僧祇鬘。阿僧祇塗香。末香。衣服珍寶。幢幡妙蓋。諸莊嚴具。各阿僧

祇以用供養。如是供養。爲究竟無作法故。爲住不思
議法故。於念念中。見無數佛。於諸佛所。心無所著。於
諸佛刹。亦無所著。於佛相好。亦無所著。見佛光明。聽
佛說法。亦無所著。於十方世界。及佛菩薩所有眾會。
亦無所著。聽佛法已。心生歡喜。志力廣大。能攝能行。
諸菩薩行。然於佛法。亦無所著。此菩薩於不可說劫。
見不可說佛。出興於世。一一佛所。承事供養。皆悉盡
於不可說劫。心無厭足。見佛聞法。及見菩薩眾會。莊
嚴。皆無所著。見不淨世界。亦無憎惡。何以故。此菩薩
如諸佛法。而觀察故。諸佛法中。無垢無淨。無闇無明。

無異無一。無實無妄。無安隱。無險難。無正道。無邪道。菩薩如是深入法界。教化眾生。而於眾生不生執著。受持諸法。而於諸法不生執著。發菩提心。住於佛住。而於佛住不生執著。雖有言說。而於言說心無所著。入眾生趣。於眾生趣心無所著。了知三昧。能入能住。而於三昧心無所著。往詣無量諸佛國土。若入若見。若於中住。而於佛土心無所著。捨去之時。亦無顧戀。菩薩摩訶薩以能如是無所著故。於佛法中心無障礙。了佛菩提。證法毗尼。住佛正教。修菩薩行。住菩薩心思惟菩薩解脫之法。於菩薩住處。心無所染。於菩

薩所行亦無所著。淨菩薩道。受菩薩記。得受記已。作如是念。凡夫愚癡。無知無見。無信無解。無聰敏行。頑嚚貪著。流轉生死。不求見佛。不隨明導。不信調御。迷誤失錯。入於險道。不敬十力王。不知菩薩恩。戀著住處。聞諸法空。心大驚怖。遠離正法。住於邪法。捨夷坦道。入險難道。棄背佛意。隨逐魔意。於諸有中。堅執不捨。菩薩如是觀諸眾生。增長大悲。生諸善根。而無所著。菩薩爾時復作是念。我當爲一眾生。於十方世界。一一國土。經不可說不可說劫。教化成熟。如爲一眾生。爲一切眾生。皆亦如是。終不以此而生疲厭。捨而

餘去。又以毛端徧量法界。於一毛端處。盡不可說。不可說劫。教化調伏一切眾生。如一毛端處。一一毛端處。皆亦如是。乃至不於一彈指頃。執著於我。起我我所想。於一一毛端處。盡未來劫。修菩薩行。不著身。不著法。不著念。不著願。不著三昧。不著觀察。不著寂定。不著境界。不著教化。調伏眾生。亦復不著入於法界。何以故。菩薩作是念。我應觀一切法界如幻。諸佛如影。菩薩行如夢。佛說法如響。一切世間如化。業報所持故。差別身如幻。行力所起故。一切眾生如心。種種雜染故。一切法如實際。不可變異故。又作是念。我當

盡虛空徧法界。於十方國土中。行菩薩行。念念明達。一切佛法。正念現前。無所取著。菩薩如是觀身無我。見佛無礙。爲化眾生。演說諸法。令於佛法發生無量歡喜淨信。救護一切心無疲厭。無疲厭故。於一切世界。有眾生未成熟。未調伏處。悉詣於彼。方便化度。其中眾生種種音聲。種種諸業。種種取著。種種施設。種種和合。種種流轉。種種所作。種種境界。種種生。種種歿。以大誓願。安住其中。而教化之。不令其心有動有退。亦不一念生染著想。何以故。得無所著。無所依故。自利利他。清淨滿足。是名菩薩摩訶薩第七無著行。

第七無著行。體卽方便。言不住事理。故名無著。以由迴向故。不住生死。由拔濟故。不住涅槃。俱無住故。名爲無著。所謂觀空而不捨有。涉有而不迷虛。權實雙行。二邊不住。故名無著行也。文中釋相有二。初顯自分無著。次顯勝進無著。於自分中分三。初明自行無著。二徵釋所由。三類顯萬行。前中有十三行經。先明淨境無著。又三。一明嚴刹無著。二往詣下。於三寶無著。於中。初敬事供佛。如是下顯供所爲。於念念中下。別示不著之相。義兼三寶及自進修。皆無所著。三此菩薩下。明長時無著。次云

見不淨世界亦無憎惡。於染境不嫌。二何以故。下兩行餘經。徵釋所由。意云不依佛慧。淨穢自生。順法而觀。二相安在。故云如諸佛法而觀察故。佛法卽法界佛慧也。三菩薩如是深入。下六行經。類顯萬行。若自若他。皆無所著。上明自分行。下明勝進行。中有三段。初明自行。次明利他行。後結行成滿。初中先牒前自分。次於佛法中下有十一句。正顯勝進。次明利他行中二。先增長大悲。後要心拔濟。初中云得受記已。下七行經。先觀迷四諦故。入於險道。不敬十力下。明觀迷勝義故。入於險道。上明

觀其所悲。次菩薩如是觀下。增長悲心。結成無著。
次菩薩爾時下。要心拔濟。有十四行半經。先起悲
行。後顯無著。初中先明心無疲厭。又以毛端下。明
其心廣大。此悲行也。後顯無著中。自乃至不於一
彈指頃下。舉少況多。廣顯無著。次何以故下。釋無
著之所以。由念深故。利廣。以正念現前。故無所取
著耳。三結行成滿中。三。初觀身無我二句。結自利
行成。次爲化眾生下。六行半經。結利他行成。於中
先總顯教化無疲。次無疲厭故下。別示無厭之相。
次不令其心二句。結成無著。三何以故下一行經。

徵釋雙結二行成就。上勝進行竟。是名下結名。

佛子。何等爲菩薩摩訶薩難得行。此菩薩成就難得善根。難伏善根。最勝善根。不可壞善根。無能過善根。不思議善根。無盡善根。自在力善根。大威德善根。與一切佛同一性善根。此菩薩修諸行時。於佛法中。得最勝解。於佛菩提得廣大解。於菩薩願未曾休息。盡一切劫。心無疲倦。於一切苦不生厭離。一切眾魔所不能動。一切諸佛之所護念。具行一切菩薩苦行。修菩薩行。精勤匪懈。於大乘願恆不退轉。是菩薩安住此難得行已。於念念中。能轉阿僧祇劫生死而不捨。

菩薩大願。若有眾生承事供養。乃至見聞。皆於阿耨
多羅三藐三菩提。得不退轉。此菩薩雖了眾生非有
而不捨一切眾生界。譬如船師。不住此岸。不住彼岸。
不住中流。而能運度此岸眾生。至於彼岸。以往返無
休息故。菩薩摩訶薩。亦復如是。不住生死。不住涅槃。
亦復不住生死中流。而能運度此岸眾生。置於彼岸。
安隱無畏。無憂惱處。亦不於眾生數。而有所著。不捨
一眾生。著多眾生。不捨多眾生。著一眾生。不增眾生
界。不減眾生界。不生眾生界。不滅眾生界。不盡眾生
界。不長眾生界。不分別眾生界。不二眾生界。何以故。

菩薩深入眾生界如法界。眾生界法界無有二。無二法中無增無減。無生無滅。無有無無。無取無依。無著無二。何以故。菩薩了一切法。法界無二故。菩薩如是以善方便入深法界。住於無相。以清淨相莊嚴其身。了法無性。而能分別一切法相。不取眾生。而能了知眾生之數。不著世界。而現身佛刹。不分別法。而善入佛法。深達義理。而廣演言教。了一切法。離欲真際。而不斷菩薩道。不退菩薩行。常勤修習無盡之行。自在入於清淨法界。譬如鑽木。以出於火。火事無量。而火不滅。菩薩如是化眾生事。無有窮盡。而在世間。常住

不滅。非究竟。非不究竟。非取。非不取。非依。非無依。非世法。非佛法。非凡夫。非得果。菩薩成就如是難得心。修菩薩行時。不說二乘法。不說佛法。不說世間。不說世間法。不說眾生。不說無眾生。不說垢。不說淨。何以故。菩薩知一切法無染無取。不轉不退。故菩薩於如是寂滅微妙甚深最勝法中修行時。亦不生念。我現修此行。已修此行。當修此行。不著蘊界處。內世間外世間。內外世間。所起大願。諸波羅蜜。及一切法。皆無所著。何以故。法界中無有法。名向聲聞乘。向獨覺乘。無有法。名向菩薩乘。向阿耨多羅三藐三菩提。無有

法名向凡夫界。無有法名向染向淨向生死向涅槃。何以故。諸法無二。無不二故。譬如虛空。於十方中。若去來今求不可得。然非無虛空。菩薩如是觀一切法。皆不可得。然非無一切法。如實無異。不失所作。普示修行菩薩諸行。不捨大願。調伏眾生。轉正法輪。不壞因果。亦不違於平等妙法。普與三世諸如來等。不斷佛種。不壞實相。深入於法。辯才無盡。聞法不著。至法淵底。善能開演。心無所畏。不捨佛住。不違世法。普現世間。而不著世間。菩薩如是成就難得智慧心。修習諸行。於三惡趣。拔出眾生。教化調伏。安置三世諸佛。

道中。令不動搖。復作是念。世間眾生。不知恩報。更相
讐對。邪見執著。迷惑顛倒。愚癡無智。無有信心。隨逐
惡友。起諸惡慧。貪愛無明。種種煩惱。皆悉充滿。是我
所修菩薩行處。設有知恩聰明慧解。及善知識充滿
世間。我不於中修菩薩行。何以故。我於眾生無所適
莫。無所冀望。乃至不求一縷一毫。及以一字讚美之
言。盡未來劫修菩薩行。未曾一念自爲於己。但欲度
脫一切眾生。令其清淨。永得出離。何以故。於眾生中
爲明導者。法應如是不取不求。但爲眾生修菩薩道。
令其得至安隱彼岸。成阿耨多羅三藐三菩提。是名

菩薩摩訶薩第八難得行

第八難得行。體依願度。釋相中二。初明自分。後明勝進。初中分四。初自利行。中從此菩薩成就難得。下三行經。明修成善根。次此菩薩修諸行時。下四行餘經。顯善根行相。文有十句。由得最勝解故。受難得之名。次是菩薩下三行經。顯行成利益。第二此菩薩雖了眾生下十一行經。辨利他行。有法喻合。合中云。不住生死中流者。上以生死爲此岸。涅槃爲彼岸。今言生死中流者。以發心之後。成佛之前。十地三賢。尙居二死。是以中流卽是生死。故云。

生死中流。非生死涅槃之中間。名生死中也。次何以故下。徵釋。有兩番徵。前番正徵不著。後番重徵。前義第三菩薩如是下。七行餘經。雙結二行。動寂無礙。亦名無盡心行。有法喻合。第四非究竟下。雙非二行。拂跡入玄。謂上二利。悲智雙行。心雖無著。然猶恐涉悲智之迹。故此拂之。上明自分行。次菩薩成就如是下。明勝進行二。初明慧行。次明悲行。初中先牒前自分。次不說二乘法下。正辨勝進行相。皆卽事入玄。初總明離相無說。次何以故下。四行經。徵釋以顯雙非。意云所以不說者。一無法可

說故。二明無心說。謂不起念故。次何以故下三行經。轉釋無念所以無念者。稱法界故。次何以故下四行半經。徵顯雙非。有法喻合。徵意云。既無所著。何以復修二利之行。釋意云。由雙非故。能雙運。由無二故。無著。由無不二故。不妨起行。故合中先明性相無礙。次普與下。功成德立。上辨慧行。下辨悲行。初如是成就下二句。牒智顯悲。次於三惡趣下一行餘經。正顯悲相。次復作是念下三行經。偏語化惡。明惡正是所悲故。次設有下。明若善則非化境矣。次何以故下三行餘經。徵釋徧化之所由。徵

意云。菩薩化生。理宜平等。偏惡棄善。其故何耶。釋
意云。菩薩於物。無定親疎。但就惑重障深者。可悲
故。惡是化境耳。若求名利。則化知恩。以本無求。故
偏化惡。次何以故。下次轉徵釋。必要行悲。無求之
所以。徵云。菩薩眾生。本不相預。何爲長劫悲救。無
求。釋意云。諸佛菩薩。法爾同導。不爾。不名。爲明導
故。上勝進行。竟。是名下結名。

佛子。何等爲菩薩摩訶薩善法行。此菩薩爲一切世
間天人。魔梵沙門。婆羅門。乾闥婆等。作清涼法池。攝
持正法。不斷佛種。得清淨光明陀羅尼故。說法授記。

辯才無盡得具足義陀羅尼故。義辯無盡得覺悟實
法陀羅尼故。法辯無盡得訓釋言辭陀羅尼故。詞辯
無盡得無邊文句無盡義無礙門陀羅尼故。無礙辯
無盡得佛灌頂陀羅尼灌其頂故。歡喜辯無盡得不
由他悟陀羅尼門故。光明辯無盡得同辯陀羅尼門
故。同辯無盡得種種義身句身文身中訓釋陀羅尼
門故。訓釋辯無盡得無邊旋陀羅尼故。無邊辯無盡
此菩薩大悲堅固。普攝眾生。於三千大千世界。變身
金色。施作佛事。隨諸眾生根性欲樂。以廣長舌。於一
音中。現無量音。應時說法。皆令歡喜。假使有不可說

種種業報無數。眾生共會一處。其會廣大。充滿不可說世界。菩薩於彼眾會中坐。是中眾生一一皆有不可說阿僧祇口。一口能出百千億那由他音。同時發聲。各別言詞。各別所問。菩薩於一念中。悉能領受。皆爲酬對。令除疑惑。如一眾會中。於不可說眾會中。悉亦如是。復次。假使一毛端處。念念出不可說不可說道場眾會。一切毛端處。皆亦如是。盡未來劫。彼劫可盡。眾會無盡。是諸眾會。於念念中。以各別言詞。各別所問。菩薩於一念中。悉能領受。無怖無怯。無疑無謬。而作是念。設一切眾生。以如是語業。俱來問我。我

爲說法。無斷無盡。皆令歡喜。住於善道。復令善解。一切言詞。能爲眾生說種種法。而於言語。無所分別。假使不可說。不可說。種種言詞。而來問難。一念悉領。一音咸答。普使開悟。無有遺餘。以得一切智灌頂故。以得無礙藏故。以得一切法圓滿光明故。具足一切智智故。佛子。此菩薩摩訶薩。安住善法行已。能自清淨。亦能以無所著方便。而普饒益一切眾生。不見有眾生得出離者。如於此三千大千世界。如是乃至於不可說三千大千世界。變身金色。妙音具足。於一切法。無所障礙。而作佛事。佛子。此菩薩摩訶薩。成就十種。

身。所謂入無邊法界。非趣身。滅一切世間故。入無邊法界。諸趣身。生一切世間故。不生身。住無生平等法故。不滅身。一切滅言說不可得故。不實身。得如實故。不妄身。隨應現故。不遷身。離死此生彼故。不壞身。法界性無壞故。一相身。二世語言道斷故。無相身。善能觀察法相故。菩薩成就如是十種身。爲一切眾生舍。長養一切善根故。爲一切眾生救。令其得大安隱故。爲一切眾生歸。與其作大依處故。爲一切眾生導。令得無上出離故。爲一切眾生師。令入真實法中故。爲一切眾生燈。令其明見業報故。爲一切眾生光。令照

甚深妙法故爲一切三世炬。令其曉悟實法故爲一切世間照。令入光明地中故爲一切諸趣明。示現如來自在故。佛子。是名菩薩摩訶薩第九善法行。菩薩安住此行爲一切眾生作清涼法池。能盡一切佛法源故。

第九善法行。體卽力度。言善法者。謂善巧說法。故名善法。言力者。唯識有二。一思擇力。二修習力。由此二力爲機說法。本業有三。一報通力。二修定通力。三變化通力。此地大同九地。是法師位。善說法故。初徵標其名。次釋相有二。先自分。後勝進。自分

中此菩薩爲一切世間下二行經。初總明。次得清淨光明下。分二。初有七行半經。廣攝持正法。次此菩薩大悲堅固。下有十八行經。廣不斷佛種。於中通分三段。初兩行半經。明三業利生。卽大悲河。二假使有不可說下十三行半經。假設深勝。於中先大會斷疑。明問答成就。處多大眾。頓領頓酬。由具諸度故。卽波羅蜜河。次假使一毛下。明微細斷疑。謂於一毛端處。有不可說如前大會。多劫殊問。一念能答。卽三昧河。次而作是念下。周徧斷疑。上言毛端多眾。尙有量故。今明一切眾各具多言。悉能

答故卽願智河。三以得一切智下一行半經。總釋所由。謂所以得此四河廣利者。一以他佛外加故。二以自藏離礙故。三所照法圓故。四能照智具故。不斷佛種。故稱爲善法。上明自分行。次此菩薩安住善法下。明勝進行。初牒前自分。次正顯勝進。有十六行經。分爲四段。初能自清淨。下辨四河清淨之義。二如於此三千下。明四河入海無能障義。於多界中。化無障故。三成就十種身下。辨此四河旋遶池義。謂成就隨順身語意業。智爲先導。身語意業四方流注。入智海故。隨順卽是旋遶之義。四菩

薩成就如是下。正顯無疲厭。謂四河入海。累劫無
疲菩薩亦爾。以普賢行願。盡未來劫。修菩薩行。入
如來海。不生疲厭。是以廣顯與生爲救爲歸等。上
明勝進行。後是名下。結名安住。此行下歎勝。

佛子。何等爲菩薩摩訶薩真實行。此菩薩成就第一
誠諦之語。如說能行。如行能說。此菩薩學三世諸佛
真實語。入三世諸佛種性。與三世諸佛善根同等。得
三世諸佛無二語。隨如來學智慧成就。此菩薩成就
知眾生是處非處智。去來現在業報智。諸根利鈍智。
種種界智。種種解智。一切至處道智。諸禪解脫三昧

垢淨起時非時智。一切世界宿住隨念智。天眼智。漏盡智。而不捨一切菩薩行。何以故。欲教化一切眾生。悉令清淨故。此菩薩復生如是增上心。若我不令一切眾生住無上解脫道。而我先成阿耨多羅三藐三菩提者。則違我本願。是所不應。是故要當先令一切眾生得無上菩提。無餘涅槃。然後成佛。何以故。非眾生請我發心。我自爲眾生作不請之友。欲先令一切眾生滿足善根。成一切智。是故我爲最勝。不著一切世間故。我爲最上。住無上調御地故。我爲離繫解眾生無際故。我爲已辦。本願成就故。我爲善變化。菩薩

功德莊嚴故。我爲善依怙。三世諸佛攝受故。此菩薩摩訶薩。不捨本願故。得入無上智慧莊嚴。利益眾生。悉令滿足。隨本誓願。皆得究竟。於一切法中。智慧自在。令一切眾生。普得清淨。念念徧遊十方世界。念念普詣。不可說不可說諸佛國土。念念悉見。不可說不可說諸佛。及佛莊嚴清淨國土。示現如來自在神力。普徧法界。虛空界。此菩薩現無量身。普入世間而無所依。於其身中。現一切刹。一切眾生。一切諸法。一切諸佛。此菩薩知眾生種種想。種種欲。種種解。種種業報。種種善根。隨其所應。爲現其身。而調伏之。觀諸菩

薩如幻。一切法如化。佛出世如影。一切世間如夢。得
義身文身無盡藏。正念自在。決定了知一切諸法。智
慧最勝。入一切三昧。真實相。住一性無二地。菩薩摩
訶薩。以諸眾生皆著於二。安住大悲。修行如是寂滅
之法。得佛十力。入因陀羅網法界。成就如來無礙解
脫。人中雄猛。大師子吼。得無所畏。能轉無礙清淨法
輪。得智慧解脫。了知一切世間境界。絕生死迴流。入
智慧大海。爲一切眾生護持三世諸佛正法。到一切
佛法海。實相源底。菩薩住此真實行已。一切世間天
人。魔梵沙門。婆羅門。乾闥婆。阿脩羅等。有親近者。皆

令開悟歡喜清淨。是名菩薩摩訶薩第十眞實行。
第十眞實行。體卽智度。謂約二智受用法樂成熟
有情。並如行能說。如說能行。卽是眞實。初徵名。次
釋相。中文分三別。初此菩薩成就第一下一行經
總顯名體。次別顯行相有二。初此菩薩學三世諸
佛下二行經。總標章門。次依章別釋有五段。初成
就智慧。二得三世諸佛無二語。三同佛善根。四入
佛種性。五學佛眞實語。初中三。此菩薩成就知眾
生下。初顯所成十力。次而不捨一切菩薩行。明得
果不捨因。三何以故下。徵釋所以。十力化生之智。

故須得之。令物清淨。故須不捨因行。二得三世諸佛無二語中有三。初此菩薩復生如是下兩行餘經。初反舉違誓。自誠不應。次是故要當下一行餘經。順釋要當先人後己。三何以故下六行經。徵釋所由。徵意有二。一云。何以違誓是所不應。二云。何以要先人後己。釋亦二別。一非眾生請我發心。由不講強許。今之不與。豈是所應。次云我爲最勝者。以菩薩之道。必先人後己。不爾。豈得名最勝耶。三同佛善根。有二。初不捨本願下。標德成滿。次別明同相。初於一切法中二句。意業智慧同。次念念徧

遊下三行經。身業神通同。四入佛種性中二。初此菩薩現無量身。下二行經。明身入世無依。次智入種性中二。初知眾生種種想。明入悲種性。次觀諸菩薩如幻。入智種性。五學佛真實語中二。初以諸眾生下。標前起後。次得佛十力。下四行餘經。成果起用。顯實語相。能師子吼。轉法輪故。結云。知實相源。方爲實語。文中大同十地。窮佛所得。圓融教中。位位果滿故。窮法實相。謂如是性相體力等。皆盡源故。後菩薩住此下。結行成益。是名下結名。

爾時佛神力故。十方各有佛刹微塵數世界。六種震

動。所謂動。徧動。等徧動。起。徧起。等徧起。踊。徧踊。等徧踊。震。徧震。等徧震。吼。徧吼。等徧吼。擊。徧擊。等徧擊。雨。天妙華。天香。天末香。天鬘。天衣。天寶。天莊嚴具。奏天樂音。放天光明。演暢諸天微妙音聲。如此世界夜摩天宮說十行法。所現神變。十方世界悉亦如是。復以佛神力故。十方各過十萬佛刹微塵數世界外。有十萬佛刹微塵數菩薩俱來詣此土。充滿十方。語功德林菩薩言。佛子。善哉善哉。善能演說諸菩薩行。我等一切同名功德林。所住世界皆名功德幢。彼土如來。同名普功德。我等佛所亦說此法。眾會眷屬言詞義。

理悉亦如是無有增減。佛子。我等皆承佛神力。來入此會。爲汝作證。十方世界悉亦如是。

此下第六證成分。初地動瑞證。次十方菩薩俱來人證。佛子我等下結通。

爾時功德林菩薩承佛神力。普觀十方一切眾會。暨于法界。欲令佛種性不斷故。欲令菩薩種性清淨故。欲令願種性不退轉故。欲令行種性常相續故。欲令三世種性悉平等故。欲攝三世一切佛種性故。欲開演所種諸善根故。欲觀察一切諸根。欲解煩惱習氣。心行所作故。欲照了一切佛菩提故。而說頌曰

一心敬禮十力尊

離垢清淨無礙見

境界深遠無倫匹

住如虛空道中者

過去人中諸最勝

功德無量無所著

勇猛第一無等倫

彼離塵者行斯道

現在十方諸國土

善能開演第一義

離諸過惡最清淨

彼無依者行斯道

未來所有人師子

周徧遊行於法界

已發諸佛大悲心

彼饒益者行斯道

三世所有無比尊

自然除滅愚癡闇

於一切法皆平等

彼大力人行此道

普見無量無邊界

一切諸有及諸趣

見已其心不分別

彼無動者行斯道

法界所有皆明了

於第一義最清淨

永破瞋慢及愚癡

彼功德者行斯道

於諸眾生善分別

悉入法界真實性

自然覺悟不由他

彼等空者行斯道

盡空所有諸國土

悉往說法廣開喻

所說清淨無能壞

彼勝牟尼行此道

具足堅固不退轉

成就尊重最勝法

願力無盡到彼岸

彼善修者所行道

無量無邊一切地

廣大甚深妙境界

悉能知見靡有遺

彼論師子所行道

一切句義皆明了

所有異論悉摧伏

於法決定無所疑

彼大牟尼行此道

遠離世間諸過患

普與眾生安隱樂

能爲無等大導師

彼勝德者行斯道

恆以無畏施眾生

普令一切皆欣慶

其心清淨離染濁

彼無等者行斯道

意業清淨極調善

離諸戲論無口過

威光圓滿眾所欽

彼最勝者行斯道

入真實義到彼岸

住功德處心永寂

諸佛護念恆不忘

彼滅有者行斯道

遠離於我無惱害

恆以大音宣正法

十方國土靡不周

彼絕譬者行斯道

檀波羅蜜已成滿

百福相好所莊嚴

眾生見者皆欣悅

彼最勝慧行斯道

智地甚深難可入

能以妙慧善安住

其心究竟不動搖

彼堅固行行斯道

法界所有悉能入

隨所入處咸究竟

神通自在靡不該

彼法光明行此道

諸無等等大牟尼 勤修三昧無二相

心常在定樂寂靜 彼普見者行斯道

微細廣大諸國土 更相涉入各差別

如其境界悉了知 彼智山王行此道

意常明潔離諸垢 於三界中無所著

護持眾戒到彼岸 此淨心者行斯道

智慧無邊不可說 普徧法界虚空界

善能修學住其中 彼金剛慧行斯道

三世一切佛境界 智慧善入悉周徧

未嘗暫起疲厭心 彼最勝者行斯道

善能分別十力法

了知一切至處道

身業無礙得自在

彼功德身行此道

十方無量無邊界

所有一切諸眾生

我皆救護而不捨

彼無畏者行斯道

於諸佛法勤修習

心常精進不懈倦

淨治一切諸世間

彼大龍王行此道

了知眾生根不同

欲解無量各差別

種種諸界皆明達

此普入者行斯道

十方世界無量刹

悉往受生無有數

未曾一念生疲厭

彼歡喜者行斯道

普放無量光明網

照耀一切諸世間

其光所照入法性

此善慧者行斯道

震動十方諸國土

無量億數那由他

不令眾生有驚怖

此利世者所行道

善解一切語言法

問難酬對悉究竟

聰哲辯慧靡不知

此無畏者所行道

善解覆仰諸國土

分別思惟得究竟

悉使住於無盡地

此勝慧者所行道

功德無量那由他

爲求佛道皆修習

於其一切到彼岸

此無盡行所行道

超出世間大論師

辯才第一師子吼

普使羣生到彼岸

此淨心者所行道

諸佛灌頂第一法

已得此法灌其頂

心恆安住正法門

彼廣大心行此道

一切眾生無量別

了達其心悉周徧

決定護持佛法藏

彼如須彌行此道

能於一一語言中

普爲示現無量音

令彼眾生隨類解

此無礙見行斯道

一切文字語言法

智皆善入不分別

住於真實境界中

此見性者所行道

安住甚深大法海

善能印定一切法

了法無相真寶門

此見實者所行道

一一佛土皆往詣

盡於無量無邊劫

觀察思惟靡暫停

此匪懈者所行道

無量無數諸如來

種種名號各不同

於一毛端悉明見

此淨福者所行道

一毛端處見諸佛

其數無量不可說

一切法界悉亦然

彼諸佛子行斯道

無量無邊無數劫

於一念中悉明見

知其修促無定相

此解脫行所行道

能令見者無空過 皆於佛法種因緣
而於所作心無著 彼諸最勝所行道
那由他劫常遇佛 終不一念生疲厭
其心歡喜轉更增 此不空見所行道
盡於無量無邊劫 觀察一切眾生界
未曾見有一眾生 此堅固士所行道
修習無邊福智藏 普作清涼功德池
利益一切諸羣生 彼第一人行此道
法界所有諸品類 普徧虛空無數量
了彼皆依言說住 此師子吼所行道

能於一一三昧中

普入無數諸三昧

悉至法門幽奧處

此論月者行斯道

忍力勤修到彼岸

能忍最勝寂滅法

其心平等不動搖

此無邊智所行道

於一世界一坐處

其身不動恆寂然

而於一切普現身

彼無邊身行此道

無量無邊諸國土

悉令其入一塵中

普得包容無障礙

彼無邊思行此道

了達是處及非處

於諸力處普能入

成就如來最上力

彼第一力所行道

過去未來現在世

無量無邊諸業報

恆以智慧悉了知

此達解者所行道

了達世間時非時

如應調伏諸眾生

悉順其宜而不失

此善了者所行道

善守身語及意業

恆令依法而修行

離諸取著降眾魔

此智心者所行道

於諸法中得善巧

能入真如平等處

辯才宣說無有窮

此佛行者所行道

陀羅尼門已圓滿

善能安住無礙藏

於諸法界悉通達

此深入者所行道

三世所有一切佛 悉與等心同智慧

一性一相無有殊 此無礙種所行道

已抉一切愚癡膜 深入廣大智慧海

普施眾生清淨眼 此有目者所行道

已具一切諸導師 平等神通無二行

獲於如來自在力 此善修者所行道

徧遊一切諸世間 普雨無邊妙法雨

悉令於義得決了 此法雲者所行道

能於佛智及解脫 深生淨信永不退

以信而生智慧根 此善學者所行道

能於一念悉了知
一切眾生無有餘

了彼眾生心白性
達無性者所行道

法界一切諸國土
悉能化往無有數

其身最妙絕等倫
此無比行所行道

佛刹無邊無有數
無量諸佛在其中

菩薩於彼悉現前
親近供養生尊重

菩薩能以獨一身
入於三昧而寂定

令見其身無有數
一一皆從三昧起

菩薩所住最深妙
所行所作超戲論

其心清淨常悅樂
能令眾生悉歡喜

諸根方便各差別

能以智慧悉明見

而了諸根無所依

調難調者所行道

能以方便巧分別

於一切法得自在

十方世界各不同

悉在其中作佛事

諸根微妙行亦然

能爲眾生廣說法

誰其聞者不欣慶

此等虛空所行道

智眼清淨無與等

於一切法悉明見

如是智慧巧分別

此無等者所行道

所有無盡廣大福

一切修行使究竟

令諸眾生悉清淨

此無比者所行道

普勸修成助道法

悉令得住方便地

度脫眾生無有數

未曾暫起眾生想

一切機緣悉觀察

先護彼意令無諍

普示眾生安隱處

此方便者所行道

成就最上第一智

具足無量無邊智

於諸四眾無所畏

此方便智所行道

一切世界及諸法

悉能徧入得自在

亦入一切眾會中

度脫羣生無有數

十方一切國土中

擊大法鼓悟羣生

爲法施主最無上

此不滅者所行道

一身結跏而正坐

充滿十方無量刹

而令其身不迫隘

此法身者所行道

能於一義一文中

演說無量無邊法

而於邊際不可得

此無邊智所行道

於佛解脫善修學

得佛智慧無障礙

成就無畏爲世雄

此方便者所行道

了知十方世界海

亦知一切佛刹海

智海法海悉了知

眾生見者咸欣慶

或現入胎及初生

或現道場成正覺

如是皆令世間見

此無邊者所行道

無量億數國土中

示現其身入涅槃

實不捨願歸寂滅

此雄論者所行道

堅固微密一妙身

與佛平等無差別

隨諸眾生各異見

一寶身者所行道

法界平等無差別

具足無量無邊義

樂觀一相心不移

三世智者所行道

於諸眾生及佛法

建立加持悉究竟

所有持力同於佛

最上持者行斯道

神足無礙猶如佛

天眼無礙最清淨

耳根無礙善聽聞

此無礙意所行道

所有神通皆具足

隨其智慧悉成就

善知一切靡所儔

此賢智者所行道

其心正定不搖動

其智廣大無邊際

所有境界皆明達

一切見者所行道

已到一切功德岸

能隨次第度眾生

其心畢竟無厭足

此常勤者所行道

三世所有諸佛法

於此一切咸知見

從於如來種性生

彼諸佛子行斯道

隨順言詞已成就

乖違談論善摧伏

常能趣向佛菩提

無邊慧者所行道

一光照觸無涯限
十方國土悉充徧
普使世間得大明
此破闇者所行道
隨其應見應供養
爲現如來清淨身
教化眾生百千億
莊嚴佛刹亦如是
爲令眾生出世間
一切妙行皆修習
此行廣大無邊際
云何而有能知者
假使分身不可說
而與法界虛空等
悉共稱揚彼功德
百千萬劫無能盡
菩薩功德無有邊
一切修行皆具足
假使無量無邊佛
於無量劫說不盡

何況世間天及人

一切聲聞及緣覺

能於無量無邊劫

讚歎稱揚得究竟

第七重頌分二。初先彰說儀。次正說偈辭。總有一百一頌。大分爲三。初一偈。總申歸敬。次九十六頌。正頌前文。三有四頌。結歎深廣。然十住頌文。則舉其次第。今沒其次第。直云行斯道者。略有四意。一前則約位。始終行布而說。今將融會前說。令無始終。欲顯一位之中。具行諸行。一行之中。具一切故。二前約別行。今約普行。普別無礙。三文互顯。三前約同教。今約別教。同別無礙。爲一圓教故。四前約

不雜辯才。此約任放辯才說不待次。言辭不斷故。又前多約因。此多就果。或體用更陳。廣略綺互。總別遞明。互相影發。顯菩薩行深廣難思。下文雖依次第。既沒其本名。一同離世間品圓融行也。

大方廣佛華嚴經綱要卷第二十

大方廣佛華嚴經綱要卷第二十一

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

十無盡藏品第二十二

初來意者。總有五義。一爲答第二會初十藏問故。二前明正位。今依位起行故。同梵行品。三前約位別行。今辨始終通行故。四前明成位行。今辨淨治彼行故。同十地中信等十行。五前自分究竟。今辨勝進趣後。同上明法。準問應在十迴向後。今此辨

者略有二義。一云藏有二義。約蘊攝義。在十行後。約出生義。在十地前。義通二處。問答互顯。一云迴向無別自體。但以能迴前行爲其自體。今十藏旣爲十行勝進。亦爲迴向勝進。故迴向後無別勝進。此卽前後互舉。顯義方備。二釋名者。藏是出生蘊積之義。謂一。藏內體合法界故。攝德出用。二。無盡。奇圓顯十。卽帶數釋也。三宗趣者。十藏爲宗。攝前生後。得果爲趣。

爾時功德林菩薩復告諸菩薩言。佛子。菩薩摩訶薩有十種藏。過去未來現在諸佛。已說當說今說。

釋文中。初唱數顯同。言三世同說顯勝令遵。

何等爲十。所謂信藏。戒藏。慚藏。愧藏。聞藏。施藏。慧藏。念藏。持藏。辯藏。是爲十。

二何等下。徵名列異。心淨名信。制止名戒。崇重賢善爲慚。輕拒暴惡爲愧。餐教廣博爲聞。輟己惠人爲施。決擇諸法名慧。令心明記爲念。任持所記爲持。巧宣所說爲辯。各有業用。然念慧及戒慚愧等五。皆當體爲性。餘五行用立名。前九自利。後一利他。信爲行本。故首明之。依信離過。慚愧莊嚴。戒行光潔。上三離過之行。餘皆進善。進善之首。必藉多

聞如聞而行。唯福與慧。念使增明。慧令經久。辯以利他。故前七卽七聖財。慧爲正導。故終辨之。次二守護。後一積而能散。

佛子。何等爲菩薩摩訶薩信藏。此菩薩信一切法空。信一切法無相。信一切法無願。信一切法無作。信一切法無分別。信一切法無所依。信一切法不可量。信一切法無有上。信一切法難超越。信一切法無生。若菩薩能如是隨順一切法。生淨信已。聞諸佛法。不可思議。心不怯弱。聞一切佛。不可思議。心不怯弱。聞衆生界。不可思議。心不怯弱。聞法界。不可思議。心不怯弱。

弱。聞虛空界不可思議。心不怯弱。聞涅槃界不可思議。心不怯弱。聞過去世不可思議。心不怯弱。聞未來世不可思議。心不怯弱。聞現在世不可思議。心不怯弱。聞入一切劫不可思議。心不怯弱。何以故此菩薩於諸佛所。一向堅信。知佛智慧無邊無盡。十方無量諸世界中。一一各有無量諸佛。於阿耨多羅三藐三菩提。已得。今得。當得。已出世。今出世。當出世。已入涅槃。今入涅槃。當入涅槃。彼諸佛智慧不增不減。不生不滅。不進不退。不近不遠。無知無捨。此菩薩入佛智慧。成就無邊無盡信。得此信已。心不退轉。心不雜亂。

不可破壞。無所染著。常有根本。隨順聖人。住如來家。護持一切諸佛種性。增長一切菩薩信解。隨順一切如來善根。出生一切諸佛方便。是名菩薩摩訶薩信藏。菩薩住此信藏。則能聞持一切佛法。爲眾生說。皆令開悟。

第三依名廣釋十藏。卽爲十段。段各有四。謂徵名。釋相。結名。辨益。辨益一種。唯初七。十有餘。皆無。今初徵名可知。釋中分三。初明信相。次若菩薩下。明信力。三此菩薩入佛下。總結。今初文有十句。初三句。信三空。謂空無相無願。次三句。信依他無生。以

緣起故無作。以不實故無能。所分別。以無體故無所依。三三句信圓成無性。一。廣無邊故無量。二。最勝故無上。三。深故不可越。後一總信三性無生入一。無生觀。次觀信力。若菩薩能如是下。正顯業用。文有十句。徧從前十。前十並成此十。若逆配前十。謂由信法無生故。於佛法不怯等。次何以故下。徵釋不怯之所以。謂於深廣皆堅信故。由所信者唯佛智慧故。次十方下。二行半經。別釋上信佛智慧。謂十方無量世界無量諸佛。各已證菩提。乃至入涅槃故。智慧無邊無量。一佛尚不可盡。況橫徧十

方豎窮三際。菩薩於此堅信不移。寧有怯耶。次彼諸佛智慧下。釋聞深不怯。謂增減等皆戲論法。以寂照之體。如如超戲論故。菩薩既堅信於此。寧聞深而怯耶。此二段釋文。具前十句難思之法。如文詳之。三此菩薩下總結信成。於中初一句總牒信成。次得此信已下。顯成信之益。文有十一句。初心不退轉。至生如來家七句。明行體堅牢。次護持下四句。攝德無盡。是名下結名。菩薩住此下。辨益佛子。何等爲菩薩摩訶薩戒藏。此菩薩成就普饒益戒不受戒不住戒無悔恨戒無違諍戒不損惱戒無

雜穢戒。無貪求戒。無過失戒。無毀犯戒。云何爲普饒
益戒。此菩薩受持淨戒。本爲利益一切眾生。云何爲
不受戒。此菩薩不受行外道諸所有戒。但性自精進。
奉持三世諸佛如來平等淨戒。云何爲不住戒。此菩
薩受持戒時。心不住欲界。不住色界。不住無色界。何
以故。不求生彼而持戒故。云何爲無悔恨戒。此菩薩
恆得安住無悔恨心。何以故。不作重罪。不行詖詐。不
破淨戒故。云何爲無違諍戒。此菩薩不非先制。不更
造立。心常隨順向涅槃戒。具足受持。無所毀犯。不以
持戒。惱他眾生。令其生苦。但願一切心常歡喜而持

於戒。云何爲不惱害戒。此菩薩不因於戒。學諸呪術。造作方藥。惱害眾生。但爲救護一切眾生而持於戒。云何爲不雜戒。此菩薩不著邊見。不持雜戒。但觀緣起。持出離戒。云何爲無貪求戒。此菩薩不現異相。彰己有德。但爲滿足出離法故。而持於戒。云何爲無過失戒。此菩薩不自貢高。言我持戒。見破戒人。亦不輕毀。令他愧恥。但一其心而持於戒。云何爲無毀犯戒。此菩薩永斷殺盜邪婬妄語兩舌惡口。及無義語貪瞋邪見。具足受持十種善業。菩薩持此無犯戒時。作是念言。一切眾生。毀犯淨戒。皆由顛倒。唯佛世尊。能

知眾生以何因緣而生顛倒。毀犯淨戒。我當成就無上菩提。廣爲眾生說真實法。令離顛倒。是名菩薩摩訶薩第二戒藏。

第二戒藏釋相中二。初列十名。後隨牒釋。初列十戒皆通三聚。取其相顯。初但饒益有情。後一律儀中八通三。爲遮罪過。皆是律儀。但爲救護。卽是饒益。攝善可知。次下牒釋十戒相。卽爲十段。初云何爲普饒益戒。以饒益有情。是菩薩本意。故首明之。二云何爲不受戒。謂不受邪戒。謂雞狗等。三聚宿成。故動不踰矩。三云何爲不住戒。謂不樂住三界。

唯爲求菩提及度眾生故。非如難陀之類。四云何爲無悔恨戒。涅槃云。何故持戒。爲不悔故。何故不悔。爲歡喜故。乃至未得大涅槃故。五云何爲無違諍戒。此中有四義。非者違也。一不違制立。不同調達。二不違涅槃。不取相故。三不違律儀。具足持故。四不違利物。不惱他故。六云何爲不惱害戒。中有二義。一非爲欲惱眾生。先須持戒。如聞羅漢持戒能降龍。遂卽持之。二非爲欲成淨戒。逼惱眾生。如外道殺馬祀天。求生梵世。七云何爲不雜戒。邪見持戒名雜。定有定無。爲斷常雜。觀緣性離。無煩惱。

雜真出離矣。八云何爲無貪求戒。謂不現有德。彰
已有德。五邪之一。已見淨行。九云何爲無過失戒。
言不輕毀者。無行經云。見破戒人。不說其過惡。應
念彼人久久亦當得道。十云何爲無毀犯戒。此菩
薩永斷殺盜邪淫等。釋有二義。初明律儀。十善衆
戒之本。故偏明之。菩薩持此下。雙明二聚。攝菩提
善爲眾生故。是名下結名。

佛子。何等爲菩薩摩訶薩。慚藏。此菩薩憶念過去所
作諸惡。而生於慚。謂彼菩薩心自念言。我無始世來
與諸眾生。皆悉互作父母兄弟姊妹男女。具貪瞋癡

憍慢詔誑。及餘一切諸煩惱故。更相惱害。遞相陵奪。姦淫傷殺。無惡不造。一切眾生。悉亦如是。以諸煩惱。備造眾惡。是故各各不相恭敬。不相尊重。不相承順。不相謙下。不相啟導。不相護惜。更相殺害。互爲怨讎。自惟我身。及諸眾生。去來現在。行無慚法。三世諸佛。無不知見。今若不斷此無慚行。三世諸佛。亦當見我。我當云何。猶行不止。甚爲不可。是故我應專心斷除。證阿耨多羅三藐三菩提。廣爲眾生說真實法。是名菩薩摩訶薩第三慚藏。

第三徵釋慚藏。然慚愧相別。諸說不同。涅槃云慚

者內自羞恥。愧者發露向人。瑜伽亦云。內生羞恥。爲慚。外主羞恥爲愧。大同涅槃。唯識云。依自法力。崇重賢善爲慚。依世間力。輕拒暴惡爲愧。釋中初。釋過去作惡。卽無慚行。經云。謂彼菩薩。心自念言。下四行經。初自念無慚。次一切眾生。下兩行半經。明悲他亦爾。次釋前非而生後慚。經云。自惟我身。下二行半經。正顯慚相。初自念昔非。恥佛知見。現修慚相。自惟卽是內自羞恥。次是故我應下。決志斷證。文言去來現在行無慚者。言總意別。菩薩自念昔過。愍物三世常行。故專心斷除。防已伏之。再

起爲眾生說。則物我之兼亡。是名下結名。

佛子。何等爲菩薩摩訶薩。愧藏。此菩薩自愧。昔來於五欲中。種種貪求。無有厭足。因此增長貪恚癡等一切煩惱。我今不應復行是事。又作是念。眾生無智。起諸煩惱。具行惡法。不相恭敬。不相尊重。乃至展轉互爲怨讎。如是等惡。無不備造。造已歡喜。追求稱歎。盲無慧眼。無所知見。於母人腹中。入胎受生。成垢穢身。畢竟至於髮白面皺。有智慧者。觀此。但是從婬慾生不淨之法。三世諸佛。皆悉知見。若我於今。猶行是事。則爲欺誑三世諸佛。是故我當修行於愧。速成阿耨

多羅三藐三菩提。廣爲眾生說眞實法。是名菩薩摩訶薩。第四愧藏。

第四徵釋愧藏。釋相中文有三段。初此菩薩自愧。昔來下。自念無愧而修愧行。故云我今不應復行。是事卽愧行也。次又作是念。眾生無智下。傷物無愧。不覺苦集。故云無知見。次於母腹中下。依顧世間而修愧行。誓益自他。於中初於母腹中下。卽所愧境。次有智慧下。顧他生愧。卽外羞也。是故已下。決志斷證。言不淨之法者。從婬欲生。卽種子不淨。住母腹中。卽住處不淨。成垢穢身。卽自相自性究

竟不淨。髮白意含。究竟不淨。是名下結名。

佛子。何等爲菩薩摩訶薩。聞藏。此菩薩知。是事有。故是事有。是事無。故是事無。是事起。故是事起。是事滅。故是事滅。是世間法。是出世間法。是有爲法。是無爲法。是有記法。是無記法。何等爲是事有。故是事有。謂無明有。故行有。何等爲是事無。故是事無。謂識無。故名色無。何等爲是事起。故是事起。謂愛起。故苦起。何等爲是事滅。故是事滅。謂有滅。故生滅。何等爲世間法。所謂色受想行識。何等爲出世間法。所謂戒定慧。解脫。解脫知見。何等爲有爲法。所謂欲界色界無色

界。衆生界。何等爲無爲法。所謂虛空。涅槃。數緣滅。緣起。法性住。何等爲有記法。謂四聖諦。四沙門果。四辯。四無所畏。四念處。四正勤。四神足。五根。五力。七覺分。八聖道分。何等爲無記法。謂世間有邊。世間無邊。世間亦有邊。亦無邊。世間非有邊。非無邊。世間有常。世間無常。世間亦有常。亦無常。世間非有常。非無常。如來滅後有。如來滅後無。如來滅後亦有。亦無。如來滅後非有。非無。我及衆生有。我及衆生無。我及衆生亦有。亦無。我及衆生非有。非無。過去有幾。如來般涅槃。幾聲聞。辟支佛。般涅槃。未來有幾。如來幾

聲聞辟支佛幾眾生。現在有幾佛住。幾聲聞辟支佛住。幾眾生住。何等如來最先出。何等聲聞辟支佛最先出。何等眾生最先出。何等如來最後出。何等聲聞辟支佛最後出。何等眾生最後出。何法最在初。何法最在後。世間從何處來。去至何所。有幾世界成。有幾世界壞。世界從何處來。去至何所。何者爲生死最初際。何者爲生死最後際。是名無記法。菩薩摩訶薩作如是念。一切眾生於生死中。無有多聞。不能了知。此一切法。我當發意持多聞藏。證阿耨多羅三藐三菩提。爲諸眾生說真實法。是名菩薩摩訶薩第五多聞。

藏。

第五徵釋聞藏。釋相中有二。初明所知之法。後菩薩摩訶薩作如是念下。顯多聞之意。初釋所知之法。標稱聞藏。釋云。知者。聞爲本故。實則多知耳。所知之法。初標十法。釋分七段。初牒釋有無二法。云何爲是事。有下。謂十二因緣緣生之法。今經正顯緣生無性。二云何爲世間法下。明有漏五蘊爲世間法。三何等爲出世間法。謂無漏五蘊。卽五分法身。四何等爲有爲法。謂三界。五何等爲無爲法。謂六無爲等。於大小乘多少不同。論有廣釋。六何等

善居和要卷二十一
爲有記法。謂四聖諦等。言有記者。謂能招愛非愛果。故云有記。此是通說。餘處辨記。卽是善惡。今唯是善。七云何爲無記法。言無記者有二義。一非善非惡。不能招愛非愛果。名爲無記。此但可釋餘文。今此文中。單指外道。正謂虛妄推度。非理問難。不可記錄。故名無記。非對善惡。今此無記。亦名置記。記卽答也。不應答故。此無記法中。略開五種。初謂世間有邊。下五行經。就我明無記。此中乃外道妄計四句。其過不出。斷常二見。次第二過去。有幾如來。下明三乘。凡聖數多少者。以橫無邊故。不可記。

也。次第三何等如來最先下豎無際故不可記也。次第四世間從何處來下。徵世間所從。文有六句。初二句問眾生及蘊世間。次四句約器世間。以外道計眾生有最初生故。謂外道或謂眾生從冥中來。還至冥故。或謂世界皆微塵成。聚則爲身器。散則爲微塵。此皆邪見之源。故不應答。次第五何者爲生死最初際。下二句約生死初後際。此外道計生死有始終。以彼定執。故是邪見。中論云。大聖之所說。本際不可得。生死無有始。亦復無有終。若無有始終。中當云何有。是故於此中。先後共亦無。以

妄計始終。故不應答。故結云。是名爲無記法。次作是念下。顯多聞之意。謂悲物無聞。長淪生死。故誓持聞藏。自證利他。是名下結名。

佛子。何等爲菩薩摩訶薩施藏。此菩薩行十種施。所謂分減施。竭盡施。內施。外施。內外施。一切施。過去施。未來施。現在施。究竟施。佛子。云何爲菩薩分減施。此菩薩稟性仁慈。好行惠施。若得美味。不專自受。要與眾生。然後方食。凡所受物。悉亦如是。若自食時。作是念言。我身中有八萬戶蟲。依於我住。我身充樂。彼亦充樂。我身饑苦。彼亦饑苦。我今受此。所有飲食。願令

眾生普得充飽。爲施彼故而自食之。不貪其味。復作是念。我於長夜愛著其身。欲令充飽而受飲食。今以此食惠施眾生。願我於身永斷貪著。是名分減施。云何爲菩薩竭盡施。佛子。此菩薩得種種上味飲食香華衣服資生之具。若自以受用。則安樂延年。若輟己施人。則窮苦天命。時或有人來作是言。汝今所有悉當與我。菩薩自念。我無始已來。以饑餓故。喪身無數。未曾得有如毫末許饒益眾生而獲善利。今我亦當同於往昔而捨其命。是故應爲饒益眾生。隨其所有。一切皆捨。乃至盡命。亦無所吝。是名竭盡施。云何爲

菩薩內施。佛子。此菩薩年方少盛。端正美好。香華衣服。以嚴其身。始受灌頂轉輪王位。七寶具足。王四天下。時或有人來白王言。大王當知。我今衰老。身嬰重疾。熒獨羸頓。死將不久。若得王身手足血肉頭目骨髓。我之身命。必冀存活。唯願大王莫更籌量。有所顧惜。但見慈念。以施於我。爾時菩薩作是念言。今我此身後必當死。無一利益。宜時疾捨。以濟眾生。念已施之心。無所悔。是名內施。云何爲菩薩外施。佛子。此菩薩年盛色美。眾相具足。名華上服。而以嚴身。始受灌頂轉輪王位。七寶具足。王四天下。時或有人來白王

言。我今貧窶。眾苦逼迫。惟願仁慈。特垂矜念。捨此王位。以贍於我。我當統領。受王福樂。爾時菩薩作是念言。一切榮盛。必當衰歇。於衰歇時。不能復更。饒益眾生。我今宜應。隨彼所求。充滿其意。作是念已。即便施之。而無所悔。是名外施。云何爲菩薩內外施。佛子。此菩薩如上所說。處輪王位。七寶具足。王四天下。時或有人。而來白言。此轉輪位。王處已久。我未曾得。唯願大王。捨之與我。并及王身。爲我臣僕。爾時菩薩作是念言。我身財寶。及以王位。悉是無常。敗壞之法。我今盛壯。富有天下。乞者現前。當以不堅。而求堅法。作是

念已。卽便施之。乃至以身恭勤作役。心無所悔。是名
內外施。云何爲菩薩一切施。佛子。此菩薩亦如上說
處輪王位。七寶具足。王四天下。時有無量貧窮之人。
來詣其前。而作是言。大王名稱周聞十方。我等欽風。
故來至此。吾曹今者各有所求。願普垂慈。令得滿足。
時諸貧人。從彼大王。或乞國土。或乞妻子。或乞手足。
血。肉。心。肺。頭。目。髓。腦。菩薩是時。心作是念。一切恩愛。
會當別離。而於眾生無所饒益。我今爲欲永捨貪愛。
以此一切必離散物。滿眾生願。作是念已。悉皆施與。
心無悔恨。亦不於眾生而生厭賤。是名一切施。云何

爲菩薩過去施。此菩薩聞過去諸佛菩薩所有功德。聞已不著。了達非有。不起分別。不貪不味。亦不求取。無所依倚。見法如夢。無有堅固。於諸善根。不起有想。亦無所倚。但爲教化。取著眾生。成熟佛法。而爲演說。又復觀察過去諸法。十方推求。都不可得。作是念已。於過去法。畢竟皆捨。是名過去施。云何爲菩薩未來施。此菩薩聞未來諸佛之所修行。了達非有。不取於相。不別樂往生諸佛國土。不味不著。亦不生厭。不以善根迴向於彼。亦不於彼而退善根。常勤修行。未曾廢捨。但欲因彼境界。攝取眾生。爲說真實。令成熟佛。

法。然此法者。非有處所。非無處所。非內非外。非近非遠。復作是念。若法非有。不可不捨。是名未來施。云何爲菩薩現在施。此菩薩聞四天王眾天。三十三天。夜摩天。兜率陀天。化樂天。他化自在天。梵天。梵身天。梵輔天。梵眾天。大梵天。光天。少光天。無量光天。光音天。淨天。少淨天。無量淨天。徧淨天。廣天。少廣天。無量廣天。廣果天。無煩天。無熱天。善見天。善現天。色究竟天。乃至聞聲聞緣覺。具足功德。聞已其心不迷不沒。不聚不散。但觀諸行如夢不實。無有貪著。爲令眾生捨離惡趣。心無分別。修菩薩道。成就佛法。而爲開演。是

名現在施。云何爲菩薩究竟施。佛子。此菩薩假使有無量眾生。或有無眼。或有無耳。或無鼻舌。及以手足。來至其所。告菩薩言。我身薄祐。諸根殘缺。惟願仁慈。以善方便。捨己所有。令我具足。菩薩聞之。卽便施與。假使由此。經阿僧祇劫。諸根不具。亦不心生一念悔惜。但自觀身。從初入胎。不淨微形。胞段諸根。生老病死。又觀此身。無有真實。無有慚愧。非賢聖物。臭穢不潔。骨節相持。血肉所塗。九孔常流。人所惡賤。作是觀已。不生一念愛著之心。復作是念。此身危脆。無有堅固。我今云何而生戀著。應以施彼。充滿其願。如我所

善屋經卷第二十一
作。以此開導一切眾生。令於身心不生貪愛。悉得成就清淨智身。是名究竟施。是爲菩薩摩訶薩第六施藏。

第六施藏。釋相中二。初此菩薩行十種施下。先標列十名下。依章別釋中。卽爲十段。一一各三。謂標釋結。然此十施前六事捨。謂身命財。次三。心捨。謂不取著。後一俱捨。名爲究竟。今佛子云何下一句。標分減施。次釋中。此菩薩稟性仁慈下。初明分減之相。次若自食時下。明施善巧。次復作是念下。對治施障。是名下結名。二云何下。標竭盡施。言竭盡

者。不顧活命。傾竭所有也。次釋相中。此菩薩得種種下。明難捨之物。次或時有人來下。乞境現前。三菩薩自念下。正修施行。是名下結名。三云何爲菩薩內施。內施謂身也。次此菩薩下。乞境現前。笈者單也。無兄曰煢。次爾時菩薩下。正修施行。是名下結名。四云何爲菩薩外施。卽王位也。時或人來下。乞境。爾時下。施行。五云何爲菩薩內外施。王位爲外。兼身爲內。六云何爲菩薩一切施。謂凡一切所有也。明難捨之物。以是事捨之終。故總該收。舉難攝易。略舉數條。廣則無邊。次時有無量貧窮之人。

下明乞境現前。心作是念。下。正修施行。七云何爲
菩薩過去施。然三世之施。通相皆明不著。別則過
去不生。追戀未來。預止貪求。現在心無染著。今云
此菩薩聞過去下。明於佛法無所著。次云又復觀
察下。於一切法無所著。是名過去施。八云何爲菩
薩未來施。謂不著未來果報故。初聞未來諸佛下
正顯不著修行之因。不願淨土之果。不味其好。不
厭其事。不迴向者。釋上不味。不退已下。釋上不厭。
修彼行故。次但欲因彼境界下。釋疑。疑云。旣於淨
不味。修行何爲。釋有二意。一者約悲。但爲攝物故。

次然此法者下約智。智了非有故。生卽非生故不著。不礙事故。非生之生故修行。非有處所者。與理冥故。非無處所者。事像形故。非內者。相分境故。非外者。心所淨故。是名未來施。九云何爲菩薩現在施。釋相有三。初明所捨之境。次結捨心。三通外難。初所捨境。聞四天王下。列欲界諸天。次梵天下。色界諸天。次乃至聲聞下。列二乘。上皆所捨之境。次聞已其心不迷下。五句明能捨心。次爲令眾生下。釋疑。疑云旣言不聚善因。何以說五乘因果。釋云。拯三途之劇苦。示人天以蘇息。止劣見之妄情。說

二乘以引攝爲物然耳。非自不捨也。是名現在施。
十云何爲菩薩究竟施。然究竟之名。略有五義。一
前六捨財命。次三捨著心。今則兼上二門故。二又
發大願。令物無著故。三令物得究竟果故。四不生
一念愛著。則微細無著故。五究竟能令物實益故。
次釋相中。初云假使有無量眾生下。明施境現前。
次菩薩聞之。即便施與下。正施無恪。次但觀自身
下。顯成捨之由。由觀此身過患多故。固當捨也。次
如我所作下。迴向眾生。是名究竟施。

佛子。何等爲菩薩摩訶薩慧藏。此菩薩於色如實知。

色集如實知。色滅如實知。色滅道如實知。於受想行
識如實知。受想行識集如實知。受想行識滅如實知。
受想行識滅道如實知。於無明如實知。無明集如實
知。無明滅如實知。無明滅道如實知。於愛如實知。愛
集如實知。愛滅如實知。愛滅道如實知。於聲聞如實
知。聲聞法如實知。聲聞集如實知。聲聞涅槃如實知。
於獨覺如實知。獨覺法如實知。獨覺集如實知。獨覺
涅槃如實知。於菩薩如實知。菩薩法如實知。菩薩集
如實知。菩薩涅槃如實知。云何知。知從業報諸行因
緣之所造作。一切虛假空無有實。非我。非堅固。無有

少法可得成立。欲令眾生知其實性。廣爲宣說。爲說何等。說諸法不可壞。何等法不可壞。色不可壞。受想行識不可壞。無明不可壞。聲聞法。獨覺法。菩薩法。不可壞。何以故。一切法無作無作者。無言說無處所。不生不起。不與不取。無動轉。無作用。菩薩成就如是等無量慧藏。以少方便。了一切法。自然明達。不由他悟。此慧無盡藏。有十種不可盡故。說爲無盡。何等爲十。所謂多聞善巧。不可盡故。親近善知識。不可盡故。善分別句義。不可盡故。入深法界。不可盡故。以一味智莊嚴。不可盡故。集一切福德。心無疲倦。不可盡故。入

一切陀羅尼門不可盡故。能分別一切眾生語言音聲不可盡故。能斷一切眾生疑惑不可盡故。爲一切眾生現一切佛神力。教化調伏。令修行不斷不可盡故。是爲十。是爲菩薩摩訶薩第七慧藏。住此藏者得無盡智慧。普能開悟一切眾生。

第七釋慧藏。釋相中二。初明慧藏。後釋無盡。前中三。初此菩薩於色如實知。下八行半經。明如實知境。次下釋如實知義。顯所知之相。徵云云。何知也。下知從業報下。釋也。釋意云。知相知性無有障礙。是菩薩所知。無知之知。是菩薩所知。故云如實知。

也。初知從業報。乃約自利。明知苦集。次約利他。彰知滅道。次欲令眾生知其實性。廣爲宣說。標其說意。正是利他。能知實性。是道諦相。法不可壞。及所知性。卽滅諦相。廣爲宣說。唯菩薩相。次爲說何等。下展轉徵釋。總有三重。初徵意云。說何令知實性。釋云。說不可壞。次徵云。何等法不可壞。爲性爲相。此尋說處。釋云。相卽性故。故說五類等法。皆不可壞。次何以故。下徵云。現見諸法。猶如聚沫。泡。焰。芭。蕉。幻。夢。不實。那言不壞。下釋略有三義。一。色等性空。無可壞故。若壞方空。非本空故。二。由空卽真。同

法性故。若壞方真。事在理外故。三由卽空不待壞。故壞則斷滅。文有十句。次菩薩成就下。三總結多門。以彰善巧者。更有多門。皆以無所得等爲少方便。則色空見盡。壞與不壞兩亡。不隨境轉。名不由他悟。次此慧無盡藏下。二釋無盡。文有十句。是爲下結名。住此藏者。下歎益。

佛子。何等爲菩薩摩訶薩念藏。此菩薩捨離癡惑。得具足念。憶念過去一生。二生。乃至十生。百生。千生。百千生。無量百千生。成劫。壞劫。成壞劫。非一成劫。非一壞劫。非一成壞劫。百劫。千劫。百千億那由他。乃至無

數無量無邊無等不可數不可稱不可思不可量不可說不可說不可說不可說劫念一佛名號乃至不可說不可說佛出世說授記念一佛出世說授記乃至不可說不可說佛出世說授記念一佛出世說修多羅乃至不可說不可說佛出世說修多羅如修多羅祇夜授記伽陀尼陀那優陀那本事本生方廣未曾有譬喻論議亦如是念一眾會乃至不可說不可說眾會念演一法乃至演不可說不可說法念一根種種性乃至不可說不可說根種種性念一根無量種種性乃至不可說不可說根無量種種性念一煩惱種種性乃至

不可說不可說煩惱種種性。念一三昧種種性。乃至不可說不可說三昧種種性。此念有十種。所謂寂靜念。清淨念。不濁念。明徹念。離塵念。離種種塵念。離垢念。光耀念。可愛樂念。無障礙念。菩薩住是念時。一切世間無能擾亂。一切異論無能變動。往世善根悉得清淨。於諸世法。無所染著。眾魔外道所不能壞。轉身受生。無所忘失。過現未來。說法無盡。於一切世界中。與眾同住。會無過咎。入一切諸佛眾會道場。無所障礙。一切佛所悉得親近。是名菩薩摩訶薩第八念藏。

入釋念藏釋相中有四。初捨離癡惑標念體。次憶念過去下十三行半經。明所念差別。次此念有十種下。三明能念勝相。於中十句。次菩薩住是念時。下五行經。明念益相。是名下結名。

佛子。何等爲菩薩摩訶薩持藏。此菩薩持諸佛所說修多羅文句義理。無有忘失。一生持。乃至不可說不可說生持。持一佛名號。乃至不可說不可說佛名號。持一劫數。乃至不可說不可說劫數。持一佛授記。乃至不可說不可說佛授記。持一修多羅。乃至不可說不可說修多羅。持一眾會。乃至不可說不可說眾會。

持演一法。乃至演不可說不可說法。持一根無量種種性。乃至不可說不可說根無量種種性。持一煩惱種種性。乃至不可說不可說煩惱種種性。持一三昧種種性。乃至不可說不可說三昧種種性。佛子。此持藏無邊難滿。難至其底。難得親近。無能制伏。無量無盡。具大威力。是佛境界。唯佛能了。是名菩薩摩訶薩第九持藏。

九釋持藏。釋相中三。初此菩薩持諸佛下。別舉文義。次持一佛名號下。徧舉諸法。三佛子此持藏下。明持德量。文有十句。次是名下結名。

佛子。何等爲菩薩摩訶薩辯藏。此菩薩有深智慧了知實相。廣爲衆生演說諸法。不違一切諸佛經典。說一品法。乃至不可說不可說品法。說一佛名號。乃至不可說不可說佛名號。如是說一世界。說一佛授記。說一修多羅。說一衆會說演一法。說一根無量種種性。說一煩惱無量種種性。說一三昧無量種種性。乃至說不可說不可說三昧無量種種性。或一日說。或半月一月說。或百年。千年。百千年說。或一劫百劫千劫百千劫說。或百千億那由他劫說。或無數無量乃至不可說不可說劫說。劫數可盡。一文一句義理難

盡。何以故。此菩薩成就十種無盡藏故。成就此藏得攝一切法陀羅尼門。現在前。百萬阿僧祇陀羅尼。以爲眷屬。得此陀羅尼已。以法光明。廣爲眾生演說於法。其說法時。以廣長舌。出妙音聲。充滿十方一切世界。隨其根性。悉令滿足。心得歡喜。滅除一切煩惱纏垢。善入一切音聲言語文字辯才。令一切眾生佛種不斷。淨心相續。亦以法光明而演說法。無有窮盡。不生疲倦。何以故。此菩薩成就盡虛空徧法界無邊身故。是爲菩薩摩訶薩第十辯藏。此藏無窮盡。無分段。無間。無斷。無變異。無隔礙。無退轉。甚深無底。難可得。

入普入一切佛法之門。

第十釋辯藏。釋相中分四。初此菩薩有深智慧。下總舉體用。雙照事理。二種實相。名深智慧。次說一品法下。四行半經。顯能廣演。次或一日說下。三行餘經。明長時演。次何以故。下徵釋。意云。所以能長時演者。成就十種無盡藏故。以是十藏之終。故說具前十藏。次其說法時。下五行經。彰辯之德。是爲下結名。次此藏無窮。下歎益中。文有十句。義該七辯。一無窮盡。是豐義味辯。一一句中。出多事理故。二卽捷辯。欲言卽言。無分段故。三無疎謬辯。不以

邪錯間深理故。四無斷辯。相續連環故。五應辯。應時應機無變異故。六迅辯。迅若懸河。無隔礙故。已下四句。卽一切世間最上妙辯。此辯有五德。一甚深如雷。卽第八句。二清徹遠聞。故不退轉。卽第七句。三其聲哀雅。如迦陵頻伽。故能普入一切佛法。卽第十句。四能令眾生入心愛敬。五其有聞者。歡喜無厭。故難可得入。上二卽第九句。上來依章別釋竟。

佛子。此十種無盡藏。有十種無盡法。令諸菩薩究竟成就無上菩提。何等爲十。饒益一切眾生故。以本願

善迴向故。一切劫無斷絕故。盡虛空界悉開悟。心無
限故。迴向有爲而不著故。一念境界。一切法無盡故。
大願心無變異故。善攝取諸陀羅尼故。一切諸佛所
護念故。了一切法皆如幻故。是爲十種無盡法。能令
一切世間所作。悉得究竟無盡大藏。

第四佛子。下總歎十藏勝能。分三。初標歎。次何等
爲十下。徵釋。釋有十句。攝爲五對。一下化上求。二
豎窮廣徧。三捨相契實。四無變善攝。五外護內明。
故以爲勝。次是爲十種下。結歎。此後應有偈等。或
是略無。多是經來未盡。第四會竟。

大方廣佛華嚴經綱要卷第二十一

大方廣佛華嚴經綱要卷第二十二

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

第五會兜率天宮金剛幢菩薩說十迴向等法門
令已行者起願自二十二卷起至三十三卷止有
三品經

昇兜率天宮品 兜率天宮偈讚品 十迴向品

昇兜率天宮品第二十三

自下第五會說十迴向法。初來意。先會來者。正爲

善處經要卷二二二
答前迴向問故。迴前解行以向真證。廣益自他。令
行彌綸。無不周故。菩薩大乘藏經云。以少善根引
無量果者。謂迴向心。以迴向心爲大利故。故行後
明之。又前解行旣著。今悲願彌博。後品來者。前會
旣終。將明後說。先明說處。表法故來。二釋名者。先
會得名。亦有三義。同前二會。二釋品名者。兜率是
處。佛以法界之身。不起而應。故名爲昇。處此說者。
表位超勝。是次第故。又上下放逸。此天知足。表世
間行滿。故居喜足之天。又以彼有一生補處。表菩
提之心。功行滿故。又積劫累勳。知階未足。迴勳授

子乃知有餘。菩薩亦爾。勤苦積行。未見有餘。迴向
眾生。乃知自足。又欲界六天。此居其中。表悲智均
平。處於中故。又生此天而修三福。謂施戒定。自餘
不具偏多不均。故處此說也。三宗趣者。會以十向
大願爲宗。得地爲趣。品以昇天赴感爲宗。說向爲
趣。

爾時佛神力故。十方一切世界。一一四天下。閻浮提
中。皆見如來坐於樹下。各有菩薩承佛神力而演說
法。靡不自謂恆對於佛。

第四釋文。此會有三品經。初二品當會由致。後一

品正說所以無勝進者。由二義故。一以此會是三賢位終。攝前解行。總爲趣地方便。迴向當體自是勝進。是故無也。此經上下其例有四。一約行滿入位之際。如賢首品信滿總爲入住方便。二約願滿入證之際。如此迴向初僧祇滿總爲入地方便。三約功用滿。約無功用之際。如第八地總攝前七地以爲方便。此第二僧祇也。四約因位成滿之際。如第十地初攝前九地爲入方便。此約三僧祇滿處攝也。餘位相接卽別有方便。故非一例。二方欲入地必離進趣相。與無分別爲方便故。上辯勝進就

初二品前一化主赴機。後品助化讚佛。今初品中大分十段。一本會齊現。二不離而昇。三見佛嚴處。四迎佛與供。五觀佛勝德。六請佛處殿。七如來受請。八天王獲益。九承力偈讚。十如來就座。今初也。初言神力。卽是徧因。未必起神境通。但是修成心自在力。

爾時世尊復以神力不離於此菩提樹下。及須彌頂夜摩天宮。而往詣於兜率陀天。一切妙寶所莊嚴殿。第二爾時下明不離而昇。謂前十方一切四會。皆儼然不散而昇。故云不離菩提樹等。此說意明橫

徧十方。豎該九會。佛法界身。徧時處故。

時兜率天王遙見佛來。卽於殿上敷摩尼藏師子之座。其師子座。天諸妙寶之所集成。過去修行善根所得。一切如來神力所現。無量百千億那由他阿僧祇善根所生。一切如來淨法所起。無邊福力之所嚴瑩。清淨業報。不可沮壞。觀者欣樂。無有厭足。是出世法。非世所染。一切眾生咸來觀察。無有能得究其妙好。第三見佛巖處。卽於下正顯巖處有二。初一方巖。後結通十方。初中分二。初總顯體德。後有百萬下。別明體用。今初有十一句。初一句總。餘十句爲別。

別中分三段。初一句自體相。以寶成故。次六句因相。謂過去善根。後三句總顯殊特。

有百萬億層級。周而圍繞。百萬億金網。百萬億華帳。百萬億寶帳。百萬億鬘帳。百萬億香帳。張施其上。華鬘垂下。香氣普熏。百萬億華蓋。百萬億鬘蓋。百萬億寶蓋。諸天執持。四面行列。百萬億寶衣。以敷其上。

二別明體用中。通有二百九十九種百萬億。廣上三段。卽爲三別。初自此已下。有二百一十四句。廣自體。次有百萬億初發心下七十五句。廣前殊特。三百萬億善根下十句。廣前因相。初一多明器世

闍嚴。後二顯眾生世間嚴。皆智正覺世間之力也。皆言百萬億位增十行之百萬故。初中長分爲十。前九色嚴。後一音聲嚴。

百萬億樓閣。綺煥莊嚴。百萬億摩尼網。百萬億寶網。彌覆其上。百萬億寶纓絡網。四面垂下。百萬億莊嚴具網。百萬億蓋網。百萬億衣網。百萬億寶帳網。以張其上。百萬億寶蓮華網。開敷光榮。百萬億寶香網。其香美妙。稱悅眾心。

第二樓閣。下十句。復於殿內建立樓閣。繞座莊嚴。網嚴樓閣。

百萬億寶鈴帳。其鈴微動。出和雅音。百萬億栴檀寶帳。香氣普熏。百萬億寶華帳。其華敷榮。百萬億眾妙色衣帳。世所希有。百萬億菩薩帳。百萬億雜色帳。百萬億真金帳。百萬億瑠璃帳。百萬億種種寶帳。悉張其上。百萬億一切寶帳。大摩尼寶以爲莊嚴。

第三寶鈴帳。下十句。辨帳嚴。是繞座前。已辨覆故。百萬億妙寶華。周而瑩飾。百萬億頻婆帳。殊妙間錯。百萬億寶鬘。百萬億香鬘。四面垂下。百萬億天堅固香。其香普熏。百萬億天莊嚴具。纓絡。百萬億寶華。纓絡。百萬億勝藏寶。纓絡。百萬億摩尼寶。纓絡。百萬億

海摩尼寶纓絡莊嚴座身。百萬億妙寶繪采。以爲垂帶。

第四如寶華下有十二句辨嚴座身。頻婆羅此云影質。謂帳莊嚴中。現外質之影故。

百萬億因陀羅金剛寶。百萬億自在摩尼寶。百萬億妙色真金藏。以爲間飾。百萬億毗盧遮那摩尼寶。百萬億因陀羅摩尼寶。光明照耀。百萬億天堅固摩尼寶。以爲牕牖。百萬億清淨功德摩尼寶。彰施妙色。百萬億清淨妙藏寶。以爲門闥。百萬億世中最勝半月寶。百萬億離垢藏摩尼寶。百萬億師子面摩尼寶。間

錯莊嚴。百萬億心王摩尼寶。所求如意。百萬億閻浮檀摩尼寶。百萬億清淨藏摩尼寶。百萬億帝幢摩尼寶。咸放光明。彌覆其上。百萬億白銀藏摩尼寶。百萬億須彌幢摩尼寶。莊嚴其藏。

第五因陀羅金剛寶下。有十七句。亦嚴座四周。皆明妙寶。以爲牕門及覆。亦嚴座體。莊嚴其藏。是蓮華藏。不言蓮華。或是座身之龕名藏。

百萬億真珠纓絡。百萬億瑠璃纓絡。百萬億赤色寶纓絡。百萬億摩尼纓絡。百萬億寶光明纓絡。百萬億種種藏摩尼纓絡。百萬億甚可樂見赤真珠纓絡。百

三身系要卷二十一
萬億無邊色相藏。摩尼寶纓絡。百萬億極清淨。無比寶纓絡。百萬億勝光明。摩尼寶纓絡。周而垂布。以爲莊嚴。百萬億摩尼身。殊妙嚴飾。百萬億因陀羅妙色寶。

第六眞珠纓絡。下十二句。纓絡周垂嚴其摩尼身。下二句。文似闕略。謂妙色寶下無所結屬。

百萬億黑栴檀香。百萬億不思議境界香。百萬億十方妙香。百萬億最勝香。百萬億甚可愛樂香。咸發香氣。普熏十方。百萬億頻婆羅香。普散十方。百萬億淨光香。普熏眾生。百萬億無邊際種種色香。普熏一切。

諸佛國土。永不歇滅。百萬億塗香。百萬億熏香。百萬
億燒香。香氣發越。普熏一切。百萬億蓮華藏沉水香。
出大音聲。百萬億遊戲香。能轉眾心。百萬億阿樓那
香。香氣普熏。其味甘美。百萬億能開悟香。普徧一切。
令其聞者。諸根寂靜。復有百萬億無比香王香。種種
莊嚴。

第七黑梅檀下有十六句。以香爲嚴。阿樓那。此云
紅赤色。

雨百萬億天華雲。雨百萬億天香雲。雨百萬億天末
香雲。雨百萬億天拘蘇摩華雲。雨百萬億天波頭摩

華雲。兩百萬億天優鉢羅華雲。兩百萬億天拘物頭
華雲。兩百萬億天芬陀利華雲。兩百萬億天曼陀羅
華雲。兩百萬億一切天華雲。兩百萬億天衣雲。兩百
萬億摩尼寶雲。兩百萬億天蓋雲。兩百萬億天幡雲。
兩百萬億天冠雲。兩百萬億天莊嚴具雲。兩百萬億
天寶鬘雲。兩百萬億天寶纓絡雲。兩百萬億天栴檀
香雲。兩百萬億天沈水香雲。

第八兩百萬下二十句。雨雲爲嚴。

建百萬億寶幢。懸百萬億寶幡。垂百萬億寶繒帶。然
百萬億香鑪。布百萬億寶鬘。持百萬億寶扇。執百萬

億寶拂。懸百萬億寶鈴網。微風吹動。出妙音聲。百萬
億寶欄楯。周帀圍繞。百萬億寶多羅樹。次第行列。百
萬億妙寶牕牖。綺麗莊嚴。百萬億寶樹。周帀垂陰。百
萬億寶樓閣。延袤綺飾。百萬億寶門。垂布纓絡。百萬
億金鈴。出妙音聲。百萬億吉祥相。纓絡嚴淨。垂下。百
萬億寶悉底迦。能除眾惡。百萬億金藏。金縷織成。百
萬億寶蓋。眾寶爲竿。執持行列。百萬億一切寶莊嚴
具網。間錯莊嚴。

第九建百萬下四十八句。座外四面嚴於中有四。
初二十句雜莊嚴羅列座側。言樓閣延袤者。靜法

云。梵云蒲莫迦。此云帳舉。前文已有樓閣故。寶悉底迦者。具云塞縛悉底迦。此云有樂。若見此相。必獲安樂。其形卍字。

百萬億光明寶。放種種光。百萬億光明。周徧照耀。百萬億日藏輪。百萬億月藏輪。並無量色寶之所集成。百萬億香燄。光明映徹。百萬億蓮華藏。開敷鮮榮。百萬億寶網。百萬億華網。百萬億香網。彌覆其上。

次光明寶下九句。光明嚴。言網覆者。如世之燈。以護夕蟲成隱。映故。

百萬億天寶衣。百萬億天青色衣。百萬億天黃色衣。

百萬億天赤色衣。百萬億天奇妙色衣。百萬億天種種寶奇妙衣。百萬億種種香熏衣。百萬億一切寶所成衣。百萬億鮮白衣。悉善敷布。見者歡喜。

三天寶衣下九句寶衣敷布嚴。

百萬億天鈴幢。百萬億金網幢。出微妙音。百萬億天繪幢。眾采具足。百萬億香幢。垂布香網。百萬億華幢。雨一切華。百萬億天衣幢。懸布妙衣。百萬億天摩尼贊幢。眾寶莊嚴。百萬億天莊嚴具幢。眾具校飾。百萬億天鬘幢。種種華鬘。四面行布。百萬億天蓋幢。寶鈴和鳴。聞皆歡喜。

四天鈴幢下十句。寶幢行列嚴。上九段色相嚴。

次下第十一段音聲嚴。

百萬億天螺。出妙音聲。百萬億天鼓。出大音聲。百萬億天筚篥。出微妙音。百萬億天牟陀羅。出大妙音。百萬億天諸雜樂。同時俱奏。百萬億天自在樂。出妙音聲。其聲普徧一切佛刹。百萬億天變化樂。其聲如響。普應一切。百萬億天鼓。因於撫擊。而出妙音。百萬億天如意樂。自然出聲音節相和。百萬億天諸雜樂。出妙音聲。滅諸煩惱。

第十天螺出妙音聲下。辨音聲嚴於中二。初十句

樂音嚴。牟陀羅者。此云蜂鼓。謂天樂初奏。此鼓先作故。

百萬億悅意音。讚歎供養。百萬億廣大音。讚歎承事。
百萬億甚深音。讚歎修行。百萬億眾妙音。歎佛業果。
百萬億微細音。歎如實理。百萬億無障礙。真實音。歎
佛本行。百萬億清淨音。讚歎過去供養諸佛。百萬億
法門音。讚歎諸佛最勝無畏。百萬億無量音。歎諸菩
薩功德無盡。百萬億菩薩地音。讚歎開示一切菩薩
地相應行。百萬億無斷絕音。歎佛功德無有斷絕。
後悅意音。下二十句。法音嚴中。初十一句。讚歎三

寶。

百萬億隨順音。讚歎稱揚見佛之行。百萬億甚深法音。讚歎一切法無礙智相應理。百萬億廣大音。其音充滿一切佛刹。百萬億無礙清淨音。隨其心樂。悉令歡喜。百萬億不住三界音。令其聞者深入法性。百萬億歡喜音。令其聞者心無障礙。深信恭敬。百萬億佛境界音。隨所出聲。悉能開示一切法義。百萬億陀羅尼音。善宣一切法句差別。決了如來祕密之藏。百萬億一切法音。其音和暢。克諧眾樂。

後隨順音下九句說法益物。上廣自體竟。

有百萬億初發心菩薩。纔見此座。倍更增長一切智
心。百萬億治地菩薩。心淨歡喜。百萬億修行菩薩。悟
解清淨。百萬億生貴菩薩。住勝志樂。百萬億方便具
足菩薩。起大乘行。百萬億正心住菩薩。勤修一切菩
薩道。百萬億不退菩薩。淨修一切菩薩地。百萬億童
眞菩薩。得一切菩薩三昧光明。百萬億法王子菩薩。
入不思議諸佛境界。百萬億灌頂菩薩。能現無量如
來十力。

大文第二廣顯殊特。前略云見者無厭。亦已略明
益相。今廣顯之。卽座之德用。恭敬供養。復顯爲嚴。

文中二。初明獲益。後申供儀。前有三十九句。曲分爲四。初十約位辨益。

百萬億菩薩得自在神通。百萬億菩薩生清淨解。百萬億菩薩心生愛樂。百萬億菩薩深信不壞。百萬億菩薩勢力廣大。百萬億菩薩名稱增長。百萬億菩薩演說法義。令智決定。百萬億菩薩正念不亂。百萬億菩薩生決定智。百萬億菩薩得聞持力。持一切佛法。百萬億菩薩出生無量廣大覺解。百萬億菩薩安住信根。

二得自在下有十二句。雜辨得益。

百萬億菩薩得檀波羅蜜能一切施。百萬億菩薩得尸波羅蜜具持眾戒。百萬億菩薩得忍波羅蜜心不妄動。悉能忍受一切佛法。百萬億菩薩得精進波羅蜜能行無量出離精進。百萬億菩薩得禪波羅蜜具足無量禪定光明。百萬億菩薩得般若波羅蜜智慧光明能普照耀。百萬億菩薩成就大願。悉皆清淨。百萬億菩薩得智慧燈明照法門。百萬億菩薩爲十方諸佛法光所照。百萬億菩薩周徧十方演離癡法。

三得檀下約行辨益。

百萬億菩薩普入一切諸佛刹土。百萬億菩薩法身。

隨到一切佛國。百萬億菩薩得佛音聲。能廣開悟。百萬億菩薩得出生一切智方便。百萬億菩薩得成就一切法門。百萬億菩薩成就法智。猶如寶幢。能普顯示一切佛法。百萬億菩薩能悉示現如來境界。

四普入一切佛刹。下七句約大用辨益。上四段通明獲益。

百萬億諸天王恭敬禮拜。百萬億龍王諦觀無厭。百萬億夜叉王頂上合掌。百萬億乾闥婆王起淨信心。百萬億阿修羅王斷憍慢意。百萬億迦樓羅王口銜繒帶。百萬億緊那羅王歡喜踴躍。百萬億摩睺羅伽

王歡喜瞻仰。百萬億世主稽首作禮。百萬億忉利天王瞻仰不瞬。百萬億夜摩天王歡喜讚歎。百萬億兜率天王布身作禮。百萬億化樂天王頭頂禮敬。百萬億他化天王恭敬合掌。百萬億梵天王一心觀察。百萬億摩醯首羅天王恭敬供養。百萬億菩薩發聲讚歎。

二諸天恭敬明供儀。文分爲五段。初十七句。雜明八部人天菩薩三業設敬。其中所作各隨所宜。

百萬億天女專心供養。百萬億同願天踴躍歡喜。百萬億往昔同住天妙聲稱讚。百萬億梵身天布身敬

禮。百萬億梵輔天。合掌於頂。百萬億梵眾天。圍繞侍衛。百萬億大梵天。讚歎稱揚無量功德。百萬億光天。五體投地。百萬億少光天。宣揚讚歎佛世難值。百萬億無量光天。遙向佛禮。百萬億光音天。讚歎如來甚難得見。百萬億淨天。與宮殿俱而來詣此。百萬億少淨天。以清淨心。稽首作禮。百萬億無量淨天。願欲見佛。投身而下。百萬億徧淨天。恭敬尊重。親近供養。百萬億廣天。念昔善根。百萬億少廣天。於如來所。生希有想。百萬億無量廣天。決定尊重。生諸善業。百萬億廣果天。曲躬恭敬。百萬億無煩天。信根堅固。恭敬禮

拜。百萬億無熱天。合掌念佛。情無厭足。百萬億善見天。頭面作禮。百萬億善現天。念供養佛。心無懈怠。百萬億阿迦尼吒天。恭敬頂禮。百萬億種種天。皆大歡喜發聲讚歎。百萬億諸天。各善思惟而爲莊嚴。

二天女專心下二十六句。唯明諸天三業敬養。

百萬億菩薩天。護持佛座。莊嚴不絕。百萬億華手菩薩。雨一切華。百萬億香手菩薩。雨一切香。百萬億髮手菩薩。雨一切髮。百萬億末香手菩薩。雨一切末香。百萬億塗香手菩薩。雨一切塗香。百萬億衣手菩薩。雨一切衣。百萬億蓋手菩薩。雨一切蓋。百萬億幢手

菩薩雨一切幢。百萬億幡。手菩薩雨一切幡。百萬億寶手菩薩雨一切寶。百萬億莊嚴手菩薩雨一切莊嚴具。

三菩薩天下有十二句。明菩薩事供養。

百萬億諸天子。從天宮出。至於座所。百萬億諸天子。以淨信心。并宮殿俱。百萬億生貴天子。以身持座。百萬億灌頂天子。舉身持座。

四諸天子。從天宮出。下四句。諸天身供養。

百萬億思惟菩薩恭敬思惟。百萬億生貴菩薩發清淨心。百萬億菩薩諸根悅樂。百萬億菩薩深心清淨。

百萬億菩薩信解清淨。百萬億菩薩諸業清淨。百萬億菩薩受生自在。百萬億菩薩法光照耀。百萬億菩薩成就於地。百萬億菩薩善能教化一切眾生。

五思惟菩薩下十句。菩薩修法供養亦明得益。菩薩多明得益。諸天但說供養者。諸天供養是益因故。

百萬億善根所生。百萬億諸佛護持。百萬億福德所圓滿。百萬億殊勝心所清淨。百萬億大願所嚴潔。百萬億善行所生起。百萬億善法所堅固。百萬億神力所示現。百萬億功德所成就。百萬億讚歎法而以讚

歎。

第三百萬億善根下。廣前因深十句可知。所以此會嚴事偏多者。一以此天補處爲王故。二以賢位已極。大悲普周故。而此勝相皆是如來海印所現。法界差別自在實德。人法無礙。依正渾融之嚴也。亦表蘊前妙行積於此位故。

補義曰。疏言表蘊前妙行積於此位者。前十無盡藏品。正明所蘊之行法。今將以行迴向成德。故約事以表。正顯事理無二之行也。

如此世界兜率天王。奉爲如來敷置高座。一切世界

兜率天王。悉爲於佛。如是敷座。如是莊嚴。如是儀則。如是信樂。如是心淨。如是欣樂。如是喜悅。如是尊重。如是而生希有之想。如是踴躍。如是渴仰。悉皆同等。第二如此世界下。結通十方。

爾時兜率天王。爲如來敷置座已。心生尊重。與十萬億阿僧祇兜率天子。奉迎如來。

第四爾時下。迎佛興供。於中二。先將迎興供。二爾時如來威神力下。見佛興供。前中初奉迎。

以清淨心。雨阿僧祇色華雲。雨不思議色香雲。雨種種色鬘雲。雨廣大清淨梅檀雲。雨無量種種蓋雲。雨

細妙天衣雲。雨無邊眾妙寶雲。雨天莊嚴具雲。雨無量種種燒香雲。雨一切梅檀沈水堅固末香雲。諸天子眾各從其身。出此諸雲時。百千億阿僧祇兜率天子及餘在會諸天子眾。心大歡喜恭敬頂禮。阿僧祇天女。踴躍欣慕諦觀如來。

二以清淨下。興供。於中先諸天興供。皆從身出者。非唯顯諸天福力。亦表身為供具。供自心生。

兜率宮中不可說諸菩薩眾。住虛空中精勤一心。以出過諸天諸供養具。供養於佛。恭敬作禮。阿僧祇音樂。一時同奏。

後兜率宮下。菩薩與供。

爾時如來威神力故。往昔善根之所流故。不可思議自在力故。兜率宮中一切諸天。及諸天女。皆遙見佛。如對目前。

第二見佛興供於中先諸天。後百千億下。明菩薩同興念言。如來出世。難可值遇。我今得見。具一切智於法無礙。正等覺者。如是思惟。如是觀察。與諸眾會。悉共同時。奉迎如來。

二同興下。慶遇奉迎。

各以天衣。盛一切華。盛一切香。盛一切寶。盛一切莊

聖眉綱身卷二十一
嚴具盛一切天梅檀末香盛一切天沈水末香盛一切天妙寶末香盛一切天香華盛一切天曼陀羅華悉以奉散供養於佛。

三各以下。正明興供。於中三。初十句衣盛供以散佛。表修寂滅以趣果故。

百千億那由他阿僧祇兜率陀天子住虛空中咸於佛所起智慧境界心。燒一切香。香氣成雲。莊嚴虛空。又於佛所起歡喜心。雨一切天華雲。莊嚴虛空。又於佛所起尊重心。雨一切天蓋雲。莊嚴虛空。又於佛所起供養心。散一切天鬘雲。莊嚴虛空。又於佛所生信

解心。布阿僧祇金網。彌覆虛空。一切寶鈴常出妙音。
又於佛所。生最勝福田心。以阿僧祇帳莊嚴虛空。雨
一切纓絡雲。無有斷絕。又於佛所。生深信心。以阿僧
祇諸天宮殿莊嚴虛空。一切天樂出微妙音。又於佛
所。生最勝難遇心。以阿僧祇種種色天衣雲莊嚴虛
空。雨於無比種種妙衣。又於佛所。生無量歡喜踴躍
心。以阿僧祇諸天寶冠莊嚴虛空。雨無量天冠。廣大
成雲。又於佛所。起歡喜心。以阿僧祇種種色寶莊嚴
虛空。雨一切纓絡雲。無有斷絕。

二百千億下十句。明起心雨供嚴空。顯所修萬行。

稱法性空空有無礙。是嚴空義。

百千億那由他阿僧祇天子。咸於佛所。生淨信心。散
無數種種色天華。然無數種種色天香。供養如來。又
於佛所。起大莊嚴變化心。持無數種種色天栴檀末
香。奉散如來。又於佛所。起歡喜踴躍心。持無數種種
色。蓋隨逐如來。又於佛所。起增上心。持無數種種色
天寶衣。敷布道路。供養如來。又於佛所。起清淨心。持
無數種種色天寶幢。奉迎如來。又於佛所。起增上歡
喜心。持無數種種色天莊嚴具。供養如來。又於佛所
生不壞信心。持無數天寶鬘。供養如來。又於佛所。生

無比歡喜心。持無數種種色天寶幡。供養如來。百千億那由他阿僧祇諸天子。以調順寂靜無放逸心。持無數種種色天樂。出妙音聲。供養如來。

三百千億那由他阿僧祇天子。下九句。雜申供養。表萬行雜修故。上諸天興供。下菩薩。

百千億那由他不可說先住兜率宮諸菩薩眾。以從超過三界法所生。離諸煩惱行所生。周徧無礙心所生。甚深方便法所生。無量廣大智所生。堅固清淨信所增長。不思議善根所生起。阿僧祇善巧變化所成就。供養佛心之所現。無作法門之所印。出過諸天諸

供養具。供養於佛。

第二菩薩興供中。二先明行成依報供。後其諸菩薩下。身出正報供。前中二十七句。文分爲三。初十句。多因成一果之供。次八句。一因成一果之供。後九句。一因成多果之供。

以從波羅蜜所生一切寶蓋。於一切佛境界清淨解所生一切華帳。無生法忍所生一切衣。入金剛法無礙心所生一切鈴網。解一切法如幻心所生一切堅固香。周徧一切佛境界。如來座心所生一切佛眾寶妙座。供養佛不懈心所生一切寶幢。解諸法如夢歡

喜心所生佛所住一切寶宮殿。

第二一因一果中。皆因果相似。疏各有義。

無著善根無生善根所生一切寶蓮華雲。一切堅固香雲。一切無邊色華雲。一切種種色妙衣雲。一切無邊清淨栴檀香雲。一切妙莊嚴寶蓋雲。一切燒香雲。一切妙鬘雲。一切清淨莊嚴具雲。皆徧法界。出過諸天供養之具。供養於佛。

第三無著下。一因多果供。無著無生。但是一義。無生約理。無著約智。此二契合。方成一因。又有九句。其諸菩薩。一一身各出不可說百千億那由他菩薩。

垂足經卷第二十二
三
皆充滿法界虛空界。其心等於三世諸佛。以從無顛倒法所起。無量如來力所加。開示眾生安隱之道。具足不可說名味句。普入無量法。一切陀羅尼種中生。不可窮盡辯才之藏。心無所畏。生大歡喜。以不可說無量無盡如實讚歎法讚歎如來。無有厭足。

第二身出正報供。文有十句。上四迎佛興供竟。爾時一切諸天。及諸菩薩眾。見於如來應正等覺。不可思議人中之雄。

大文第五爾時一切下。明觀佛勝德。於中分二。先明觀佛身雲勝德。後爾時如來大悲下。明現勝德。

之意。前中分二。初觀勝德。後時彼大眾咸見下。觀佛光用。今初總觀如來。後別觀德相。然此經文。次第具顯如來二十一種殊勝功德。文分三。初總觀如來。次別觀德相。三結成觀解。今初總觀。

其身無量不可稱數。現不思議種種神變。令無數眾生。心大歡喜。普徧一切虛空界一切法界。以佛莊嚴而爲莊嚴。令一切眾生安住善根。示現無量諸佛神力。超過一切諸語言道。諸大菩薩所共欽敬。隨所應化。皆令歡喜。住於諸佛廣大之身。功德善根悉已清淨。色相第一。無能曠奪。

垂履經卷二十一
三三
第二其身下別觀德相。二十一德分二十段。後二合故。然攝論中二十一德通有三節。一先列經二十一一句。二無著菩薩立功德名以爲解釋。三無性等。但釋論名以符經旨。今各句句配屬。今初明不二。現行經也。卽觀察如來一向無障轉功德。此是無著立名。他皆倣此。

智慧境界不可窮盡。無比三昧之所出生。其身無際。徧住一切眾生身中。令無量眾生皆大歡喜。令一切智種性不斷。

第二智慧已下。明趣無相法。卽觀察如來於有無

二相眞如最勝清淨能入功德。

住於諸佛究竟所住。生於三世諸佛之家。令不可數
眾生信解清淨。令一切菩薩智慧成就。諸根悅豫。法
雲普覆。虛空法界。教化調伏。無有遺餘。隨眾生心。悉
令滿足。令其安住。無分別智。出過一切眾生之上。

第三住於諸佛究竟已下。明住佛住。卽觀察如來
無功用佛事。不休息功德。

獲一切智。放大光明。宿世善根。皆令顯現。普使一切
發廣大心。令一切眾生安住。普賢不可壞智。徧住一
切眾生國土。從於不退正法中生。住於一切平等法。

界明了眾生心之所宜。現不可說不可說種種差別。如來之身。非世言詞而歎可盡。能令一切常思念佛。充滿法界。廣度羣生。隨初發心所欲利益。以法惠施。令其調伏。信解清淨。示現色身。不可思議。

第四獲一切智。下明逮得一切佛平等性。下云得佛平等。卽觀察如來於法身中所依。意樂作事無差別功德。

等觀眾生。心無所著。住無礙住。得佛十力。無所障礙。心常寂定。未曾散亂。住一切智。

第五等觀眾下。明到無障處。卽觀察如來修一切

障對治功德。

善能開演種種文句。真實之義。能悉深入。無邊智海。出生無量功德。慧藏。

第六善能開演下。明不可轉法。卽觀察如來降伏一切外道功德。

恆以佛日普照法界。隨本願力。常現不沒。恆住法界。住佛所住。無有變異。於我我所。俱無所著。住出世法。世法無染。

第七恆以佛日下。明所行無礙。卽觀察如來生在世間不爲世法所礙功德。

於一切世間。建智慧幢。其智廣大。超過世間。無所染著。拔諸眾生。令出淤泥。置於最上智慧之地。所有福德。饒益眾生。而無有盡。了知一切菩薩智慧。信向決定。當成正覺。以大慈悲。現不可說無量佛身。種種莊嚴。以妙音聲。演無量法。隨眾生意。悉令滿足。

第八於一切下。明其所安立不可思議。卽觀察如來安立正法功德。文中分二。初約所詮以辨深廣。次以大慈下。現身說法。約能詮教以明安立。

於去來今。心常清淨。令諸眾生。不著境界。恆與一切諸菩薩記。令其皆人佛之種性。生在佛家。得佛灌頂。

第九於去來今下明遊於三世平等法性。卽觀察如來授記功德。

常遊十方。未曾休息。而於一切無所樂著。法界佛刹。悉能徧往。諸眾生心。靡不了知。所有福德。離世清淨。不住生死。而於世間如影普現。

第十常遊十方下。明其身流布一切世間。卽觀察如來於一切世界示現受用變化身功德。

以智慧月。普照法界。了達一切。悉無所得。恆以智慧知諸世間。如幻如影。如夢如化。一切皆以心爲自性。如是而住。隨諸眾生業報不同。心樂差別。諸根各異。

而現佛身。如來恆以無數眾生而爲所緣。爲說世間
皆從緣起。知諸法相。皆悉無相。唯是一相。智慧之本。
欲令眾生離諸相著。示現一切世間性相。而行於世。
爲其開示無上菩提。

第十一以智慧月下。明於一切法智無疑滯。卽觀
察如來斷疑功德。文中有二。初自斷疑。後文隨諸
眾生下。能斷他疑。

爲欲救護一切眾生出現世間。開示佛道。令其得見
如來身相。攀緣憶念。勤加修習。除滅世間煩惱之相。
修菩提行。心不散動。於大乘門皆得圓滿。成就一切

諸佛義利。

第十二爲欲救護下。明於一切行成就大覺。卽觀察如來合入種種行功德。文中有二。初約說法合入。開示佛道者。令悟入故。次令其得見。下約現身令人。

悉能觀察眾生善根。而不壞滅清淨業報。智慧明了。普入三世。

第十三悉能觀察下。明於諸法智無有疑惑。卽觀察如來當來法生妙智功德。

永離一切世間分別。放光明網。普照十方。一切世界。

無不充滿。色身妙好。見者無厭。以大功德智慧神通。出生種種菩薩諸行。諸根境界自在圓滿。作諸佛事。作已便沒。

第十四永離一切下。明凡所現身不可分別。下經但云無能測身。卽觀察如來如其勝解。示現功德。善能開示。過現未來一切智道。爲諸菩薩。普雨無量陀羅尼雨。令其發起廣大欲樂。受持修習。

第十五善能開示下。明一切菩薩等所求智。卽觀察如來無量所依調伏有情。加行功德。

成就一切諸佛功德。圓滿熾盛無邊妙色。莊嚴其身。

一切世間靡不現觀。永離一切障礙之法。於一切法
真實之義。已得清淨。於功德法而得自在。

第十六成就一切下。明得佛無二住勝彼岸。卽觀
察如來平等法身波羅蜜多成滿功德。

爲大法王。如日普照。爲世福田。具大威德。於一切世
間。普現化身。放智慧光。悉令開悟。欲令眾生。知佛具
足無邊功德。以無礙繪。繫頂受位。隨順世間。方便開
導。以智慧手。安慰眾生。爲大醫王。善療眾病。一切世
間。無量國土。悉能徧往。未曾休息。清淨慧眼。離諸障
翳。悉能明見。於作不善惡業眾生。種種調伏。合其人

道善取時宜。無有休息。若諸眾生起平等心。卽爲化現平等業報。隨其心樂。隨其業果。爲現佛身種種神變。而爲說法。令其悟解。得法智慧。心大歡喜。諸根踊躍。見無量佛。起深重信。生諸善根。永不退轉。

第十七爲大法王下。明不相間雜。如來解脫妙智。究竟卽觀察如來。隨其勝解。示現差別。佛士功德。一切眾生。隨業所繫。長眠生死。如來出世。能覺悟之。安慰其心。使無憂怖。若得見者。悉令證入。無依義智。智慧善巧。了達境界。莊嚴妙好。無能暎奪。智山法芽。悉已清淨。或現菩薩。或現佛身。令諸眾生。至無患地。

無數功德之所莊嚴業行所成現於世間。一切諸佛莊嚴清淨莫不皆以一切智業之所成就。

第十八一切眾生下明證無中邊佛平等地。卽觀察佛身方處無分限功德。

常守本願不捨世間作諸眾生堅固善友。清淨第一離垢光明。令一切眾生皆得現見。六趣眾生無量無邊。佛以神力常隨不捨。若有往昔同種善根。皆令清淨。而於六趣一切眾生不捨本願。無所欺誑。悉以善法方便攝取。令其修習清淨之業。摧破一切諸魔鬪諍。

法界緣起卷二十一
三十一
第十九常守本願下。明極於法界。卽觀察如來窮
生死際。常現利益安樂。一切有情功德。

從無礙際。出廣大。力最勝。日藏。無有障礙。於淨心界。
而現影像。一切世間。無不覩見。以種種法。廣施眾生。
佛是無邊。光明之藏。諸力智慧。皆悉圓滿。恆以大光。
普照眾生。隨其所願。皆令滿足。離諸怨敵。爲上福田。
一切眾生。共所依怙。凡有所施。悉令清淨。修少善行。
受無量福。悉令得入。無盡智地。爲一切眾生。種植善
根。淨心之主。爲一切眾生。發生福德。最上良田。智慧
甚深。方便善巧。能救一切三惡道苦。

第二十從無礙際下。顯於二句。謂盡虛空性。窮未來際。卽觀察如來無盡等功德。深密佛地。具斯二句。開則別中自有二十一。句。今文合之。上所引功德之名。全依無著。其所解釋。疏中多依無性。與離世間品小有同異。大旨無違。至下品中。當更顯示。如是信解。如是觀察。

第三如是下。結成觀解。

如是入於智慧之淵。如是遊於功德之海。如是普至虛空智慧。如是而知眾生福田。如是正念現前觀察。如是觀佛諸業相好。如是觀佛普現世間。如是觀佛

神通自在

末後八句。就所觀德以辨能觀。前四句內德。後四句外相。前中謂佛內德無量。不出福智。前二句福智之體。次二句福智之用。後外相中。初一句重舉能觀正念者。明非散心。後三句亦就所觀以辨能觀。初一句總。後二句別。身雲普現。卽是相好。神通自在。卽前業用。上觀佛身雲勝德竟。

時彼大眾見如來身。一一毛孔出百千億那由他阿僧祇光明。一一光明有阿僧祇色。阿僧祇清淨。阿僧祇照明。令阿僧祇眾觀察。阿僧祇眾歡喜。阿僧祇眾

快樂阿僧祇眾。深信增長。阿僧祇眾。志樂清淨。阿僧祇眾。諸根清涼。阿僧祇眾。恭敬尊重。

第二時彼大眾下。明見佛光用。前雖有用。乃觀如來常所具德。今現目覩。故不同也。文中三。初觀常光。二觀放光。三顯光意。今初有十一句。初總餘別。別中前三光相。後七光益。

爾時大眾咸見佛身放百千億那由他不思議大光明。一一光明皆有不思議色。不思議光。照不思議無邊法界。

二爾時下。觀放光中。先舉體相。

以佛神力。出大妙音。其音演暢。百千億那由他。不思議讚頌。超諸世間所有言詞。出世善根之所成就。復現百千億那由他。不思議微妙莊嚴。於百千億那由他。不思議劫。歎不可盡。皆是如來無盡自在之所出生。又現不可說諸佛如來。出興於世。令諸眾生入智慧門。解甚深義。又現不可說諸佛如來。所有變化。盡法界。虛空界。令一切世間平等清淨。如是皆從如來所住無障礙。一切智生。亦從如來所修行。不思議勝德所生。復現百千億那由他。不思議妙寶光燄。從昔大願善根所起。以曾供養無量如來。修清淨行。無放

逸故。薩婆若心。無有障礙。生善根故。爲顯如來力廣
徧故。爲斷一切眾生疑故。爲令咸得見如來故。令無
量眾生住善根故。顯示如來神通之力。無瞋奪故。欲
令眾生普得入於究竟海故。爲令一切諸佛國土菩
薩大眾皆來集故。爲欲開示不可思議佛法門故。

後以佛下辨光業用中有五現。一現說法。二現嚴。
三現佛。四現神變。五現寶燄光。後爲顯如來下四
行經。明現光意。

爾時如來大悲普覆。示一切智所有莊嚴。

第二爾時如來下。明現勝德之意。文分爲二別。先

牒前現德。

欲令不可說百千億那由他阿僧祇世界中眾生未信者信。已信者增長。已增長者。令其清淨。已清淨者。令其成熟。已成熟者。令心調伏。觀甚深法。具足無量智慧光明。發生無量廣大之心。薩婆若心。無有退轉。不違法性。不怖實際。證真實理。滿足一切波羅蜜行。出世善根。皆悉清淨。猶如普賢得佛自在。離魔境界。入諸佛境。了知深法。獲難思智。大乘誓願。永不退轉。常見諸佛。未曾捨離。成就證智。證無量法。具足無邊福德藏力。發歡喜心。入無疑地。離惡清淨。依一切智。

見法不動。得入一切菩薩眾會。常生三世諸如來家。
二欲令下。正明現意分二。先明下益眾生。次開示
如來下。明上弘佛道。今初分二。先彰現因。後世尊
下。辨現益之因。今初先舉所益。後未信者下。辨益
不同。此中文義若約行布。初五句十信。次觀甚深
下七句。皆十住益。三滿足下三句十行益。四離魔
下三句十向益。五常見諸佛下盡明十地。若約圓
融。初之五句。信中攝位。句各一位。從觀甚深下。義
通諸位。以圓教中位位攝德故。

世尊所現如是莊嚴。皆是過去先所積集善根所成。

爲欲調伏諸眾生故。

二辨現因。既積善所成。故爲益深大。亦結前因。生後開示。

開示如來大威德故。照明無礙智慧藏故。示現如來無邊勝德極熾然故。顯示如來不可思議大神變故。以神通力於一切趣現佛身故。示現如來神通變化無邊際故。本所志願悉成滿故。顯示如來勇猛智慧能徧往故。於法自在。成法王故。出生一切智慧門故。示現如來身清淨故。又現其身最殊妙故。顯示證得三世諸佛平等法故。開示善根清淨藏故。顯示世間

無能爲喻。上妙色故。顯示具足十力之相。令其見者無厭足故。爲世間日照三世故。

第二開示下。明上弘佛道。分二。先別彰所爲。二自在已下。舉因結歎。前中有二十七句。爲欲顯前二十一種殊勝功德。

自在法王一切功德。皆從往昔善根所現。一切菩薩於一切劫。稱揚讚說。不可窮盡。

第二舉因結歎。前舉積因。後歎無盡。

爾時兜率陀天王。奉爲如來嚴辦。如是諸供具已。與百千億那由他阿僧祇兜率天子。向佛合掌。白佛言。

善來世尊。善來善逝。善來如來。應正等覺。唯見哀愍處此宮殿。

第六爾時兜率下。天王請佛處殿。

爾時世尊以佛莊嚴而自莊嚴。具大威德。爲令一切眾生。生大歡喜故。一切菩薩發深悟解故。一切兜率陀天子。增益欲樂故。兜率陀天王。供養承事無厭足故。無量眾生緣念於佛而發心故。無量眾生種見佛善根。福德無盡故。常能發起清淨信故。見佛供養無所求故。所有志願。皆清淨故。勤集善根。無懈怠故。發大誓願。求一切智故。受天王請入一切寶莊嚴殿。如

此世界十方所有一切世界悉亦如是。

第七爾時世尊下。如來受請分二。先受請入殿。二爾時一切下。入已現嚴前中。先明此界。次如此世界下。結通十方。

爾時一切寶莊嚴殿。自然而有妙好莊嚴。出過諸天莊嚴之上。一切寶網周而彌覆。普雨一切上妙寶雲。普雨一切莊嚴具雲。普雨一切寶衣雲。普雨一切梅檀香雲。普雨一切堅固香雲。普雨一切寶莊嚴蓋雲。普雨不可思議華聚雲。普出不可思議妓樂音聲。讚揚如來一切種智。悉與妙法而共相應。如是一切諸

供養具悉過諸天供養之上。

第二入已現嚴顯是佛力。故出過諸天。

時兜率宮中妓樂歌讚熾然不息。以佛神力令兜率王。心無動亂。往昔善根皆得圓滿。無量善法益加堅固。增長淨信。起大精進。生大歡喜。淨深志樂。發菩提心。念法無斷。總持不忘。

第八時兜率宮下。天王獲益。文中心無動亂。得定益。往昔已下。進善益。十住位中。攝散歸靜。故樂音止息。此位起勝。得動實性故。動寂無二故。樂音熾然。心不動也。

爾時兜率陀天王承佛威力。卽自憶念過去佛所
種善根。而說頌言。

第九爾時下承力偈讚。然憶念昔因。亦是益相。取
文便故爲說偈依。先明此處偈讚。後結通十方。

昔有如來無礙月 諸吉祥中最殊勝

彼曾入此莊嚴殿 是故此處最吉祥

昔有如來名廣智 諸吉祥中最殊勝

彼曾入此金色殿 是故此處最吉祥

昔有如來名普眼 諸吉祥中最殊勝

彼曾入此蓮華殿 是故此處最吉祥

昔有如來號珊瑚

諸吉祥中最殊勝

彼曾入此寶藏殿

是故此處最吉祥

昔有如來論師子

諸吉祥中最殊勝

彼曾入此山王殿

是故此處最吉祥

昔有如來名日照

諸吉祥中最殊勝

彼曾入此眾華殿

是故此處最吉祥

昔有佛號無邊光

諸吉祥中最殊勝

彼曾入此樹嚴殿

是故此處最吉祥

昔有如來名法幢

諸吉祥中最殊勝

彼曾入此寶宮殿

是故此處最吉祥

昔有如來名智燈

諸吉祥中最殊勝

彼曾入此香山殿

是故此處最吉祥

昔有佛號功德光

諸吉祥中最殊勝

彼曾入此摩尼殿

是故此處最吉祥

後正陳偈讚。十頌。頌各一佛。佛各各異。略無別德。

此佛卽前會次前十佛。寄位漸深。憶念漸遠耳。

如此世界兜率天王。承佛神力。以頌讚歎過去諸佛。十方一切諸世界中。兜率天王。悉亦如是歎佛功德。

第二如此世界下。結通。

爾時世尊。於一切寶莊嚴殿。摩尼寶藏師子座上。結

跏趺坐。

第十爾時世尊下。如來就座。文分四別。一明就座。法身清淨。妙用自在。與三世佛同一境界。住一切智。與一切佛同入一性。佛眼明了。見一切法皆無障礙。有大威力。普遊法界。未嘗休息。具大神通。隨有可化。眾生之處。悉能徧往。以一切諸佛無礙莊嚴而嚴其身。善知其時。爲眾說法。

二法身下。顯德亦大同前二十一德。

不可說諸菩薩眾。各從他方種種國土而共來集。眾會清淨。法身無二。無所依止。而能自在起佛身行。

三不可說下。眾集。卽眷屬圓滿。

坐此座已。於其殿中。自然而有無量無數殊特妙好。出過諸天供養之具。所謂華鬘衣服塗香末香寶蓋。幢幡伎樂歌讚。如是等事。一一皆悉不可稱數。以廣大心恭敬尊重供養於佛。十方一切兜率陀天。悉亦如是。

四坐此座已下。現嚴初此界。後十方下。結通。

大方廣佛華嚴經綱要卷第二十二

手屏總長女二二二

三ア

大方廣佛華嚴經綱要卷第二十三

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

兜率宮中偈讚品第二十四

初來意者。前明化主赴感。今明助化讚揚。及顯位體所依。故次來也。二釋文者。謂十方菩薩於此宮中讚佛實德。故受斯名。三宗趣者。集眾放光偈讚爲宗。爲說迴向爲趣。

爾時佛神力故。十方各有一大菩薩。一一各與萬佛

刹微塵數諸菩薩俱。從萬佛刹微塵數國土外諸世界。中來詣佛所。其名曰。金剛幢菩薩。堅固幢菩薩。勇猛幢菩薩。光明幢菩薩。智幢菩薩。寶幢菩薩。精進幢菩薩。離垢幢菩薩。星宿幢菩薩。法幢菩薩。所從來國。謂妙寶世界。妙樂世界。妙銀世界。妙金世界。妙摩尼世界。妙金剛世界。妙波頭摩世界。妙優鉢羅世界。妙栴檀世界。妙香世界。各於佛所。淨修梵行。所謂無盡幢佛。風幢佛。解脫幢佛。威儀幢佛。明相幢佛。常幢佛。最勝幢佛。自在幢佛。梵幢佛。觀察幢佛。其諸菩薩。至佛所已。頂禮佛足。以佛神力。卽化作妙寶藏師子之

座。寶網彌覆。周而徧滿。諸菩薩眾。隨所來方。各於其上。結加趺坐。其身悉放百千億那由他阿僧祇清淨光明。此無量光。皆從菩薩清淨心寶。離眾過惡大願所起。顯示一切諸佛自在清淨之法。以諸菩薩平等願力。能普救護一切眾生。一切世間之所樂見。見者不虛。悉得調伏。其菩薩眾。悉已成就無量功德。所謂徧游一切諸佛國土。無所障礙。見無依止清淨法身。以智慧身。現無量身。徧往十方承事諸佛。入於諸佛無量無邊不可思議自在之法。住於無量一切智門。以智光明善了諸法。於諸法中。得無所畏。隨所演說。

窮未來際。辯才無盡。以大智慧。開總持門。慧眼清淨。入深法界。智慧境界。無有邊際。究竟清淨。猶若虛空。如此世界。兜率天宮。諸菩薩眾。如是來集。十方一切。兜率天宮。悉有如是名號菩薩。而來集會。所從來國。諸佛名號。亦皆同等。無有差別。

大文分三。初集眾。二放光。三偈讚。初中二。先明集。因。謂佛神力。二十方下眾集。於中文二。先明此會。後如此世界。兜率天宮下。結通。初中長分十段。一。總舉上首。二。一一。下。眷屬數。三。從萬佛刹下來處。遠近位增。增數。故各一萬。四。其名曰下。主菩薩名。

同名幢者。略有五義。一高出義。表三賢位極。二建立義。大悲大智。建立眾生及菩提故。三歸向義。謂大悲攝生。智願攝善。歸向菩提故。四摧殄義。如猛將幢。降伏一切諸魔軍故。五滅諸怖畏義。如帝釋幢。不怖惑業故。金剛等異名。卽表十向行體。五所從來國。皆稱妙者。迴向之力。微善彌於法界故。其別名卽表十向所修法門。六本所事佛。同名幢義。不異菩薩別名。卽表修十向智。亦表當位之果。七其諸下。到已修敬。八以佛神力下。善住威儀。座體云妙寶者。十住以慧光徧照。故以毗盧遮那藏爲

體。十行以行淨離垢。故以蓮華藏爲體。今十向大悲。處於生死。普該萬法。不拘乎一。故座體直云妙寶。不限色類。以教行徧周。籠攝衆生。如以寶網彌覆其上。九其身悉放下。放光益物。此位多辨悲智益物。故復辨此。於中初光體。次此無量下。辨光因。後顯示下。略示光業。十其菩薩下。略讚勝德十一句。初總餘別。別中十門。次如此世界下。結通十方。爾時世尊。從兩膝輪。放百千億那由他光明。普照十方。盡法界。虛空界。一切世界。彼諸菩薩。皆見於此。佛神變相。此諸菩薩。亦見於彼。一切如來神變之相。如

是菩薩。皆與毗盧遮那如來。於往昔時。同種善根。修菩薩行。悉已悟入諸佛自在甚深解脫。得無差別法界之身。入一切土而無所住。見無量佛。悉往承事。於一念中。周行法界。自在無礙。心意清淨。如無價寶。無量無數諸佛如來。常加護念。共與其力。到於究竟第一彼岸。恆以淨念。住無上覺。念念恆入一切智處。以小入大。以大入小。皆得自在通達無礙。已得佛身。與佛同住。獲一切智。從一切智而生其身。一切如來所行之處。悉能隨入。開闡無量智慧法門。到金剛幢大智彼岸。獲金剛定。斷諸疑惑。已得諸佛自在神通。普

於一切十方國土教化調伏百千萬億無數眾生。於一切數。雖無所著。善能修學。成就究竟。方便安立一切諸法。如是等百千億那由他不可說無盡清淨三世一切無量功德藏諸菩薩眾。皆來集會。在於佛所。因光所見一切佛所。悉亦如是。

第二爾時世尊下放光。文分四節。初從兩膝放光處。言膝輪者。位漸高故。又表迴因向果等。有屈伸進趣之相故。又悲智相導。屈伸無住故。二放百千下。光數。三普照下。光照分齊。四彼諸菩薩下。光所作業。謂令彼此互相見故。此中分三節。初正明彼

於此乃能了	正覺無來處	去亦無所從
清淨妙色身	神力故顯現	無量世界中
示現如來身	廣說微妙法	其心無所著
智慧無邊際	了達一切法	普入於法界
示現自在力	眾生及諸法	了達皆無礙
普現眾色像	徧於一切刹	欲求一切智
速成無上覺	應以淨妙心	修習菩提行
若有見如來	如是威神力	當於最勝尊
供養勿生疑		

第二偈讚中十菩薩卽爲十段。亦十方如次。皆先

標說人及說儀式。今初東方金剛幢者。此是會主。名含總別。總顯迴向不出悲智。金剛者堅利也。卽悲之智。二乘實際不能壞。堅也。斷難斷。惑利也。故云智慧到彼岸。卽智之悲。愛見不能動。堅也。無所不救。利也。故文中徧利利生。七十八經云。譬如金剛。唯從金剛處及金處生。非餘寶處生。菩提心金剛亦復如是。唯從大悲救護眾生金剛處。一切智明殊勝境界金處而生。非餘眾生善相處生。是知金剛不獨喻智。攻般若者不得此意。但以標名。獨將金剛喻於般若。不觀文中。悲濟九類而無所度。

悲智相導。方爲真實般若。別名卽救護眾生悲也。
離眾生相智也。頌有十偈。歎佛寂用無礙德。

爾時堅固幢菩薩承佛神力。普觀十方而說頌言。

如來勝無比 甚深不可說 出過言語道

清淨如虛空 汝觀人師子 自在神通力

已離於分別 而令分別見 導師爲開演

甚深微妙法 以是因緣故 現此無比身

此是大智慧 諸佛所行處 若欲了知者

常應親近佛 意業常清淨 供養諸如來

終無疲厭心 能入於佛道 具無盡功德

堅住菩提心 以是疑網除 觀佛無厭足
通達一切法 是乃真佛子 此人能了知
諸佛自在力 廣大智所說 欲爲諸法本
應起勝希望 志求無上覺 若有尊敬佛
念報於佛恩 彼人終不離 一切諸佛住
何有智慧人 於佛得見聞 不修清淨願
履佛所行道

第二南方堅固者。表不壞迴向故。菩提心堅故。觀
佛無厭故。十頌多明如來爲物所依德。

爾時勇猛幢菩薩。承佛神力。普觀十方而說頌言。

譬如明淨眼 因日觀眾色 淨心亦復然

佛力見如來 如以精進力 能盡海源底

智力亦如是 得見無量佛 譬如良沃田

所種必滋長 如是淨心地 出生諸佛法

如人獲寶藏 永離貧窮苦 菩薩得佛法

離垢心清淨 譬如伽陀藥 能消一切毒

佛法亦如是 滅諸煩惱患 真實善知識

如來所稱讚 以彼威神故 得聞諸佛法

設於無數劫 財寶施於佛 不知佛實相

此亦不名施 無量眾色相 莊嚴於佛身

非於色相中 而能見於佛 如來等正覺
寂然恆不動 而能普現身 徧滿十方界
譬如虛空界 不生亦不滅 諸佛法如是
畢竟無生滅

第三西方菩薩淨心智力見佛盡源等一切佛故名勇猛。十頌總顯如來見聞弘益之德。

爾時光明幢菩薩承佛神力普觀十方而說頌言。
人間及天上 一切諸世界 普見於如來
清淨妙色身 譬如一心力 能生種種心
如是一佛身 普現一切佛 菩提無二法

亦復無諸相	而於二法中	現相莊嚴身
了法性空寂	如幻而生起	所行無有盡
導師如是現	三世一切佛	法身悉清淨
隨其所應化	普現妙色身	如來不念言
我作如是身	自然而示現	未嘗起分別
法界無差別	亦無所依止	而於世間中
示現無量身	佛身非變化	亦復非非化
於無化法中	示有變化形	正覺不可量
法界虛空等	深廣無涯底	言語道悉絕
如來善通達	一切處行道	法界眾國土

所往皆無礙

第四北方菩薩以大悲力運智慧光朗彼重昏無所不至名光明幢十頌多顯如來卽體化用周普之德。

爾時智幢菩薩承佛神力普觀十方而說頌言。

若人能信受 一切智無礙 修習菩提行

其心不可量 一切國土中 普現無量身

而身不在處 亦不住於法 一一諸如來

神力示現身 不可思議劫 算數莫能盡

三世諸眾生 悉可知其數 如來所示現

其數不可得 或時示一二 乃至無量身

普現十方刹 其實無二種 譬如淨滿月

普現一切水 影像雖無量 本月未曾二

如是無礙智 成就等正覺 普現一切刹

佛體亦無二 非一亦非二 亦復非無量

隨其所應化 示現無量身 佛身非過去

亦復非未來 一念現出生 成道及涅槃

如幻所作色 無生亦無起 佛身亦如是

示現無有生

第五東北方。於佛寂用之境。決斷無疑。故又智導。

萬行。出生無盡。故名智幢。十頌多歎如來應現出生無礙之德。

爾時寶幢菩薩承佛神力。普觀十方而說頌言。

佛身無有量。能示有量身。隨其所應觀。

導師如是現。佛身無處所。充滿一切處。

如空無邊際。如是難思議。非心所行處。

心不於中起。諸佛境界中。畢竟無生滅。

如翳眼所覩。非內亦非外。世間見諸佛。

應知亦如是。饒益眾生故。如來出世間。

眾生見有出。而實無興世。不可以國土。

晝夜而見佛 歲月一刹那 當知悉如是

眾生如是說 某日佛成道 如來得菩提

實不繫於日 如來離分別 非世超諸數

三世諸導師 出現皆如是 譬如淨日輪

不與昏夜合 而說某日夜 諸佛法如是

三世一切劫 不與如來合 而說三世佛

導師法如是

第六東南方菩薩以圓淨智照平等理不礙應現

隨順一切如摩尼寶故名寶幢十頌多顯平等超

世德。

爾時精進幢菩薩承佛神力普觀十方而說頌言。

一切諸導師 身同義亦然 普於十方刹

隨應種種現 汝觀牟尼尊 所作甚奇特

充滿於法界 一切悉無餘 佛身不在內

亦復不在外 神力故顯現 導師法如是

隨諸眾生類 先世所集業 如是種種身

示現各不同 諸佛身如是 無量不可數

唯除大覺尊 無有能思議 如以我難思

心業莫能取 佛難思亦爾 非心業所現

如刹不可思 而見淨莊嚴 佛難思亦爾

妙相無不現 譬如一切法 眾緣故生起

見佛亦復然 必假眾善業 譬如隨意珠

能滿眾生心 諸佛法如是 悉滿一切願

無量國土中 導師興於世 隨其願力故

普應於十方

第七西南方菩薩勤觀如來真應皆同故能平等

隨順一切眾生名精進幢十頌顯此同義。

爾時離垢幢菩薩承佛神力普觀十方而說頌言。

如來大智光 普淨諸世間 世間既淨已

開示諸佛法 設有人欲見 眾生數等佛

靡不應其心 而實無來處 以佛爲境界
專念而不息 此人得見佛 其數與心等
成就白淨法 具足諸功德 彼於一切智
專念心不捨 導師爲眾生 如應演說法
隨於可化處 普現最勝身 佛身及世間
一切皆無我 悟此成正覺 復爲眾生說
一切人師子 無量自在力 示現念等身
其身各不同 世間如是身 諸佛身亦然
了知其自性 是則說名佛 如來普知見
明了一切法 佛法及菩提 二俱不可得

導師無來去 亦復無所住 遠離諸顛倒

是名等正覺

第八西北方菩薩真如體淨能成白法復淨世間
故名離垢。十頌多歎如來淨德。前六淨他後四自
淨。

爾時星宿幢菩薩承佛神力普觀十方而說頌言。

如來無所住 普住一切刹 一切土皆往

一切處咸見 佛隨眾生心 普現一切身

成道轉法輪 及以般涅槃 諸佛不思議

誰能思議佛 誰能見正覺 誰能現最勝

假以語言說	言語中顯示	心意及諸法	三世一切時	於法得開悟	若能於世間	令眾生信喜	了達法性者	如中有生滅	一切法皆如
	一切佛自在	一切悉知見	求悉無所有	神力之所現	遠離一切著	佛體不可得	無佛無世界	眾生妄分別	諸佛境亦然
	正覺超語言	疾得成如來	若能如是知	卽此說名佛	無礙心歡喜	彼亦無所見	如來普現前	是佛是世界	乃至無一法

第九下方菩薩解佛徧應法界之身而不離法性。若彼星宿燦然羅空不可縛著。故以爲名。十頌顯佛此德。

爾時法幢菩薩承佛神力普觀十方而說頌言。

寧可恆具受 一切世間苦 終不遠如來

不覩自在力 若有諸眾生 未發菩提心

一得聞佛名 決定成菩提 若有智慧人

一念發道心 必成無上尊 慎莫生疑惑

如來自在力 無量劫難遇 若生一念信

速證無上道 設於念念中 供養無量佛

未知真實法 不名爲供養 若聞如是法
諸佛從此生 雖經無量苦 不捨菩提行
一聞大智慧 諸佛所入法 普於法界中
成三世導師 雖盡未來際 徧遊諸佛刹
不求此妙法 終不成菩提 眾生無始來
生死久流轉 不了真實法 諸佛故興世
諸法不可壞 亦無能壞者 自在大光明
普示於世間

第十上方菩薩。知真實之法。普入法界。則所修行
皆無分量。故名法幢。知法名佛。故先讚見佛之益。

十頌雙顯佛法難聞。

十迴向品第二十五之一

初來意者。當會序分已彰。正宗宜顯故。又已總示所依佛智。次別顯能依行位。故次來也。二釋名者。迴者轉也。向者趣也。轉自萬行。趣向三處。故迴向不同。有其十種。十之別名。本分當釋。迴向通稱。今當重明。隨境所向。義有眾多。以義通收。不出三處。謂眾生菩提。及以實際。上二隨相。實際卽離相。開三爲十。一迴自向他。二迴少向多。三迴自因行。向他因行。四迴因向果。五迴劣向勝。六迴比向證。七

迴事向理。八迴差別行。向圓融行。九迴世向出世。
十迴順理事行。向理所成事。十義中初三皆迴。同
眾生。次三皆迴。向菩提。次二迴。向實際。後二義通
於果及實際。三宗趣者。以無邊行海。順無邊大願
爲宗。成就普賢德用爲趣。

爾時金剛幢菩薩。承佛神力。入菩薩智光三昧。
釋文大分有十。一三昧分。二加分。三起分。四本分。
五說分。六瑞應分。七結通分。八證成分。九偈讚勸
修分。十校量功德分。今初三昧分。

入是三昧已。十方各過十萬佛刹微塵數世界外。有

十萬佛刹微塵數諸佛皆同一號號金剛幢而現其
前咸稱讚言善哉善哉善男子乃能入此菩薩智光
三昧善男子此是十方各十萬佛刹微塵數諸佛神
力共加於汝亦是毗盧遮那如來往昔願力威神之
力及由汝智慧清淨故諸菩薩善根增勝故令汝入
是三昧而演說法。

第二入是三昧下加分有三。一總顯加相於中初
明佛現次明讚善。

爲令諸菩薩得清淨無畏故具無礙辯才故入無礙
智地故住一切智大心故成就無盡善根故滿足無

礙白法故。入於普門法界故。現一切佛神力故。前際
念智不斷故。得一切佛護持諸根故。以無量門廣說
眾法故。聞悉解了。受持不忘故。攝諸菩薩一切善根
故。成辦出世助道故。不斷一切智智故。開發大願故。
解釋實義故。了知法界故。令諸菩薩皆悉歡喜故。修
一切佛平等善根故。護持一切如來種性故。所謂演
說諸菩薩十迴向。

第二爲合下辦加所爲。有二十二句。前二十句爲
合下十句標所成。後以無量門下十一句。明其所
作。後一句總結所屬。

佛子。汝當承佛威神之力而演此法。得佛護念故。安住佛家故。增益出世功德故。得陀羅尼光明故。入無障礙佛法故。大光普照法界故。集無過失淨法故。住廣大智境界故。得無障礙法光故。爾時諸佛卽與金剛幢菩薩無量智慧。與無留礙辯。與分別句義善方便。與無礙法光明。與如來平等身。與無量差別淨音聲。與菩薩不思議善觀察三昧。與不可沮壞一切善根迴向智。與觀察一切法成就巧方便。與一切處說一切法無斷辯。何以故。入此三昧善根力故。爾時諸佛各以右手摩金剛幢菩薩頂。

第三佛子下。正顯加相。於中初有十句。口加語業。以增辯。次諸佛卽與無量智下十句。意業冥加以益智。後何以故下。摩頂身加以增威。

金剛幢菩薩得摩頂已。卽從定起。

第三金剛幢下起分。

告諸菩薩言。佛子。菩薩摩訶薩。有不可思議大願。充滿法界。普能救護一切眾生。所謂修學去來現在一切佛迴向。

第四告諸菩薩下。本文中分二。初三句總標願體。難思希求名願。卽具普賢無盡願海。深廣難思。充

滿下。顯難思相。謂體充法界。故難思議。用普救護。故稱爲大。三所謂下。釋成難思。以行同佛故。

佛子。菩薩摩訶薩迴向有幾種。佛子。菩薩摩訶薩迴向有十種。三世諸佛咸共演說。

第二別示名相。文分爲四。初舉數徵名次。佛子迴向有十種下。標數顯勝。諸佛共說故。

何等爲十。一者救護一切眾生離眾相迴向。二者不壞迴向。三者等一切諸佛迴向。四者至一切處迴向。五者無盡功德藏迴向。六者入一切平等善根迴向。七者等隨順一切眾生迴向。八者真如相迴向。九

者無縛無著解脫迴向。十者入法界無量迴向。佛子。是爲菩薩摩訶薩十種迴向。過去未來現在諸佛已說當說今說。

此徵列十迴向名。其總名已見品初。今略釋其相。其迴向二字。皆是能迴之願。救護等名。皆是迴向之行。故皆依主受名。救護等名。皆迴向之別相。大悲廣濟。名爲救護。一切眾生。大智無著。故云離眾生相。卽是廣大不顛倒心。二不壞者。於三寶等得不壞信。以此善根。用將迴向。三學三世佛所作迴向。名等諸佛。四菩薩令其善根至一切處。五由迴

向故。能成無盡功德之藏。六順理修善。事理無違。入於平等。七以善根等心。順益眾生。八善根合。如以成迴向。九不爲相縛。不於見著。作用自在。故云解脫。如不思議解脫等。十稱性起用。謂以法界善根迴向法界故。疏有廣釋。難以備錄。上略釋別名。佛子是爲下結數。

佛子。云何爲菩薩摩訶薩救護一切眾生離眾生相迴向。

第五說分說十迴向卽爲十段。中皆先長行後偈頌。長行中各二。初位行。後位果。有不具者。至文當

知位行中各三。初牒名徵釋。二依徵廣釋。三依釋結名。今初牒名。謂常以無相心中常行六道而入果報。不受而受。諸受迴易轉化。故名救護等。

佛子。此菩薩摩訶薩行檀波羅蜜。淨尸波羅蜜。修羼提波羅蜜。起精進波羅蜜。入禪波羅蜜。住般若波羅蜜。大慈大悲大喜大捨。修如是等無量善根。

二廣釋中分二。先明所迴善根。後修善根時下。正明迴向。今初。古人名此以爲行體。

修善根時。作是念言。願此善根。普能饒益一切眾生。皆使清淨。至於究竟。永離地獄餓鬼畜生閻羅王等。

無量苦惱。

後正明迴向中大文分二。先明隨相。後我應如日下。明離相迴向前隨相文初二行經總明。次從此起。至後眾生斷疑故。有一百零六行餘經。別明救護。分爲四段。初利樂救護。二受惱救護。三代苦救護。四迴拔救護。下如次標顯。

菩薩摩訶薩種善根時。以己善根如是迴向。我當爲一切眾生作舍。令免一切諸苦事故。爲一切眾生作護。悉令解脫諸煩惱故。爲一切眾生作歸。皆令得離諸怖畏故。爲一切眾生作趣。令得至於一切智故。爲

一切眾生作安。令得究竟安隱處故。爲一切眾生作明。令得智光滅癡暗故。爲一切眾生作炬。破彼一切無明闇故。爲一切眾生作燈。令住究竟清淨處故。爲一切眾生作導師。引其令入真實法故。爲一切眾生作大導師。與其無礙大智慧故。佛子。菩薩摩訶薩以諸善根如是迴向平等饒益一切眾生。究竟皆令得一切智。

後別顯中。初明利樂救護文有十行經。初一行總標。次我當下有十句。別顯離苦得樂。後佛子一行半經。總結利樂。

佛子。菩薩摩訶薩於非親友守護迴向。與其親友等無差別。何以故。菩薩摩訶薩入一切法平等性故。不於眾生而起一念非親友想。設有眾生於菩薩所起怨害心。菩薩亦以慈眼視之。終無恚怒。普爲眾生作善知識。演說正法。令其修習。譬如大海。一切眾毒不能變壞。菩薩亦爾。一切愚蒙無有智慧。不知恩德。瞋很頑毒。憍慢自大。其心盲瞽。不識善法。如是等類諸惡眾生。種種逼惱。無能動亂。譬如日天子出現世間。不以生盲不見故。隱而不現。又復不以乾闥婆城阿修羅手。閻浮提樹。崇巖邃谷。塵霧煙雲。如是等物之

所覆障故。隱而不現。亦復不以時節變改。故隱而不現。菩薩摩訶薩亦復如是。有大福德。其心深廣。正念觀察。無有退屈。爲欲究竟功德智慧。於上勝法。心生志欲。法光普照。見一切義。於諸法門。智慧自在。常爲利益一切眾生。而修善法。曾不誤起捨眾生心。不以眾生其性弊惡。邪見瞋濁。難可調伏。便卽棄捨。不修迴向。但以菩薩大願。甲冑而自莊嚴。救護眾生。恆無退轉。不以眾生不知報恩。退菩薩行。捨菩提道。不以凡愚共同一處。捨離一切如實善根。不以眾生數起過惡。難可忍受。而於彼所。生疲厭心。何以故。譬如日

天子不但爲一事故。出現世間。菩薩摩訶薩亦復如是。不但爲一眾生故。修諸善根。迴向阿耨多羅三藐三菩提。普爲救護一切眾生故。而修善根。迴向阿耨多羅三藐三菩提。如是不但爲淨一佛刹故。不但爲信一佛故。不但爲見一佛故。不但爲了一法故。起大智願。迴向阿耨多羅三藐三菩提。爲普淨一切佛刹故。普信一切諸佛故。普承事供養一切諸佛故。普解一切佛法故。發起大願。修諸善根。迴向阿耨多羅三藐三菩提。佛子。菩薩摩訶薩以諸佛法而爲所緣。起廣大心。不退轉心。無量劫中。修集希有難得心寶。與

一切諸佛悉皆平等。菩薩如是觀諸善根。信心清淨。大悲堅固。以甚深心歡喜心。清淨心。最勝心。柔軟心。慈悲心。憐愍心。攝護心。利益心。安樂心。普爲眾生真實迴向。非但口言佛子。菩薩摩訶薩。以諸善根迴向之時。作是念言。以我善根。願一切趣生一切眾生。皆得清淨功德圓滿。不可沮壞。無有窮盡。常得尊重。正念不忘。獲決定慧。具無量智。身口意業。一切功德。圓滿莊嚴。又作是念。以此善根。令一切眾生承事供養。一切諸佛。無空過者。於諸佛所。淨信不壞。聽聞正法。斷諸疑惑。憶持不忘。如說修行。於如來所。起恭敬心。

身業清淨。安住無量廣大善根。永離貧窮。七財滿足。於諸佛所。常隨修學。成就無量勝妙善根。平等悟解。住一切智。以無礙眼。等視眾生。眾相嚴身。無有玷缺。言音淨妙。功德圓滿。諸根調伏。十力成就。善心滿足。無所依住。令一切眾生。普得佛樂。得無量住。住佛所住。

二明受惱救護。有四五行經。於中先明受惱之相。有二十八行餘經。至菩提止。於中有兩重法喻。合。次佛子云云。以諸佛法下明迴向之相。中二。先辨迴向之心。次以諸善根下。辨迴向之願。二先願

眾生令成法器。後又作是念。下明得法圓滿。於中
四。一總舉遇緣得法。二於諸佛下成自分德。三於
諸佛所常隨下勝進德圓。四令一切下明得果滿。
佛子。菩薩摩訶薩見諸眾生造作惡業。受諸重苦。以
是障故。不見佛。不聞法。不識僧。便作是念。我當於彼
諸惡道中。代諸眾生受種種苦。令其解脫。菩薩如是
受苦毒時。轉更精勤。不捨不避。不驚不怖。不退不怯。
無有疲厭。何以故。如其所願。決欲荷負一切眾生。令
解脫故。菩薩爾時作是念言。一切眾生在生老病死
諸苦難處。隨業流轉。邪見無智。喪諸善法。我應救之。

令得出離。又諸眾生愛網所纏。癡蓋所覆。染著諸有。隨逐不捨。入苦籠檻。作魔業行。福智都盡。常懷疑惑。不見安隱處。不知出離道。在於生死輪轉不息。諸苦淤泥。恆所沒溺。菩薩見已。起大悲心。大饒益心。欲令眾生悉得解脫。以一切善根迴向。以廣大心迴向。如三世菩薩所修迴向。如大迴向經所說迴向。願諸眾生普得清淨。究竟成就一切種智。復作是念。我所修行。欲令眾生皆悉得成。無上智王。不爲自身而求解脫。但爲救濟一切眾生。令其咸得一切智心。度生死流。解脫眾苦。復作是念。我當普爲一切眾生。備受眾

苦。令其得出無量生死眾苦大壑。我當普爲一切眾生於一切世界。一切惡趣中。盡未來劫。受一切苦。然常爲眾生勤修善根。何以故。我寧獨受如是眾苦。不令眾生墮於地獄。我當於彼地獄畜生閻羅王等險難之處。以身爲質。救贖一切惡道眾生。令得解脫。復作是念。我願保護一切眾生。終不棄捨。所言誠實。無有虛妄。何以故。我爲救度一切眾生。發菩提心。不爲自身求無上道。亦不爲求五欲境界。及三有中種種樂故。修菩提行。何以故。世間之樂。無非是苦。眾魔境界。愚人所貪。諸佛所呵。一切苦患。因之而起。地獄餓

鬼及以畜生閻羅王處。忿恚鬪訟。更相毀辱。如是諸惡。皆因貪著五欲所致。耽著五欲。遠離諸佛。障礙生天。何況得於阿耨多羅三藐三菩提。菩薩如是觀諸世間。貪少欲味。受無量苦。終不爲彼五欲樂故。求無上菩提。修菩薩行。但爲安樂。一切眾生發心修習。成滿大願。斷截眾生諸苦冑索。令得解脫。佛子。菩薩摩訶薩。復作是念。我當以善根如是迴向。令一切眾生得究竟樂。利益樂。不受樂。寂靜樂。無依樂。無動樂。無量樂。不捨不退樂。不滅樂。一切智樂。復作是念。我當與一切眾生作調御師。作主兵臣。執大智炬。示安隱。

道令離險難。以善方便。俾知實義。又於生死海。作一切智善巧船師。度諸眾生。使到彼岸。佛子。菩薩摩訶薩。以諸善根。如是迴向。所謂隨宜救護一切眾生。令出生死。承事供養一切諸佛。得無障礙。一切智智。捨離眾魔。遠惡知識。親近一切菩薩善友。滅諸過罪。成就淨業。具足菩薩廣大行願。無量善根。

三代苦救護中三。先總明代苦迴向。次復作是念。我所修行下。別明迴向之心。文有多節。本文自明。後以諸善根如是迴向下。總結迴向之益。

佛子。菩薩摩訶薩。以諸善根。正迴向已。作如是念。不

以四天下眾生多故。多日出現。但一日出。悉能普照。一切眾生。又諸眾生。不以自身光明故。知有晝夜。遊行觀察。興造諸業。皆由日天子出。成辦斯事。然彼日輪。但一無二。菩薩摩訶薩。亦復如是。修習善根。迴向之時。作是念言。彼諸眾生。不能自救。何能救他。唯我一人。志獨無侶。修集善根。如是迴向。所謂爲欲廣度一切眾生故。普照一切眾生故。示導一切眾生故。開悟一切眾生故。顧復一切眾生故。攝受一切眾生故。成就一切眾生故。令一切眾生歡喜故。令一切眾生悅樂故。令一切眾生斷疑故。

第四迴。拔迴向。文有十行經。先四行以喻明。次二行法合。後四行合前成益。

佛子。菩薩摩訶薩復作是念。我應如日。普照一切。不求恩報。眾生有惡。悉能容受。終不以此而捨誓願。不以一眾生惡故。捨一切眾生。但勤修習善根迴向。普令眾生皆得安樂。善根雖少。普攝眾生。以歡喜心。廣大迴向。若有善根。不欲饒益一切眾生。不名迴向。隨一善根。普以眾生而爲所緣。乃名迴向。

大文第二離相迴向中二。先以忘機之智導前。大悲令成無緣。次安置下。正明大智離眾生相。今初

安置眾生於無所著法性迴向。見眾生自性不動不轉迴向。於迴向無所依無所取迴向。不取善根相迴向。不分別業報體性迴向。不著五蘊相迴向。不壞五蘊相迴向。不取業迴向。不求報迴向。不染著因緣迴向。不分別因緣所起迴向。不著名稱迴向。不著處所迴向。不著虛妄法迴向。不著眾生相世界相心意相迴向。不起心顛倒。想顛倒。見顛倒迴向。不著語言道迴向。觀一切法真實性迴向。觀一切眾生平等相迴向。以法界印印諸善根迴向。觀諸法離貪欲迴向。解一切法無種植善根亦如是。觀諸法無二。無生無滅。

第二正明離相迴向。文分二。先正明離相。後總結成益。前中二。先會前迴向眾生。令入實際。次以如是等善根下。會前迴向菩提。明入實際。後菩薩如是下。總結成益。由隨離不二。故成無礙離過之益。佛子。是爲菩薩摩訶薩第一救護一切眾生離眾生相迴向。

三結名。上長行竟

爾時金剛幢菩薩觀察十方一切眾會。暨于法界。入深句義。以無量心。修習勝行。大悲普覆一切眾生。不斷三世諸如來種。入一切佛功德法藏。出生一切諸

佛法身。善能分別諸眾生心。知其所種善根成熟。住於法身。而爲示現清淨色身。承佛神力。卽說頌言。

不思議劫修行道

精進堅固心無礙

爲欲饒益羣生類

常求諸佛功德法

調御世間無等人

修治其意甚明潔

發心普救諸含識

彼能善入迴向藏

勇猛精進力具足

智慧聰達意清淨

普救一切諸羣生

其心堪忍不傾動

心善安住無與等

意常清淨大歡悅

如是爲物勤修行

譬如大地普容受

不爲自身求快樂

但欲救護諸眾生

如是發起大悲心

疾得入於無礙地

十方一切諸世界

所有眾生皆攝受

爲救彼故善住心

如是修學諸迴向

修行布施大欣悅

護持淨戒無所犯

勇猛精進心不動

迴向如來一切智

其心廣大無邊際

忍力安住不傾動

禪定甚深恆照了

智慧微妙難思議

十方一切世界中

具足修治清淨行

如是功德皆迴向

爲欲安樂諸含識

大士勤修諸善業

無量無邊不可數

如是悉以益眾生

令住難思無上智

普爲一切眾生故

不思議劫處地獄

如是會無厭退心

勇猛決定常迴向

不求色聲香與味

亦不希求諸妙觸

但爲救度諸羣生

常求無上最勝智

智慧清淨如虛空

修習無邊大士行

如佛所行諸行法

彼人如是常修學

大士遊行諸世界

悉能安隱諸羣生

普使一切皆歡喜

修菩薩行無厭足

除滅一切諸心毒

思惟修習最上智

不爲自己求安樂

但願眾生得離苦

此人迴向得究竟

心常清淨離眾毒

三世如來所付囑

住於無上大法城

未曾染著於諸色

受想行識亦如是

其心永出於三有

所有功德盡迴向

佛所知見諸眾生

盡皆攝取無有餘

誓願皆令得解脫

爲彼修行大歡喜

其心念念恆安住

智慧廣大無與等

離癡正念常寂然

一切諸業皆清淨

彼諸菩薩處於世 不著內外一切法

如風無礙行於空 大士用心亦復然

所有身業皆清淨 一切語言無過失

心常歸向於如來 能令諸佛悉歡喜

十方無量諸國土 所有佛處皆往詣

於中覩見大悲尊 靡不恭敬而瞻奉

心常清淨離諸失 普入世間無所畏

已住如來無上道 復爲三有大法池

精勤觀察一切法 隨順思惟有非有

如是趣於真實理 得入甚深無諍處

以此修成堅固道 一切眾生莫能壞

善能了達諸法性 普於三世無所著

如是迴向到彼岸 普使羣生離眾垢

永離一切諸所依 得入究竟無依處

一切眾生語言道 隨其種類各差別

菩薩悉能分別說 而心無著無所礙

菩薩如是修迴向 功德方便不可說

能令十方世界中 一切諸佛皆稱歎

第二爾時下。重頌分二。先敘儀意。言入深句義者。

說依。以無量下。亦是說依。依此說故。亦說所爲爲。

此說故。次不思議劫下。正陳偈辭。有二十八偈分
二。前八偈半。頌所迴善根。後十九偈半。頌迴向行。
前七偈半。頌隨相。後未曾有下十二偈。頌離相行。
於中前五頌。正明離相。後十方下七偈。頌前成益。
第一救護眾生迴向竟。

大方廣佛華嚴經綱要卷第二十三

大方廣佛華嚴經綱要卷第二十四

唐于闐國三藏沙門實叉難陀譯經

唐清淨山大華嚴寺沙門澄觀疏義

明匡山法雲寺憨山沙門德清提挈

十迴向品第二十五之二

佛子。云何爲菩薩摩訶薩不壞迴向。

第二釋不壞迴向文中。長行先位行。後位果。今初標名徵起。言不壞者。謂於諦寶等十種勝境。深信堅固。得不壞名。然十表無盡。信通事理。故本業云。觀一切法。但有用。但有名。念念不住。故名不壞。是

知善根迴向。皆通事事無礙。方真不壞耳。

佛子。此菩薩摩訶薩。於去來今諸如來。所得不壞信。悉能承事一切佛故。於諸菩薩。乃至初發一念之心。求一切智。得不壞信。誓修一切菩薩善根。無疲厭故。於一切佛法。得不壞信。發深志樂故。於一切佛教。得不壞信。守護住持故。於一切眾生。得不壞信。慈眼等觀善根。迴向普利益故。於一切白淨法。得不壞信。普集無邊諸善根故。於一切菩薩迴向道。得不壞信。滿足殊勝諸欲解故。於一切菩薩法師。得不壞信。於諸菩薩起佛想故。於一切佛自在神通。得不壞信。深信

諸佛難思議故。於一切菩薩善巧方便行得不壞信。攝取種種無量無數行境界故。佛子。菩薩摩訶薩。如是安住不壞信時。於佛菩薩聲聞獨覺。若諸佛教。若諸眾生。如是等種種境界中。種諸善根無量無邊。令菩提心轉更增長。慈悲廣大。平等觀察。隨順修學。諸佛所作。攝取一切清淨善根。入真實義。集福德行。行大惠施。修諸功德。等觀三世。

第二長行廣釋中大分三段。初舉所迴善根。二辨迴向之行。三明迴向所爲。今初於去來今下有十五行經。初舉所迴善根。於中先十行餘經明起不

善屬經卷第二十四
二
壞信。次佛子如是安住下五行經。於信種善根中
先種善根。次令菩提心下十句。明長菩薩道。

菩薩摩訶薩以如是等善根功德迴向一切智。願常
見諸佛。親近善友。與諸菩薩同共止住。念一切智心
無暫捨。受持佛教。勤加守護。教化成熟一切眾生。心
常迴向出世之道。供養瞻侍一切法師。解了諸法。憶
持不忘。修行大願。悉使滿足。菩薩如是積集善根。成
就善根。增長善根。思惟善根。繫念善根。分別善根。愛
樂善根。修習善根。安住善根。菩薩摩訶薩如是積集
諸善根已。以此善根所得依果。修菩薩行。於念念中。

見無量佛。如其所應。奉事供養。以阿僧祇寶。阿僧祇華。阿僧祇鬘。阿僧祇衣。阿僧祇蓋。阿僧祇幢。阿僧祇幡。阿僧祇莊嚴具。阿僧祇給侍。阿僧祇塗飾地。阿僧祇塗香。阿僧祇末香。阿僧祇和香。阿僧祇燒香。阿僧祇深信。阿僧祇愛樂。阿僧祇淨心。阿僧祇尊重。阿僧祇讚歎。阿僧祇禮敬。阿僧祇寶座。阿僧祇華座。阿僧祇香座。阿僧祇鬘座。阿僧祇栴檀座。阿僧祇衣座。阿僧祇金剛座。阿僧祇摩尼座。阿僧祇寶繪座。阿僧祇寶色座。阿僧祇寶經行處。阿僧祇華經行處。阿僧祇香經行處。阿僧祇鬘經行處。阿僧祇衣經行處。阿僧

祇寶間錯經行處。阿僧祇一切寶繪采經行處。阿僧祇一切寶多羅樹經行處。阿僧祇一切寶欄楯經行處。阿僧祇一切寶鈴網彌覆經行處。阿僧祇一切寶宮殿。阿僧祇一切華宮殿。阿僧祇一切香宮殿。阿僧祇一切鬘宮殿。阿僧祇一切栴檀宮殿。阿僧祇一切堅固妙香藏宮殿。阿僧祇一切金剛宮殿。阿僧祇一切摩尼宮殿。皆悉殊妙出過諸天。阿僧祇諸雜寶樹。阿僧祇種種香樹。阿僧祇諸寶衣樹。阿僧祇諸音樂樹。阿僧祇寶莊嚴具樹。阿僧祇妙音聲樹。阿僧祇無厭寶樹。阿僧祇寶繪采樹。阿僧祇寶璫樹。阿僧祇一

切華香幢幡鬘蓋所嚴飾樹。如是等樹。扶疎蔭暎莊嚴宮殿。其諸宮殿。復有阿僧祇軒檻莊嚴。阿僧祇牕牖莊嚴。阿僧祇門闥莊嚴。阿僧祇樓閣莊嚴。阿僧祇半月莊嚴。阿僧祇帳莊嚴。阿僧祇金網彌覆其上。阿僧祇香。周布普熏。阿僧祇衣。敷布其地。佛子。菩薩摩訶薩。以如是等諸供養具。於無量無數不可說不可說劫。淨心尊重恭敬供養一切諸佛。恆不退轉。無有休息。一一如來滅度之後。所有舍利。悉亦如是恭敬供養。爲令一切眾生。生淨信故。一切眾生。攝善根故。一切眾生。離諸苦故。一切眾生。廣大解故。一切眾生。

善屋系要卷二十一
四
以大莊嚴而莊嚴故。無量莊嚴而莊嚴故。諸有所作得究竟故。知諸佛興難可值故。滿足如來無量力故。莊嚴供養佛塔廟故。住持一切諸佛法故。如是供養現在諸佛。及滅度後所有舍利。其諸供養於阿僧祇劫說不可盡。

第二菩薩摩訶薩以如是下。明迴向行中。初六行餘經。明先將善根迴向。次如是積集善根下。明將勝報善根迴向。有三十五行餘經。於中初廣列供事。以阿僧寶廣列六門。次佛子以如是等下三行經。先明供現佛。次一一下。明供舍利。次爲令下七

行經。明供意。有十一句。次如是下。結供分齊。

如是修集無量功德。皆爲成熟一切眾生。無有退轉。無有休息。無有疲厭。無有執著。離諸心想。無有依止。永絕所依。遠離於我。及以我所。如實法印。印諸業門。得法無生。住佛所住。觀無生性。印諸境界。諸佛護念。發心迴向。與諸法性相應迴向。入無作法。成就所作。方便迴向。捨離一切諸事。想著方便迴向。住於無量善巧迴向。永出一切諸有迴向。修行諸行。不住於相。善巧迴向。普攝一切善根迴向。普淨一切菩薩諸行。廣大迴向。發無上菩提心迴向。與一切善根同住迴。

向。滿足最上信解心。迴向佛子。菩薩摩訶薩。以諸善根。如是迴向時。雖隨生死而不改變。求一切智。未曾退轉。在於諸有心。無動亂。悉能度脫一切眾生。不染有爲法。不失無礙智。菩薩行位。因緣無盡。世間諸法。無能變動。具足清淨諸波羅蜜。悉能成就一切智力。菩薩如是離諸癡暗。成菩提心。開示光明。增長淨法。迴向勝道。具足眾行。以清淨意。善能分別了一切法。悉隨心現。知業如幻。業報如像。諸行如化。因緣生法。悉皆如響。菩薩諸行。一切如影。出生無著。清淨法眼。見於無作廣大境界。證寂滅性。了法無二。得法實相。

具菩薩行。於一切相皆無所著。善能修行同事諸業。於白淨法。恆無廢捨。離一切著。住無著行。菩薩如是善巧思惟。無有迷惑。不違諸法。不壞業因。明見真實。善巧迴向。知法自性。以方便力。成就業報。到於彼岸。智慧觀察一切諸法。獲神通智。諸業善根。無作而行。隨心自在。

第二如是修習下。顯迴向行中有三段。初迴向之心。二迴向之相。三迴向行成。初有四行餘經。明迴向之心。於中不離大悲。卽兼迴向眾生之意。無有執著卽離相之意。次與諸法性相應下五行經。明

迴向之相。兼顯迴向菩提。有十一句。次佛子。以諸善根下。迴向行成。於中。初一句。牒前。次。雖隨生死。下文有十句。正顯隨相行成。由前法性相應。故隨生死而不變。次菩薩如是。下一行半經。結前生後。次以清淨意下五行餘經。明離相行成。由前事不礙理。故觸境了如。十一句皆明離相觀行。次菩薩如是善巧。下三行餘經。雙結二行無礙。以成迴向。菩薩摩訶薩。以諸善根如是迴向。爲欲度脫一切眾生。不斷佛種。永離魔業。見一切智。無有邊際。信樂不捨。離世境界。斷諸雜染。亦願眾生得清淨智。入深方

便出生死法。獲佛善根。永斷一切諸魔事業。以平等印。普印諸業。發心趣入一切種智。成就一切出世間法。

第三迴向所爲。以專爲度脫一切眾生。不斷佛種。是迴向所爲也。於中魔業通一切惡。魔事通一切相。但違法印。皆魔事故。

佛子。是爲菩薩摩訶薩第二不壞迴向。

第三依釋結名。

菩薩摩訶薩住此迴向時。得見一切無數諸佛。成就無量清淨妙法。普於眾生得平等心。於一切法無有

疑惑。一切諸佛神力所加。降伏眾魔。永離其業。成就
生貴。滿菩提心。得無礙智。不由他解。善能開闡一切
法義。能隨想力。入一切刹。普照眾生。悉使清淨。菩薩
摩訶薩。以此不壞迴向之力。攝諸善根。如是迴向。

第二位果。亦如十地調柔等果。初牒得時。次得見
下。正辨果相。次菩薩下。總結所屬。

爾時金剛幢菩薩觀察十方。承佛神力。卽說頌言。

菩薩已得不壞意 修行一切諸善業

是故能令佛歡喜 智者以此而迴向

供養無量無邊佛 布施持戒伏諸根

爲欲利益諸眾生

普使一切皆清淨

一切上妙諸香華

無量差別勝衣服

寶蓋及以莊嚴具

供養一切諸如來

如是供養於諸佛

無量無數難思劫

恭敬尊重常歡喜

未曾一念生疲厭

專心想念於諸佛

一切世間大明燈

十方所有諸如來

靡不現前如目覩

不可思議無量劫

種種布施心無厭

百千萬億眾劫中

修諸善法悉如是

彼諸如來滅度已

供養舍利無厭足

悉以種種妙莊嚴

建立難思眾塔廟

造立無等最勝形

寶藏淨金爲莊嚴

巍巍高大如山王

其數無量百千億

淨心尊重供養已

復生歡喜利益意

不思議劫處世間

救護眾生令解脫

了知眾生皆妄想

於彼一切無分別

而能善別眾生根

普爲羣生作饒益

菩薩修集諸功德

廣大最勝無與比

了達體性悉非有

如是決定皆迴向

以最勝智觀諸法

其中無有一法生

如是方便修迴向

功德無量不可盡

以是方便令心淨

悉與一切如來等

此方便力不可盡

是故福報無盡極

發起無上菩提心

一切世間無所依

普至十方諸世界

而於一切無所礙

一切如來出世間

爲欲啟導眾生心

如其心性而觀察

畢竟推求不可得

一切諸法無有餘

悉入於如無體性

以是淨眼而迴向

開彼世間生死獄

雖令諸有悉清淨

亦不分別於諸有

知諸有性無所有 而令歡喜意清淨

於一佛土無所依 一切佛土悉如是

亦不染著有爲法 知彼法性無依處

以是修成一切智 以是無上智莊嚴

以是諸佛皆歡喜 是爲菩薩迴向業

菩薩專心念諸佛 無上智慧巧方便

如佛一切無所依 願我修成此功德

專心救護於一切 令其遠離眾惡業

如是饒益諸羣生 繫念思惟未曾捨

住於智地守護法 不以餘乘取涅槃

唯願得佛無上道

菩薩如是善迴向

不取眾生所言說

一切有爲虛妄事

雖復不依言語道

亦復不著無言說

十方所有諸如來

了達諸法無有餘

雖知一切皆空寂

而不於空起心念

以一莊嚴嚴一切

亦不於法生分別

如是開悟諸羣生

一切無性無所觀

第二偈頌二十五偈。分三。初二偈頌所迴善根。及

第一節迴向。次十八偈頌所成供行。後五偈頌迴

向所爲。

佛子。云何爲菩薩摩訶薩等一切佛迴向。

第三等一切佛迴向。長行亦二。先位行。後位果。釋名者。準下文。但等三世諸佛所行之道。亦等善根。文云。如過去佛所修一切善根。我亦如是。故本業云。三世諸佛法一切時行。兼顯無間。故下文云。與妻子俱。未曾暫捨菩提之心。此從所等立名。卽等一切佛之迴向。以深入法性。行普門善而爲其性。佛子。此菩薩摩訶薩隨順修學去來現在諸佛世尊迴向之道。如是修學迴向道時。見一切色。乃至觸法。若美若惡。不生愛憎。心得自在。無諸過失。廣大清淨。

歡喜悅樂。離諸憂惱。心意柔軟。諸根清涼。

次標舉廣釋中。先顯迴向。後明成益。先迴向中。先等隨相。後等離相。隨相中復二。先明對境善根。以將迴向。後總攝萬善。以將迴向。今初。如是下二行。半經明所迴善根。謂學佛修時。於六境違順。成四淨心。一於違順成就行捨。不爲境牽。名心自在。二於凡小。以悲智廣大淨諸惑故。三離憂過故。有喜樂捨。無憂苦惱。四禪定輕安。故心意柔軟。不妄取境。故諸根清淨。此四淨心。學佛之修。爲所迴善根。佛子。菩薩摩訶薩。獲得如是安樂之時。復更發心迴

向諸佛。作如是念。願以我今所種善根。令諸佛樂轉更增勝。所謂不可思議佛所住樂。無有等比。佛三昧樂。不可限量。大慈悲樂。一切諸佛解脫之樂。無有邊際。大神通樂。最極尊重。大自在樂。廣大究竟無量。力樂。離諸知覺寂靜之樂。住無礙住。恆正定樂。行無二行。不變異樂。佛子。菩薩摩訶薩。以諸善根迴向佛已。復以此善根迴向菩薩。所謂願未滿者。令得圓滿。心未淨者。令得清淨。諸波羅蜜未滿足者。令得滿足。安住金剛菩提之心。於一切智得不退轉。不捨大精進。守護菩提門。一切善根。能令眾生捨離我慢。發菩提

心所願成滿。安住一切菩薩所住。獲得菩薩明利諸根。修習善根。證薩婆若。佛子。菩薩摩訶薩以諸善根如是迴向菩薩已。復以迴向一切眾生。願一切眾生所有善根。乃至極少一彈指頃。見佛聞法。恭敬聖僧。彼諸善根。皆離障礙。念佛圓滿。念法方便。念僧尊重。不離見佛。心得清淨。獲諸佛法。集無量德。淨諸神通。捨法疑念。依教而住。如爲眾生如是迴向。爲聲聞辟支佛迴向。亦復如是。又願一切眾生。永離地獄餓鬼畜生閻羅王等一切惡處。增長無上菩提之心。專意勤求一切種智。永不毀謗諸佛正法。得佛安樂。身心

清淨證一切智。

第二正迴向中。迴向五乘之境。文分五段。一佛。二菩薩。三有善眾生。四二乘。五有惡眾生。初一行餘經。結前起後。次願以我今下五行經。正顯所願。所願增佛。然佛德已圓。今願增者。尊重荷恩。展誠敬故。亦猶獻芹於上。香華奉佛。非彼須待。次佛子下。迴向菩薩。初結前生後。所謂下正顯有十願。前六自利。後能令下四利他。次佛子下五行經。迴向有善眾生。次如爲眾生下一行經。明迴向二乘。次又願一切下三行經。明爲有惡眾生。謂不遺闡提。上

來五段。初一迴向菩提。餘迴向眾生。上明對境善根以將迴向竟。

佛子。菩薩摩訶薩所有善根。皆以大願發起。正發起。正積集。正積集。增長。正增長。悉令廣大。具足充滿。佛子。菩薩摩訶薩在家宅中。與妻子俱。未曾暫捨菩提之心。正念思惟。薩婆若境。自度度彼。令得究竟。以善方便。化己眷屬。令入菩薩智。令成熟解脫。雖與同止。心無所著。以本大悲。處於居家。以慈心故。隨順妻子。於菩薩清淨道無所障礙。菩薩摩訶薩雖在居家作諸事業。未曾暫捨一切智心。所謂若著衣裳。若噉滋味。

若服湯藥。澡漱塗摩。迴旋顧視。行住坐臥。身語意業。若睡若寤。如是一切諸有所作。心常迴向。薩婆若道。繫念思惟。無時捨離。爲欲饒益一切眾生。安住菩提。無量大願。攝取無數廣大善根。勤修諸善。普救一切。永離一切憍慢放逸。決定趣於一切智地。終不發意向於餘道。常觀一切諸佛菩提。永捨一切諸雜染法。修行一切菩薩所學。於一切智道無所障礙。住於智地。愛樂誦習。以無量智集諸善根。心不戀樂一切世間。亦不染著所行之行。專心受持諸佛教法。菩薩如是處在居家。普攝善根。令其增長。迴向諸佛無上菩提。

提佛子。菩薩爾時。乃至施與畜生之食。一搏一粒。咸作是願。當令此等捨畜生道。利益安樂。究竟解脫。永度苦海。永滅苦受。永除苦蘊。永斷苦覺。苦聚苦行。苦因。苦本。及諸苦處。願彼眾生。皆得捨離。菩薩如是專心繫念。一切眾生。以彼善根。而爲上首。爲其迴向。一切種智。菩薩初發菩提之心。普攝眾生。修諸善根。悉以迴向。欲令永離生死曠野。得諸如來無礙快樂。出煩惱海。修佛法道。慈心徧滿。悲力廣大。普使一切得清淨樂。守護善根。親近佛法。出魔境界。入佛境界。斷世間種植。如來種。住於三世平等法中。菩薩摩訶薩。

如是所有已集當集現集善根悉以迴向。

第二總攝萬善迴向。有二十九行經。大分兩段。先明歷事別陳。次顯積集迴向。前中初二行經。總顯其相。於中所有善根。卽所發起等也。皆以大願。卽能發起等也。云正發起等者。謂隨發起積集增進。必向二處。不餘趣求。離諸過失。名之爲正。次佛子下。歷事別陳。初四行半經。明隨染無汚。次雖在居家。下四行經。明動與道合。次爲欲饒益。下二行經。總顯迴向之相。次永離下四行半經。別顯有十句。次菩薩如是下。總結歷事。次佛子菩薩爾時乃至。

下第二明積集迴向二。初明微細積集。一搏一粒。其福至微。施與眾生。其田至劣。積此微善。亦以大願令成發起。成迴向行。故云微細積集。次咸作是願。下十句。正明迴向之行。總名離苦得樂。次菩薩初發菩提之心。下明長時積集。以從初發心卽積集故。故云長時。言欲令者。是心願故。文有十三句。次如是所有下。總結一搏一粒。卽現集也。初發心來。卽已集也。當來之善。亦必要起。故皆迴向。上等隨相行竟。

復作是念。如過去諸佛菩薩所行恭敬供養一切諸

佛度諸眾生。令永出離。勤加修習。一切善根。悉以迴向。而無所著。所謂不依色。不著受。無倒想。不作行。不取識。捨離六處。不住世法。樂出世間。知一切法。皆如虛空。無所從來。不生不滅。無有真實。無所染著。遠離一切諸分別見。不動不轉。不失不壞。住於實際。無相離相。唯是一相。如是深入一切法性。常樂習行。普門善根。悉見一切諸佛眾會。如彼過去一切如來善根。迴向。我亦如是。而爲迴向。解如是法。證如是法。依如是法。發心修習。不違法相。知所修行。如幻如影。如水中月。如鏡中像。因緣和合之所顯現。乃至如來究竟。

之地。佛子。菩薩摩訶薩復作是念。如過去諸佛修菩薩行時。以諸善根如是迴向。未來現在悉亦如是。我今亦應如彼諸佛如是發心。以諸善根而爲迴向。第一迴向。勝迴向。最勝迴向。上迴向。無上迴向。無等迴向。無等迴向。無比迴向。無對迴向。尊迴向。妙迴向。平等迴向。正直迴向。大功德迴向。廣大迴向。善迴向。清淨迴向。離惡迴向。不隨惡迴向。

第二等佛離相迴向者。卽向實際。統於前二。說有先後。行在一心。文中二。初等過去。後等現未。初中二。先舉所等。後顯能等。前中又三。初標隨相。卽有

離相。故末句云而無所著。一所謂下。別顯離相之相中。先離妄契止。次知一切法下。釋前不著。二如是深入下。結其無礙。謂既稱法性修隨相故。一攝一切。名普門善。悉見諸佛。略辨成益。次如彼下。顯能等。中先牒所等。總顯能等。次解如是下。別顯等相。次佛子復作是念下等。現未。中初牒例。次我今下。總顯能等。次第一下。別明等相。上顯迴向竟。菩薩如是以諸善根正迴向已。成就清淨身語意業。住菩薩住。無諸過失。修習善業。離身語惡。心無瑕穢。修一切智。住廣大心。知一切法無有所作。住出世法。

世法不染。分別了知無量諸業。成就迴向善巧方便。永拔一切取著根本。

第二明迴向成益。文顯可知。

佛子。是爲菩薩摩訶薩第三等一切佛迴向。

第三依釋結名。

菩薩摩訶薩住此迴向。深入一切諸如來業。趣向如來勝妙功德。入深清淨智慧境界。不離一切諸菩薩業。善能分別巧妙方便。入深法界。善知菩薩修行次第。入佛種性。以巧方便。分別了知無量無邊一切諸法。雖復現身於世中生。而於世法心無所著。

善星經卷第二十四
第二位果辨十種勝德。

爾時金剛幢菩薩承佛神力普觀十方卽說頌言。

彼諸菩薩摩訶薩

修過去佛迴向法

亦學未來現在世

一切導師之所行

於諸境界得安樂

諸佛如來所稱讚

廣大光明清淨眼

悉以迴向大聰哲

菩薩身根種種樂

眼耳鼻舌亦復然

如是無量上妙樂

悉以迴向諸最勝

一切世間眾善法

及諸如來所成就

於彼悉攝無有餘

盡以隨喜益眾生

世間隨喜無量種

令此迴向爲眾生

人中師子所有樂

願使羣萌悉圓滿

一切國土諸如來

凡所知見種種樂

願令眾生皆悉得

而爲照世大明燈

菩薩所得勝妙樂

悉以迴向諸羣生

雖爲羣生故迴向

而於迴向無所著

菩薩修行此迴向

興起無量大悲心

如佛所修迴向德

願我修行悉成滿

如諸最勝所成就

一切智乘微妙樂

及我在世之所行

諸菩薩行無量樂

示入眾趣安隱樂

恆守諸根寂靜樂

悉以迴向諸羣生

普使修成無上智

非身語意卽是業

亦不離此而別有

但以方便滅癡冥

如是修成無上智

菩薩所修諸行業

積集無量勝功德

隨順如來生佛家

寂然不亂正迴向

十方一切諸世界

所有眾生咸攝受

悉以善根迴向彼

願令具足安隱樂

不爲自身求利益

欲令一切悉安樂

未曾暫起戲論心

但觀諸法空無我

十方無量諸最勝

所見一切真佛子

悉以善根迴向彼

願使速成無上覺

一切世間含識類

等心攝取無有餘

以我所行諸善業

令彼眾生速成佛

無量無邊諸大願

無上導師所演說

願諸佛子皆清淨

隨其心樂悉成滿

普觀十方諸世界

悉以功德施於彼

願令皆具妙莊嚴

菩薩如是學迴向

心不稱量諸二法

但恆了達法無二

諸法若二若不二

於中畢竟無所著

十方一切諸世間

悉是眾生想分別

於想非想無所得

如是了達於諸想

彼諸菩薩身淨已

則意清淨無瑕穢

語業已淨無諸過

當知意淨無所著

一心正念過去佛

亦憶未來諸導師

及以現在天人尊

悉學於其所說法

三世一切諸如來

智慧明達心無礙

爲欲利益眾生故

迴向菩提集眾業

彼第一慧廣大慧

不虛妄慧無倒慧

平等實慧清淨慧

最勝慧者如是說

第二偈頌有二十四偈。分三。初二十一頌。頌前位行。次二頌。位果。後一結歎。

佛子。云何爲菩薩摩訶薩。至一切處迴向。

第四至一切處迴向。長行亦二。先位行。後位果。今初牒名徵起。言至一切者。至是能至善根。及其供具。一切處卽所至之供境。謂以大願令此善根供具。徧至一切時處。隨所應供。供諸福田。本業云。以大願力入一切佛國中。供養一切佛故。言至一切。疏有多義。

佛子。此菩薩摩訶薩修習一切諸善根時。作是念言。

願此善根功德之力。至一切處。譬如實際。無處不至。至一切物。至一切世間。至一切眾生。至一切國土。至一切法。至一切虛空。至一切三世。至一切有爲無爲。至一切語言音聲。願此善根。亦復如是。徧至一切諸如來所。供養三世一切諸佛。過去諸佛。所願悉滿。未來諸佛。具足莊嚴。現在諸佛。及其國土道場眾會。徧滿一切虛空法界。願以信解大威力故。廣大智慧無障礙故。一切善根悉迴向故。以如諸天諸供養具。而爲供養。充滿無量無邊世界。

第二依徵廣釋中三。初迴向眾生菩提。一迴向實

際。三結歎成益。初迴向眾生中。先略明。有九行經。有法喻合。法中謂願力及善根力。此二相資。故能徧至。次譬如實際下舉喻。言實際者。卽一切法真實之際。故次願以下。法合。先總。次過去下。別明。先舉三世合所至處。次願以信解下。二行餘經。明能至供中。先成供因。以如諸下辨所成供。可知。

佛子。菩薩摩訶薩。復作是念。諸佛世尊。徧一切虛空法界。種種業所起。十方不可說一切世界。種種世界。不可說佛國土。佛境界。種種世界。無量世界。無分齊世界。轉世界。側世界。仰世界。覆世界。如是一切諸世

界中。現住於壽。示現種種神通變化。彼有菩薩。以勝解力。爲諸眾生堪受化者。於彼一切諸世界中。現爲如來。出興於世。以至一切處智。普徧開示如來無量自在神力。法身徧往。無有差別。平等普入一切法界。如來藏身。不生不滅。善巧方便。普現世間。證法實性。超一切故。得不退轉。無礙力故。生於如來無障礙見。廣大威德。種性中故。佛子。菩薩摩訶薩。以其所種一切善根。願於如是諸如來所。以眾妙華。及眾妙香。鬘蓋幢旛。衣服燈燭。及餘一切諸莊嚴具。以爲供養。若佛形像。若佛塔廟。悉亦如是。以此善根。如是迴向。所

謂不亂迴向。一心迴向。自意迴向。尊敬迴向。不動迴向。無住迴向。無依迴向。無眾生心迴向。無躁競心迴向。寂靜心迴向。

二佛子下。廣明徧至。於中二。初約十方佛明其徧至。次約常住佛明其徧至。前中言不可說世界者。總明供處。次如是一切諸世界下。別明供養。初供現住壽者。是現在佛。於中有實報佛。有權應佛。現身說法。權應之事。有六行半經。次佛子以其所種下二行經。明供行。次若佛形像下。供住持佛。次以此善根如是迴向下。通顯迴向之心。謂前以善根

聖屋經卷第二十四
三三
迴向成供。供諸田時。如是用心。文有十句。以顯十
心。故能卽事順理。上明供十方佛竟。

復作是念。盡法界。虛空界。去來現在一切劫中諸佛
世尊。得一切智。成菩提道。無量名字。各各差別。於種
種時。現成正覺。悉皆住壽。盡未來際。一一各以法界
莊嚴。而嚴其身。道場眾會。周徧法界。一切國土。隨時
出興。而作佛事。如是一切諸佛如來。我以善根。普皆
迴向。願以無數香蓋。無數香幢。無數香旛。無數香帳。
無數香網。無數香像。無數香光。無數香燄。無數香雲。
無數香座。無數香經行地。無數香所住處。無數香世。

界。無數香山。無數香海。無數香河。無數香樹。無數香
衣服。無數香蓮華。無數香宮殿。無量華蓋。廣說乃至
無量華宮殿。無邊鬘蓋。廣說乃至無邊鬘宮殿。無等
塗香蓋。廣說乃至無等塗香宮殿。不可數末香蓋。廣
說乃至不可數末香宮殿。不可稱衣蓋。廣說乃至不
可稱衣宮殿。不可思寶蓋。廣說乃至不可思寶宮殿。
不可量燈光明蓋。廣說乃至不可量燈光明宮殿。不
可說莊嚴具蓋。廣說乃至不可說莊嚴具宮殿。不可
說不可說摩尼寶蓋。不可說不可說摩尼寶幢。如是
摩尼寶旛。摩尼寶帳。摩尼寶網。摩尼寶像。摩尼寶光。

摩尼寶燄。摩尼寶雲。摩尼寶座。摩尼寶經行地。摩尼寶所住處。摩尼寶刹。摩尼寶山。摩尼寶海。摩尼寶河。摩尼寶樹。摩尼寶衣服。摩尼寶蓮華。摩尼寶宮殿。皆不可說不可說。如是一一諸境界中。各有無數欄楯。無數宮殿。無數樓閣。無數門闥。無數半月。無數却敵。無數牕牖。無數清淨寶。無數莊嚴具。以如是等諸供養物。恭敬供養如上所說諸佛世尊。

第二約常住佛以明徧至。謂三世住壽。盡未來際。亦應常也。三身十身。融無礙故。不同前文有塔廟等。文中有三。初以善根迴向供佛。二願令一切下。

以供佛善根迴向眾生。三譬如下。總願善根普攝迴向。初盡法界下。四行餘經。明所供境。次顯能供。行文云如是等三句。結前生後。次所成供具。列有香蓋等二十八事。次如是一下。又增前數。以如是等下。結成供行。上總顯佛行。下文以此供佛行迴向眾生。

願令一切世間。皆得清淨。一切眾生。咸得出離。住十力地。於一切法中。得無礙法明。令一切眾生具足善根。悉得調伏。其心無量。等虛空界。往一切刹而無所至。入一切土。施諸善法。常得見佛。植諸善根。成就大

乘。不著諸法。具足眾善。立無量行。普入無邊一切法界。成就諸佛神通之力。得於如來一切智智。

第二以供佛善根迴向眾生。正顯迴向之願。初總顯所爲。次令一切眾生下四行經。別顯願得因圓果滿。

譬如無我。普攝諸法。我諸善根。亦復如是。普攝一切諸佛如來。咸悉供養。無有餘故。普攝一切無量諸法。悉能悟入。無障礙故。普攝一切諸菩薩眾。究竟皆與同善根故。普攝一切諸菩薩行。以本願力。皆圓滿故。普攝一切菩薩法明。了達諸法。皆無礙故。普攝諸佛。

大神通力。成就無量諸善根故。普攝諸佛力無所畏。
發無量心滿一切故。普攝菩薩三昧辯才陀羅尼門。
善能照了無二法故。普攝諸佛善巧方便。示現如來。
大神力故。普攝三世一切諸佛降生成道轉正法輪。
調伏眾生入般涅槃恭敬供養悉周徧故。普攝十方。
一切世界嚴淨佛刹咸究竟故。普攝一切諸廣大劫。
於中出現修菩薩行無斷絕故。普攝一切所有趣生。
悉於其中現受生故。普攝一切諸眾生界具足普賢。
菩薩行故。普攝一切諸惑習氣悉以方便令清淨故。
普攝一切眾生諸根無量差別咸了知故。普攝一切。

眾生解欲。令離雜染得清淨故。普攝一切化眾生行。隨其所應爲現身故。普攝一切應眾生道。悉入一切眾生界故。普攝一切如來智性。護持一切諸佛教故。第三總願善根普攝迴向者。以上來三段別明善根。但說成供供佛。今欲顯此善根無所不成。故復明此。於中初喻。謂二無我理。普攝理事無不周故。次我諸善根下法合。有二十句。前十二句攝成自利德。次普攝一切下八句成利他德。

佛子。菩薩摩訶薩。以諸善根如是迴向時。用無所得而爲方便。不於業中分別報。不於報中分別業。雖無

分別而普入法界。雖無所作而恆住善根。雖無所起而勤修勝法。不信諸法而能深入。不有於法而悉知見。若作不作。皆不可得。知諸法性。恆不自在。雖悉見諸法而無所見。普知一切而無所知。菩薩如是了達境界。知一切法因緣爲本。見於一切諸佛法身。至一切法離染實際。解了世間皆如變化。明達眾生。唯是一法。無有二性。不捨業境。善巧方便。於有爲界。示無爲法。而不滅壞。有爲之相。於無爲界。示有爲法。而不分別。無爲之相。菩薩如是觀一切法。畢竟寂滅。成就一切清淨善根。而起救護眾生之心。智慧明達一切。

法海常樂修行離愚癡法已具成就出世功德不更
修學世間之法得淨智眼離諸癡翳以善方便修迴
向道。

第二佛子至以諸善根下迴向實際初總標云用
無所得爲方便者略有二義一以無所得導前隨
相則涉有不迷於空爲入有之方便二假無得以
入有不存無得卽此無得亦是方便此爲入空之
方便也今文兼二義欲顯隨相離相無前後故次
下別顯有三段初正顯觀心文有十句初不於業
中分別報等三句明會事歸理觀謂事法旣虛相

無不盡理無不現。故業果皆空。業空故無體。可能招報。況謂因中而有果耶。報空故無體。可以酬因。況謂果中有因耶。若約觀心。名會用歸寂。次云雖無所作而恆住善根。下五句明理不礙事。約心則寂不礙用。於中初句理無能所分別。而不礙有能入之智。所入之法界。次句無作而造作。次句無起而修起。次句無能所信而能卽事入立。末句不有能所見。而不礙能所見。次雖悉見諸法。下二句明事理無礙。約心則寂照雙流。良以事虛攬理。無不理事。理實應緣。無不事之理。所以寂而常照。照

而常寂。故終日知見而無所知見。上總顯觀心。
次菩薩如是了達境界下。明觀成之相。文有八句。
通顯緣生性空義。疏有多釋。三菩薩如是觀一切
法下。明觀成之益。上明離相行。

佛子。菩薩摩訶薩以諸善根如是迴向。稱可一切諸
佛之心。嚴淨一切諸佛國土。教化成就一切眾生。具
足受持一切佛法。作一切眾生最上福田。爲一切商
人智慧導師。作一切世間清淨日輪。一一善根。充徧
法界。悉能救護一切眾生。皆令清淨。具足功德。佛子。
菩薩摩訶薩如是迴向時。能護持一切佛種。能成熟

一切眾生。能嚴淨一切國土。能不壞一切諸業。能了知一切諸法。能等觀諸法無二。能徧往十方世界。能了達離欲實際。能成就清淨信解。能具足明利諸根。第三結歎成益。上來近明離相之益。今則通辨。一迴向益。文中二。先明自分。二利益。初句上稱佛心。餘句自成二利。二佛子下勝進。二利益。文兼體用。並顯可知。

佛了。是爲菩薩摩訶薩第四至一切處迴向。

第三依釋結名。上位行竟。

菩薩摩訶薩住此迴向時。得至一切處身業。普能應

現一切世界故。得至一切處語業。於一切世界中演
說法故。得至一切處意業。受持一切佛所說法故。得
至一切處神足通。隨眾生心悉往應故。得至一切處
隨證智。普能了達一切法故。得至一切處總持辯才。
隨眾生心令歡喜故。得至一切處入法界。於一毛孔
中。普入一切世界故。得至一切處徧入身。於一眾生
身。普入一切眾生身故。得至一切處普見劫。一一劫
中。常見一切諸如來故。得至一切處普見念。一一念
中。一切諸佛悉現前故。佛子。菩薩摩訶薩得至一切
處迴向。能以善根如是迴向。

第二大段位果。文有十句。初三三業體徧。次三三業用徧。後四顯用自住。

爾時金剛幢菩薩承佛威力。普觀十方。而說頌言。

內外一切諸世間 菩薩悉皆無所著

不捨饒益眾生業 大士修行如是智

十方所有諸國土 一切無依無所住

不取活命等眾法 亦不妄起諸分別

普攝十方世界中 一切眾生無有餘

觀其體性無所有 至一切處善迴向

普攝有爲無爲法 不於其中起妄念

如於世間法亦然

照世燈明如是覺

菩薩所修諸業行

上中下品各差別

悉以善根迴向彼

十方一切諸如來

菩薩迴向到彼岸

隨如來學悉成就

恆以妙智善思惟

具足人中最勝法

清淨善根普迴向

利益羣迷恆不捨

悉令一切諸眾生

得成無上照世燈

未曾分別取眾生

亦不妄想念諸法

雖於世間無染著

亦復不捨諸含識

菩薩常樂寂滅法

隨順得至涅槃境

亦不捨離眾生道

獲如是等微妙智

菩薩未曾分別業

亦不取著諸果報

一切世間從緣生

不離因緣見諸法

深入如是諸境界

不於其中起分別

一切眾生調御師

於此明了善迴向

第二重頌有十一偈。分三。初七偈頌迴向眾生及

菩提。次三偈半頌迴向實際。後半偈頌成益。第

四迴向竟

大方廣佛華嚴經綱要卷第二十四

大方廣佛華嚴經綱要卷第二十五

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

十迴向品第二十五之三

佛子。云何爲菩薩摩訶薩無盡功德藏迴向。

第五無盡功德藏迴向。長行中亦先明位行。今初徵起釋名者。由緣無盡境行迴向故。成無盡功德之行。得十無盡藏之果。從能迴向行及果受名。或無盡功德之藏。或功德卽藏通二釋。以迴向望行。

迴向爲能藏。無盡功德是所藏。以因望果亦然。並有財釋。本業云。常以三寶授於前人。故名無盡功德藏。卽以五門善根而爲其性。第二廣釋中三。初明所迴善根。二明迴向之行。三菩薩摩訶薩如是迴向已下。結行成德。

佛子。此菩薩摩訶薩。以懺除一切諸業重障所起善根。禮敬三世一切諸佛所起善根。勸請一切諸佛說法所起善根。聞佛說法。精勤修習。悟不思議廣大境界所起善根。於去來今一切諸佛。一切眾生所有善根。皆生隨喜所起善根。去來今世一切諸佛善根無

盡諸菩薩眾精勤修習所得善根。三世諸佛成正覺轉正法輪調伏眾生。菩薩悉知發隨喜心所生善根。三世諸佛從初發心修菩薩行成最正覺乃至示現入般涅槃。般涅槃已。正法住世乃至滅盡。於如是等皆生隨喜所有善根。

初中有八句以四門而爲行本。一懺除。二禮敬。三勸請。四隨喜。然初言懺悔者。懺名陳露先罪。悔名改往修來。二禮敬者。謂除我慢障。起信敬善故。三勸請者。名爲祈求。除謗法障。起慈善根故。於去來下。四隨喜。爲慶悅彼故。除嫉妬障。起平等善故。文

有四句。以此四行爲所迴向善根。

菩薩如是念不可說諸佛境界。及自境界。乃至菩提無障礙境。如是廣大無量差別一切善根。凡所積集。凡所信解。凡所隨喜。凡所圓滿。凡所成就。凡所修行。凡所獲得。凡所知覺。凡所攝持。凡所增長。悉以迴向莊嚴一切諸佛國土。如過去世無邊際劫一切世界一切如來所行之處。所謂無量無數佛世界種。佛智所知。菩薩所識。大心所受。莊嚴佛刹清淨業行。所流所引。應眾生起如來神力之所示現。諸佛出世淨業所成。普賢菩薩妙行所興。一切諸佛於中成道。示現

種種自在神力。盡未來際。所有如來應正等覺。徧法界住。當成佛道。當得一切清淨莊嚴功德。佛土盡法界。虛空界無邊無際無斷無盡。皆從如來智慧所生。無量妙寶之所莊嚴。所謂一切香莊嚴。一切華莊嚴。一切衣莊嚴。一切功德藏莊嚴。一切諸佛力莊嚴。一切佛國土莊嚴。如來所覩不可思議同行宿緣諸清淨眾。於中止住。未來世中當成正覺。一切諸佛之所成就。非世所覩。菩薩淨眼。乃能照見。此諸菩薩具大威德。宿植善根。知一切法如幻如化。普行菩薩諸清淨業。人不思議自在三昧。善巧方便。能作佛事。放佛

光明普照世間。無有限極。現在一切諸佛世尊。悉亦如是。莊嚴世界。無量形相。無量光色。悉是功德之所成就。無量香。無量寶。無量樹。無數莊嚴。無數宮殿。無數音聲。隨順宿緣諸善知識。示現一切功德莊嚴。無有窮盡。所謂一切香莊嚴。一切髮莊嚴。一切末香莊嚴。一切寶莊嚴。一切旛莊嚴。一切寶繒綵莊嚴。一切寶欄楯莊嚴。阿僧祇金網莊嚴。阿僧祇河莊嚴。阿僧祇雲雨莊嚴。阿僧祇音樂。奏微妙音。如是等無量無數莊嚴之具。莊嚴一切盡法界。虛空界。十方無量種種業起。佛所了知。佛所宣說。一切世界。其中所有一

切佛土。所謂莊嚴佛土。清淨佛土。平等佛土。妙好佛
土。威德佛土。廣大佛土。安樂佛土。不可壞佛土。無盡
佛土。無量佛土。無動佛土。無畏佛土。光明佛土。無違
逆佛土。可愛樂佛土。普照明佛土。嚴好佛土。精麗佛
土。妙巧佛土。第一佛土。勝佛土。殊勝佛土。最勝佛土。
極勝佛土。上佛土。無上佛土。無等佛土。無比佛土。無
譬喻佛土。如是過去未來現在一切佛土所有莊嚴。
菩薩摩訶薩以己善根發心迴向願以如是去來現
在一切諸佛所有國土清淨莊嚴悉以莊嚴於一世
界。如彼一切諸佛國土所有莊嚴皆悉成就皆悉清

淨。皆悉聚集。皆悉顯現。皆悉嚴好。皆悉住持。如一世界。如是盡法界。虛空界。一切世界。悉亦如是。三世一切諸佛國土。種種莊嚴。皆悉具足。

第二正明迴向行中。先四行經。結前善根。謂凡所積集等。略說十種善根。總之一一皆悉迴向也。後悉以下。明迴向中。先迴向菩提。次迴向眾生。皆有隨相離相之行。於隨相中。正起行願。先迴向淨土。經總標云。悉以迴向莊嚴。一切諸佛國土。然莊嚴有二。初眾寶莊嚴。後人寶莊嚴。別顯莊嚴之相。則約三世。經初標舉如過去世。無邊際劫時。處無量。

佛刹如佛所知。菩薩所受之刹。悉以莊嚴。明過去
嚴。次清淨業行下。明因圓滿。一切諸佛下。事業圓
滿。次盡未來際下。舉未來嚴。次盡法界別顯有九
圓滿。束之爲五。初分量圓滿。次皆從如來下二句
明果法圓滿。三無量下。依持圓滿。四如來所覩一
句。明主圓滿。五不可思議同行下。明輔翼圓滿。次
現在一切下。舉現在嚴土。無量下。別顯有三圓滿。
一者形相。卽形色圓滿。次無量光色。卽顯色圓滿。
三無量香下。住處圓滿。次如是等下。總結三世嚴
具及土。次所謂下。別顯所嚴有二十九種。通有十

七圓滿。次如是過去未來現在下。願成彼嚴。於中
先嚴一世界。次如一世界下。例嚴普周。顯嚴分齊。
令法界土。皆具三世一切莊嚴。既一佛土即具無
盡莊嚴。則一嚴一切嚴。亦顯一圓滿即一切圓滿。
重重無盡。方是華嚴土圓滿。上眾寶嚴竟。

佛子。菩薩摩訶薩。復以善根如是迴向。願我所修一
切佛刹。諸大菩薩。皆悉充滿。其諸菩薩。體性真實。智
慧通達。善能分別一切世界及眾生界。深入法界。及
虛空界。捨離愚癡。成就念佛。念法。真實。不可思議。念
僧無量。普皆周徧。亦念於捨。法日圓滿。智光普照。見

無所礙。從無得生。生諸佛法。爲眾勝上善根之主。發
生無上菩提之心。住如來力。趣薩婆若。破諸魔業。淨
眾生界。深入法性。永離顛倒。善根大願。皆悉不空。如
是菩薩。充滿其土。生如是處。有如是德。常作佛事。得
佛菩提。清淨光明。具法界智。現神通力。一身充滿一
切法界。得大智慧。入一切智所行之境。善能分別無
量無邊法界句義。於一切利。皆無所著。而能普現一
切佛土。心如虛空。無有所依。而能分別一切法界。善
能入出不可思議甚深三昧。趣薩婆若。住諸佛刹。得
諸佛力。開示演說阿僧祇法。而無所畏。隨順三世諸

佛善根。普照一切如來法界。悉能受持一切佛法。知阿僧祇諸語言法。善能演出不可思議差別音聲。入於無上佛自在地。普遊十方一切世界而無障礙。行於無諍無所依法。無所分別。修習增廣菩提之心。得善巧智。善知句義。能隨次第開示演說。願令如是諸大菩薩莊嚴其國。充滿分布。隨順安住。熏修極熏修。純淨極純淨。恬然冥寂。於一佛刹。隨一方所。皆有如是無數無量無邊無等不可數。不可稱。不可思。不可量。不可說。不可說。不可說。諸大菩薩。周徧充滿。如一方所。一切方所。亦復如是。如一佛刹。盡虛空徧法界。

一切佛刹。悉亦如是。佛子。菩薩摩訶薩。以諸善根。方便迴向一切佛刹。方便迴向一切菩薩。方便迴向一切如來。方便迴向一切佛菩提。方便迴向一切廣大願。方便迴向一切出要道。方便迴向淨一切眾生界。方便迴向於一切世界。常見諸佛出興於世。方便迴向常見如來壽命無量。方便迴向常見諸佛徧周法界。轉無障礙不退法輪。佛子。菩薩摩訶薩。以諸善根。如是迴向時。普入一切佛國土故。一切佛刹。皆悉清淨。普至一切眾生界故。一切菩薩。皆悉清淨。普願一切諸佛國土。佛出興故。一切法界。一切佛土。諸如來。

身超然出現。

第二佛子菩薩下。人寶爲嚴。亦卽是前輔翼圓滿。文中三。初總願所成。次其諸菩薩下。別顯願相。初總顯德。次善能下。別顯有十八句。先明智慧圓。次深人下。四句明體實。次如是下。結德嚴。言生如是處。卽指前淨土。有如是德。卽指向文。次常作佛事。下顯業廣。於中分四。卽四圓滿。初明事業圓滿。上辨佛業。今菩薩業。次得大智慧下。卽乘圓滿。大止妙觀以爲乘故。文有八句。次趣薩婆若下。無畏圓滿。內無災患。外無畏故。四隨順三世下。卽任持圓

滿於中。先明能受。次知阿僧祇語言下。明能說。次願令下。結以嚴刹。初總彰人徧。次熏修下五句。結行德深。謂以止以觀。唯智唯悲。熏修身心。無有間斷。名極熏修。現惑不生。故名純淨。種習不起。名極純淨。恬和也。晏安也。恬和安寂。卽寂照之相也。次於一佛刹下。別示徧相。兼顯數多。於中有三節。初一刹中有多數量。次以方例刹。後以刹例法界。如下僧祇品云。於一微細毛端處。有不可說諸普賢也。言如是者。如前具德也。已上通顯行願。下文總攝迴向經云。佛子。菩薩摩訶薩。以諸善根下六行。

經謂非唯但向佛淨土故。文有十句。初三句結前已說。後七句辨所未明。次佛子菩薩摩訶薩以諸善根如是迴向下。結行成益。總收三種世間。

佛子。菩薩摩訶薩以如是等無比迴向。趣薩婆若。其心廣大。猶如虛空。無有限量。入不思議。知一切業及以果報。皆悉寂滅。心常平等。無有邊際。普能徧入一切法界。佛子。菩薩摩訶薩如是迴向時。不分別我。及以我所。不分別佛。及以佛法。不分別刹。及以嚴淨。不分別眾生。及以調伏。不分別業。及業果報。不著於思。及思所起。不壞因。不壞果。不取事。不取法。不謂生死。

有分別。不謂涅槃恆寂靜。不謂如來證佛境界。無有少法與法同止。

第二佛子至如是等下。明離相迴向。卽向實際。文中有一。先明見實。智冥實際。後彰離妄。德合實際。此二段返覆相成。今初。初句牒前迴向菩提。其心已下。正顯離相。寂照無涯。爲入不思議。卽事契真。故常平等。由此故能遍入。若事若理。無礙法界。名爲一切。次佛子下。彰其離妄。文有十對。初六遮妄。執有。以緣成無性故。次一遮妄執空。以卽真故。不礙存故。不壞假名。說實相故。不壞因果。後三約雙

遮空有。謂生死涅槃相待而有。俱空叵得。二約體融。佛卽法界。不應以法界更證法界。故末句謂無有少法爲智所入。亦無少智而入於如。上通顯迴向菩提竟。

佛子。菩薩摩訶薩如是迴向時。以諸善根普施眾生。決定成熟。平等教化。無相無緣。無稱量。無虛妄。遠離一切分別取著。

第二佛子。下明迴向眾生。初句總明。謂卽前迴向菩提時。便以善根迴向眾生。故云如是迴向時也。次決定下。別顯行相有七句。初二句隨相。一無放

捨心。二無冤親相。次五句離相。一不見眾生相。二不取化緣。三不稱量根性。四無能度我人。末句總結。卽此七句已攝盡上向菩提行。上通明迴向之行。

菩薩摩訶薩如是迴向已得無盡善根。所謂念三世一切諸佛故得無盡善根。念一切菩薩故得無盡善根。淨諸佛刹故得無盡善根。淨一切眾生界故得無盡善根。深入法界故得無盡善根。修無量心等虛空界故得無盡善根。深解一切佛境界故得無盡善根。於菩薩業勤修習故得無盡善根。了達三世故得無

盡善根。佛子。菩薩摩訶薩。以一切善根。如是迴向時。了。一切眾生界。無有眾生。解一切法。無有壽命。知一切法。無有作者。悟一切法。無補伽羅。了。一切法。無有忿爭。觀一切法。皆從緣起。無有住處。知一切物。皆無所依。了。一切刹。悉無所住。觀一切菩薩行。亦無處所。見一切境界。悉無所有。佛子。菩薩摩訶薩。如是迴向時。眼終不見不淨佛刹。亦復不見異相眾生。無有少法。爲智所入。亦無少智。而入於法。解如來身。非如虛空。一切功德。無量妙法。所圓滿故。於一切處。令諸眾生。積集善根。悉充足故。佛子。此菩薩摩訶薩。於念念。

中。得不可說不可說十力地。具足一切福德。成就清淨善根。爲一切眾生福田。此菩薩摩訶薩成就如摩尼功德藏。隨有所須。一切樂具悉皆得故。隨所遊方。悉能嚴淨一切國土。隨所行處。令不可說不可說眾生。皆悉清淨。攝取福德。修治諸行故。佛子。菩薩摩訶薩如是迴向時。修一切菩薩行。福德殊勝。色相無比。威力光明。超諸世間。魔及魔民。莫能瞻對。善根具足。大願成就。其心彌廣。等一切智。於一念中。悉能周徧無量佛刹。智力無量。了達一切諸佛境界。於一切佛得深信解。住無邊智。菩提心力。廣大如法界。究竟

如虛空佛子。是名菩薩摩訶薩第五無盡功德藏迴向。

大文第三結行成德。有四佛子兼此爲五。卽爲五段。初成無盡善根德。次佛子至以一切善根下。成二空智慧德。文有十句。初四我空。後六法空。次佛子至如是迴向時下。成境界清淨德。次佛子至於念念中下。明福智無盡德。次佛子至如是迴向時下。明福智超勝德。次佛子是名下。依釋結名。

菩薩摩訶薩住此迴向得十種無盡藏。何等爲十。所謂得見佛無盡藏。於一毛孔見阿僧祇諸佛出興世

故。得入法無盡藏。以佛智力觀一切法。悉入一法故。
得憶持無盡藏。受持一切佛所說法。無忘失故。得決
定慧無盡藏。善知一切佛所說法祕密方便故。得解
義趣無盡藏。善知諸法理趣分齊故。得無邊悟解無
盡藏。以如虛空智通達三世一切法故。得福德無盡
藏。充滿一切諸眾生意不可盡故。得勇猛智覺無盡
藏。悉能除滅一切眾生愚癡翳故。得決定辯才無盡
藏。演說一切佛平等法。令諸眾生悉解了故。得十力
無畏無盡藏。具足一切菩薩所行。以離垢繪而繫其
頂。至無障礙一切智故。是爲十。佛子。菩薩摩訶薩以

一切善根迴向時。得此十種無盡藏。

第二菩薩下。辨位果。何等下徵。所謂下釋。有十句。皆先標名。次釋義。後是爲下。結十種無盡藏。初六自利。次三利他。後一攝行成果。

爾時金剛幢菩薩承佛神力。普觀十方。而說頌言。

菩薩成就深心力

普於諸法得自在

以其勸請隨喜福

無礙方便善迴向

三世所有諸如來

嚴淨佛刹徧世間

所有功德靡不具

迴向淨刹亦如是

三世所有諸佛法

菩薩皆悉諦思惟

以心攝取無有餘

如是莊嚴諸佛刹

盡於三世所有劫

讚一佛刹諸功德

三世諸劫猶可盡

佛刹功德無窮盡

如是一切諸佛刹

菩薩悉見無有餘

總以莊嚴一佛土

一切佛土悉如是

有諸佛子心清淨

悉從如來法化生

一切功德莊嚴心

一切佛刹皆充滿

彼諸菩薩悉具足

無量相好莊嚴身

辯才演說徧世間

譬如大海無窮盡

菩薩安住諸三昧

一切所行皆具足

其心清淨無與等

光明普照十方界

如是無餘諸佛刹

此諸菩薩皆充滿

未曾憶念聲聞乘

亦復不求緣覺道

菩薩如是心清淨

善根迴向諸羣生

普欲令其成正道

具足了知諸佛法

十方所有眾魔怨

菩薩威力悉摧破

勇猛智慧無能勝

決定修行究竟法

菩薩以此大願力

所有迴向無留礙

入於無盡功德藏

去來現在常無盡

菩薩善觀諸行法

了達其性不自在

既知諸法性如是

不妄取業及果報

無有色法無色法

亦無有想無無想

有法無法皆悉無

了知一切無所得

一切諸法因緣生

體性非有亦非無

而於因緣及所起

畢竟於中無取著

一切眾生語言處

於中畢竟無所得

了知名相皆分別

明解諸法悉無我

如眾生性本寂滅

如是了知一切法

三世所攝無有餘

刹及諸業皆平等

以如是智而迴向

隨其悟解福業生

此諸福相亦如解

豈復於中有可得

如是迴向心無垢

永不稱量諸法性

了達其性皆非性

不住世間亦不出

一切所行眾善業

悉以迴向諸羣生

莫不了達其真性

所有分別皆除遣

所有一切虛妄見

悉皆棄捨無有餘

離諸熱惱恆清涼

住於解脫無礙地

菩薩不壞一切法

亦不滅壞諸法性

解了諸法猶如響

悉於一切無所著

了知三世諸眾生

悉從因緣和合起

亦知心樂及習氣

未曾滅壞一切法

了達業性非是業

而亦不違諸法相

又亦不壞業果報

說諸法性從緣起

了知眾生無有生

亦無眾生可流轉

無實眾生而可說

但依世俗假宣示

第二偈頌有二十五偈。初一偈總頌所迴善根。餘

二十四偈。雙頌前迴向善根。及結行成益。於中先

有十一偈。頌隨相。次十三偈。頌離相。第五迴向竟。

佛子。云何爲菩薩摩訶薩隨順堅固一切善根迴向。

第六隨順堅固一切善根迴向。長行亦二。謂位行

垂履約要卷二十一
五
位果。行中釋名者。謂所修事善皆悉順入堅固法性。故下文云。則爲隨順真實住。本分名入一切平等善根。入卽隨順。平等卽堅固。平等之理不可壞。故若順等理。則順諸善根。故下文云。則爲隨順佛住等。此則不唯事順於理。理事相順。受平等名。如此平等。方名堅固。此約所迴善根及所向實際以立斯名。亦可名爲堅固之善根。堅固卽善根。若以隨順望堅固善根。亦通三義。卽以無礙善根而爲其性。

佛子。此菩薩摩訶薩。或爲帝王。臨御大國。威德廣被。

名震天下。凡諸怨敵。靡不歸順。發號施令。悉依正法。執持一蓋。溥蔭萬方。周行率土。所向無礙。以離垢繒。而繫其頂。於法自在。見者咸伏。不刑不罰。感德從化。以四攝法。攝諸眾生。爲轉輪王。一切周給。菩薩摩訶薩。安住如是自在功德。有大眷屬。不可沮壞。離眾過失。見者無厭。福德莊嚴。相好圓滿。形體肢分。均調具足。獲那羅延堅固之身。大力成就。無能屈伏。得清淨業。離諸業障。具足修行一切布施。或施飲食。及諸上味。或施車乘。或施衣服。或施華鬘。雜香塗香。牀座房舍。及所住處。上妙燈燭。病緣湯藥。寶器寶車。調良象。

馬悉皆嚴飾。歡喜布施。或有來乞王所處座。若蓋若傘。幢旛寶物。諸莊嚴具。頂上寶冠。髻中明珠。乃至王位。皆無所吝。若見眾生在牢獄中。捨諸財寶。妻子眷屬。乃至以身救彼。令脫。若見獄囚將欲被戮。卽捨其身。以代彼命。或見來乞。連膚頂髮。歡喜施與。亦無所吝。眼耳鼻舌。及以牙齒。頭頂手足。血肉骨髓。心腎肝肺。大腸小腸。厚皮薄皮。手足諸指。連肉爪甲。以歡喜心。盡皆施與。或爲求請。未會有法。投身而下。深大火坑。或爲護持。如來正法。以身忍受一切苦毒。或爲求法。乃至一字。悉能徧捨。四海之內。一切所有。恆以正

法。化導羣生。令修善行。捨離諸惡。若見眾生損敗他形。慈心救之。令捨罪業。若見如來成最正覺。稱揚讚歎。普使聞知。或施於地。造立僧坊。房舍殿堂。以爲住處。及施僮僕。供承作役。或以自身施來乞者。或施於佛。爲求法故。歡喜踊躍。爲眾生故。承事供養。或捨王位。城邑聚落。宮殿園林。妻子眷屬。隨所乞求。悉滿其願。或捨一切資生之物。普設無遮大施之會。其中眾生種種福田。或從遠來。或從近來。或賢或愚。或好或醜。若男若女。人與非人。心行不同。所求各異。等皆施與。悉令滿足。佛子。菩薩摩訶薩如是施時。發善攝心。

聖果卷之二 二五
悉以迴向。所謂善攝色。隨順堅固。一切善根。善攝受
想行識。隨順堅固。一切善根。善攝王位。隨順堅固。一
切善根。善攝眷屬。隨順堅固。一切善根。善攝資具。隨
順堅固。一切善根。善攝惠施。隨順堅固。一切善根。

第二廣釋中二。先明行所依身。次明依身起行。所
依身中。先得位。以身爲萬行之本。位爲行道之地。
今帝王等明得位。然有位必有德。故次明具德。經
云。威德廣被。下四行經。明統領自在德。次云。菩薩
安住如是。下三行餘經。明正報殊勝德。次依身起
行。具足修行。一切布施下。先明隨相迴向。次離相

初卽迴向菩提及迴向眾生。次離相卽迴向實際。今隨相中有三段。初總標列善根迴向。次依標廣顯善根迴向。三總結多門善根迴向。今初標列中云。具足修行一切布施。卽所施之物。十九行經總列於此。後別開有六十門。次云其中眾生辨所施田。皆施與者。不揀賢愚等。悉令滿足。隨所求故。次佛子如是施時下。顯能施迴向之心。望前是能施之心。故云如是施時發善攝心。望後是能迴向心。故云發善攝心。悉以迴向。故下諸門迴向之內。皆以此心貫之。所謂下列有六善攝。總收上來能

施所施及以施物。

佛子。菩薩摩訶薩隨所施物。無量無邊。以彼善根如是迴向。所謂以上妙食施眾生時。其心清淨。於所施物無貪無著。無所顧吝。具足行施。願一切眾生得智慧食。心無障礙。了知食性。無所貪著。但樂法喜。出離之食。智慧充滿。以法堅住。攝取善根。法身智身清淨遊行。哀愍眾生。爲作福田。現受搏食。是爲菩薩摩訶薩布施食時善根迴向。

第二佛子。下依標廣顯中。先總標施行。次所謂下。一一別釋。有六十門。內一一皆四。一施行。二迴向。

三雙結二行。四迴向所爲。若闕所爲。則但有二。亦可合後二段爲雙結所爲。此科宜記。今第一施食。以食爲世命。貴賤同依。故首明之。文但有三。先明施行。言其心清淨。離施過故。謂不求名利果報及怖畏等而行施故。不貪著者。是無貪思。無顧客者。是無慳思。又施時無貪著。施已無顧客。隨所施行。與眾生共。兼於理事。名爲具足。此心在初。亦貫下。諸段。次願一切眾生下。迴向行。然其所願。正爲眾生。令得成佛。卽迴向菩提。下皆準之。是爲下。雙結二行。

佛子。菩薩摩訶薩若施飲時。以此善根如是迴向。所謂願一切眾生飲法味水。精勤修習。具菩薩道。斷世渴愛。常求佛智。離欲境界。得法喜樂。從清淨法而生其身。常以三昧調攝其心。入智慧海。興大法雲。霑大法雨。是爲菩薩摩訶薩布施飲時善根迴向。

第二施飲中亦三。初施行。次以下二句牒起。次所謂下別顯願相。下皆倣此。然所願卽順物而發迴向之願。一一皆然。

佛子。菩薩摩訶薩布施種種清淨上味。所謂辛酸鹹淡。及以甘苦種種諸味。潤澤具足。能令四大安隱調

和。肌體盈滿。氣力彊壯。其心清淨。常得歡喜。咽咀之時。不欬不逆。諸根明利。內藏充實。毒不能侵。病不能傷。始終無患。永得安樂。以此善根如是迴向。所謂願一切眾生得最上味。甘露充滿。願一切眾生得法智味。了知一切諸味業用。願一切眾生得無量法味。了達法界安住實際大法城中。願一切眾生作大法雲。周徧法界。普雨法雨。教化調伏一切眾生。願一切眾生得勝智味。無上法喜。充滿身心。願一切眾生得無貪著一切上味。不染世間一切諸味。常勤修習一切佛法。願一切眾生得一法味。了諸佛法悉無差別。願

一切眾生得最勝味。乘一切智。終無退轉。願一切眾生得入諸佛無異法味。悉能分別一切諸根。願一切眾生法味增益。常得滿足。無礙佛法。是爲菩薩摩訶薩。布施味時。善根迴向。爲令一切眾生勤修福德。皆悉具足。無礙智身故。

第三施味。願得上味者。佛但食入口。悉爲甘露。佛子。菩薩摩訶薩。施車乘時。以諸善根。如是迴向。所謂願一切眾生。皆得具足一切智乘。乘於大乘。不可壞乘。最勝乘。最上乘。速疾乘。大力乘。福德具足乘。出世間乘。出生無量諸菩薩乘。是爲菩薩摩訶薩。施車

乘時善根迴向。

第四施車乘。義通車馬。願中皆約代步。以後第十六別施車故。

佛子。菩薩摩訶薩布施衣時。以諸善根如是迴向。所謂願一切眾生得慚愧衣。以覆其身。捨離邪道。露形惡法。顏色潤澤。皮膚細軟。成就諸佛第一之樂。得最清淨一切種智。是爲菩薩摩訶薩布施衣時善根迴向。

第五施衣。施衣能感妙色。以衣禦寒。令顏色潤澤故。

佛子。菩薩摩訶薩常以種種名華布施。所謂微妙香華。種種色華。無量奇妙華。善見華。可喜樂華。一切時華。天華。人華。世所珍愛華。甚芬馥悅意華。以如是等無量妙華。供養一切現在諸佛。及佛滅後所有塔廟。或以供養說法之人。或以供養比丘僧寶。一切菩薩諸善知識。聲聞獨覺。父母宗親。下至自身。及餘一切貧窮孤露。布施之時。以諸善根如是迴向。所謂願一切眾生。皆得諸佛三昧之華。悉能開敷一切諸法。願一切眾生。皆得如佛見者歡喜。心無厭足。願一切眾生所見順愜。心無動亂。願一切眾生具行廣大清淨。

之業。願一切眾生常念善友。心無變異。願一切眾生如阿伽陀藥。能除一切煩惱。眾毒。願一切眾生成滿大願。皆悉得爲無上智王。願一切眾生智慧日光。破愚癡暗。願一切眾生菩提淨月。增長滿足。願一切眾生入大寶州。見善知識。具足成就一切善根。是爲菩薩摩訶薩。布施華時。善根迴向。爲令眾生皆得清淨無礙智故。

第六施華。先列施物。後供養下。明所施田。及自身者。身爲福田。足法器故。依之進道。故施自身。勝施外道無量。

佛子。菩薩摩訶薩布施鬘時。以諸善根如是迴向。所謂願一切眾生。人所樂見。見者欽歎。見者親善。見者愛樂。見者渴仰。見者除憂。見者生喜。見者離惡。見者常得親近於佛。見者清淨。獲一切智。是爲菩薩摩訶薩布施鬘時善根迴向。

第七施鬘。鬘者貫華如環而爲首飾。或以環身。

佛子。菩薩摩訶薩布施香時。以諸善根如是迴向。願一切眾生具足戒香。得不缺戒。不雜戒。不汙戒。無悔戒。離纏戒。無熱戒。無犯戒。無邊戒。出世戒。菩薩波羅蜜戒。願一切眾生以是戒故。皆得成就諸佛戒身。是

爲菩薩摩訶薩布施香時善根迴向。爲令眾生悉得圓滿無礙戒蘊故。

第八施香。準下十度萬行皆香。此偏語戒者。翻破戒之穢故。有十二願。一不缺。謂具持三聚。二不雜。謂不雜外道。三不汙。謂無染心。涅槃云。乃至染環釧聲。亦名汙菩薩戒。四無悔。謂不犯重故。犯重之人。多生悔恨。五不纏。謂設有誤犯。深慚愧故。如其故犯數犯。不生慚愧。深愛著犯。見犯是福。名之謂纏。六無熱。七無犯。謂定共相應。故無惑熱。常持如初。故無犯。八無邊。九出世。謂道共相應。離斷常邊。

成出世行故。十波羅蜜者。謂遠離二乘。圓修十度。方名不犯菩薩律儀。是智所讚戒。末句結因成果。謂五分之一。

佛子。菩薩摩訶薩。施塗香時。以諸善根如是迴向。所謂願一切眾生施香普熏。悉能惠捨一切所有。願一切眾生戒香普熏。得於如來究竟淨戒。願一切眾生忍香普熏。離於一切險害之心。願一切眾生精進香普熏。常服大乘精進甲冑。願一切眾生定香普熏。安住諸佛現前三昧。願一切眾生慧香普熏。一念得成無上智王。願一切眾生法香普熏。於無上法得無所

畏願一切眾生德香普熏成就一切大功德智。願一切眾生菩提香普熏。得佛十力。到於彼岸。願一切眾生清淨白法妙香普熏。永滅一切不善之法。是爲菩薩摩訶薩施塗香時善根迴向。

第九施塗香。十度皆有熏發資長菩提心。辟除蔽惡。俱得稱香。

佛子。菩薩摩訶薩施牀座時。以諸善根如是迴向。所謂願一切眾生得諸天牀座。證大智慧。願一切眾生得賢聖牀座。捨凡夫意。住菩提心。願一切眾生得安樂牀座。永離一切生死苦惱。願一切眾生得究竟牀

座得見諸佛自在神通。願一切眾生得平等牀座。恆
普熏修一切善法。願一切眾生得最勝牀座。具清淨
業。世無與等。願一切眾生得安隱牀座。證真實法。具
足究竟。願一切眾生得清淨牀座。修習如來淨智境
界。願一切眾生得安住牀座。得善知識常隨覆護。願
一切眾生得師子牀座。常如如來右脇而臥。是爲菩
薩摩訶薩施牀座時善根迴向。爲令眾生修習正念
善護諸根故。

第十施牀座。後第十八有別明施座。故晉譯此爲
牀敷深見當也。

佛子。菩薩摩訶薩施房舍時。以諸善根如是迴向。所謂願一切眾生皆得安住清淨佛刹。精勤修習一切功德。安住甚深三昧境界。捨離一切住處執著。了諸住處皆無所有。離諸世間。住一切智。攝取一切諸佛所住。住究竟道安樂住處。恆住第一清淨善根。終不捨離佛無上住處。是爲菩薩摩訶薩施房舍時善根迴向。爲欲利益一切眾生。隨其所應。思惟救護故。

第十一施房舍。言不捨佛無上住者。住大寂室故。佛子。菩薩摩訶薩施住處時。以諸善根如是迴向。所謂願一切眾生常獲善利。其心安樂。願一切眾生依

如來住。依大智住。依善知識住。依尊勝住。依善行住。
依大慈住。依大悲住。依六波羅蜜住。依大菩提心住。
依一切菩薩道住。是爲菩薩摩訶薩施住處時善根。
迴向。爲令一切福德清淨故。究竟清淨故。智清淨故。
道清淨故。法清淨故。戒清淨故。志樂清淨故。信解清
淨故。願清淨故。一切神通功德清淨故。

第十二施住處。言住處。謂僧坊等。

佛子。菩薩摩訶薩施諸燈明。所謂酥燈。油燈。寶燈。摩
尼燈。漆燈。火燈。沉水燈。栴檀燈。一切香燈。無量色光
燈。施如是等無量燈時。爲欲利益一切眾生。爲欲攝

受一切眾生。以此善根如是迴向。所謂願一切眾生
得無量光。普照一切諸佛正法。願一切眾生得清淨
光。照見世間極微細色。願一切眾生得離翳光。了眾
生界空無所有。願一切眾生得無邊光。身出妙光。普
照一切。願一切眾生得普照光。於諸佛法。心無退轉。
願一切眾生得佛淨光。一切剎中。悉皆顯現。願一切
眾生得無礙光。一光徧照一切法界。願一切眾生得
無斷光。照諸佛剎。光明不斷。願一切眾生得智幢光。
普照世間。願一切眾生得無量色光。照一切剎。示現
神力。菩薩如是施燈明時。爲欲利益一切眾生。安樂

一切眾生故。以此善根隨逐眾生。以此善根攝受眾生。以此善根分布眾生。以此善根慈愍眾生。以此善根覆育眾生。以此善根救護眾生。以此善根充滿眾生。以此善根緣念眾生。以此善根等益眾生。以此善根觀察眾生。是爲菩薩摩訶薩施燈明時善根迴向。如是迴向。無有障礙。普令眾生住善根中。

第十三施燈。言寶燈者。如夜光之類。以沈水旃檀香。用和酥油。無量色者。然膏色白。然漆色赤。然油色黃。然檀色綠。如是種種。願中瑜伽明施燈得淨眼報。然燈功德。經燒燈供佛。大能滅罪生福。令發

願言當以大海爲油。須彌爲炷。然大明燈。照佛刹海。供養無休。又願法門之燈。大願爲炷等。今文願中具身智二光。並可思準。

佛子。菩薩摩訶薩。施湯藥時。以諸善根如是迴向。所謂願一切眾生於諸葢纏。究竟得出。願一切眾生永離病身。得如來身。願一切眾生作大良藥。滅除一切不善之病。願一切眾生成阿伽陀藥。安住菩薩不退轉地。願一切眾生成如來藥。能拔一切煩惱毒箭。願一切眾生親近賢聖。滅除煩惱。修清淨行。願一切眾生作大藥王。永除眾病。不令重發。願一切眾生作不

壞藥樹。悉能救療。一切眾生。願一切眾生。得一切智
光。出眾病箭。願一切眾生。善解世間方藥之法。所有
疾病。爲其救療。菩薩摩訶薩。施湯藥時。爲令一切眾
生。永離眾病故。究竟安隱故。究竟清淨故。如佛無病
故。拔除一切病箭故。得無盡堅固身故。得金剛圍山
所不壞身故。得堅固滿足力故。得圓滿不可奪佛樂
故。得一切佛自在堅固身故。以諸善根如是迴向。

第十四施湯藥。施藥近果。得無病報。如薄俱羅。遠
得藥王樹身等。願中言不重發者。經云。世醫所療
治。雖瘥還復發。如來所治者。畢竟不復發。言自在

堅固身者。生公云。金剛爲內照之實。非唯金色。故云自在。

佛子。菩薩摩訶薩。悉能惠施一切器物。所謂黃金器。盛滿雜寶。白銀器。盛眾妙寶。瑠璃器。盛種種寶。玻璃器。盛滿無量寶莊嚴具。砮礮器。盛赤真珠。瑪瑙器。盛滿珊瑚。摩尼珠寶。白玉器。盛眾美食。栴檀器。盛天衣服。金剛器。盛眾妙香。無量無數種種寶器。盛無量無數種種眾寶。或施諸佛。信佛福田。不思議故。或施菩薩。知善知識。難值遇故。或施聖僧。爲令佛法久住世故。或施聲聞。及辟支佛。於諸聖人。生淨信故。或施父

母爲尊重故。或施師長爲恆誘誨。令依聖教修功德。故。或施下劣貧窮孤露。大慈大悲。愛眼等視諸眾生。故。專意滿足去來今世。一切菩薩檀波羅蜜故。以一切物普施一切。終不厭捨諸眾生故。如是施時。於其施物。及以受者。皆無所著。菩薩摩訶薩。以如是等種種寶器。盛無量寶。而布施時。以諸善根。如是迴向。所謂願一切眾生。成等虛空無邊藏器。念力廣大。悉能受持世出世間一切經書。無有忘失。願一切眾生成清淨器。能悟諸佛甚深正法。願一切眾生成無上寶器。悉能受持三世佛法。願一切眾生成就如來廣大

法器以不壞信。攝受三世佛菩提法。願一切眾生成
就最勝寶莊嚴器。住大威德菩提之心。願一切眾生
成就功德所依處器。於諸如來無量智慧。生淨信解。
願一切眾生成就趣入一切智器。究竟如來無礙解
脫。願一切眾生得盡未來劫菩薩行器。能令眾生普
皆安住一切智力。願一切眾生成就三世諸佛種性
勝功德器。一切諸佛妙音所說。悉能受持。願一切眾
生成就容納盡法界虛空界一切世界一切如來眾
會道場器。爲大丈夫讚說之首。勸請諸佛轉正法輪。
是爲菩薩摩訶薩布施器時善根迴向。爲欲普令一

國風光卷之二十三
三二
切眾生皆得圓滿普賢菩薩行願器故。

第十五施器言施受皆無所著成波羅蜜故。然隨一器卽發多願未必一器以對一願也。

大方廣佛華嚴經綱要卷第二十五

大方廣佛華嚴經綱要卷第二十六

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

十迴向品第二十五之四

佛子。菩薩摩訶薩。以種種車。眾寶嚴飾。奉施諸佛。及諸菩薩。師長善友。聲聞緣覺。如是無量種種福田。乃至貧窮孤露之者。此諸人眾。或從遠來。或從近來。或承菩薩名聞故來。或是菩薩因緣故來。或聞菩薩往昔所發施願故來。或是菩薩心願請來。菩薩是時。或

施寶車。或施金車。悉妙莊嚴。鈴網覆上。寶帶垂下。或施上妙瑠璃之車。無量珍奇。以爲嚴飾。或復施與白銀之車。覆以金網。駕以駿馬。或復施與無量雜寶所莊嚴車。覆以寶網。駕以香象。或復施與栴檀之車。妙寶爲輪。雜寶爲蓋。寶師子座。敷置嚴好。百千綵女列坐其上。十萬丈夫牽御而行。或復施與玻瓈寶車。眾雜妙寶。以爲嚴飾。端正女人充滿其中。寶帳覆上。幢旛侍側。或復施與碼碯藏車。飾以眾寶。熏諸雜香。種種妙華。散布莊嚴。百千綵女持寶瓔珞。駕馭均調。涉險能安。或復施與堅固香車。眾寶爲輪。莊嚴巨麗。寶

帳覆上。寶網垂下。種種寶衣敷布其中。清淨好香流芬外徹。其香美妙。稱悅人心。無量諸天翼從而行。載以眾寶。隨時給施。或復施與光明寶車。種種諸寶妙色映徹。眾妙寶網羅覆其上。雜寶瓔珞周帀垂下。散以末香。內外芬潔。所愛男女悉載其上。佛子。菩薩摩訶薩。以如是等眾妙寶車奉施佛時。以此善根如是迴向。所謂願一切眾生悉解供養最上福田。深信施佛得無量報。願一切眾生一心向佛。常遇無量清淨福田。願一切眾生於諸如來無所吝惜。具足成就大捨之心。願一切眾生於諸佛所修行施。離二乘願。

逮得如來無礙解脫一切智智。願一切眾生於諸佛所行無盡施。入佛無量功德智慧。願一切眾生入佛勝智。得成清淨無上智王。願一切眾生得佛徧至無礙神通隨所欲往。靡不自在。願一切眾生深入大乘。獲無量智。安住不動。願一切眾生皆能出生一切智法。爲諸天人最上福田。願一切眾生於諸佛所無嫌恨心。勤種善根。樂求佛智。願一切眾生任運能往一切佛刹。一刹那中。普周法界。而無懈倦。願一切眾生逮得菩薩自在神通。分身徧滿等虛空界一切佛所。親近供養。願一切眾生得無比身徧往十方而無厭。

倦。願一切眾生得廣大身。飛行迅疾。隨意所往。終無
懈退。願一切眾生得佛究竟自在威力。一剎那中。盡
虛空界。悉現諸佛神通變化。願一切眾生修安樂行。
隨順一切諸菩薩道。願一切眾生得速疾行。究竟十
力智慧神通。願一切眾生普入法界十方國土。悉盡
邊際等無差別。願一切眾生行普賢行。無有退轉。到
於彼岸。成一切智。願一切眾生升於無比智慧之乘。
隨順法性見如實理。是爲菩薩摩訶薩。以眾寶車奉
施。現在一切諸佛。及佛滅後所有塔廟善根迴向。爲
令眾生得於如來究竟出離無礙乘故。佛子。菩薩摩

訶薩。以眾寶車施菩薩等善知識時。以諸善根如是
迴向。所謂願一切眾生。心常憶持善知識教。專勤守
護。令不忘失。願一切眾生。與善知識同一義利。普攝
一切與共善根。願一切眾生。近善知識。尊重供養。悉
捨所有。順可其心。願一切眾生。得善志欲。隨逐善友
未嘗捨離。願一切眾生。常得值遇諸善知識。專意承
奉。不違其教。願一切眾生。樂善知識。常不捨離。無間
無雜。亦無誤失。願一切眾生。能以其身施善知識。隨
其教命。靡有違逆。願一切眾生。爲善知識之所攝受。
修習大慈。遠離諸惡。願一切眾生。隨善知識。聽聞諸

佛所說正法。願一切眾生與善知識同一善根清淨業果。與諸菩薩同一行願。究竟十力。願一切眾生悉能受持善知識法。逮得一切三昧境界智慧神通。願一切眾生悉能受持一切正法。修習諸行。到於彼岸。願一切眾生乘於大乘無所障礙。究竟成就一切智道。願一切眾生悉得上於一切智乘。至安隱處。無有退轉。願一切眾生知如實行。隨其所聞一切佛法。皆得究竟永無忘失。願一切眾生普爲諸佛之所攝受。得無礙智。究竟諸法。願一切眾生得無退失自在神通。所欲往詣。一念皆到。願一切眾生往來自在。廣行

化導令住大乘。願一切眾生所行不空。載以智乘。到究竟位。願一切眾生得無礙乘。以無礙智至一切處。是爲菩薩摩訶薩。施善知識種種車時。善根迴向。爲令眾生功德具足。與佛菩薩等無異故。佛子。菩薩摩訶薩。以眾寶車布施僧時。起學一切施心。智善了心。淨功德心。隨順捨心。僧寶難遇心。深信僧寶心。攝持正教心。住勝智樂得未曾有。爲大施會。出生無量廣大功德。深信佛教。不可沮壞。以諸善根如是迴向。所謂願一切眾生。普入佛法。憶持不忘。願一切眾生。離凡愚法。入賢聖處。願一切眾生。速入聖位。能以佛法。

次第開誘。願一切眾生。舉世宗重。言必信用。願一切
眾生。善入一切諸法平等。了知法界自性無二。願一
切眾生。從於如來智境而生。諸調順人所共圍繞。願
一切眾生。住離染法。滅除一切煩惱塵垢。願一切眾
生。皆得成就無上僧寶。離凡夫地。入賢聖眾。願一切
眾生。勤修善法。得無礙智。具聖功德。願一切眾生。得
智慧心。不著三世。於諸眾中自在如王。願一切眾生。
乘智慧乘。轉正法輪。願一切眾生。具足神通。一念能
往不可說不可說世界。願一切眾生。乘虛空身。於諸
世間智慧無礙。願一切眾生。普入一切虛空法界諸

佛眾會成就第一波羅蜜行。願一切眾生得輕舉身
殊勝智慧。悉能徧入一切佛刹。願一切眾生獲無邊
際善巧神足。於一切刹普現其身。願一切眾生得於
一切無所依身。以神通力如影普現。願一切眾生得
不思議自在神力。隨應可化。卽現其前教化調伏。願
一切眾生得入法界無礙方便。一念徧遊十方國土。
是爲菩薩摩訶薩。施僧寶車善根迴向。爲令眾生普
乘清淨無上智乘。於一切世間轉無礙法智慧輪故。
佛子。菩薩摩訶薩。以眾寶車布施聲聞獨覺之時。起
如是心。所謂福田心。尊敬心。功德海心。能出生功德

智慧心。從如來功德勢力所生心。百千億那由他劫。修習心。能於不可說劫。修菩薩行心。解脫一切魔繫。縛心。摧滅一切魔軍眾心。慧光照了無上法心。以此施車所有善根如是迴向。所謂願一切眾生。爲世所信。第一福田。具足無上檀波羅蜜。願一切眾生。離無益語。常樂獨處。心無二念。願一切眾生。成最第一清淨福田。攝諸眾生。令修福業。願一切眾生。成智慧淵。能與眾生無量無數善根果報。願一切眾生。住無礙行。滿足清淨第一福田。願一切眾生。住無諍法。了一切法。皆無所作。無性爲性。願一切眾生。常得親近最

上福田。具足修成無量福德。願一切眾生。能現無量自在神通。以淨福田攝諸含識。願一切眾生。具足無盡功德福田。能與眾生如來十力第一乘果。願一切眾生。爲能辦果真實福田。成一切智無盡福聚。願一切眾生。得滅罪法。悉能受持所未曾聞佛法句義。願一切眾生。常勤聽受一切佛法。聞悉解悟無空過者。願一切眾生。聽聞佛法通達究竟。如其所聞隨順演說。願一切眾生。於如來教信解修行。捨離一切九十六種外道邪見。願一切眾生。常見賢聖。增長一切最勝善根。願一切眾生。心常信樂。智行之士。與諸聖哲。

同止共歡。願一切眾生聽聞佛名。悉不唐捐。隨其所聞。咸得目見。願一切眾生善分別。知諸佛正教。悉能守護。持佛法者。願一切眾生常樂聽聞。一切佛法受持。讀誦。開示。照了。願一切眾生信解佛教。如實功德。悉捨所有。恭敬供養。是爲菩薩摩訶薩。施聲聞。獨覺。種種車時。善根迴向。爲令眾生皆得成就清淨第一智慧神通。精進修行。無有懈怠。獲一切智力。無畏故。佛子。菩薩摩訶薩。以眾寶車。施諸福田。乃至貧窮。孤獨者時。隨其所求。一切悉捨。心生歡喜。無有厭倦。仍向彼人。自悔責言。我應往就。供養供給。不應勞汝。遠

來疲頓。言已拜跪問訊起居。凡有所須一切施與。或時施彼摩尼寶車。以閻浮提第一女寶充滿其上。或復施與金莊嚴車。人間女寶充滿其上。或復施與妙瑠璃車。內宮妓女充滿其上。或施種種奇妙寶車。童女充滿如天姝女。或施無數寶莊嚴車。寶女滿中。柔明辯慧。或施所乘妙栴檀車。或復施與玻瓈寶車。悉載寶女充滿其上。顏容端正。色相無比。袿服莊嚴。見者欣悅。或復施與碼碯寶車。灌頂王子身載其上。或時施與堅固香車。所有男女悉載其中。或施一切寶莊嚴車。載以難捨親善眷屬。佛子。菩薩摩訶薩。以如

是等無量寶車。隨其所求。恭敬施與。皆令遂願歡喜
滿足。以此善根如是迴向。所謂願一切眾生乘不退
轉無障礙輪廣大之乘。詣不可思議菩提樹下。願一
切眾生乘清淨因大法智乘。盡未來劫修菩薩行。永
不退轉。願一切眾生乘一切法無所有乘。永離一切
分別執著。而常修習一切智道。願一切眾生乘無詔
誑正直之乘。往諸佛刹自在無礙。願一切眾生隨順
安住一切智乘。以諸佛法共相娛樂。願一切眾生皆
乘菩薩清淨行乘。具足菩薩十出離道及三昧樂。願
一切眾生乘四輪乘。所謂住好國土。依止善人。集勝

福德發大誓願。以此成滿一切菩薩清淨梵行。願一切眾生得普照十方。法光明乘。修學一切如來智力。願一切眾生乘佛法乘。到一切法究竟彼岸。願一切眾生載眾福善難思法乘。普示十方安隱正道。願一切眾生乘大施乘。捨慳恡垢。願一切眾生乘淨戒乘。持等法界無邊淨戒。願一切眾生乘忍辱乘。常於眾生離瞋濁心。願一切眾生乘大精進不退轉乘。堅修勝行趣菩提道。願一切眾生乘禪定乘。速至道場證菩提智。願一切眾生乘於智慧巧方便乘。化身充滿一切法界諸佛境界。願一切眾生乘法王乘。成就無

畏。恆普惠施一切智法。願一切眾生乘無所著智慧之乘。悉能徧入一切十方。於真法性而無所動。願一切眾生乘於一切諸佛法乘。示現受生徧十方刹。而不失壞大乘之道。願一切眾生乘一切智最上寶乘。滿足普賢菩薩行願而無厭倦。是爲菩薩摩訶薩以眾寶車施諸福田。乃至貧窮孤露之人善根迴向。爲令眾生具無量智。歡喜踊躍。究竟皆得一切智乘故。

第十六施車。因緣故來者。往昔有緣應受施故。瑜伽云。若有眾生來求種種能引戲樂。能引無義所施之物。不應施與。今言施以端正女人美色。豈不

相違。今云種種福田。豈皆施與。此中有二十願。初十約所施福田立願。後十約所施車立願。可知。結文中言及佛滅後所有塔廟。塔安舍利。廟置佛像。塔者。正云窣堵波。此云高顯。亦云歸宗之所。此施車一行。辨隨田別顯有五。上第一施佛。二施菩薩。三施僧。四施二乘。五施諸福田。五中皆有二十願。前三中。一約田有十願。次約車有十願。三施二乘中。緣覺有十願。聲聞有十願。後諸福田中亦有二十願。以諸田中有悲境故。言拜跪等。以劣田故。亦有二十願者。施田非一故。但就車發相似願。

佛子。菩薩摩訶薩。布施象寶。其性調順。七支具足。年齒盛壯。六牙清淨。口色紅赤。猶如蓮華。形體鮮白。譬如雪山。金幢爲飾。寶網羅覆。種種妙寶莊嚴。其鼻見者。欣玩無有厭足。超步萬里。曾不疲倦。或復施與調良馬寶。諸相具足。猶如天馬。妙寶月輪。以爲光飾。真金鈴網羅覆其上。行步平正。乘者安隱。隨意所往。迅疾如風。遊歷四洲。自在無礙。菩薩以此象寶馬寶。或奉養父母。及善知識。或給施貧乏。苦惱眾生。其心曠然。不生悔悵。但倍增欣慶。益加悲愍。修菩薩德。淨菩薩心。以此善根。如是迴向。所謂願一切眾生。住調順。

乘增長一切菩薩功德。願一切眾生得善巧乘。能隨
出生一切佛法。願一切眾生得信解乘。普照如來無
礙智力。願一切眾生得發趣乘。能普發與一切大願。
願一切眾生具足平等波羅蜜乘。成滿一切平等善
根。願一切眾生成就寶乘。生諸佛法無上智寶。願一
切眾生成就菩薩行莊嚴乘。開敷菩薩諸三昧華。願
一切眾生得無邊速疾乘。於無數劫淨菩薩心。精勤
思惟了達諸法。願一切眾生成就最勝調順大乘。以
善方便具菩薩地。願一切眾生成最高廣堅固大乘。
普能運載一切眾生。皆得至於一切智位。是爲菩薩

摩訶薩施象馬時善根迴向。爲令眾生皆得乘於無礙智乘。圓滿究竟至佛乘故。

第十七施象馬。二事相合有十願。一如性調順。二如隨意所往。三似彼盛壯。四如超步萬里。五猶行步平正。六如彼象寶。七似彼如華。八卽迅疾如風。九具菩薩地名最勝調象馬各有調義。故分二義。佛子。菩薩摩訶薩布施座時。或施所處師子之座。其座高廣殊特妙好。瑠璃爲足。金縷所成。柔軟衣服。以敷其上。建以寶幢。熏諸妙香。無量雜寶莊嚴之具。以爲莊校。金網覆上。寶鐸風搖。出妙音聲。奇珍萬計。周

而填飾。一切臣民所共瞻仰。灌頂大王獨居其上。宣布法化萬邦。遵奉其王。復以妙寶嚴身。所謂普光明寶。帝青寶。大帝青寶。勝藏摩尼寶。明淨如日。清涼猶月。周而繁布。譬如眾星。上妙莊嚴第一。無比海殊妙寶。海堅固幢寶。奇文異表。種種莊嚴。於大眾中最尊最勝。閻浮檀金離垢寶。繒以冠其首。享灌頂位。王閻浮提。具足無量。大威德力。以慈爲主。伏諸怨敵。教令所行。靡不承順。時轉輪王。以如是等百千萬億無量無數寶莊嚴座。施於如來第一福田。及諸菩薩。真善知識。賢聖僧寶。說法之師。父母宗親。聲聞獨覺。及以

發趣菩薩乘者。或如來塔。乃至一切貧窮孤露。隨其所須。悉皆施與。以此善根。如是迴向。所謂願一切眾生。坐菩提座。悉能覺悟諸佛正法。願一切眾生。處自在座。得法自在。諸金剛山。所不能壞。悉能摧伏一切魔軍。願一切眾生。得佛自在師子之座。一切眾生之所瞻仰。願一切眾生。得不可說不可說種種殊妙寶莊嚴座。於法自在化導眾生。願一切眾生。得三種世間最殊勝座。廣大善根之所嚴飾。願一切眾生。得周徧不可說不可說世界座。阿僧祇劫。歎之無盡。願一切眾生。得大深密福德之座。其身充滿一切法界。願

一切眾生得不思議種種寶座。隨其本願所念眾生。廣開法施。願一切眾生得善妙座。現不可說諸佛神通。願一切眾生得一切寶座。一切香座。一切華座。一切衣座。一切鬘座。一切摩尼座。一切琉璃等不思議種種寶座。無量不可說世界座。一切世間莊嚴清淨座。一切金剛座。示現如來威德自在成最正覺。是爲菩薩摩訶薩施寶座時善根迴向。爲令眾生獲離世間大菩提座。自然覺悟一切佛法故。

第十八施座。三種世間義如常釋。又辯法師云。地前爲願樂世間。初地至七地名功用世間。八至等

覺名無功用世間。有云西域傳。衆生界中有三世間。一地下世間。龍修羅等。二人中世間。三天上世間。若依智論三世間者。卽衆生五蘊及器爲三。佛子。菩薩摩訶薩。施諸寶蓋。此蓋殊特尊貴所用。種種大寶而爲莊嚴。百千億那由他上妙蓋中最爲第一。衆寶爲竿。妙網覆上。寶繩金鈴周而垂下。摩尼瓔珞次第懸布。微風吹動。妙音克諧。珠玉寶藏。種種充滿。無量奇珍。悉以嚴飾。栴檀沉水。妙香普熏。閻浮檀金光明清淨。如是無量百千億那由他阿僧祇衆妙寶物具足莊嚴。以清淨心奉施於佛。及佛滅後所有。

塔廟。或爲法故。施諸菩薩及善知識名聞法師。或施父母。或施僧寶。或復奉施一切佛法。或施種種眾生福田。或施師僧及諸尊宿。或施初發菩提之心。乃至一切貧窮孤露。隨有求者悉皆施與。以此善根如是迴向。所謂願一切眾生勤修善根以覆其身。常爲諸佛之所庇廕。願一切眾生功德智慧以爲其蓋。永離世間一切煩惱。願一切眾生覆以善法。除滅世間塵垢熱惱。願一切眾生得智慧藏。令眾樂見心無厭足。願一切眾生以寂靜白法而自覆蔭。皆得究竟不壞佛法。願一切眾生善覆其身。究竟如來清淨法身。願

一切眾生。作周徧蓋。十力智慧徧覆世間。願一切眾生得妙智慧。出過三世無所染著。願一切眾生得應供蓋。成勝福田。受一切供。願一切眾生得最上蓋。獲無上智。自然覺悟。是爲菩薩摩訶薩。布施蓋時善根迴向。爲令一切眾生得自在蓋。能持一切諸善法故。爲令一切眾生能以一蓋普覆一切虛空法界一切刹土。示現諸佛自在神通無退轉故。爲令一切眾生能以一蓋莊嚴十方一切世界供養佛故。爲令一切眾生以妙幢旛及諸寶蓋供養一切諸如來故。爲令一切眾生得普莊嚴蓋。徧覆一切諸佛國土盡無餘。

故。爲令一切眾生。得廣大蓋。普蓋眾生。皆令於佛。生
信解故。爲令一切眾生。以不可說。眾妙寶蓋。供養一
佛。於不可說一一佛所。皆是故。爲令一切眾生。得
佛菩提。高廣之蓋。普覆一切諸如來故。爲令一切眾
生。得一切摩尼寶莊嚴蓋。一切寶瓔珞莊嚴蓋。一切
堅固香莊嚴蓋。種種寶清淨莊嚴蓋。無量寶清淨莊
嚴蓋。廣大寶清淨莊嚴蓋。寶網彌覆。寶鈴垂下。隨風
搖動。出微妙音。普覆法界。虛空界。一切世界。諸佛身
故。爲令一切眾生。得無障無礙。智莊嚴蓋。普覆一切
諸如來故。又欲令一切眾生。得第一智慧故。又欲令

一切眾生得佛功德莊嚴故。又欲令一切眾生於佛
功德生清淨欲願心故。又欲令一切眾生得無量無
邊自在心寶故。又欲令一切眾生滿足諸法自在智
故。又欲令一切眾生以諸善根普覆一切故。又欲令
一切眾生成就最勝智慧蓋故。又欲令一切眾生成
就十力普徧蓋故。又欲令一切眾生能以一蓋彌覆
法界諸佛刹故。又欲令一切眾生於法自在爲法王
故。又欲令一切眾生得大威德自在心故。又欲令一
切眾生得廣大智恆無絕故。又欲令一切眾生得無
量功德普覆一切皆究竟故。又欲令一切眾生以諸

功德蓋其心故。又欲令一切眾生以平等心覆眾生故。又欲令一切眾生得大智慧平等蓋故。又欲令一切眾生具大迴向巧方便故。又欲令一切眾生獲勝欲樂清淨心故。又欲令一切眾生得善欲樂清淨意故。又欲令一切眾生得大迴向普覆一切諸眾生故。

第十九施蓋。編草爲蓋。七寶蓋隨。況眾寶嚴。功報何極。

佛子。菩薩摩訶薩。或施種種上妙幢旛。眾寶爲竿。寶繪爲旛。種種雜綵。以爲其幢。寶網垂覆。光色徧滿。寶鐸微搖。音節相和。奇特妙寶。形如半月。閻浮檀金光。

踰數日。悉置幢上。隨諸世界業果所現種種妙物。以爲嚴飾。如是無數千萬億那由他諸妙幢旛。接影連輝。遞相間發。光明嚴潔。周徧大地。充滿十方。虛空法界。一切佛刹。菩薩摩訶薩淨心信解。以如是等無量幢旛。或施現在一切諸佛。及佛滅後所有塔廟。或施法寶。或施僧寶。或施菩薩諸善知識。或施聲聞。及辟支佛。或施大眾。或施別人。諸來求者。普皆施與。以此善根。如是迴向。所謂願一切眾生。皆能建立一切善根。福德幢旛。不可毀壞。願一切眾生。建一切法自在幢旛。尊重愛樂。勤加守護。願一切眾生。常以寶繪書

寫正法。護持諸佛菩薩法藏。願一切眾生。建高顯幢。
然智慧燈。普照世間。願一切眾生。立堅固幢。悉能摧
殄一切魔業。願一切眾生。建智力幢。一切諸魔所不
能壞。願一切眾生。得大智慧那羅延幢。摧滅一切世
間慢幢。願一切眾生。得智慧日大光明幢。以智日光
普照法界。願一切眾生。具足無量寶莊嚴幢。充滿十
方一切世界。供養諸佛。願一切眾生。得如來幢。摧滅
一切九十六種外道邪見。是爲菩薩摩訶薩施幢旛
時善根迴向。爲令一切眾生。得甚深高廣菩薩行幢。
及諸菩薩神通行幢。清淨道故。

第二十施幢旛。二事合一願。

佛子。菩薩摩訶薩開眾寶藏。以百千億那由他諸妙珍寶。給施無數一切眾生。隨意與之心無恡惜。以諸善根如是迴向。所謂願一切眾生常見佛寶。捨離愚癡修行正念。願一切眾生皆得具足法寶光明。護持一切諸佛法藏。願一切眾生能悉攝受一切僧寶。周給供養。恆無厭足。願一切眾生得一切智無上心寶。淨菩提心無有退轉。願一切眾生得智慧寶。普入諸法心無疑惑。願一切眾生具足菩薩諸功德寶。開示演說無量智慧。願一切眾生得於無量妙功德寶。修

成正覺十力智慧。願一切眾生得妙三昧十六智寶。究竟成滿廣大智慧。願一切眾生成就第一福田之寶。悟入如來無上智慧。願一切眾生得成第一無上寶王。以無盡辯開演諸法。是爲菩薩摩訶薩施眾寶時善根迴向。爲令一切眾生皆得成滿第一智寶。如來無礙淨眼寶故。

第二十一開藏寶。言十六智寶者。有二佛地四智。智各有四。故爲十六。以果位自在正融通故。今依賢首。卽是八忍八智。

佛子。菩薩摩訶薩。或以種種妙莊嚴具而爲布施。所

謂一切身莊嚴具令身淨妙靡不稱可。菩薩摩訶薩等觀一切世間眾生猶如一子。欲令皆得身淨莊嚴成就世間最上安樂。佛智慧樂安住佛法利益眾生。以如是等百千億那由他種種殊妙寶莊嚴具。勤行布施。行布施時。以諸善根如是迴向。所謂願一切眾生成就無上妙莊嚴具。以諸清淨功德智慧莊嚴人天。願一切眾生得清淨莊嚴相。以淨福德莊嚴其身。願一切眾生得上妙莊嚴相。以百福相莊嚴其身。願一切眾生得不雜亂莊嚴相。以一切相莊嚴其身。願一切眾生得善淨語言莊嚴相。具足種種無盡辯才。

願一切眾生得一切功德聲莊嚴相。其音清淨聞者喜悅。願一切眾生得可愛樂諸佛語言莊嚴相。令諸眾生聞法歡喜修清淨行。願一切眾生得心莊嚴相。入深禪定普見諸佛。願一切眾生得總持莊嚴相。照明一切諸佛正法。願一切眾生得智慧莊嚴相。以佛智慧莊嚴其心。是爲菩薩摩訶薩惠施一切莊嚴具時。善根迴向。爲令眾生具足一切無量佛法功德。智慧圓滿莊嚴。永離一切僞慢放逸故。

第二十二施莊嚴具十願中。初一利他。後九自利。佛子。菩薩摩訶薩。以受灌頂自在王位。摩尼寶冠。及

髻中珠。普施眾生。心無恡惜。常勤修習。爲大施主。修學施慧。增長捨根。智慧善巧。其心廣大。給施一切。以彼善根。如是迴向。所謂願一切眾生。得諸佛法之所灌頂。成一切智。願一切眾生。具足頂髻。得第一智。到於彼岸。願一切眾生。以妙智寶。普攝眾生。皆令究竟。功德之頂。願一切眾生。皆得成就。智慧寶頂。堪受世間之所禮敬。願一切眾生。以智慧冠莊嚴其首。爲一切法自在之王。願一切眾生。智慧明珠。繫其頂上。一切世間無能見者。願一切眾生。皆悉堪受世間頂禮。成就慧頂。照明佛法。願一切眾生。首冠十力莊嚴之。

冠。智慧寶海清淨具足。願一切眾生。至大地頂得一
切智究竟十力。破欲界頂諸魔眷屬。願諸眾生得成
第一無上頂王。獲一切智光明之頂。無能映奪。是爲
菩薩摩訶薩施寶冠時善根迴向。爲令眾生得第一
智最清淨處智慧摩尼妙寶冠故。

第二十三施寶冠及髻珠二事合一。言智慧明珠
等者。體圓德備。鑒徹惑亡。爲智明珠。極果所宗。故
名頂上。是祕是妙。無能見者。亦以權隱實。名在髻
中。開權顯實。故名解髻。文無解義。因便故來。

佛子。菩薩摩訶薩。見有眾生處在牢獄黑暗之處。杻

械枷鎖檢繫其身。起坐不安。眾苦競集。無有親識。無歸無救。裸露饑羸。酸劇難忍。菩薩見已。捨其所有。一切財寶。妻子眷屬。及以自身。於牢獄中救彼眾生。如大悲菩薩。妙眼王菩薩。既救度已。隨其所須。普皆給施。除其苦患。令得安隱。然後施以無上法寶。令捨放逸。安住善根。於佛教中心無退轉。佛子。菩薩摩訶薩。於牢獄中救眾生時。以諸善根如是迴向。所謂願一切眾生。究竟解脫。貪愛纏縛。願一切眾生。斷生死流。升智慧岸。願一切眾生。除滅愚癡。生長智慧。解脫一切煩惱纏縛。願一切眾生。滅三界縛。得一切智。究竟

出離。願一切眾生永斷一切煩惱結縛。到無煩惱無
障礙地。智慧彼岸。願一切眾生離諸動念。思惟分別。
入於平等不動智地。願一切眾生脫諸欲縛。永離世
間一切貪欲。於三界中無所染著。願一切眾生得勝
志樂。常蒙諸佛爲說法門。願一切眾生得無著無縛
解脫心。廣大如法界。究竟如虛空。願一切眾生得菩
薩神通。一切世界調伏眾生。令離世間住於大乘。是
爲菩薩摩訶薩救度牢獄苦眾生時善根迴向。爲令
眾生普入如來智慧地故。

第二十四施妻子救獄囚。上來皆明外施。此下二

段明無畏施。初一兼於內外之財。內財爲難故。佛子。菩薩摩訶薩。見有獄囚五處被縛。受諸苦毒。防衛驅逼。將之死地。欲斷其命。捨閻浮提一切樂具。親戚朋友。悉將永訣。置高碓上。以刀屠割。或用木槍。豎貫其體。衣纏油沃。以火焚燒。如是等苦。種種逼迫。菩薩見已。自捨其身。而代受之。如阿逸多菩薩。殊勝行王菩薩。及餘無量諸大菩薩。爲眾生故。自捨身命。受諸苦毒。菩薩爾時語主者言。我願捨身。以代彼命。如此等苦。可以與我。如治彼人。隨意皆作。設過彼苦。阿僧祇倍。我亦當受。令其解脫。我若見彼。將被殺害。不

捨身命救贖其苦。則不名爲住菩薩心。何以故。我爲
救護一切眾生。發一切智菩提心故。佛子。菩薩摩訶
薩。自捨身命救眾生時。以諸善根如是迴向。所謂願
一切眾生得無斷盡究竟身命。永離一切災橫逼惱。
願一切眾生依諸佛住。受一切智具足十力菩提記
莢。願一切眾生普救含識。令無怖畏。永出惡道。願一
切眾生得一切命。入於不死智慧境界。願一切眾生
永離怨敵。無諸厄難。常爲諸佛善友所攝。願一切眾
生捨離一切刀劍兵仗諸惡苦具。修行種種清淨善
業。願一切眾生離諸怖畏。菩提樹下摧伏魔軍。願一

切眾生離大眾怖於無上法心淨無畏能爲最上大
師子吼願一切眾生得無障礙師子智慧於諸世間
修行正業願一切眾生到無畏處常念救護諸苦眾
生是爲菩薩摩訶薩自捨身命救彼臨刑諸獄囚時
善根迴向爲令眾生離生死苦得於如來上妙樂故。

第二十五捨身代死此一向內財。

大方廣佛華嚴經綱要卷第二十六

大方廣佛華嚴經綱要卷第二十七

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

十迴向品第二十五之五

佛子。菩薩摩訶薩。布施乞者。連膚頂髻。如寶髻王。菩薩勝妙身菩薩。及餘無量諸菩薩等。菩薩是時見乞者來。心生歡喜。而語之言。汝今若須連膚頂髻。可就我取。我此頂髻。閻浮提中。最爲第一。作是語時。心無動亂。不念餘業。捨離世間。志求寂靜。究竟清淨。精勤

質直向一切智。便執利刀。割其頭上連膚頂髻。右膝著地。合十指掌。一心施與。正念三世一切諸佛菩薩所行。發大歡喜。增上志樂。於諸法中。意善開解。不取於苦。了知苦受無相無生。諸受互起。無有常住。是故我應同去來今一切菩薩修行。大捨發深信樂。求一切智。無有退轉。不由他教。善知識力。菩薩摩訶薩。作是施時。以諸善根。如是迴向。所謂願一切眾生得無見頂。成就菩薩如塔之髻。願一切眾生得紺青髮。金剛髮。細軟髮。能滅眾生一切煩惱。願一切眾生得潤澤髮。密緻髮。不侵鬢額髮。願一切眾生得柔軟髮。盡

於鬢額而生髮。願一切眾生得如卍字髮。螺文右旋髮。願一切眾生得佛相髮。永離一切煩惱結習。願一切眾生得光明髮。其光普照十方世界。願一切眾生得無亂髮。如如來髮淨妙無雜。願一切眾生得成應供頂塔之髮。令其見者如見佛髮。願一切眾生皆得如來無染著髮。永離一切暗翳塵垢。是爲菩薩摩訶薩施連膚髻時善根迴向。爲令眾生其心寂靜。皆得圓滿諸陀羅尼。究竟如來一切種智十種力故。

第二十六施連膚頂髻。卽肉髻也。行中六。一覩乞生欣。住種性故。二而語下。語意清淨。離二障故。三

便執利刀下。身業正捨。事業勝故。四正念下。欣慕上流。意業勝故。五於諸法下。巧安諦理。無相攝故。六是故下。決志思齊。依止勝故。此及迴向。有七最勝。成波羅蜜。前後諸施。文多略無。以切內施。故特標最勝。無見頂相。縱上界亦有餘故。佛相髮。準梵本卽是右旋。

佛子。菩薩摩訶薩。以眼布施諸來乞者。如歡喜行菩薩。月光王菩薩。及餘無量諸菩薩等。所行惠施。菩薩摩訶薩。布施眼時。起清淨施眼心。起清淨智眼心。起依止法光明心。起現觀無上佛道心。發迴向廣大智。

慧心。發與三世菩薩平等捨施心。發於無礙眼起不
壞淨信心。於其乞者起歡喜攝受心。爲究竟一切神
通故。爲生佛眼故。爲增廣大菩提心故。爲修習大慈
悲故。爲制伏六根故。於如是法而生其心。佛子。菩薩
摩訶薩。布施眼時。於其乞者。心生愛樂。爲設施會。增
長法力。捨離世間愛見放逸。除斷欲縛。修習菩提。隨
彼所求。心安不動。不違其意。皆令滿足。而常隨順。無
二捨行。以此善根。如是迴向。所謂願一切眾生得最
勝眼。示導一切。願一切眾生得無礙眼。開廣智藏。願
一切眾生得淨肉眼。光明鑒徹。無能蔽者。願一切眾

生得淨天眼。悉見眾生生死業果。願一切眾生得淨法眼。能隨順入如來境界。願一切眾生得智慧眼。捨離一切分別取著。願一切眾生具足佛眼。悉能覺悟一切諸法。願一切眾生成就普眼。盡諸境界無所障礙。願一切眾生成就清淨離癡翳眼。了眾生界空無所有。願一切眾生具足清淨無障礙眼。皆得究竟如來十力。是爲菩薩摩訶薩布施眼時善根迴向。爲令眾生得一切智清淨眼故。

第二十七施眼。智論說施有三種。飲食爲下。珍寶爲中。頭目五臟爲上。文中有四。一標彰引例。謂如

歡喜行菩薩等。二菩薩下。發起勝心。三爲究竟下。明行心所爲。四佛子下。彰施儀式。迴向行願成十眼。與離世間大同小異。

佛子。菩薩摩訶薩。能以耳鼻施諸乞者。如勝行王菩薩。無怨勝菩薩。及餘無量諸菩薩等。布施之時。親附乞者。專心修習諸菩薩行。具佛種性。生如來家。念諸菩薩所修施行。常勤發起諸佛菩提。清淨諸根功德。智慧觀察。三有無一。堅固願常得見諸佛菩薩。隨順憶念一切佛法。知身虛妄空無所有。無所貪惜。菩薩如是施耳鼻時。心常寂靜。調伏諸根。勉濟眾生險惡。

諸難。生長一切智慧功德。入大施海。了達法義。具修諸道。依智慧行。得法自在。以不堅身易堅固身。佛子。菩薩摩訶薩。布施耳時。以諸善根如是迴向。所謂願一切眾生得無礙耳。普聞一切說法之音。願一切眾生得無障耳。悉能解了一切音聲。願一切眾生得如來耳。一切聰達無所壅滯。願一切眾生得清淨耳。不因耳處生分別心。願一切眾生得無聾聵耳。令蒙昧識畢竟不生。願一切眾生得徧法界耳。悉知一切諸佛法音。願一切眾生得無礙耳。開悟一切無障礙法。願一切眾生得無壞耳。善知諸論無能壞者。願一切

眾生得普聞耳。廣大清淨爲諸耳王。願一切眾生具足天耳。及以佛耳。是爲菩薩摩訶薩布施耳時善根迴向。爲令眾生皆悉獲得清淨耳故。佛子。菩薩摩訶薩布施鼻時如是迴向。所謂願一切眾生得隆直鼻。得隨好鼻。得善相鼻。得可愛樂鼻。得淨妙鼻。得隨順鼻。得高顯鼻。得伏怨鼻。得善見鼻。得如來鼻。願一切眾生得離恚怒面。得一切法面。得無障礙面。得善見面。得隨順面。得清淨面。得離過失面。得如來圓滿面。得徧一切處面。得無量美好面。是爲菩薩摩訶薩布施鼻時善根迴向。爲令眾生究竟得入諸佛法故。爲

令眾生究竟攝受諸佛法故。爲令眾生究竟了知諸佛法故。爲令眾生究竟住持諸佛法故。爲令眾生究竟常見諸如來故。爲令眾生皆悉證得佛法門故。爲令眾生究竟成就無能壞心故。爲令眾生皆能照了諸佛正法故。爲令眾生普悉嚴淨諸佛國土故。爲令眾生皆得如來大威力身故。是爲菩薩摩訶薩施耳鼻時善根迴向。

第二十八施耳鼻。布施之時安住勝心。有六最勝。一具佛種性。卽安住最勝。二念諸下。事業最勝。三常勤下。依止最勝。四隨順下。清淨最勝。五勉濟下。

意樂最勝。六生長下。巧便最勝。後一願中得十面者。鼻居面中。好醜由起。故相從立願。

佛子。菩薩摩訶薩。安住堅固自在。地中。能以牙齒施諸眾生。猶如往昔華齒王菩薩。六牙象王菩薩。及餘無量諸菩薩等。菩薩摩訶薩。施牙齒時。其心清淨。希有難得。如優曇華。所謂無盡心施。大信心施。步步成就。無量捨心施。調伏諸根心施。一切悉捨心施。一切智願心施。安樂眾生心施。大施。極施。勝施。最勝施。輟身要用。無所嫌恨心施。菩薩爾時。以諸善根。如是迴向。所謂願一切眾生。得銛白牙齒。成最勝塔。受天人

供。願一切眾生得齊平牙齒。如佛相好無有疎缺。願一切眾生得調伏心。善趣菩薩波羅蜜行。願一切眾生。口善清淨。牙齒鮮白。明顯現。願一切眾生。得可憶念莊嚴牙齒。其口清淨無可惡相。願一切眾生。牙齒成就具滿四十。常出種種希有妙香。願一切眾生。意善調伏。牙齒鮮潔如白蓮華。文理迴旋卍字成就。願一切眾生。口脣鮮淨。牙齒潔白。放無量光。周徧照耀。願一切眾生。牙齒堅利。食無完粒。無所味著。爲上福田。願一切眾生。於牙齒間常放光明。授諸菩薩第一記莖。是爲菩薩摩訶薩。施牙齒時善根迴向。爲令

眾生具一切智。於諸法中智慧清淨故。

第二十九施牙齒。初施行中。言安住堅固自在位者。登地已上故。十願中。唯第三單約心說。謂智能調惑。趣於彼岸。如牙調食。以資法身。餘約齒說。

佛子。菩薩摩訶薩。若有人來從乞舌時。於乞者所。以慈悲心。軟語愛語。猶如往昔端正面王菩薩。不退轉菩薩。及餘無量諸菩薩等。佛子。菩薩摩訶薩。於諸趣中。而受生時。有無量百千億那由他眾生。而來乞舌。菩薩爾時。安置其人在師子座。以無恚心。無害心。無恨心。大威德心。從佛種性所生心。住於菩薩所住心。

常不濁亂心。住大勢力心。於身無著心。於語無著心。兩膝著地。開口出舌。以示乞者。慈心軟語而告之言。我今此身普皆屬汝。可取我舌隨意所用。令汝所願皆得滿足。菩薩爾時以諸善根如是迴向。所謂願一切眾生得周普舌。悉能宣示諸語言法。願一切眾生得覆面舌。所言無二皆悉真實。願一切眾生得普覆一切佛國土舌。示現諸佛自在神通。願一切眾生得軟薄舌。恆受美妙清淨上味。願一切眾生得辯才舌。能斷一切世間疑網。願一切眾生得光明舌。能放無數萬億光明。願一切眾生得決定舌。辯說諸法無有

窮盡願一切眾生得普調伏舌。善能開示一切祕要。所有言說皆令信受。願一切眾生得普通達舌。善入一切語言大海。願一切眾生得善說一切諸法門舌。於言語智悉到彼岸。是爲菩薩摩訶薩布施舌時善根迴向。爲令眾生皆得圓滿無礙智故。

第三十施舌。安置下。發十勝心。

佛子。菩薩摩訶薩以頭布施諸來乞者。如最勝智菩薩。及大丈夫迦尸國王等諸大菩薩所行布施。爲欲成就入一切法最勝智首。爲欲成就證大菩提救眾生首。爲欲具足見一切法最第一首。爲得正見清淨。

智首。爲欲成就無障礙首。爲欲證得第一地首。爲求世間最勝智首。欲成三界無能見頂淨智慧首。爲得示現普到十方智慧王首。爲欲滿足一切諸法無能破壞自在之首。佛子。菩薩摩訶薩。安住是法精勤修習。則爲已入諸佛種性。學佛行施。於諸佛所生清淨信。增長善根。令諸乞者皆得喜足。其心清淨慶悅無量。心淨信解。照明佛法。發菩提意。安住捨心。諸根悅豫。功德增長。生善樂欲。常好修行。廣大施行。菩薩爾時。以諸善根如是迴向。所謂願一切眾生得如來頭。得無見頂。於一切處無能暎蔽。於諸佛刹最爲上首。

其髮右旋光淨潤澤。卍字嚴飾世所希有。具足佛首。成就智首。一切世間最第一首。爲具足首。爲清淨首。爲坐道場圓滿智首。是爲菩薩摩訶薩布施頭時善根迴向。爲令眾生得最勝法。成於無上大智慧故。

第三十一施頭。爲欲下。顯施所爲。有十種皆約佛智。一入理。二導悲。三見事。四離障。五融事理。六爲歸依。七超劣。八見無初相。九理用自在。十卽事而真。故不可壞。施行亦具最勝。

佛子。菩薩摩訶薩以其手足施諸眾生。如常精進菩薩。無憂王菩薩。及餘無量諸菩薩等。於諸趣中種種

生處布施手足。以信爲手。起饒益行。往反周旋。勤修正法。願得寶手。以手爲施。所行不空。具菩薩道。常舒其手。擬將廣惠。安步遊行。勇猛無怯。以淨信力。具精進行。除滅惡道。成就菩提。佛子。菩薩摩訶薩如是施時。以無量無邊廣大之心。開淨法門。入諸佛海。成就施手。周給十方。願力任持。一切智道。住於究竟離垢之心。法身智身無斷無壞。一切魔業不能傾動。依善知識堅固其心。同諸菩薩修行施度。佛子。菩薩摩訶薩爲諸眾生求一切智。施手足時。以諸善根如是迴向。所謂願一切眾生具神通力。皆得寶手。得寶手已。

各相尊敬。生福田想。以種種寶更相供養。又以眾寶
供養諸佛。興妙寶雲徧諸佛土。令諸眾生互起慈心。
不相惱害。遊諸佛刹安住無畏。自然具足究竟神通。
又令皆得寶手。華手。香手。衣手。蓋手。華鬘手。末香手。
莊嚴具手。無邊手。無量手。普手。得是手已。以神通力。
常勤往詣一切佛土。能以一手徧摩一切諸佛世界。
以自在手持諸眾生。得妙相手。放無量光。能以一手
普覆眾生。成於如來手指網縵赤銅爪相。菩薩爾時
以大願手普覆眾生。願一切眾生志常樂求無上菩
提。出生一切功德大海。見來乞者歡喜無厭。入佛法

海。同佛善根。是爲菩薩摩訶薩。施手足時。善根迴向。
第三十二。施手足。二事合願。信爲手因。果能雨寶。
行爲足因。果能遊步。次佛子。下淨心正施。初施手
心。願力已下。明施足心。如足住地。能持身故。願住
智地。能成智身。離心垢故。能顯法身。法身湛然。故
不可壞。智證永續。故無有斷。

佛子。菩薩摩訶薩。壞身出血。布施衆生。如法業菩薩。
善意王菩薩。及餘無量諸菩薩等。於諸趣中。施身血
時。起成就一切智心。起欣仰大菩提心。起樂修菩薩
行心。起不取苦受心。起樂見乞者心。起不嫌來乞心。

起趣向一切菩薩道心。起守護一切菩薩捨心。起增
廣菩薩善施心。起不退轉心。不休息心。無戀己心。以
諸善根如是迴向。所謂願一切眾生。皆得成就法身
智身。願一切眾生得無勞倦身。猶如金剛。願一切眾
生得不可壞身。無能傷害。願一切眾生得如變化身。
普現世間無有盡極。願一切眾生得可愛樂身。淨妙
堅固。願一切眾生得法界生身。同於如來無所依止。
願一切眾生得如妙寶光明之身。一切世人無能暎
蔽。願一切眾生得智藏身。於不死界而得自在。願一
切眾生得寶海身。見皆獲益無空過者。願一切眾生。

得虛空身。世間惱患無能染著。是爲菩薩摩訶薩施身血時。以大乘心。清淨心。廣大心。欣悅心。慶幸心。歡喜心。增上心。安樂心。無濁心。善根迴向。

第三十三壞身出血施。於諸下起十二勝心。

佛子。菩薩摩訶薩。見有乞求其身體肉。歡喜輒語。謂乞者言。我身體肉。隨意取用。如饒益菩薩。一切施王菩薩。及餘無量諸菩薩等。於諸趣中種種生處。以其髓肉施乞者時。歡喜廣大。施心增長。同諸菩薩修習善根。離世塵垢。得深志樂。以身普施。心無有盡。具足無量廣大善根。攝受一切妙功德寶。如菩薩法受行。

無厭。心常愛樂。布施功德。一切周給。心無有悔。審觀諸法。從緣無體。不貪施業。及業果報。隨所會遇。平等施與。佛子。菩薩摩訶薩。如是施時。一切諸佛。皆悉現前。想之如父。得護念故。一切眾生。皆悉現前。普令安住。清淨法故。一切世界。皆悉現前。嚴淨一切佛國土故。一切眾生。皆悉現前。以大悲心。普救護故。一切佛道。皆悉現前。樂觀如來十種力故。去來現在一切菩薩。皆悉現前。同共圓滿諸善根故。一切無畏。皆悉現前。能作最上師子吼故。一切三世。皆悉現前。得平等智。普觀察故。一切世間。皆悉現前。發廣大願。盡未來

劫修菩提故。一切菩薩無疲厭行。皆悉現前。發無數
量廣大心故。佛子。菩薩摩訶薩施髓肉時。以此善根
如是迴向。所謂願一切眾生得金剛身。不可沮壞。願
一切眾生得堅密身。恆無缺減。願一切眾生得意生
身。猶如佛身莊嚴清淨。願一切眾生得百福相身。三
十二相而自莊嚴。願一切眾生得八十種好妙莊嚴
身。具足十力。不可斷壞。願一切眾生得如來身。究竟
清淨。不可限量。願一切眾生得堅固身。一切魔怨所
不能壞。願一切眾生得一相身。與三世佛同一身相。
願一切眾生得無礙身。以淨法身徧虛空界。願一切

眾生得菩提藏身。普能容納一切世間。是爲菩薩摩訶薩。求一切智施髓肉時。善根迴向。爲令眾生皆得如來究竟清淨無量身故。

第三十四施身髓肉。二事合願。意生身。如楞伽說。佛子。菩薩摩訶薩。以心布施諸來乞者。如無悔厭菩薩。無礙王菩薩。及餘無量諸大菩薩。以其自心施乞者時。學自在施心。修一切施心。習行檀波羅蜜心。成就檀波羅蜜心。學一切菩薩布施心。一切悉捨無盡心。一切悉施慣習心。荷負一切菩薩施心。正念一切諸佛現前心。供養一切諸來乞者。無斷絕心。菩薩

摩訶薩如是施時。其心清淨。爲度一切諸眾生故。爲得十力菩提處故。爲依大願而修行故。爲欲安住菩薩道故。爲欲成就一切智故。爲不捨離本誓願故。以諸善根如是迴向。所謂願一切眾生得金剛藏心。一切金剛圍山等所不能壞。願一切眾生得卍相莊嚴金剛界心。得無能動搖心。得不可恐怖心。得利益世間常無盡心。得大勇猛幢智慧藏心。得如那羅延堅固幢心。得如眾生海不可盡心。得那羅延藏無能壞心。得滅諸魔業魔軍眾心。得無所畏心。得大威德心。得常精進心。得大勇猛心。得不驚懼心。得被金剛甲

胃心得諸菩薩最上心得成就佛法菩提光明心得
菩提樹下坐安住一切諸佛正法離諸迷惑成一切
智心得成就十力心是爲菩薩摩訶薩布施心時善
根迴向爲令眾生不染世間具足如來十力心故。

第三十五施心。以其下起十勝心。後顯願有二十
心。金剛藏者。藏卽名堅。金剛亦堅。卽佛地智。世法
莫壞。

佛子。菩薩摩訶薩。若有乞求腸腎肝肺。悉皆施與。如
善施菩薩。降魔自在。王菩薩。及餘無量諸大菩薩。行
此施時。見乞者來。其心歡喜。以愛眼觀。爲求菩提。隨

其所須悉皆施與。心不中悔。觀察此身無有堅固。我應施彼。取堅固身。復念此身尋卽敗壞。見者生厭。狐狼餓狗之所噉食。此身無常。會當棄捨。爲他所食。無所覺知。佛子。菩薩摩訶薩。作是觀時。知身無常。穢污之極。於法解悟。生大歡喜。敬心諦視。彼來乞者。如善知識而來護想。隨所乞求。無不惠施。以不堅身。易堅固身。佛子。菩薩摩訶薩。如是施時。所有善根。悉以迴向。願一切眾生。得智藏身。內外清淨。願一切眾生。得福藏身。能普任持。一切智願。願一切眾生。得上妙身。內蘊妙香。外發光明。願一切眾生。得腹不現身。上下

端直。支節相稱。願一切眾生得智慧身。以佛法味充
悅滋長。願一切眾生得無盡身。修習安住甚深法性。
願一切眾生得陀羅尼清淨藏身。以妙辯才顯示諸
法。願一切眾生得清淨身。若身若心內外俱淨。願一
切眾生得如來智深觀行身。智慧充滿。雨大法雨。願
一切眾生得內寂身。外爲眾生作智幢王。放大光明。
普照一切。是爲菩薩摩訶薩。施腸腎肝肺善根迴向。
爲令眾生內外清淨。皆得安住無礙智故。

第三十六施腸腎肝肺。四事合一迴向。起十勝心。
佛子。菩薩摩訶薩。布施乞者支節諸骨。如法藏菩薩。

光明王菩薩。及餘無量諸大菩薩。施其身分支節骨
時。見乞者來。生愛樂心。歡喜心。淨信心。安樂心。勇猛
心。慈心。無礙心。清淨心。隨所乞求。皆施與心。菩薩摩
訶薩。施身骨時。以諸善根如是迴向。所謂願一切眾
生。得如化身。不復更受骨肉血身。願一切眾生。得金
剛身。不可破壞。無能勝者。願一切眾生。得一切智圓
滿法身。於無縛無著無繫界生。願一切眾生。得智力
身。諸根圓滿。不斷不壞。願一切眾生。得法力身。智力
自在。到於彼岸。願一切眾生。得堅固身。其身真實常
無散壞。願一切眾生。得隨應身。教化調伏一切眾生。

願一切眾生得智熏身。具那羅延支節大力。願一切
眾生得堅固相續不斷絕身。永離一切疲極勞倦。願
一切眾生得大力安住身。悉能具足精進大力。願一
切眾生得徧世間平等法身。住於無量最上智處。願
一切眾生得福德力身。見者蒙益。遠離眾惡。願一切
眾生得無依處身。皆得具足無依著智。願一切眾生
得佛攝受身。常爲一切諸佛加護。願一切眾生得普
饒益。諸眾生身。悉能徧入一切諸道。願一切眾生得
普現身。普能照現一切佛法。願一切眾生得具足精
進身。專念勤修大乘智行。願一切眾生得離我慢貢

高。清。淨。身。智。常。安。住。無。所。動。亂。願。一。切。眾。生。得。堅。固。行。身。成。就。大。乘。一。切。智。業。願。一。切。眾。生。得。佛。家。身。永。離。世。間。一。切。生。死。是。爲。菩。薩。摩。訶。薩。施。身。骨。時。善。根。迴。向。爲。令。眾。生。得。一。切。智。永。清。淨。故。

第三十七施支節諸骨。前云骨髓。髓已前明。今開支節自是一事。如節節支解。卽前列所無。無繫界者。卽涅槃界。所爲中。言得一切智者。智爲萬德之骨故。

佛子。菩薩摩訶薩。見有人來手執利刀。乞其身皮。心生歡喜。諸根悅豫。譬如有人惠以重恩。逢迎引納。敷

座令坐。曲躬恭敬。而作是念。此來乞者。甚爲難遇。斯欲滿我一切智願。故來求索。饒益於我。歡喜和顏。而語之言。我今此身一切皆捨。所須皮者。隨意取用。猶如往昔清淨藏菩薩。金脇鹿王菩薩。及餘無量諸大菩薩等。無有異。菩薩爾時以諸善根如是迴向。所謂願一切眾生得微細皮。猶如如來色相清淨。見者無厭。願一切眾生得不壞皮。猶如金剛。無能壞者。願一切眾生得金色皮。如閻浮檀。上妙真金。清淨明潔。願一切眾生得無量色皮。隨其心樂。現清淨色。願一切眾生得淨妙色皮。具足沙門善輒清淨如來色相。願

一切眾生得第一色皮。自性清淨色相無比。願一切
眾生成就如來清淨色皮。以諸相好而自莊嚴。願一
切眾生得妙色皮。放大光明普照一切。願一切眾生
得明網皮。如世高幢。放不可說圓滿光明。願一切眾
生得潤澤色皮。一切色相悉皆清淨。是爲菩薩摩訶
薩。施身皮時善根迴向。爲令眾生皆得一切嚴淨佛
刹。具足如來大功德故。

第三十八施身皮。所爲中云淨佛刹者。皮爲外相
故。

佛子。菩薩摩訶薩。以手足指施諸乞者。如堅精進菩

薩。閻浮提自在。王菩薩。及餘無量諸大菩薩。菩薩爾時。顏貌和悅。其心安善。無有顛倒。乘於大乘。不求美欲。不尙名聞。但發菩薩廣大之意。遠離慳嫉。一切諸垢。專向如來無上妙法。佛子。菩薩摩訶薩如是施時。攝諸善根。悉以迴向。願一切眾生得纖長指。與佛無異。願一切眾生得臍圓指。上下相稱。願一切眾生得赤銅甲指。其甲隆起清淨鑿徹。願一切眾生得一切智勝丈夫指。悉能攝持一切諸法。願一切眾生得隨好指。具足十力。願一切眾生得大人指。纖臍齊等。願一切眾生得輪相指。指節圓滿。文相右旋。願一切眾

生得如蓮華卍字旋指十力業報相好莊嚴願一切
眾生得光藏指放大光明照不可說諸佛世界願一
切眾生得善安布指善巧分布網縵具足是爲菩薩
摩訶薩布施指時善根迴向爲令眾生一切皆得心
清淨故。

第三十九施手足指所爲云得清淨心者得指由
心故有十願。

佛子。菩薩摩訶薩請求法時。若有人言。汝能施我連
肉爪甲。當與汝法。菩薩答言。但與我法。連肉爪甲隨
意取用。如求法自在。王菩薩無盡菩薩及餘無量諸

大菩薩爲求法故。欲以正法開示演說。饒益眾生。一切皆令得滿足故。捨連肉爪甲與諸乞者。菩薩爾時以此善根如是迴向。所謂願一切眾生。皆得諸佛赤銅相爪。願一切眾生得潤澤爪。隨好莊嚴。願一切眾生得光淨爪。鑒徹第一。願一切眾生得一切智爪。具大人相。願一切眾生得無比爪。於諸世間無所染著。願一切眾生得妙莊嚴爪。光明普照一切世間。願一切眾生得不壞爪。清淨無缺。願一切眾生得入一切佛法方便相爪。廣大智慧皆悉清淨。願一切眾生得善生爪。菩薩業果無不淨妙。願一切眾生得一切智。

大導師爪放無量色妙光明藏。是爲菩薩摩訶薩爲求法故施連肉爪甲時善根迴向。爲令眾生具足諸佛一切智爪無礙力故。

第四十施連肉爪甲。事爪則不染塵垢。智爪則不染境相。

佛子。菩薩摩訶薩求佛法藏恭敬尊重。生難得想。有能說者來語之言。若能投身七仞火坑。當施汝法。菩薩聞已。歡喜踊躍。作是思惟。我爲法故。尙應久住阿鼻獄等一切惡趣。受無量苦。何況纔入人間火坑。卽得聞法。奇哉正法。甚爲易得。不受地獄無量楚毒。但

入火坑卽便得聞。但爲我說。我入火坑。如求善法。王菩薩。金剛思惟菩薩。爲求法。故入火坑中。菩薩爾時。以此善根。如是迴向。所謂願一切眾生。住佛所住。一切智法。永不退轉。無上菩提。願一切眾生。離諸險難。受佛安樂。願一切眾生。得無畏心。離諸恐怖。願一切眾生。常樂求法。具足喜樂。眾法莊嚴。願一切眾生。離諸惡趣。滅除一切三毒熾火。願一切眾生。常得安樂。具足如來勝妙樂事。願一切眾生。得菩薩心。永離一切貪恚癡火。願一切眾生。悉得菩薩諸三昧樂。普見諸佛心大歡喜。願一切眾生。善說正法。於法究竟常

無忘失。願一切眾生具足菩薩神通妙樂。究竟安住一切種智。是爲菩薩摩訶薩爲求正法投火坑時善根迴向。爲令眾生離障礙業皆得具足智慧火故。

第四十一求法入火。行中七尺曰仞。

佛子。菩薩摩訶薩爲求正法。分別演說。開菩薩道。示菩提路。趣無上智。勤修十力。廣示一切智心。獲無礙智法。令眾生清淨。住菩薩境界。勤修大智。護佛菩提時。以身具受無量苦惱。如求善法菩薩勇猛王菩薩及餘無量諸大菩薩爲求法故。受無量苦。乃至攝取誹謗正法。惡業所覆。魔業所持。極大惡人。彼所應受。

一切苦惱。以求法故。悉皆爲受。以此善根如是迴向。所謂願一切眾生永離一切苦惱逼迫。成就安樂自在神通。願一切眾生永離諸苦得一切樂。願一切眾生永滅苦蘊得照現身。恆受安樂。願一切眾生超出苦獄。成就智行。願一切眾生見安隱道。離諸惡趣。願一切眾生得法喜樂。永斷眾苦。願一切眾生永拔眾苦。互相慈愛無損害心。願一切眾生得諸佛樂。離生死苦。願一切眾生成就清淨無比安樂。一切苦惱無能損害。願一切眾生得一切勝樂。究竟具足佛無礙樂。是爲菩薩摩訶薩爲求法故受眾苦時善根迴向。

爲欲救護一切眾生令離險難住一切智無所障礙
解脫處故。

第四十二爲求法護法受眾苦者如香城粉骨雪
嶺忘軀。

佛子。菩薩摩訶薩處於王位求正法時乃至但爲一
文一字一句一義。生難得想。能悉罄捨海內所有。若
近若遠國土城邑。人民庫藏園池屋宅。樹林華果。乃
至一切珍奇妙物。宮殿樓閣。妻子眷屬。及以王位。悉
能捨之。於不堅中求堅。固法爲欲利益一切眾生。勤
求諸佛無礙解脫。究竟清淨一切智道。如大勢德菩

薩勝德王菩薩及餘無量諸大菩薩勤求正法乃至極少爲於一字五體投地正念三世一切佛法愛樂修習永不貪著名聞利養捨諸世間自在王位求佛自在法王之位於世間樂心無所著以出世法長養其心永離世間一切戲論住於諸佛無戲論法菩薩爾時以諸善根如是迴向所謂願一切眾生常樂惠施一切悉捨願一切眾生能捨所有心無中悔願一切眾生常求正法不惜身命資生之具願一切眾生悉得法利能斷一切眾生疑惑願一切眾生得善法欲心常喜樂諸佛正法願一切眾生爲求佛法能捨

身命及以王位。大心修習無上菩提。願一切眾生尊
重正法。常深愛樂。不惜身命。願一切眾生護持諸佛
甚難得法。常勤修習。願一切眾生皆得諸佛菩提光
明。成菩提行。不由他悟。願一切眾生常能觀察一切
佛法。拔除疑箭。心得安隱。是爲菩薩摩訶薩。爲求正
法。捨國城時。善根迴向。爲令眾生知見圓滿。常得住
於安隱道故。

第四十三求法。捨海內所有。卽捨王位所統也。
佛子。菩薩摩訶薩。作大國王。於法自在。普行教命。令
除殺業。閻浮提內。城邑聚落。一切屠殺。皆令禁斷。無

足二足四足多足。種種生類。普施無畏。無欺奪心。廣修一切菩薩諸行。仁慈莅物。不行侵惱。發妙寶心。安隱眾生。於諸佛所。立深志樂。常自安住三種淨戒。亦令眾生如是安住。菩薩摩訶薩。令諸眾生住於五戒。永斷殺業。以此善根如是迴向。所謂願一切眾生發菩薩心。具足智慧。永保壽命。無有終盡。願一切眾生住無量劫。供一切佛。恭敬勤修。更增壽命。願一切眾生具足修行離老死法。一切災毒不害其命。願一切眾生具足成就無病惱身。壽命自在能隨意住。願一切眾生得無盡命。窮未來劫住菩薩行。教化調伏一

切眾生。願一切眾生。爲壽命門。十力善根於中增長。願一切眾生。善根具足。得無盡命。成滿大願。願一切眾生。悉見諸佛。供養承事。住無盡壽。修習善根。願一切眾生。於如來處。善學所學。得聖法喜。無盡壽命。願一切眾生。得不老不病。常住命根。勇猛精進。入佛智慧。是爲菩薩摩訶薩。住三聚淨戒。永斷殺業。善根迴向。爲令眾生得佛十力圓滿智故。

第四十四爲王斷殺等。自住三聚淨戒。令他住於五戒。是爲法施。五戒殺初。故此偏語。若望所殺。是無畏施。

佛子。菩薩摩訶薩。見有眾生。心懷殘忍。損諸人畜。所有男形。令身缺減。受諸楚毒。見是事已。起大慈悲。而哀救之。令閻浮提一切人民。皆捨此業。菩薩爾時語其人言。汝何所爲。作是惡業。我有庫藏。百千萬億。一切樂具。悉皆充滿。隨汝所須。盡當相給。汝之所作。眾罪由生。我今勸汝。莫作是事。汝所作業。不如道理。設有所獲。於何可用。損他益己。終無是處。如是惡行。諸不善法。一切如來所不稱歎。作是語已。卽以所有一切樂具。盡皆施與。復以善語。爲說妙法。令其歡悅。所謂示寂靜法。令其信受。滅除不善。修行淨業。互起慈

心。不相損害。彼人聞已。永捨罪惡。菩薩爾時以此善根如是迴向。所謂願一切眾生。具丈夫形。成就如來馬陰藏相。願一切眾生。具男子形。發勇猛心。修諸梵行。願一切眾生。具勇猛力。恆爲主導。住無礙智。永不退轉。願一切眾生。皆得具足大丈夫身。永離欲心。無有染著。願一切眾生。悉得成就善男子法。智慧增長。諸佛所歎。願一切眾生。普得具於大人之力。常能修習十力善根。願一切眾生。永不失壞男子之形。常修福智。未曾有法。願一切眾生。於五欲中。無著無縛。心得解脫。厭離三有。住菩薩行。願一切眾生。成就第一

智慧丈夫。一切宗信。伏從其化。願一切眾生。具足菩薩丈夫智慧。不久當成無上大雄。是爲菩薩摩訶薩。禁絕一切毀敗男形善根。迴向爲令眾生具丈夫形。皆能守護諸善丈夫。生賢聖家。智慧具足。常勤修習。丈夫勝行。有丈夫用。巧能顯示。七丈夫道。具足諸佛善丈夫種。丈夫正教。丈夫勇猛。丈夫精進。丈夫智慧。丈夫清淨。普令眾生究竟皆得。

第四十五救於形殘。行中初覩境興悲。次菩薩爾時下。以法諫喻。三作是語已下。財法雙救。財救所害之現苦。法救能害之當苦。示寂靜滅。修淨業道。

滅集因故。昔有黃門救五百牛毀形之事。善根力故。男形具足。迴向行中。修諸梵行。未必制心。後離欲心。必無身過。具男子形。但異女人。具大丈夫。必心懷道德。所爲中。初令得果。後常勤下。令得起行。丈夫行者。涅槃云。一切男女。若具四法。卽名丈夫。一近善知識。二聽聞正法。三思惟其義。四如說修行。

大方廣佛華嚴經綱要卷第二十七

大方廣佛華嚴經綱要卷第二十八

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

十、迴向品第二十五之六

佛子。菩薩摩訶薩若見如來出興於世。開演正法。以大音聲普告一切。如來出世。如來出世。令諸眾生得聞佛名。捨離一切我慢戲論。復更勸導。令速見佛。令憶念佛。令歸向佛。令攀緣佛。令觀察佛。令讚歎佛。復爲廣說佛難值遇。千萬億劫時乃一出。眾生由此得

見於佛。生清淨信。踊躍歡喜。尊重供養。復於佛所。聞諸佛名。轉更值遇。無數諸佛。植諸善本。修習增長。爾時無數百千萬億那由他衆生。因見佛故。皆得清淨。究竟調伏。彼諸衆生。於菩薩所。皆生最上善知識想。因菩薩故。成就佛法。以無數劫。所種善根。普於世間。施作佛事。佛子。菩薩摩訶薩。開示衆生。令見佛時。以諸善根。如是迴向。所謂願一切衆生。不待勸誘。自往見佛。承事供養。皆令歡喜。願一切衆生。常樂見佛。心無廢捨。願一切衆生。常勤修習。廣大智慧。受持一切諸佛法藏。願一切衆生。隨所聞聲。皆悟佛法。於無量

劫修菩薩行。願一切眾生安住正念。恆以智眼見佛。出興。願一切眾生不念異業。常憶見佛。勤修十力。願一切眾生於一切處常見諸佛。了達如來徧虛空界。願一切眾生皆得具足佛自在身。普於十方成道說法。願一切眾生遇善知識。常聞佛法。於諸如來得不壞信。願一切眾生悉能稱歎諸佛出興。令其見者普得清淨。是爲菩薩摩訶薩歎佛出世善根迴向。爲令眾生見一切佛。供養承事於無上法。究竟清淨故。

第四十六歎佛出興。如上大威光童子偈聲普告等。初施行者。卽法施行。於中法施獲益。初聞名離

惑益。二見身起行益。三讚歎增敬益。四展轉增長益。

佛子。菩薩摩訶薩捨於大地。或施諸佛造立精舍。或施菩薩及善知識隨意所用。或施眾僧以爲住處。或施父母。或施別人聲聞獨覺種種福田。乃至一切貧窮孤露及餘四眾。隨意悉與。令無所乏。或施造立如來塔廟。於如是等諸處之中。悉爲辦具資生什物。令隨意用。無所恐懼。菩薩摩訶薩隨何方所布施地時。以諸善根如是迴向。所謂願一切眾生具足清淨一切智地。悉到普賢眾行彼岸。願一切眾生得總持地。

正念受持一切佛法。願一切眾生得住持力。常能守護一切佛教。願一切眾生得如地心。於諸眾生意常清淨。無有惡念。願一切眾生持諸佛種。成就菩薩諸地次第。無有斷絕。願一切眾生普爲一切作安隱處。悉令調伏。住清淨道。願一切眾生同諸如來利益世間。普使勤修安住佛力。願一切眾生普爲世間之所愛樂。悉令安住無上佛樂。願一切眾生獲善方便。住佛諸力無畏法中。願一切眾生得如地智。自在修行一切佛法。是爲菩薩摩訶薩施大地時善根迴向。爲令眾生皆得究竟一切如來清淨地故。

第四十七施大地。言大地但通相言耳。略列諸田。實通一切。言別人者。謂有資財人。非敬非悲故。言善知識。要在益我。然所施之田。有敬悲恩德四種之不同。疏有多釋。今此中菩薩施心。悲智齊於虛空。事物窮乎法界。施田凡聖盡於十方。故三事性空。深無底。三事殊特勝無比。三事廣大徧無涯。三事相融俱無礙。迴向行中十願。初一果地。餘九因地。

佛子。菩薩摩訶薩。布施僮僕。供養一切諸佛菩薩。眞善知識。或施僧寶。或奉父母尊勝福田。或復給施病。

苦眾生令無闕乏以存其命。或復施與貧窮孤露及
餘一切無瞻侍者。或爲守護如來塔廟。或爲書持諸
佛正法。以百千億那由他僕使隨時給施。其諸僕使
皆聰慧善巧。性自調順。常勤精進。無有懈惰。具質直
心安樂心。利益心。仁慈心。恭恪心。無怨恨心。無讎敵
心。能隨受者方俗所宜。於彼彼中作諸利益。又皆從
菩薩淨業所感。才能技藝工巧。算數靡不通達。善能
供侍。悅可其心。菩薩爾時以諸善根如是迴向。所謂
願一切眾生得調順心。一切佛所修習善根。願一切
眾生隨順供養一切諸佛。於佛所說悉能聽受。願一

切眾生得佛攝受。常觀如來。更無餘念。願一切眾生
不壞佛種。勤修一切順佛善根。願一切眾生常勤供
養一切諸佛。無空過時。願一切眾生攝持一切諸佛
妙義。言詞清淨。遊行無畏。願一切眾生常樂見佛。心
無厭足。於諸佛所。不惜身命。願一切眾生得見諸佛。
心無染著。離世所依。願一切眾生。但歸於佛。永離一
切邪歸依處。願一切眾生。隨順佛道。心常樂觀。無上
佛法。是爲菩薩摩訶薩。施僕使時。善根迴向。爲令眾
生。遠離塵垢。淨治佛地。能現如來自在身故。

第四十八施僮僕。少美日僮。以擬瞻侍。執守日僕。

以備勞役。然不放從。良而施與人。還令成僕者。以
菩薩行海。無善不修。若放從良。有三義闕。一行海
不具。二彼僕本願不滿。三佛果闕。此應機之德。

佛子。菩薩摩訶薩。以身布施諸來乞者。布施之時。生
謙下心。生如地心。生忍受眾苦。無變動心。生給侍眾
生。不疲厭心。生於諸眾生。猶如慈母。所有眾善。悉迴
與心。生於諸愚險極惡眾生。種種侵陵。皆寬宥心。安
住善根。精勤給事。菩薩爾時。悉以善根。如是迴向。所
謂願一切眾生。隨其所須。常無闕乏。修菩薩行。恆不
間斷。不捨一切菩薩義利。善住菩薩所行之道。了達

菩薩平等法性。得在如來種族之數。住真實語。持菩薩行。令諸世間得淨佛法。深心信解。證法究竟。令諸眾生。出生清淨。增上善根。住大功德。具一切智。又以此善根。令一切眾生常得供養一切諸佛。解一切法。受持讀誦。不忘不失。不壞不散。心善調伏。不調令調。以寂靜法而調習之。令彼眾生。於諸佛所。住如是事。又以此善根。令一切眾生作第一塔。應受世間種種供養。令一切眾生。成最上福田。得佛智慧開悟一切。令一切眾生。作最上受者。普能饒益一切眾生。令一切眾生。成最上福利。能使具足一切善根。令一切眾

生。成第一好施處。能使獲得無量福報。令一切眾生於三界中。皆得出離。令一切眾生作第一導師。能爲世間示如實道。令一切眾生得妙總持。具持一切諸佛正法令。一切眾生證得無量第一法界。具足虛空無礙正道。是爲菩薩摩訶薩。施自己身善根。迴向。爲令眾生皆得應供無量智身故。

第四十九捨自身爲僕。迴向。行中有二十願。前十進善。後十住持。

佛子。菩薩摩訶薩。聞法喜悅。生淨信心。能以其身供養諸佛。欣樂信解。無上法寶。於諸佛所。生父母想。讀

誦受持無礙道法。普入無數那由他法。大智慧寶諸善根門。心常憶念無量諸佛。入佛境界。深達義理。能以如來微密梵音。與佛法雲雨。佛法雨。勇猛自在。能分別說一切智入第一之地。具足成就薩婆若乘。以無量百千億那由他大法。成滿諸根佛子。菩薩摩訶薩於諸佛所。聞如是法。歡喜無量。安住正法。自斷疑惑。亦令他斷。心恆怡暢。功德成滿。善根具足。意恆相續。利益眾生。心常不匱。獲最勝智。成金剛藏。親近諸佛。淨諸佛刹。常勤供養一切如來。菩薩爾時。以諸善根如是迴向。所謂願一切眾生皆得圓滿最勝之身。

一切諸佛之所攝受。願一切眾生常近諸佛。依諸佛
住。恆得覲仰。未曾遠離。願一切眾生皆得清淨不壞
之身。具足一切功德智慧。願一切眾生常勤供養一
切諸佛。行無所得。究竟梵行。願一切眾生得無我身。
離我所。願一切眾生悉能分身徧十方刹。猶如影
現。而無來往。願一切眾生得自在身。普往十方。無我
無受。願一切眾生從佛身生。處在如來無上身家。願
一切眾生得法力身。忍辱大力。無能壞者。願一切眾
生得無比身。成就如來清淨法身。願一切眾生成就
出世功德之身。生無所得。清淨法界。是爲菩薩摩訶

薩以身供佛善根迴向。爲令衆生永住三世諸佛家故。

第五十聞法喜悅。捨身供佛。施行者卽財法二供。初行體。欣樂下自利行。能以下利他行。

佛子。菩薩摩訶薩以身布施一切衆生。爲欲普令成就善根。憶念善根。菩薩摩訶薩自願其身爲大明燈。普能照耀一切衆生。爲衆樂具。普能攝受一切衆生。爲妙法藏。普能任持一切衆生。爲淨光明。普能開曉一切衆生。爲世光影。普令衆生常得覩見。爲善根因緣。普令衆生常得值遇。爲眞善知識。令一切衆生悉

蒙教誘。爲平坦道。令一切眾生皆得履踐。爲無有上
具足安樂。令一切眾生離苦清淨。爲明淨日。普作世
間平等利益。菩薩爾時以諸善根如是迴向。所謂願
一切眾生常親近佛。入佛智地。願一切眾生得隨順
智。住無上覺。願一切眾生常處佛會。意善調伏。願一
切眾生所行有則。具佛威儀。願一切眾生悉得涅槃
深解法義。願一切眾生具知足行。生如來家。願一切
眾生捨無明欲。住佛志樂。願一切眾生勝善根。坐
菩提樹。願一切眾生殺煩惱賊。離怨害心。願一切眾
生具足護持一切佛法。是爲菩薩摩訶薩以身布施。

一切眾生善根迴向。爲欲利益一切眾生。令得無上安隱處故。

第五十一 以身布施一切眾生。行中亦事法二行。後菩薩下別顯中。若約事則身爲日月光明河池泉井。以施於物。以三種世間身得自在故。若約法則法燈照耀。法日利益等。迴向行中。然施行以身就生。故願翻眾生以身近佛。

佛子。菩薩摩訶薩。自以其身給侍諸佛。於諸佛所。念報重恩。如父母想。於諸如來。起深信樂。以清淨心護佛菩提。住諸佛法。離世間想。生如來家。隨順諸佛。離

魔境界了達一切諸佛所行成就一切諸佛法器菩薩爾時以此善根如是迴向所謂願一切眾生得清淨心一切智寶而自莊嚴願一切眾生住善調伏遠離一切諸不善業願一切眾生得不可壞堅固眷屬普能攝受諸佛法願一切眾生爲佛弟子到於菩薩灌頂之地願一切眾生常爲諸佛之所攝受永離一切不善之法願一切眾生隨順諸佛修行菩薩最勝之法願一切眾生入佛境界悉皆得授一切智記願一切眾生與諸如來皆悉平等一切佛法無不自在願一切眾生悉爲諸佛之所攝受常能修行無取

著業願一切眾生常爲諸佛第一侍者。一切佛所修智慧行。是爲菩薩摩訶薩給侍諸佛善根迴向。爲欲證得諸佛菩提。爲欲救護一切眾生。爲欲出離一切三界。爲欲成就無損惱心。爲得無量廣大菩提。爲欲成就照佛法智。爲欲常蒙諸佛攝受。爲得諸佛之所護持。爲欲信解一切佛法。爲欲成就與三世佛平等善根。爲欲圓滿無悔恨心。證得一切諸佛法故。

第五十二施身給侍諸佛。行中亦有心持身持。

佛子。菩薩摩訶薩布施國土一切諸物。乃至王位。悉亦能捨於諸世事。心得自在。無繫無縛。無所戀著。遠

離惡業。饒益衆生。不著業果。不樂世法。不復貪染。諸
有生處。雖住世間。非此處生。心不執著。蘊界處法。於
內外法。心無依住。常不忘失。諸菩薩行。未曾遠離。諸
善知識。持諸菩薩廣大行願。常樂承事一切善友。菩
薩爾時。以此善根。如是迴向。所謂願一切衆生爲大
法王。於法自在。到於彼岸。願一切衆生成佛法王。摧
滅一切煩惱怨賊。願一切衆生住佛王位。得如來智
開演佛法。願一切衆生住佛境界。能轉無上自在法
輪。願一切衆生生如來家。於法自在。護持佛種。永使
不絕。願一切衆生開示無量法王正法。成就無邊諸

大菩薩願一切眾生住淨法界爲大法王。現佛出與相繼不斷。願一切眾生於諸世界作智慧王。化導羣生。無時暫捨。願一切眾生普爲法界虛空界等諸世界。中一切眾生作法施主。使其咸得住於大乘。願一切眾生得成具足眾善之王。與三世佛善根齊等。是爲菩薩摩訶薩。布施王位善根迴向。爲欲令彼一切眾生究竟住於安隱處故。

第五十三施國所有乃至王位。行中初明事行。後於諸下明其心捨棄萬乘如脫屣。何繫縛哉。

佛子。菩薩摩訶薩見有人來乞王京都嚴麗大城。及

以關防所有輸稅。盡皆施與。心無吝惜。專向菩提。發
大誓願。住於大慈。行於大悲。志意歡悅。利益眾生。以
廣大智。解了深法。安住諸佛平等法性。發心爲求一
切智故。於自在法起深樂故。於自在智求證得故。淨
修一切諸功德故。住於堅固廣大智故。廣集一切諸
善根故。修行一切佛法願故。自然覺悟大智法故。安
住菩提心無退故。修習一切菩薩行願。一切種智盡
究竟故。而行布施。以此善根如是迴向。所謂願一切
眾生悉能嚴淨無量刹土。奉施諸佛以爲住處。願一
切眾生常樂居止阿蘭若處。寂靜不動。願一切眾生

永不依止王都聚落。心樂寂靜。永得究竟。願一切眾生永不樂著一切世間。於世語言常樂遠離。願一切眾生得離貪心。施諸所有。心無中悔。願一切眾生得出離心。捨諸家業。願一切眾生得無吝心。常行惠施。願一切眾生得不著心。離居家法。願一切眾生得離眾苦。除滅一切災橫怖畏。願一切眾生嚴淨十方一切世界。奉施諸佛。是爲菩薩摩訶薩布施王都善根。迴向。爲合眾生悉能嚴淨諸佛刹故。

第五十四施大都城。

佛子。菩薩摩訶薩所有一切內宮眷屬妓侍眾女。皆

顏貌端正。才能具足。談笑歌舞。悉皆巧妙。種種衣服。種種華香。而以嚴身。見者歡喜。情無厭足。如是寶女。百千萬億。那由他數。皆由菩薩善業所生。隨意自在。敬順無失。盡以布施諸來乞者。而於其中無愛樂心。無顧戀心。無耽著心。無繫縛心。無執取心。無貪染心。無分別心。無隨逐心。無取相心。無樂欲心。菩薩爾時。觀諸善根。爲欲令一切衆生咸得出離。故迴向。得佛法喜。故迴向。於不堅固中而得堅固。故迴向。得金剛智。不可壞心。故迴向。入佛道場。故迴向。到於彼岸。故迴向。得無上菩提心。故迴向。能以智慧了達諸法。故迴向。

迴向。出生一切善根。故迴向。入三世諸佛家。故迴向。
佛子。菩薩摩訶薩。住如是法。生如來家。增長諸佛清
淨勝因。出生最勝一切智道。深入菩薩廣大智業。滅
除一切世間垢惱。常能供施功德福田。爲諸眾生宣
說妙法。善巧安立。令其修習諸清淨行。常勤攝取一
切善根。菩薩爾時。以諸善根如是迴向。所謂願一切
眾生常得無量三昧眷屬。菩薩勝定。相續不斷。願一
切眾生常樂見佛。悉入諸佛莊嚴三昧。願一切眾生
成就菩薩不思議定。自在遊戲無量神通。願一切眾
生入如實定。得不壞心。願一切眾生盡獲菩薩甚深

三昧於諸禪定而得自在。願一切眾生得解脫心。成
就一切三昧眷屬。願一切眾生種種三昧。皆得善巧。
悉能攝取諸三昧相。願一切眾生得勝智三昧。普能
學習諸三昧門。願一切眾生得無礙三昧。入深禪定。
終不退失。願一切眾生得無著三昧。心恆正受。不取
二法。是爲菩薩摩訶薩布施一切內宮眷屬時善根
迴向。爲欲令一切眾生皆得不壞清淨眷屬故。爲欲
令一切眾生皆得菩薩眷屬故。爲欲令一切眾生悉
得滿足佛法故。爲欲令一切眾生滿足一切智力故。
爲欲令一切眾生證於無上智慧故。爲欲令一切眾

生得於隨順眷屬故。爲欲令一切眾生得同志行人
共居故。爲欲令一切眾生具足一切福智故。爲欲令
一切眾生成就清淨善根故。爲欲令一切眾生得善
和眷屬故。爲欲令一切眾生成就如來清淨法身故。
爲欲令一切眾生成就次第如理辯才。善說諸佛無
盡法藏故。爲欲令一切眾生永捨一切世俗善根。同
修出世清淨善根故。爲欲令一切眾生淨業圓滿成
就一切清淨法故。爲欲令一切眾生一切佛法皆悉
現前。以法光明普嚴淨故。

第五十五施內宮眷屬。一女麗具德。二而於下施

心清淨。迴向行中有二。初迴向意。二正顯迴向。今初以歷事將終。文勢稍展。此一段文。貫於前後。晉經迴向二字皆在句初。則是迴向菩提意也。今經在句末。則是迴向之意。初中文有十句。後佛子下重牒前意。生如來家下。從後例牒。亦有十句。西域文勢多如此。反騰前辭。正明迴向中。又有十願。隨一一願。具前十意。皆云三昧者。禪定輕安。身心柔軟。猶彼女故。故善財云。定女常供侍。

佛子。菩薩摩訶薩。能以所愛妻子布施。猶如往昔須達拏太子。現莊嚴王菩薩。及餘無量諸菩薩等。菩薩

爾時乘薩婆若心。行一切施。淨修菩薩布施之道。其
心清淨。無有中悔。罄捨所珍。求一切智。令諸眾生淨
深志樂。成菩提行。觀菩薩道。念佛菩提。住佛種性。菩
薩摩訶薩成辦如是布施心。已決定志。求如來之身。
自觀己身繫屬一切。不得自在。又以其身普攝眾生。
猶如寶洲。給施一切。未滿足者。令其滿足。菩薩如是
護念眾生。欲令自身作第一塔。普使一切皆生歡喜。
欲於世間生平等心。欲爲眾生作清涼池。欲與眾生
一切安樂。欲爲眾生作大施主。智慧自在。了知菩薩
所行之行。而能如是大誓莊嚴。趣一切智。願成無上

智慧福田。普念眾生。常隨守護。而能成辦自身利益。智慧光明。普照於世。常勤憶念菩薩施心。恆樂觀察。如來境界。佛子。菩薩摩訶薩。以無縛無著解脫心。布施妻子所集善根。如是迴向。所謂願一切眾生住佛菩提。起變化身。周徧法界。轉不退輪。願一切眾生得無著身。願力周行一切佛刹。願一切眾生捨愛憎心。斷貪恚結。願一切眾生爲諸佛子。隨佛所行。願一切眾生於諸佛所。生自己心。不可沮壞。願一切眾生常爲佛子。從法化生。願一切眾生得究竟處。成就如來自在智慧。願一切眾生證佛菩提。永離煩惱。願一切

三摩沙多上シクノ一ノ一ノ
一
衆生能具演說佛菩提道。常樂修行無上法施。願一切衆生得正定心。不爲一切諸緣所壞。願一切衆生坐菩提樹。成最正覺。開示無量從法化生諸善男女。是爲菩薩摩訶薩。布施妻子善根。迴向爲令衆生皆悉證得無礙解脫無著智故。

第五十六施妻子。二事合願。標章引例。須達拏者。此云善愛。或云好愛。彼有經說。其事甚廣。次菩薩爾時下明能施心。初自分。次成辦下勝進所爲。自觀己身下。觀身不堅。况於妻子。次又以下修堅固。二利之行。次佛子下。迴向行中有十一願。初一依

於施心。欲令普徧。故次二依妻立願。次三及後一。依子立願。生自己心者。如己骨肉等故。

佛子。菩薩摩訶薩。莊嚴舍宅。及諸資具。隨有乞求。一切施與。行布施法。於家無著。遠離一切居家覺觀。厭惡家業。資生之具。不貪不味。心無繫著。知家易壞。心恆厭捨。都於其中無所愛樂。但欲出家修菩薩行。以諸佛法而自莊嚴。一切悉捨。心無中悔。常爲諸佛之所讚歎。舍宅財物。隨處所有。悉以惠施。心無戀著。見有乞求。心生喜慶。菩薩爾時。以此善根。如是迴向。所謂願一切眾生捨離妻子。成就出家第一之樂。願一

一切眾生解脫家縛。入於非家諸佛法中。修行梵行。願一切眾生捨離慳垢。樂一切施。心無退轉。願一切眾生永離家法。少欲知足。無所藏積。願一切眾生出世俗家。住如來家。願一切眾生得無礙法。滅除一切障礙之道。願一切眾生離家屬愛。雖現居家。心無所著。願一切眾生善能化誘。不離家法。說佛智慧。願一切眾生身現在家。心常隨順佛智而住。願一切眾生在居家地。住於佛地。普令無量無邊眾生發歡喜心。是爲菩薩摩訶薩。布施舍宅時。善根迴向。爲令眾生成就菩薩種種行願神通智故。

第五十七施舍宅。

佛子。菩薩摩訶薩。布施種種園林臺榭遊戲快樂莊嚴之處。作是念言。我當爲一切眾生作好園林。我當爲一切眾生示現法樂。我當施一切眾生歡喜之意。我當示一切眾生無邊喜樂。我當爲一切眾生開淨法門。我當令一切眾生發歡喜心。我當令一切眾生得佛菩提。我當令一切眾生成滿大願。我當於一切眾生猶如慈父。我當令一切眾生智慧觀察。我當施一切眾生資生之具。我當於一切眾生猶如慈母。生長一切善根大願。佛子。菩薩摩訶薩如是修行諸善。

根時。於惡眾生不生疲厭。亦不誤起棄捨之心。設滿
世間一切眾生。悉不知恩。菩薩於彼初無嫌恨。不生
一念求反報心。但欲滅其無量苦惱。於諸世間心如
虛空。無所染著。普觀諸法真實之相。發大誓願。滅眾
生苦。永不厭捨大乘志願。滅一切見。修諸菩薩平等
行願。佛子。菩薩摩訶薩如是觀察已。攝諸善根。悉以
迴向。所謂願一切眾生念念滋生無量善法。成就無
上園林之心。願一切眾生得不動法。見一切佛。皆令
歡喜。願一切眾生樂法園苑。得諸佛刹園苑妙樂。願
一切眾生得淨妙心。常見如來神足園林。願一切眾

生得佛戲樂常善遊戲智慧境界。願一切眾生得遊
戲樂。普詣佛刹道場眾會。願一切眾生成就菩薩解
脫遊戲。盡未來劫行菩薩行。心無疲倦。願一切眾生
見一切佛。充滿法界。發廣大心。住佛園林。願一切眾
生悉能徧往一切佛刹。一一刹中供養諸佛。願一切
眾生得善欲心。清淨莊嚴一切佛刹。是爲菩薩摩訶
薩布施一切園林臺榭善根迴向。爲令眾生見一切
佛。遊戲一切佛園林故。

第五十八施園林等。先標起念。次佛子下。離過成
德。

佛子。菩薩摩訶薩。作百千億那由他無量無數廣大
施會。一切清淨。諸佛印可。終不損惱於一眾生。普令
眾生遠離眾惡。淨三業道。成就智慧。開置無量百千
億那由他阿僧祇清淨境界。積集無量百千億那由
他阿僧祇資生妙物。發甚難得菩提之心。行無限施
令諸眾生住清淨道。初中後善。生淨信解。隨百千億
無量眾生心之所樂。悉令歡喜。以大慈悲救護一切。
承事供養三世諸佛。爲欲成就一切佛種。修行布施
心無中悔。增長信根。成滿勝行。念念增進。檀波羅蜜。
菩薩爾時以諸善根如是迴向。所謂願一切眾生發

大乘心悉得成就摩訶行施。願一切眾生皆悉能行大會施。盡施善施最勝施。無上施最無上施。無等等施。超諸世間施。一切諸佛所稱歎施。願一切眾生作第一施主。於諸惡趣勉濟眾生。皆令得人無礙智道。修平等願如實善根。得無差別證自境智。願一切眾生安住寂靜諸禪定智。入不死道。究竟一切神通智慧。勇猛精進。具足諸地莊嚴佛法。到於彼岸。永不退轉。願一切眾生設大施會。終不疲厭。給濟眾生。無有休息。究竟無上一切種智。願一切眾生恆勤種植一切善根。到於無量功德彼岸。願一切眾生常蒙諸佛

之所稱歎。普爲世間作大施主。功德具足。充滿法界。徧照十方。施無上樂。願一切衆生。設大施會。廣集善根。等攝衆生。到於彼岸。願一切衆生。成最勝施。普令衆生住第一乘。願一切衆生。爲應時施。永離非時。大施究竟。願一切衆生。成就善施。到佛丈夫大施彼岸。願一切衆生。究竟常行大莊嚴施。盡以一切諸佛爲師。悉皆親近。興大供養。願一切衆生。住清淨施。集等法界無量福德。到於彼岸。願一切衆生。於諸世間。爲大施主。誓度羣品。住如來地。是爲菩薩摩訶薩。設大施會。善根迴向。爲令衆生。行無上施。究竟佛施。成就

善施不可壞。施供諸佛。施無恚恨。施救眾生。施成一
切智施。常見諸佛。施善精進。施成就一切菩薩功德。
諸佛智慧廣大施故。

第五十九設大施會。次一切下離過成德。擇薪而
爨。瀘水而用。不强乞求。名不惱眾生。今多反此。豈
成大益。開置下略示儀式。發甚難得下顯施所依
心。成波羅蜜。迴向行中有十五願。

佛子。菩薩摩訶薩。布施一切資生之物。心無貪惜。不
求果報。於世富樂。無所希望。離妄想心。善思惟法。爲
欲利益一切眾生。審觀一切諸法實性。隨諸眾生種

種不同。所用所求各各差別。成辦無量資生之具。所有嚴飾悉皆妙好。行無邊施行一切施。盡內外施行。此施時。增志樂力。獲大功德。成就心寶。常能守護一切眾生。皆令發生殊勝志願。初未曾有求反報心。所有善根等三世佛。悉以圓滿一切種智。佛子。菩薩摩訶薩。以此布施所有善根。迴向眾生。願一切眾生清淨調伏。願一切眾生滅除煩惱。嚴淨一切諸佛刹土。願一切眾生以清淨心。於一念中周徧法界。願一切眾生智慧充滿。虛空法界。願一切眾生得一切智。普入三世調伏眾生。於一切時常轉清淨不退法輪。願

一切眾生具一切智。善能示現神通方便。饒益眾生。願一切眾生悉能悟入諸佛菩提。盡未來劫。於十方界。常說正法。會無休息。令諸眾生普得聞知。願一切眾生於無量劫。修菩薩行。悉得圓滿。願一切眾生於一切世界。若染若淨。若小若大。若麤若細。若覆若仰。或一莊嚴。或種種莊嚴。所可演說。在世界數諸世界中。修菩薩行。靡不周徧。願一切眾生於念念中。常作三世一切佛事。教化眾生。向一切智。

第六十施資具。以別說諸門不可盡故。末後總說一切資具。文但有二。一施行。二迴向行。以鄰後都

結。故闕後二。今初有四。初施時離過。以離妄想心等故。二善思惟下。辨施所依。三隨諸眾生下。正明施行。四行此下。顯所成德。明迴向行中有十願。以資生多種。願亦類別。一施洗滌資具願。二施掃拭資具願。又資具總明。故願亦總發。未必別配。

佛子。菩薩摩訶薩隨諸眾生一切所須。以如是等阿僧祇物而爲給施。爲令佛法相續不斷。大悲普救一切眾生。安住大慈。修菩薩行。於佛教誨。終無違犯。以巧方便。修行眾善。不斷一切諸佛種性。隨求悉與。而無患厭。一切悉捨。未曾中悔。常勤迴向一切智道。時

十方國土種種形類。種種趣生。種種福田。皆來集會。至菩薩所。種種求索。菩薩見已。普皆攝受。心生歡喜。如見善友。大悲哀愍。思滿其願。捨心增長。無有休息。亦不疲厭。隨其所求。悉令滿足。離貧窮苦。時諸乞者。心大欣慶。轉更稱傳。讚揚其德。美聲遐布。悉來歸往。菩薩見已。歡喜無量。假使百千億那由他劫。受帝釋樂。無數劫。受夜摩天樂。無量劫。受兜率陀天樂。無邊劫。受善變化天樂。無等劫。受他化自在天樂。不可數劫。受梵王樂。不可稱劫。受轉輪王王三千樂。不可思議劫。受徧淨天樂。不可說劫。受淨居天樂。悉不能及。苦

薩摩訶薩見乞者來歡喜愛樂欣慶踊躍信心增長
志樂清淨諸根調順信解成滿乃至增進諸佛菩提
佛子菩薩摩訶薩以此善根爲欲利益一切眾生故
迴向爲欲安樂一切眾生故迴向爲令一切眾生得
大義利故迴向爲令一切眾生悉得清淨故迴向爲
令一切眾生悉求菩提故迴向爲令一切眾生悉得
平等故迴向爲令一切眾生悉得賢善心故迴向爲
令一切眾生悉入摩訶衍故迴向爲令一切眾生悉
得賢善智慧故迴向爲令一切眾生悉具普賢菩薩
行願滿十力乘現成正覺故迴向

第三隨諸眾生下總結多門善根迴向。別不可盡。故此總明。文中二。先結善根。卽前施行。後佛子下。結迴向。今初有二節。一結所施物。謂菩薩所施不止六十。故等以僧祇。次爲令佛法下。結施所爲。以初貫後。卽是所爲。若依大悲等。卽是所依。然所爲卽通自他。所依則自心所住。三時十方下。結能施心。於中有四。初對多田生喜離過。二時諸乞者下。明其田彌多。其喜彌廣。三假使下。校量顯廣。略舉十王所受之樂。不及菩薩喜樂之心。四菩薩見乞者下。結喜廣深。何等菩薩見乞生喜。謂施行熟故。

施障盡故。二佛子菩薩摩訶薩以此善根下結前
迴向。今但結其迴向所爲。則顯前來別別迴向。不
出於此。上來通顯隨相行竟。下離相。

佛子。菩薩摩訶薩以諸善根如是迴向時。身口意業
皆悉解脫。無著無繫。無衆生想。無命者想。無補伽羅
想。無人想。無童子想。無生者想。無作者想。無受者想。
無有想。無無想。無今世後世想。無死此生彼想。無常
想。無無常想。無三有想。無無三有想。非想非非想。如
是非縛迴向。非縛解迴向。非業迴向。非業報迴向。非
分別迴向。非無分別迴向。非思迴向。非思已迴向。非

心迴向。非無心迴向。佛子。菩薩摩訶薩如是迴向時。不著內。不著外。不著能緣。不著所緣。不著因。不著果。不著法。不著非法。不著思。不著非思。不著色。不著色生。不著色滅。不著受想行識。不著受想行識生。不著受想行識滅。佛子。菩薩摩訶薩若能於此諸法不著。則不縛色。不縛色生。不縛色滅。不縛受想行識。不縛受想行識生。不縛受想行識滅。若能於此諸法不縛。則亦於諸法不解。何以故。無有少法。若現生。若已生。若當生。無法可取。無法可著。一切諸法。自相如是。無有自性。自性相離。非一非二。非多非無量。非小非大。

非狹非廣。非深非淺。非寂靜。非戲論。非處非非處。非法非非法。非體非非體。非有非非有。菩薩如是觀察諸法。則爲非法。於言語中。隨世建立。非法爲法。不斷諸業道。不捨菩薩行。求一切智。終無退轉。了知一切業緣如夢。音聲如響。衆生如影。諸法如幻。而亦不壞。因緣業力。了知諸業。其用廣大。解一切法皆無所作。行無作道。未嘗暫廢。

大文第二佛子菩薩摩訶薩以諸善根如是迴向時下。離相迴向。卽向實際。行稱涅槃。此彰行深。前彰行廣。深廣同時。言不並耳。先正明離相。後如是

觀察下。不礙隨相。初總標解脫是總。不著於解。不繫於縛。是真解脫。次別顯中二。初內絕想念。故無縛解。後佛子下。觸境離染。故無縛解。初中無眾生想等。先絕我想。次無有想下。絕其法想。次如是非縛下。顯行成。次菩薩摩訶薩如是迴向時下。第二觸境無染。故無縛解。於中云。不著內外等。初明無著。卽明界處空。次云。不著色等。顯不著五蘊。次佛子若能於此下。明其不縛。蘊是則已。遣三科矣。次若能於此下。明其不解。若本無縛。其誰求解。離縛取解。未免於縛。故復遣之。遣至無遣。儻然無寄理。

自玄會矣。次何以故下。徵釋離相之所以。先徵意云。設我假立。法體不無。今無念著。其故何耶。下釋意云。法性爾故。謂諸法性本自無生。自相如是故。自性相離。次云非一非二下。別彰所離。謂上但云離爲離何相。謂一二等。文有十對。次菩薩如是觀察下。明不礙隨相者。以凡情封執。觸言生滯。聞於離相。則謂乖前隨相之言。失於業果菩提之行。故此略而會之。

佛子。此菩薩摩訶薩住一切智。若處非處。普皆迴向一切智性。於一切處。皆悉迴向。無有退轉。以何義故。

說名迴向。永度世間。至於彼岸。故名迴向。永出諸蘊。至於彼岸。故名迴向。度言語道。至於彼岸。故名迴向。離種種想。至於彼岸。故名迴向。永斷身見。至於彼岸。故名迴向。永離依處。至於彼岸。故名迴向。永絕所作。至於彼岸。故名迴向。永出諸有。至於彼岸。故名迴向。永捨諸取。至於彼岸。故名迴向。永出世法。至於彼岸。故名迴向。佛子。菩薩摩訶薩如是迴向時。則爲隨順佛住。隨順法住。隨順智住。隨順菩提住。隨順義住。隨順迴向往住。隨順境界住。隨順行住。隨順眞實住。隨順清淨住。佛子。菩薩摩訶薩如是迴向。則爲了達一切。

諸法。則爲承事一切諸佛。無有一佛而不承事。無有一法而不供養。無有一法而可滅壞。無有一法而可乖違。無有一物而可貪著。無有一法而可厭離不見。內外一切諸法。有少滅壞。違因緣道。法力具足。無有休息。佛子。是爲菩薩摩訶薩第六隨順堅固一切善根迴向。

大文第三此菩薩下。釋迴向名。初總釋。初住一切智。是自善根。由此能成下諸義故。若處已下。釋平等隨順義。次別釋中。以何義故。說名迴向。下假以徵起。釋迴向義。次佛子菩薩如是迴向時下。釋隨

順義。意謂但能如是離相迴向。自然隨順佛法智等。以佛法等實爲體故。三佛子如是迴向下。釋堅固一切善根義。亦合徵云。實際非相。何名堅固。實際無差。何名一切。此釋意云。如是離相迴向。方名堅固。以凡是有相皆可破壞故。但能離相。自成諸善。諸善皆以實際而爲體故。下佛子是爲菩薩摩訶薩第六隨順堅固一切善根迴向。依釋結名。

上位行竟。下位果。

菩薩摩訶薩住此迴向時。常爲諸佛之所護念。堅固不退。入深法性。修一切智。隨順法義。隨順法性。隨順

一切堅固善根。隨順一切圓滿大願。具足隨順堅固之法。一切金剛所不能壞。於諸法中而得自在。

第二大文住此迴向時。明位果。隨離無二。招斯十果。

爾時金剛幢菩薩觀察十方。觀察眾會。觀察法界。已入於字句甚深之義。修習無量廣大之心。以大悲心普覆世間。長去來今佛種性心。入於一切諸佛功德。成就諸佛自在力身。觀諸眾生心之所樂。隨其善根。所可成熟。依法性身為現色身。承佛神力而說頌言。

菩薩現身作國王

於世位中最無等

福德威光勝一切

普爲羣萌興利益

其心清淨無染著

於世自在咸尊敬

弘宣正法以訓人

普使衆生獲安隱

現生貴族升王位

常依正教轉法輪

稟性仁慈無毒虐

十方敬仰皆從化

智慧分別常明了

色相才能皆具足

臨馭率土靡不從

摧伏魔軍悉令盡

堅持淨戒無違犯

決志堪忍不動搖

永願蠲除忿恚心

常樂修行諸佛法

飲食香鬘及衣服

車騎牀褥座與燈

菩薩悉以給濟人

并及所餘無量種

爲利益故而行施

令其開發廣大心

於尊勝處及所餘

意皆清淨生歡喜

菩薩一切皆周濟

內外所有悉能捨

必使其心永清淨

不應暫爾生狹劣

或施於頭或施眼

或施於手或施足

皮肉骨髓及餘物

一切皆捨心無吝

菩薩身居大王位

種族豪貴人中尊

開口出舌施羣生

其心歡喜無憂戀

以彼施舌諸功德

迴向一切諸衆生

普願藉此勝因緣

悉得如來廣長舌

或施妻子及王位

或施其身作僮僕

其心清淨常歡喜

如是一切無憂悔

隨所樂求咸施與

應時給濟無疲厭

一切所有皆能散

諸來求者普滿足

爲聞法故施其身

修諸苦行求菩提

復爲眾生捨一切

求無上智不退轉

以於佛所聞正法

自捨其身充給侍

爲欲普救諸羣生

發生無量歡喜心

彼見世尊大導師

能以慈心廣饒益

是時踊躍生歡喜

聽受如來深法味

菩薩所有諸善根

悉以迴向諸眾生

普皆救護無有餘

永使解脫常安樂

菩薩所有諸眷屬

色相端嚴能辯慧

華鬘衣服及塗香

種種莊嚴皆具足

此諸眷屬甚希有

菩薩一切皆能施

專求正覺度羣生

如是之心無暫捨

菩薩如是諦思惟

備行種種廣大業

悉以迴向諸含識

而不生於取著心

菩薩捨彼大王位

及以國土諸城邑

菩薩迴向眞實義

於其法中無所著

心不分別一切業

亦不染著於業果

知菩薩性從緣起

入深法界無違逆

不於身中而有業

亦不依止於心住

智慧了知無業性

以因緣故業不失

心不妄取過去法

亦不貪著未來事

不於現在有所住

了達三世悉空寂

菩薩已到色彼岸

受想行識亦如是

超出世間生死流

其心謙下常清淨

諦觀五蘊十八界

十二種處及己身

於此一求菩提

體性畢竟不可得

不取諸法常住相

於斷滅相亦不著

法性非有亦非無

業理次第終無盡

不於諸法有所住

不於衆生及菩提

十方國土三世中

畢竟求之無可得

若能如是觀諸法

則如諸佛之所解

雖求其性不可得

菩薩所行亦不虛

菩薩了法從緣有

不違一切所行道

開示解說諸業跡

欲使衆生悉清淨

是爲智者所行道

一切如來之所說

隨順思惟入正義

自然覺悟成菩提

諸法無生亦無滅

亦復無來無有去

不於此死而生彼

是人悟解諸佛法

了達諸法真實性

而於法性無分別

知法無性無分別

此人善入諸佛智

法性徧在一切處

一切眾生及國土

三世悉在無有餘

亦無形相而可得

一切諸佛所覺了

悉皆攝取無有餘

雖說三世一切法

如是等法悉非有

如諸法性徧一切

菩薩迴向亦復然

如是迴向諸眾生

常於世間無退轉

第二應頌。先說因緣。後正說偈。頌有四十一偈。初五偈。頌所依身。次飲食下三十偈。頌依身起行。後隨順下有五偈。頌釋名中隨順等義。兼頌位果。

大方廣佛華嚴經綱要卷第二十八

大方廣佛華嚴經綱要卷第二十九

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

十迴向品第二十五之七

佛子。云何爲菩薩摩訶薩等隨順一切眾生迴向。

第七等隨一切眾生迴向。長行亦二。先位行。後位果。初中牒起。釋名者。謂以善根等心順益故。等卽平等。通於能所。所順眾生。無相平等。能隨順心。智照平等。此從迴向受名。等卽隨順。故本業云。以觀

察善惡父母無二相一合相故。名隨順觀察一切
眾生迴向。有云善惡卽冤親。此二平等俱生法身。
皆名父母。善父母者方便般若也。惡父母者無明
貪愛也。不滅癡愛起於明脫。故無二相。智契無二。
名一合相。

佛子。此菩薩摩訶薩隨所積集一切善根。所謂小善
根。大善根。廣善根。多善根。無量善根。種種善根。微塵
數善根。阿僧祇善根。無邊際善根。不可思善根。不可
量善根。佛境界善根。法境界善根。僧境界善根。善知
識境界善根。一切眾生境界善根。方便善巧境界善

根。修諸善心境界善根。內境界善根。外境界善根。無邊助道法境界善根。勤修一切捨善根。立勝志究竟持淨戒善根。一切捨無不受堪忍善根。常精進心無退善根。以大方便入無量三昧善根。以智慧善觀察善根。知一切眾生心行差別善根。集無邊功德善根。勤修習菩薩業行善根。普覆育一切世間善根。佛子。菩薩摩訶薩於此善根。修行安住。趣入攝受積集辦具。悟解心淨。開示發起時。得堪忍心。閉惡趣門。善攝諸根。威儀具足。遠離顛倒。正行圓滿。堪爲一切諸佛法器。能作眾生福德良田。爲佛所念。長佛善根。住諸

佛願行諸佛業。心得自在。等三世佛。趣佛道場。入如
來力。具佛色相。超諸世間。不樂生天。不貪富樂。不著
諸行。一切善根。悉以迴向。爲諸眾生功德之藏。住究
竟道。普覆一切。於虛妄道中。拔出眾生。令其安住。一
切善法。徧諸境界。無斷無盡。開一切智菩提之門。建
立智幢。嚴淨大道。普能示現一切世間。令除垢染。心
善調伏。生如來家。淨佛種性。功德具足。作大福田。爲
世所依。安立眾生。咸令清淨。常勤修習一切善根。

第二廣釋中大文分二。先明迴向。後佛子菩薩摩
訶薩修行如是迴向之時下。辨所成益。初中亦二。

先辨所迴善根。後佛子菩薩摩訶薩以淨志下。攝將迴向前所迴中復二。先正修善根。後佛子菩薩摩訶薩於此善下。因修成德。亦可前是體。後明行用。前中有三十一句。分爲三段。初隨所積集。下十句。明善根分齊。次佛境界善根。下十句。明善所依緣。後勤修一切捨善根。下十句。明善根體性。前十一。一該後二十。息之自顯。次明因修成德。初佛子菩薩摩訶薩於此善根下。先牒已修。文有十句。次得堪忍。下五行經。正顯成德中。先明自利德。文有十對。次爲諸眾生功德之藏。下五行餘經。明利

他德。

佛子。菩薩摩訶薩以淨志願菩提心力修諸善根時。作是念言。此諸善根。是菩提心之所積集。是菩提心之所思惟。是菩提心之所發起。是菩提心之所志樂。是菩提心之所增益。皆爲憐愍一切眾生。皆爲趣求一切種智。皆爲成就如來十力。作是念時。善根增進。永不退轉。佛子。菩薩摩訶薩復作是念。願我以此善根果報。盡未來劫。修菩薩行。悉以惠施一切眾生。悉以迴向一切眾生。普徧無餘。願令阿僧祇世界珍寶充滿。阿僧祇世界衣服充滿。阿僧祇世界妙香充滿。

阿僧祇世界莊嚴具充滿。阿僧祇世界無量摩尼寶
充滿。阿僧祇世界妙華充滿。阿僧祇世界上味充滿。
阿僧祇世界財貨充滿。阿僧祇世界牀座充滿。蓋以
寶帳敷以妙衣。阿僧祇世界種種莊嚴寶冠充滿。假
使一人盡未來劫常來求索。以此等物而惠施之。未
曾厭倦而有休息。如於一人。於一切眾生悉亦如是。
佛子。菩薩摩訶薩如是施時。無虛僞心。無希望心。無
名譽心。無中悔心。無熱惱心。但發專求一切智道心。
一切悉捨心。哀愍眾生心。教化成熟心。皆令安住一
切智智心。佛子。菩薩摩訶薩以諸善根如是迴向。盡

未來劫常行惠施。住一切智智心。佛子。菩薩摩訶薩復作是念。我爲一眾生故。欲令阿僧祇世界寶象充滿。七支具足。性極調順。上立金幢。金網彌覆。種種妙寶而爲莊嚴。以用布施。願令阿僧祇世界寶馬充滿。如龍馬王。種種眾寶莊嚴之具而嚴飾之。持用布施。願令阿僧祇世界妓女充滿。悉能敷奏種種妙音。持用布施。願令阿僧祇世界男女充滿。持用布施。願令阿僧祇世界己身充滿。發菩提心而用布施。願令阿僧祇世界己頭充滿。起不放逸心而用布施。願令阿僧祇世界己眼充滿。而用布施。願令阿僧祇世界己

身血肉及以骨髓。充滿其中心。無顧戀。持用布施。願令阿僧祇世界自在。王位充滿其中。持用布施。願令阿僧祇世界奴僕作使。充滿其中。持用布施。菩薩摩訶薩以如是等種種諸物。盡未來劫。安住廣大一切施心。施一眾生。如一眾生。盡眾生界一切眾生。皆如是。施佛子。菩薩摩訶薩於一世界。盡未來劫。修菩薩行。以是等物。施一眾生。如是給施一切眾生。皆令滿足。如於一世界。於盡虛空徧法界一切世界中。悉亦如是。大悲普覆。終無間息。普加哀愍。隨其所須。供給供養。不令施行。遇緣而息。乃至不於一彈指頃。生疲

倦心。佛子。菩薩摩訶薩如是施時。生於此心。所謂無著心。無縛心。解脫心。大力心。甚深心。善攝心。無執心。無壽者心。善調伏心。不散亂心。不妄計心。具種種寶性心。不求果報心。了達一切法心。住大迴向心。善決諸義心。令一切眾生住無上智心。生大法光明心。入一切智智心。

第二攝將迴向中初五行經明念修善根本因。法應迴向。次正將迴向中大文分三。初向眾生及向菩提。後佛子菩薩摩訶薩如是迴向時不著業下明向實際。三佛子菩薩摩訶薩以此善根普施世

間下總結三種迴向。初中迴己善願成資具以施
眾生。經云佛子菩薩摩訶薩復作是念願我以此
善根下兩行餘經。先總顯要期。次彰施行。先願成
外施。文有四段。初云願令阿僧祇世界珍寶下五
行餘經顯廣大施。各僧祇故。次云假使一人盡未
來劫下兩行經。辯施無限。長時多田。隨求無厭故。
三佛子如是施時下三行經。明施殊勝離過順理
故。四云佛子菩薩摩訶薩以諸善根下一行餘經。
結成二行。謂由迴向行以成施行。上成外施。下文
願成內施。文有四段。初佛子菩薩摩訶薩復作是

念下有十二行經。明對一田顯施廣大。謂一眾生
卽施多事各僧祇故。二菩薩以如是等下。以一例
餘。彰施無限。佛子菩薩於一世界下。舉處例處。總
收其義。有六無限。一物。二時。三心。四田。五施。六處。
三大悲下。結成所作。該六無限。四佛子菩薩如是
施時。下五行經。顯施殊勝。離過成德。有二十心。初
一牒前起後。次所謂下。正顯一十九心。具七殊勝
檀度行成。謂初六心卽巧便殊勝。次五心卽清淨
殊勝。次有三心卽安住殊勝。次有二心卽迴向殊
勝。次有一心卽意樂殊勝。謂悲愍一切故。後之二

心卽依止殊勝。依菩提心故。上迴己善願成資具已竟。下文第二迴此令眾具足財法。

佛子。菩薩摩訶薩以所集善根於念念中如是迴向。所謂願一切眾生財寶豐足無所乏少。願一切眾生成就無盡大功德藏。願一切眾生具足一切安隱快樂。願一切眾生增長菩薩摩訶薩業。願一切眾生成滿無量第一勝法。願一切眾生得不退轉一切智乘。願一切眾生普見十方一切諸佛。願一切眾生永離世間諸惑塵垢。願一切眾生皆得清淨平等之心。願一切眾生離諸難處得一切智。佛子。菩薩摩訶薩如

是迴向時。發歡喜心。爲令一切眾生得利益安樂故。
爲令一切眾生得平等心故。爲令一切眾生住能捨
心故。爲令一切眾生住一切施心故。爲令一切眾生
住歡喜施心故。爲令一切眾生住永離貧窮施心故。
爲令一切眾生住一切財寶施心故。爲令一切眾生
住無數財寶施心故。爲令一切眾生住普施無量施
一切施心故。爲令一切眾生住盡未來劫無斷施心
故。爲令一切眾生住一切悉捨無悔無惱施心故。爲
令一切眾生住悉捨一切資生之物施心故。爲令一
切眾生住隨順施心故。爲令一切眾生住攝取施心

故爲令一切眾生住廣大施心故。爲令一切眾生住捨無量莊嚴具供養施心故。爲令一切眾生住無著施心故。爲令一切眾生住平等施心故。爲令一切眾生住如金剛極大力施心故。爲令一切眾生住如日光明施心故。爲令一切眾生住攝如來智施心故。爲令一切眾生善根眷屬具足故。爲令一切眾生善根智慧常現在前故。爲令一切眾生得不可壞淨心圓滿故。爲令一切眾生成就最勝清淨善根故。爲令一切眾生於煩惱睡眠中得覺悟故。爲令一切眾生滅除一切諸疑惑故。爲令一切眾生得平等智慧淨功。

德故。爲令一切眾生功德圓滿無能壞者故。爲令一切眾生具足清淨不動三昧故。爲令一切眾生住不可壞一切智智故。爲令一切眾生成滿菩薩無量清淨神通行故。爲令一切眾生修集無著善根故。爲令一切眾生念去來今一切諸佛。心清淨故。爲令一切眾生出生清淨勝善根故。爲令一切眾生滅除一切魔所作業障道法故。爲令一切眾生具足無礙清淨平等功德法故。爲令一切眾生以廣大心常念諸佛無懈廢故。爲令一切眾生常近諸佛勤供養故。爲令一切眾生廣開一切諸善根門。普能圓滿白淨法故。

爲令一切眾生無量心。廣大心。最勝心。悉清淨故。爲令一切眾生成就清淨等施心故。爲令一切眾生奉持諸佛尸波羅蜜等清淨故。爲令一切眾生得大堪忍波羅蜜故。爲令一切眾生住精進波羅蜜常無懈怠。爲令一切眾生住無量定。能起種種神通智故。爲令一切眾生得知一切法無體性般若波羅蜜故。爲令一切眾生圓滿無邊淨法界故。爲令一切眾生成滿一切神通清淨善根故。爲令一切眾生住平等行。積集善法。悉圓滿故。爲令一切眾生善入一切諸佛境界。悉周徧故。爲令一切眾生身口意業普清淨故。

爲令一切眾生善業果報普清淨故。爲令一切眾生
了達諸法普清淨故。爲令一切眾生了達實義普清
淨故。爲令一切眾生修諸勝行普清淨故。爲令一切
眾生成就一切菩薩大願普清淨故。爲令一切眾生
證得一切功德智慧普清淨故。爲令一切眾生成就
一切同體善根迴向出生一切智乘普圓滿故。爲令
一切眾生嚴淨一切諸佛國土普圓滿故。爲令一切
眾生見一切佛而無所著普圓滿故。爲令一切眾生
具諸相好功德莊嚴普圓滿故。爲令一切眾生得六
十種音聲發言誠諦皆可信受百千種法而以莊嚴

如來無礙功德妙音悉圓滿故。爲令一切眾生成就
十力莊嚴無礙平等心故。爲令一切眾生得一切佛
無盡法明。一切辯才。普圓滿故。爲令一切眾生得無
上無畏人中之雄。師子吼故。爲令一切眾生得一切
智。轉不退轉無盡法輪故。爲令一切眾生了一切法
開示演說。普圓滿故。爲令一切眾生以時修習清淨
善法。普圓滿故。爲令一切眾生成就導師無上法寶
等清淨故。爲令一切眾生於一莊嚴無量莊嚴大莊
嚴。諸佛莊嚴。普圓滿故。爲令一切眾生等入三世所
有境界。悉周徧故。爲令一切眾生悉能往詣一切佛

刹聽受正法。無不徧故。爲令一切眾生智慧利益。爲世所宗。與佛等故。爲令一切眾生以一切智。知一切法。普圓滿故。爲令一切眾生行不動業。得無礙果。普圓滿故。爲令一切眾生所有諸根。咸得神通。能知一切眾生根故。爲令一切眾生得無差別平等智慧。於一相法。普清淨故。爲令一切眾生與理無違。一切善根悉具足故。爲令一切眾生於一切菩薩自在神通。悉明達故。爲令一切眾生得一切佛無盡功德。若福若智。悉平等故。爲令一切眾生發菩提心。解一切法。平等一相。無遺缺故。爲令一切眾生了達正法。爲世

最上福德田故爲令一切眾生成就平等清淨大悲
爲諸施者大力田故爲令一切眾生堅固第一。無能
沮壞故爲令一切眾生見必蒙益無能摧伏故爲令
一切眾生成滿最勝平等心故爲令一切眾生善能
了達一切諸法得大無畏故爲令一切眾生放一光
明普照十方一切世界故爲令一切眾生普修一切
菩薩精進行無懈退故爲令一切眾生以一行願普
滿一切諸行願故爲令一切眾生以一妙音普使聞
者皆得解故爲令一切眾生悉能具足一切菩薩清
淨心故爲令一切眾生普得值遇諸善知識咸承事

故爲令一切眾生修菩薩行。調伏眾生不休息故。爲令一切眾生以妙辯才。具一切音。隨機廣演無斷盡故。爲令一切眾生能以一心。知一切心。以一切善根等迴向故。爲令一切眾生常樂積集一切善根。安立眾生於淨智故。爲令一切眾生得一切智。福德智慧清淨身故。爲令一切眾生善知一切眾生善根。觀察迴向。普成就故。爲令一切眾生得一切智。成等正覺。普圓滿故。爲令一切眾生得具足神通智。於一處出興。一切諸處皆出興故。爲令一切眾生得普莊嚴智。嚴淨一眾會。一切眾會皆嚴淨故。爲令一切眾生於

一佛國土普見一切佛國土故。爲令一切眾生以一切莊嚴具。不可說莊嚴具。無量莊嚴具。無盡莊嚴具。莊嚴一切諸佛國土。普周徧故。爲令一切眾生於一切法。悉能決了甚深義故。爲令一切眾生得諸如來最上第一自在神通故。爲令一切眾生得非一非異一切功德自在神通故。爲令一切眾生具足一切平等善根。普爲諸佛灌其頂故。爲令一切眾生悉得成滿清淨智身。於諸有中最尊勝故。佛子。菩薩摩訶薩如是悲愍利益安樂一切眾生。咸令清淨。遠離慳嫉。受勝妙生。具大威德。生大信解。永離瞋恚。及諸翳濁。

其心清淨。質直柔軟。無有詔曲。迷惑愚癡。行出離行。堅固不壞。平等之心。永無退轉。白淨法力。具足成就。無惱無失。善巧迴向。常修正行。調伏眾生。滅除一切。諸不善業。修行苦行。一切善根。又勸眾生。令其修集。普爲含識。具受眾苦。以大智眼。觀諸善根。知其悉以。智慧爲性。方便迴向。一切眾生。爲令一切眾生。悉得安住。一切清淨功德處。故爲令一切眾生。悉能攝受。一切善根。知諸功德性。及義故。爲令一切眾生。普淨一切諸善根。故爲令一切眾生。於福田境界中。種諸善法。心無悔故。爲令一切眾生。普能攝受。一切眾生。

一一皆令趣一切智故。爲令一切眾生普攝一切所有善根。一一皆與平等迴向而相應故。又以諸善根如是迴向。所謂願一切眾生究竟安隱。願一切眾生究竟清淨。願一切眾生究竟安樂。願一切眾生究竟解脫。願一切眾生究竟平等。願一切眾生究竟了達。願一切眾生究竟安住。諸白淨法。願一切眾生得無礙眼。願一切眾生善調其心。願一切眾生具足十力。調伏眾生。佛子。菩薩摩訶薩如是迴向時。不著業。不著報。不著身。不著物。不著刹。不著方。不著眾生。不著無眾生。不著一切法。不著無一切法。佛子。菩薩摩訶

薩如是迴向時。以此善根。普施世間。願一切眾生成
滿佛智。得清淨心。智慧明了。內心寂靜。外緣不動。增
長成就三世佛種。佛子。菩薩摩訶薩修行如是迴向
之時。超出一切無能過者。一切世間所有言詞。悉共
稱讚。亦不可盡。普修一切菩薩諸行。悉能往詣一切
佛土。普見諸佛。無所障礙。又能普見一切世界菩薩
所行。以善方便。爲諸眾生分別諸法。甚深句義。得陀
羅尼。演說妙法。盡未來劫。無有斷絕。爲眾生故。念念
於不可說不可說世界。猶如影像。普現其身。供養諸
佛。念念嚴淨。不可說不可說諸佛國土。悉令周徧。修

行嚴淨佛刹智慧而無厭足。念念令不可說不可說百千億那由他眾生清淨成就。平等滿足。於彼一切諸國土中。勤修一切諸波羅蜜。攝取眾生。成就淨業。得無礙耳。於不可說不可說諸佛世界。一如來所轉法輪。聽聞受持。精勤修習。不生一念捨離之心。住無所得無依止無作無著菩薩神通。於一刹那一彈指頃。分身普詣不可說諸佛世界。與諸菩薩等同。一見佛子。菩薩摩訶薩如是修習菩薩行時。尚能成滿無量不可說不可說清淨功德。憶念稱讚所不能盡。况復得成無上菩提。一切佛刹平等清淨。一切眾生

平等清淨。一切身平等清淨。一切根平等清淨。一切業果平等清淨。一切眾會道場平等清淨。一切圓滿行平等清淨。一切法方便智平等清淨。一切如來諸願迴向平等清淨。一切諸佛神通境界平等清淨。佛子。菩薩摩訶薩如是迴向時。得一切功德清淨歡喜法門。無量功德圓滿莊嚴。如是迴向時。眾生不違一切刹。刹不違一切眾生。刹眾生不違業。業不違刹。眾生思不違心。心不違思。思心不違境界。境界不違思。業不違報。報不違業。業不違業道。業道不違業。法性不違相。法相不違性。法生不違性。法性不違生。刹

平等不違。眾生平等。眾生平等。不違。刹平等。一切眾生平等。不違。一切法平等。一切法平等。不違。一切眾生安住平等。一切眾生安住平等。不違。離欲際平等。不違。一切眾生安住平等。一切眾生安住平等。不違。離欲際平等。過去不違。未來未來不違。過去過去未來不違。現在現在不違。過去未來未來不違。世平等。不違。佛平等。佛平等。不違。世平等。菩薩行不違。一切智。一切智。不違。菩薩行。佛子。菩薩摩訶薩如是迴向時。得業平等。得報平等。得身平等。得方便平等。得願平等。得一切眾生平等。得一切刹平等。得一切行平等。得一切智平等。得三世諸佛平等。得承

事一切諸佛。得供養一切菩薩。得種一切善根。得滿一切大願。得教化一切眾生。得了知一切業。得承事供養一切善知識。得入一切清淨眾會道場。得通達一切正教。得成滿一切白法。

第二迴上施行。願令眾生具足財法。大文分三段。初慈悲迴向。二又勸眾生下。勸物迴向。三又以諸善根如是迴向下。究竟迴向。今初云佛子菩薩以積集善根下。正明迴向。先總標。所謂下別顯十願。初一豐財。以財施故。餘皆具法。積善本故。次佛子菩薩如是迴向時下。明迴向所爲。先標牒。次隨義。

別顯中總有一百一十句。文分爲二。前七十二句令成行布。修因至果。後三十八句令成圓融。因圓果滿。此二無礙。爲迴向意。亦前是自分。後爲勝進。前行布中文分六段。初爲令一切眾生下十四行經。有二十一。句。爲令修善趣賢首位之行。然純明施行。末云攝如來智施行者。照三輪空。離諸分別。同菩提故。二爲令一切善根下十句。成種性位中修行。種性卽十住位。三爲令一切眾生下有十句。令成解行位中修行。第十云無量者。四等也。解行發心。在於十行發迴向心故。四爲令一切眾生成

就清淨下十句。令成十地位。中修十度行。五爲令一切眾生身口意業下十句。令成等覺位。中修行。故皆有普言。六爲令一切眾生具諸相好下十句。令成佛果位。中行六十種音者。疏說六十四音。以聲有八轉。謂體業具爲從。屬於呼。是爲八轉。聲各具德。所謂調和柔軟諦了。易解無錯謬。無雌小廣大深遠。八八則有六十四種。第二爲令一切眾生悉能往詣下三十八句。明圓融行。因圓果滿。文分爲四。初十句。令眾生於種性位中。因行圓滿。二爲令一切眾生了達正法下十句。令解行位中。因

圓果滿。二云大力田者。謂於其中種少善根。能壞大惑故。三從悉能具足一切菩薩清淨心。下八句令十地位中。因行圓滿。四從令得一切智成等正覺。下十句令成佛果圓滿。下文第三結其成益。初佛子菩薩摩訶薩如是悲愍。下結前生後。次云咸令清淨。下別顯益相。文有十三句。顯二種生攝一切德。初之三句。顯勝妙生。二句爲因。一句爲果。清淨者。戒受人天身。離慳者。施有大財位。人天財位。卽勝妙生。有大威德。後之十句。顯功德生。功德生者。卽決定勝道。有人天中具大財位。無信解等。非

功德生。上慈悲迴向竟。下文又勸眾生令其修習下。二勸物迴向中。先令悲智雙行而成迴向。次爲令下。明迴向意。文有六句。三又以諸善根如是迴向下。究竟迴向。已上大文初迴向眾生菩提竟。下大文第二佛子如是迴向時下。迴向實際。先牒前隨相。次不著下。正顯離相。文有十句五對。不著一切法者。了法空故。不著無一切法者。空亦空故。大文第三佛子菩薩如是迴向時下。總結三種迴向。近仍前起。謂上離相不礙隨相。遠結上文普施世間。卽迴向眾生。願生成佛。卽迴向菩提。得清

淨下。卽迴向實際。成就三世佛種。卽總結三種迴向之能。上總前文通明廣釋中初明迴向竟。

下大文第二辨成益。卽此迴向行所成廣大之德。文分四段。初佛子菩薩修行如是迴向之時。下十。四行經。明成因位廣大之德。二佛子菩薩如是修習下。果位清淨德。三佛子菩薩如是迴向下。明會違自在德。四佛子菩薩如是迴向時得業平等下。明相盡平等德。前二段卽隨相益。後二段卽離相益。今初文中。先牒成益之時。顯正修行時。卽成此益。次超出下。正顯文有十二句。初二句總。次十句。

別顯。次佛子菩薩如是修習下。明果位清淨德。先牒現況當。謂前因德尙爾無盡。況當成果德。豈可量耶。次一切佛刹平等下十句懸解當相。謂成果之狀。略舉此十。前六果相圓備。後四舉因顯果。謂此果滿。由因圓故。第三佛子菩薩如是迴向時下。會違自在德。初結前生後。此結有二意。一結果德。果德無邊。上言不盡。故云一切功德清淨。二通結因果。以隨相益竟。欲明得隨相益。卽有離相。故總結云得一切功德。乃至圓滿莊嚴。由此故有不違等也。次正顯會違有四。初法法無違。中文有三節。

初如是迴向時。眾生不違一切刹等。有十一對。初六對。顯事事無違。次法性不違。下二對。顯事理無違。三刹平等不違。下三對。理理無違。上三法法相望無違。次云過去不違。未來下一行半經。明世世無違。三世平等。下約世法無違。四菩薩行不違。下約因果無違。四相盡平等德。文有二節。初佛子菩薩如是迴向時。得業平等。下初得離相平等益。次承事一切諸佛。下明得不壞諸相益。上廣釋已竟。下依釋結名。

佛子。是爲菩薩摩訶薩第七等隨順一切眾生迴向。

前來通明位行已竟。下明位果。

菩薩摩訶薩成就此迴向。則能摧滅一切魔怨。拔諸欲刺。得出離樂。住無二性。具大威德。救護眾生。爲功德王。神足無礙。往一切刹。入寂滅處。具一切身。成菩薩行。於諸行願。心得自在。分別了知一切諸法。悉能徧生一切佛刹。得無礙耳。聞一切刹所有音聲。得淨慧眼。見一切佛。未嘗暫捨。於一切境界。成就善根。心無高下。於一切法。得無所得。菩薩摩訶薩以一切善根等隨順一切眾生。如是迴向。

大文第二辨位果。與益異者。成益約於位中得果。

就其位滿。有二十一。句。初一牒前。後一總結。中間十九句。攝爲九果。一斷染果。降魔冤。謂止惡緣。拔欲刺。斷惡因也。二證入果。得出離樂。正證。住無二性。證因。三益生果。具大威德。卽護生之因。四內外超勝果。謂內德外用。五往一切下。寂用無礙果。六具一切下。行願廣大果。七分別下。智通殊勝果。八得無礙下。見聞自在果。九於一切境下。修行具足果。初成就。後無得。

爾時金剛幢菩薩承佛神力。普觀十方而說頌言。

菩薩所作諸功德

微妙廣大甚深遠

乃至一念而修行

悉能迴向無邊際

菩薩所有資生具

種種豐盈無限億

香象寶馬以駕車

衣服珍財悉殊妙

或以頭目并手足

或持身肉及骨髓

悉徧十方無量刹

普施一切令充徧

無量劫中所修習

一切功德盡迴向

爲欲救度諸羣生

其心畢竟不退轉

菩薩爲度眾生故

常修最勝迴向業

普令三界得安樂

悉使當成無上果

菩薩普興平等願

隨其所集清淨業

悉以迴施諸羣生

如是大誓終無捨

菩薩願力無限礙

一切世間咸攝受

如是迴向諸羣生

未曾暫起分別心

普願眾生智明了

布施持戒悉清淨

精進修行不懈廢

如是大誓無休息

菩薩迴向到彼岸

普開清淨妙法門

智慧同於兩足尊

分別實義得究竟

菩薩言詞已通達

種種智慧亦如是

說法如理無障礙

而於其中心不著

常於諸法不作二

亦復不作於不二

於二不二並皆離

知其悉是語言道

知諸世間悉平等

莫非心語一切業

眾生幻化無有實

所有果報從茲起

一切世間之所有

種種果報各不同

莫不皆由業力成

若滅於業彼皆盡

菩薩觀察諸世間

身口意業悉平等

亦令眾生住平等

猶如無等大聖尊

菩薩善業悉迴向

普令眾生色清淨

福德方便皆具足

同於無上調御士

菩薩利益諸羣生

功德大海盡迴向

願使威光特超世

得成勇猛大力身

凡所修習諸功德

願使世間普清淨

諸佛清淨無倫匹

眾生清淨亦如是

菩薩於義得善巧

能知諸佛最勝法

以眾善業等迴向

願令庶品同如來

菩薩了知諸法空

一切世間無所有

無有造作及作者

眾生業報亦不失

諸法寂滅非寂滅

遠離此二分別心

知諸分別是世見

入於正位分別盡

如是真實諸佛子

從於如來法化生

彼能如是善迴向

世間疑惑悉除滅

第二重頌有二十一偈分三。初十一偈頌迴向。次九偈頌成益。後一偈結讚。初中分二。初半偈頌所迴善根。餘頌攝將迴向。於中分三。初三偈半迴向已修善願。成資具以施眾生。次菩薩爲度下五偈頌復迴此施。願令眾生具足法財。三菩薩言詞下二偈。頌迴向實際。二知諸世間下。頌成益中三。初二偈。頌因德廣大。次菩薩觀察下五。頌果德清淨。後菩薩了知下二偈。頌相盡平等。後如是下一偈頌結歎。

大方廣佛華嚴經綱要卷第二十九

大方廣佛華嚴經綱要卷第三十

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

十迴向品第二十五之八

佛子。何者是菩薩摩訶薩眞如相迴向。

第八眞如相迴向。長行中先明位行。後明位果。前中標名。釋名者。善根合以成迴向。從所依立名。義通能所。故本業云。常照有無二諦。一切法一合相。故若梵本中。具名眞如相自性迴向。相卽德相。性

卽體性以二非卽離。所以雙舉。多說德相。卽以法界印而爲其性。此與前後異者。謂第七會事向理。故云平等。此明事盡理現。故行等同如。第九明從體起用。第十明用同體。同體而用。

佛子。此菩薩摩訶薩正念明了。其心堅住。遠離迷惑。專意修行。深心不動。成不壞業。趣一切智。終不退轉。志求大乘。勇猛無畏。植諸德本。普安世間。生勝善根。修白淨法。大悲增長。心寶成就。常念諸佛。護持正法。於菩薩道。信樂堅固。成就無量淨妙善根。勤修一切功德智慧。爲調御師。生眾善法。以智方便而爲迴向。

菩薩爾時慧眼普觀。所有善根。無量無邊。其諸善根。修習之時。若求緣。若辦具。若治淨。若趣入。若專勵。若起行。若明達。若精審。若開示。如是一切有種種門。種種境。種種相。種種事。種種分。種種行。種種名字。種種分別。種種出生。種種修習。其中所有一切善根。悉是趣向十力乘心之所建立。皆悉迴向一切種智。唯一無二。以諸善根如是迴向。所謂願得圓滿無礙身業。修菩薩行。願得清淨無礙口業。修菩薩行。願得成就無礙意業。安住大乘。願得圓滿無障礙心。淨修一切諸菩薩行。願起無量廣大施心。周給無邊一切眾生。

願於諸法心得自在。演大法明。無能障蔽。願得明達。一切智處。發菩提心。普照世間。願常正念三世諸佛。諦想如來常現在前。願住圓滿增上志樂。遠離一切諸魔怨敵。願得安住佛十力智。普攝眾生。無有休息。願得三昧。遊諸世界。而於世間無所染著。願住諸世界。無有疲厭。教化眾生。恆不休息。願起無量思慧方便。成就菩薩不思議道。願得諸方不迷惑智。悉能分別一切世間。願得自在神通智力。於一念中。悉能嚴淨一切國土。願得普入諸法自性。見一切世間。悉皆清淨。願得生起無差別智。於一剎中。入一切剎。願以

一切刹莊嚴之事。顯示一切教化無量無邊眾生。願於一佛刹中。示無邊法界。一切佛刹。悉亦如是。願得自在。大神通智。普能往詣一切佛土。佛子。菩薩摩訶薩。以諸善根。願得莊嚴一切佛國。願得周徧一切世界。願得成就智慧觀察。如爲己身。如是迴向。如是而爲一切眾生。所謂願一切眾生永離一切地獄畜生。閻羅王趣。願一切眾生除滅一切障礙之業。願一切眾生得周普心平等智慧。願一切眾生於怨於親等心攝受。皆令安樂。智慧清淨。願一切眾生智慧圓滿。淨光普照。願一切眾生思慧成滿。了真實義。願一切

眾生以淨志樂。越求菩提。獲無量智。願一切眾生普
能顯示安隱住處。佛子。菩薩摩訶薩。恆以善心如是
迴向。爲令一切眾生。遇清涼雲。霑法雨故。爲令一切
眾生。常值福田勝境界故。爲令一切眾生。皆能善入
菩提心藏。自護持故。爲令一切眾生。離諸蓋纏。善安
住故。爲令一切眾生。皆獲無礙神通智故。爲令一切
眾生。得自在身。普示現故。爲令一切眾生。成就最勝
一切種智。普興利益。無空過故。爲令一切眾生。普攝
羣品。令清淨故。爲令一切眾生。皆能究竟一切智故。
爲令一切眾生。心不動搖。無障礙故。佛子。菩薩摩訶

薩見可愛樂國土園林草木華果名香上服珍寶財物諸莊嚴具。或見可樂村邑聚落。或見帝王威德自在。或見住處離諸諠雜。見是事已。以方便智精勤修習。出生無量勝妙功德。爲諸眾生勤求善法。心無放逸。廣集眾善。猶如大海。以無盡善。普覆一切。爲眾善法所依之處。以諸善根方便迴向。而無分別。開示無量種種善根。智常觀察一切眾生。心恆憶念善根境界。以等真如平等善根。迴向眾生。無有休息。菩薩爾時以諸善根如是迴向。所謂願一切眾生得諸如來可愛樂見。見法真性平等平等。無所取著。圓滿清淨。

願一切眾生見諸如來甚可愛樂圓滿供養。願一切
眾生往生一切無諸煩惱甚可愛樂清淨佛刹。願一
切眾生得見諸佛可愛樂法。願一切眾生常樂護持
一切菩薩可愛樂行。願一切眾生得善知識可愛樂
眼。見無所礙。願一切眾生常見一切可愛樂物。無有
違逆。願一切眾生證得一切可愛樂法。而勤護持。願
一切眾生於一切佛可樂法中得淨光明。願一切眾
生修諸菩薩一切能捨可愛樂心。願一切眾生得無
所畏。能說一切可愛樂法。願一切眾生得諸菩薩極
可愛樂甚深三昧。願一切眾生得諸菩薩甚可愛樂

陀羅尼門。願一切眾生得諸菩薩甚可愛樂善觀察
智。願一切眾生能現菩薩甚可愛樂自在神通。願一
切眾生能於諸佛大眾會中。說可愛樂甚深妙法。願
一切眾生能以方便開示演說甚可愛樂差別之句。
願一切眾生常能發起甚可愛樂平等大悲。願一切
眾生念念發起甚可愛樂大菩提心。常令諸根歡喜
悅豫。願一切眾生能入一切甚可愛樂諸如來家。願
一切眾生得可愛樂能調伏行。調伏眾生。無有休息。
願一切眾生得諸菩薩甚可愛樂無盡辯才。演說諸
法。願一切眾生於不可說不可說劫。住於一切可樂

世界教化眾生。心無厭倦。願一切眾生以無量方便。普能悟入。甚可愛樂。諸佛法門。願一切眾生得可愛樂。無礙方便。知一切法無有根本。願一切眾生得可愛樂。離貪欲際。知一切法畢竟無二。斷一切障。願一切眾生得可愛樂。離貪欲際。知一切法平等真實。願一切眾生具足成滿。一切菩薩甚可愛樂。無戲論法。願一切眾生得金剛藏精進之心。成可愛樂。一切智道。願一切眾生具可愛樂。無礙善根。摧伏一切煩惱。怨敵。願一切眾生得可愛樂。一切智門。普於世間現成正覺。佛子菩薩摩訶薩修習如是諸善根時。得智。

慧明爲善知識之所攝受。如來慧日。明照其心。永滅
癡冥。勤修正法。入諸智業。善學智地。流布善根。充滿
法界。以智迴向。盡諸菩薩善根源底。以智深入大方
便海。成就無量廣大善根。

大文第二廣釋中長分三段。初明隨相迴向。二佛
子菩薩摩訶薩以此善根下離相迴向。三佛子此
菩薩摩訶薩如是迴向時得一切下迴向成益。初
中分二。先積善迴向。後佛子菩薩摩訶薩若見下
觸境迴向。前中亦二。先明所迴行體。後菩薩爾時
慧眼下攝將迴向。今初云佛子此菩薩正念明了。

明積集資糧。文有十句。初一爲總。謂正念堅明。下九爲別。初三句正念菩提。一遠迷惑。是明了義。專意修行。卽爲正念。正念是定。明了是慧。定慧雙運。爲道之源。二契理不動。故云深心。緣不能沮。成不壞業。卽自分堅住。三求佛不退。卽勝進堅住。次四句正念化生。初句爲總。勇求兼濟。爲大法故。下三句別。一悲智雙運。爲明了。般若爲眾德之本故。二進善去漏。爲正念。三悲增智。圓爲堅住。後二正念三寶。一念佛。二護法。三信僧。上有正念。下句堅固。影略該攝。以上積集資糧所迴行體。次成就無量。

下結德成就。文有四句。前三結前。一非止十。故云無量。二三統而收之。不出福智大悲。末句生後迴向。下文攝將迴向。云菩薩爾時慧眼普觀下。先總標觀察善根。次其諸善根下。別顯。次如是一切下。總結。種類多門。故云種種。文有十句。謂隨前求緣。有多差別故。次其中所有下。結修本意。謂本意既然。寧不迴向。上總明所迴行體。下文正明迴向。初迴向菩提。二迴向眾生。經云。以諸善根如是迴向。初迴向菩提也。文有二十願分三。初十願。願成智行。卽菩提因果。次願得三昧。下四願。周徧利生。卽

化用因果。三願得自在神通。下六願普嚴佛刹。卽淨土因果。上總迴向菩提。下云佛子菩薩摩訶薩以諸善根下。迴向眾生。初牒前生後。次所爲願一切眾生下。正顯迴向。文有八句。初二句願離三障障礙之言。義兼煩惱。次四成四智。後二結二果。不唯四智。故云無量。次云佛子菩薩摩訶薩恆以此心下。入行經總結所爲。上通明積善迴向竟。下文佛子菩薩摩訶薩見可愛樂國土下。第二明觸境迴向。大同淨行對境發願。於中五。一見可愛等列所見境。二見是事已下。覩境成德。謂增悲智。三

以諸善根下。總明迴向。亦是迴向之德。四菩薩爾時下。別明迴向。五佛子下。迴向成益。前三可知。今四別明迴向中。初一句總標。謂上起行中云。以諸善根方便迴向。未知迴向其相云何。故云爾時如是迴向。後所謂下。別顯顯如是言。有三十一願。皆言令得。言可愛樂者。由見可愛境。起可愛樂善願。成可愛樂德。疏釋有多義。次云佛子菩薩修習如是善根下。第五迴向成益。文有十句。攝爲五對。以顯四益。一以因感緣。由智內明。外爲友攝。二以緣感因。外蒙慧照。內滅癡暗。此除障益。三由勤修入

三慧業。此明學益。四上學證智。自善普充。此證入益。五盡善福源。入實智海。此成二嚴益。卽爲向實際之本。以智窮入故。上明隨相竟。

佛子。菩薩摩訶薩。以此善根如是迴向。所謂不著世間。不取眾生。其心清淨。無所依止。正念諸法。離分別見。不捨一切佛自在慧。不違三世一切諸佛正迴向門。隨順一切平等正法。不壞如來真實之相。等觀三世。無眾生相。善順佛道。善說於法。深了其義。入最勝地。悟真實法。智慧圓滿。信樂堅固。雖善修正業。而知業性空。了一切法皆如幻化。知一切法無有自性觀。

一切義及種種行。隨世言說而無所著。除滅一切執著因緣。知如實理。觀諸法性。皆悉寂滅。了一切法。同一實相。知諸法相不相違背。與諸菩薩而共同止。修行其道。善攝眾生。入去來今一切菩薩迴向之門。於諸佛法。心無驚怖。以無量心。令諸眾生普得清淨。於十方世界。不起執取我我所心。於諸世間。無所分別。於一切境界。不生染著。勤修一切出世間法。於諸世間。無取無依。於深妙道。正見牢固。離諸妄見。了真實法。

大文第二離相迴向。此與前諸迴向小異。前多攝

相歸性。少有依性起相。今此多顯性相無礙。以爲如相。故上標文。皆攝前隨相之時。今不要對前。以成無礙。故無時字。文分二。初直明迴向。後譬如下。對如廣辨。今初又二。初順如之行。二如諸佛法下。順如之益。初中止觀雙運。不著有無。文云佛子。菩薩以此善根如是迴向。所謂不著下。一止寂妄取。不違體用。次云等觀三世下。明觀空有。信智雙圓。初句觀真空。善順下。觀妙有。次云雖善修正業。而知業性空下。明權實雙行。初句立宗。以無礙爲宗。次了一切法如幻同喻。以如幻相有體虛故。次知

一切下合。及出所因。因云緣成。卽無性故。次云於諸佛法心無驚怖下。順如之益。文有十句五對。合四心彌固。一上安深法。下淨眾生。卽廣大心。二我不生。世見斯絕。卽不顛倒心。三於境無染。出世勤修。四不依世間。正道唯固。上二卽第一心。無住涅槃爲第一故。五妄見斯寂。了實體同。卽常心。常不捨離。同體悲故。上直明迴向。第二對如廣辨。如相迴向。生此段文。先敘科義。此一段文。略以五門分別。一釋名。眞謂眞實。顯非虛妄。如謂如常。表無變易。此法相宗義。若法性宗云。不變爲眞。順緣。

名如。由不變故。與有爲法有非一義。由順緣故。與有爲法有非異義。二明種類。謂或一或二或三或七乃至有十。名類不同。疏各有釋。三辨德用。謂一爲依持。二成觀境。乃至有三大等。如起信說。皆顯德用。四約教不同。可以思準。五釋文者。然此百門。古釋非一。今疏不取。但且就十科之。以配十地十如。初滿徧一切。及無相爲相等。卽徧滿真如之義。二中無能測量。無有比對。卽最勝義。三中於法無礙。爲眾法眼。卽勝流義。四中無著無住等。卽無攝受義。五中畢竟無盡。無有變易。卽類無別義。六中

無有分別體性無生。卽無染淨義。七中無所不在。住有無法。卽法無別義。八中體性清淨。體性平等。卽不增減義。九中徧一切法。是佛境界。卽智自在義。十中住一切地。成就一切佛菩薩等。卽業自在義。其中餘義。可以類取。隨地別顯。唯說十如。一具一切。十十成百。欲顯如德無量無邊。地前通修。等覺徧等。如來證窮。今迴向義。謂稱如起行。體卽是如。但人信如德。尙迷迴向。故以如德喻迴向德。若取文義便者。應云真如體相徧一切處。善根迴向如故。亦徧一切無邊際等。百門之內。各有二句。上

卽所同之如德。下善根下能同迴向之德。上敘

科義。下隨文解釋。

譬如真如徧一切處無有邊際。善根迴向亦復如是。徧一切處無有邊際。譬如真如真實爲性。善根迴向亦復如是。了一切法眞實爲性。譬如真如恆守本性。無有改變。善根迴向亦復如是。守其本性。始終不改。譬如真如以一切法無性爲性。善根迴向亦復如是。了一切法無性爲性。譬如真如無相爲相。善根迴向亦復如是。了一切法無相爲相。譬如真如若有得者。終無退轉。善根迴向亦復如是。若有得者。於諸佛法

永不退轉。譬如真如。一切諸佛之所行處。善根迴向。亦復如是。一切如來所行之處。譬如真如。離境界相。而爲境界。善根迴向。亦復如是。離境界相。而爲三世一切諸佛圓滿境界。譬如真如。能有安立。善根迴向。亦復如是。悉能安立一切眾生。譬如真如。性常隨順。善根迴向。亦復如是。盡未來劫。隨順不斷。

釋文中最初十句。初門顯在緣中。故無不徧。二明不變。故云真實。三明隨緣卽不變。云恆守本性。四示其性。五示其相。此五一向就如以辨。次二對智以說。故爲智境。八顯真如非境爲境。謂要忘境方

契如境故。如之本性。非安立故。九卽安立如。十卽如常之義。向下九十門。卽如次十十爲一門。

譬如真如。無能測量。善根迴向。亦復如是。等虛空界。盡眾生心。無能測量。譬如真如。充滿一切。善根迴向。亦復如是。一刹那中。普周法界。譬如真如。常住無盡。善根迴向。亦復如是。究竟無盡。

十二云。充滿一切者。謂若色。若心。若大。若小。等極微刹那。亦皆圓滿。非分滿故。

譬如真如。無有比對。善根迴向。亦復如是。普能圓滿一切佛法。無有比對。

十四無比對者。法性不並真故。

譬如真如。體性堅固。善根迴向。亦復如是。體性堅固。非諸惑惱之所能沮。譬如真如。不可破壞。善根迴向。亦復如是。一切眾生不能損壞。

十五惑不能壞。十六人不能壞。

譬如真如。照明爲體。善根迴向。亦復如是。以普照明而爲其性。

十七寂而常照。智卽如用。

譬如真如。無所不在。善根迴向。亦復如是。於一切處。悉無不在。譬如真如。徧一切時。善根迴向。亦復如是。

徧一切時。譬如眞如性常清淨。善根迴向亦復如是。住於世間而體清淨。譬如眞如於法無礙。善根迴向亦復如是。周行一切而無所礙。譬如眞如爲眾法眼。善根迴向亦復如是。能爲一切眾生作眼。

二十二既以照明爲體。何無照矚之眼。

譬如眞如性無勞倦。善根迴向亦復如是。修行一切菩薩諸行。恆無勞倦。譬如眞如體性甚深。善根迴向亦復如是。其性甚深。譬如眞如無有一物。善根迴向亦復如是。了知其性無有一物。譬如眞如性非出現。善根迴向亦復如是。其體微妙。難可得見。譬如眞如。

離眾垢翳。善根迴向。亦復如是。慧眼清淨。離諸癡翳。譬如真如。性無與等。善根迴向。亦復如是。成就一切諸菩薩行。最上無等。譬如真如。體性寂靜。善根迴向。亦復如是。善能隨順寂靜之法。譬如真如。無有根本。善根迴向。亦復如是。能入一切無根本法。

三十二云。無根本者。前無所依故。卽無住本故。

譬如真如。體性無邊。善根迴向。亦復如是。淨諸眾生。其數無邊。譬如真如。體性無著。善根迴向。亦復如是。畢竟遠離一切諸著。譬如真如。無有障礙。善根迴向。亦復如是。除滅一切世間障礙。譬如真如。非世所行。

善根迴向。亦復如是。非諸世間之所能行。譬如眞如體性無住。善根迴向。亦復如是。一切生死。皆非所住。譬如眞如。性無所作。善根迴向。亦復如是。一切所作。悉皆捨離。譬如眞如。體性安住。善根迴向。亦復如是。安住眞實。

二十七云安住者。由無所住。安住眞實故。

譬如眞如。與一切法而共相應。善根迴向。亦復如是。與諸菩薩聽聞修習而共相應。譬如眞如。一切法中性常平等。善根迴向。亦復如是。於諸世間修平等行。譬如眞如。不離諸法。善根迴向。亦復如是。盡未來際。

不捨世間。譬如真如。一切法中。畢竟無盡。善根迴向。亦復如是。於諸眾生迴向無盡。

四十一。畢竟無盡者。雖在諸法。諸法盡而體常。又正在法中。取不可盡。如芥子之空故。

譬如真如。與一切法無有相違。善根迴向。亦復如是。不違三世一切佛法。譬如真如。普攝諸法。善根迴向。亦復如是。盡攝一切眾生善根。譬如真如。與一切法同其體性。善根迴向。亦復如是。與三世佛同一體性。譬如真如。與一切法不相捨離。善根迴向。亦復如是。攝持一切世出世法。譬如真如。無能映蔽。善根迴向。

亦復如是。一切世間無能映蔽。譬如真如不可動搖。善根迴向。亦復如是。一切魔業無能動搖。譬如真如性無垢濁。善根迴向。亦復如是。修菩薩行。無有垢濁。譬如真如。無有變易。善根迴向。亦復如是。愍念眾生。心無變易。譬如真如。不可窮盡。善根迴向。亦復如是。非諸世法所能窮盡。譬如真如。性常覺悟。善根迴向。亦復如是。普能覺悟一切諸法。

五十一 性常覺悟者能內熏發起厭求故。

譬如真如。不可失壞。善根迴向。亦復如是。於諸眾生起勝志願。永不失壞。

五十二不可失壞者。在於生死染而不染故。

譬如真如能大照明。善根迴向亦復如是。以大智光照諸世間。

五十三卽大智光明。徧照法界義故。

譬如真如不可言說。善根迴向亦復如是。一切言語所不可說。

五十四離言真如。

譬如真如持諸世間。善根迴向亦復如是。能持一切菩薩諸行。譬如真如隨世言說。善根迴向亦復如是。隨順一切智慧言說。譬如真如徧一切法。善根迴向。

亦復如是。徧於十方一切佛刹。現大神通。成等正覺。譬如眞如。無有分別。善根迴向。亦復如是。於諸世間。無所分別。譬如眞如。徧一切身。善根迴向。亦復如是。徧十方刹。無量身中。譬如眞如。體性無生。善根迴向。亦復如是。方便示生。而無所生。譬如眞如。無所不在。善根迴向。亦復如是。十方三世諸佛土中。普現神通。而無不在。

六十一無所不在者。上徧一切。卽無邊際。今隨一
一法。皆全在中。

譬如眞如。徧在於夜。善根迴向。亦復如是。於一切夜。

放大光明。施作佛事。

六十二在晝夜乃至盡未來者。一念長劫。各各收如。各各依如。故得念劫互收互入。

譬如真如。徧在於晝。善根迴向。亦復如是。悉令一切在晝。眾生見佛神變。演不退輪。離垢清淨。無空過者。譬如真如。徧在半月。及以一月。善根迴向。亦復如是。於諸世間次第時節。得善方便。於一念中。知一切時。譬如真如。徧在年歲。善根迴向。亦復如是。住無量劫。明了成熟。一切諸根。皆令圓滿。譬如真如。徧成壞劫。善根迴向。亦復如是。住一切劫。清淨無染。教化眾生。

咸令清淨。譬如真如。盡未來際。善根迴向。亦復如是。盡未來際。修諸菩薩清淨妙行。成滿大願。無有退轉。譬如真如。徧住三世。善根迴向。亦復如是。令諸眾生。於一剎那。見三世佛。未曾一念而有捨離。譬如真如。徧一切處。善根迴向。亦復如是。超出三界。徧一切。悉得自在。譬如真如。住有無法。善根迴向。亦復如是。了達一切有無之法。畢竟清淨。

七十住有無者。理無惑計。有無常實故。

譬如真如。體性清淨。善根迴向。亦復如是。能以方便。集助道法。淨治一切諸菩薩行。譬如真如。體性明潔。

善根迴向。亦復如是。令諸菩薩悉得三昧明潔之心。
七十二性覺爲明。離念爲潔。

譬如眞如。體性無垢。善根迴向。亦復如是。遠離諸垢。
滿足一切諸清淨意。譬如眞如。無我我所。善根迴向。
亦復如是。以無我我所清淨之心。充滿十方諸佛國
土。譬如眞如。體性平等。善根迴向。亦復如是。獲得平
等一切智智。照了諸法。離諸癡翳。譬如眞如。超諸數
量。善根迴向。亦復如是。與超數量一切智乘大力法
藏而同止住。興徧十方一切世界廣大法雲。譬如眞
如。平等安住。善根迴向。亦復如是。發生一切諸菩薩

行平等住於一切智道。譬如真如徧住一切諸眾生界。善根迴向亦復如是。滿足無礙一切種智於眾生界。悉現在前。譬如真如無有分別。普住一切音聲智中。善根迴向亦復如是。具足一切諸言音智。能普示現種種言音。開示眾生。譬如真如永離世間。善根迴向亦復如是。普使眾生永出世間。譬如真如體性廣大。善根迴向亦復如是。悉能受持去來今世廣大佛法。恆不忘失。勤修一切菩薩諸行。譬如真如無有間息。善根迴向亦復如是。爲欲安處一切眾生於大智地。於一切劫修菩薩行。無有間息。譬如真如體性寬

願徧一切法。善根迴向。亦復如是。淨念無礙。普攝一切寬廣法門。譬如眞如徧攝羣品。善根迴向。亦復如是。證得無量品類之智。修諸菩薩眞實妙行。譬如眞如無所取著。善根迴向。亦復如是。於一切法皆無所取。除滅一切世間取著。普令清淨。譬如眞如體性不動。善根迴向。亦復如是。安住普賢圓滿行願。畢竟不動。譬如眞如是佛境界。善根迴向。亦復如是。令諸眾生滿足一切大智境界。滅煩惱境。悉令清淨。譬如眞如無能制伏。善根迴向。亦復如是不爲一切眾魔事業。外道邪論之所制伏。譬如眞如非是可修。非不可

修善根迴向亦復如是捨離一切妄想取著於修不修無所分別。

八十九非可修者無所得故非不可修者爲聖境故。

譬如眞如無有退捨善根迴向亦復如是常見諸佛發菩提心大誓莊嚴永無退捨譬如眞如普攝一切世間言音善根迴向亦復如是能得一切差別言音神通智慧普發一切種種言詞譬如眞如於一切法無所希求善根迴向亦復如是令諸眾生乘普賢乘而得出離於一切法無所貪求譬如眞如住一切地。

善根迴向。亦復如是。令一切眾生捨世間地。住智慧地。以普賢行而自莊嚴。譬如真如無有斷絕。善根迴向。亦復如是。於一切法得無所畏。隨其類音。處處演說。無有斷絕。譬如真如捨離諸漏。善根迴向。亦復如是。令一切眾生成就法智。了達於法。圓滿菩提。無漏功德。

九十五捨離諸漏者。準梵本云。阿那薩囉嚩。此云無漏。今言捨者。性本捨故。猶心體離念。

譬如真如。無有少法而能壞亂。令其少分非是覺悟。善根迴向。亦復如是。普令開悟一切諸法。其心無量。

徧周法界。

九十六云無有少法而能壞亂令其少分非覺悟者。如徧非情則有少法非是覺悟。

譬如真如過去非始未來非末現在非異善根迴向亦復如是爲一切眾生新新恆起菩提心願普使清淨永離生死。

九十七云過去非始等者過去初際所以名始未來爲終故稱爲末現在似有已未分之無暫住時故名爲異。今明真如雖徧三世之中體絕三世初中後相故並言非。迴向亦爾雖爲眾生新新起願。

同彼真如徧三世之中。而令永離生死之相。方名清淨。

譬如真如於三世中無所分別。善根迴向亦復如是。現在念念心常覺悟。過去未來皆悉清淨。譬如真如成就一切諸佛菩薩。善根迴向亦復如是。發起一切大願方便。成就諸佛廣大智慧。譬如真如究竟清淨。不與一切諸煩惱俱。善根迴向亦復如是。能滅一切眾生煩惱。圓滿一切清淨智慧。

言三世無分別者。前約遮詮。不同三世。今約顯詮。常無分別。下之尙有二譬。共一百門。約十真如。

上離相迴向竟。

佛子。菩薩摩訶薩如是迴向時。得一切佛刹平等。普嚴淨一切世界。故得一切眾生平等。普爲轉無礙法輪。故得一切菩薩平等。普出生一切智願。故得一切諸佛平等。觀察諸佛體無二。故得一切法平等。普知諸法性無易。故得一切世間平等。以方便智善解一切語言道。故得一切菩薩行平等。隨種種善根。盡迴向。故得一切時平等。勤修佛事。於一切時無斷絕。故得一切業果平等。於世出世所有善根。皆無染著。咸究竟。故得一切佛自在神通平等。隨順世間。現佛事。

故佛子。是爲菩薩摩訶薩第八眞如相迴向。

大文第三迴向成益及結名可知。

菩薩摩訶薩住此迴向。證得無量清淨法門。能爲如來大師子吼。自在無畏。以善方便。教化成就無量菩薩。於一切時。未曾休息。得佛無量圓滿之身。一身充滿一切世界。得佛無量圓滿音聲。一音開悟一切眾生。得佛無量圓滿之力。一毛孔中。普能容納一切國土。得佛無量圓滿神通。置諸眾生於一塵中。得佛無量圓滿解脫。於一眾生身。示現一切諸佛境界。成正覺。得佛無量圓滿三昧。一三昧中。普能示現一切

三昧得佛無量圓滿辯才。說一句法。窮未來際而不可盡。悉除一切眾生疑惑。得佛無量圓滿眾生。具佛十力。盡眾生界。示成正覺。

大文第二菩薩住此下。明位果。初牒得因。後正得下。正顯所得。文有十句。初總餘別。皆云無量者。同如廣大無盡故。皆云得佛者。同佛所證故。作佛事故。

佛子。是爲菩薩摩訶薩。以一切善根順真如相迴向。大文佛子下。總以結示。

爾時金剛幢菩薩承佛威力。普觀十方而說頌言。

菩薩志樂常安住

正念堅固離癡惑

其心善軟恆清涼

積集無邊功德行

菩薩謙順無違逆

所有志願悉清淨

已得智慧大光明

善能照了一切業

菩薩思惟業廣大

種種差別甚希有

決意修行無退轉

以此饒益諸羣生

諸業差別無量種

菩薩一切勤修習

隨順眾生不違意

普令心淨生歡喜

已升調御人尊地

離諸熱惱心無礙

於法於義悉善知

爲利羣生轉勤習

菩薩所修眾善行

無量無數種種別

於彼一切分別知

爲利羣生故迴向

以妙智慧恆觀察

究竟廣大真實理

斷諸有處悉無餘

如彼真如善迴向

譬如真如徧一切

如是普攝諸世間

菩薩以此心迴向

悉令眾生無所著

菩薩願力徧一切

譬如真如無不在

若見不見念悉周

悉以功德而迴向

夜中隨住晝亦住

半月一月亦隨住

若年若劫悉住中

真如如是行亦然

所有三世及刹土

一切眾生與諸法

悉住其中無所住

以如是行而迴向

譬如真如本自性

菩薩如是發大心

真如所在無不在

以如是行而迴向

譬如真如本自性

其中未曾有一法

不得自性是眞性

以如是業而迴向

如眞如相業亦爾

如眞如性業亦爾

如眞如性本眞實

業亦如是同眞如

譬如眞如無邊際

業亦如是無有邊

而於其中無縛著

是故此業得清淨

如是聰慧真佛子

志願堅固不動搖

以其智力善通達

入於諸佛方便藏

覺悟法王眞實法

於中無著亦無縛

如是自在心無礙

未曾見有一法起

如來法身所作業

一切世間如彼相

說諸法相皆無相

知如是相是知法

菩薩住是不思議

於中思議不可盡

入此不可思議處

思與非思皆寂滅

如是思惟諸法性

了達一切業差別

所有我執皆除滅

住於功德無能動

菩薩一切業果報

悉爲無盡智所印

如是无盡自性盡

是故無盡方便滅

菩薩觀心不在外

亦復不得在於內

知其心性無所有

我法皆離永寂滅

彼諸佛子如是知

一切法性常空寂

無有一法能造作

同於諸佛悟無我

了知一切諸世間

悉與真如性相等

見是不可思議相

是則能知無相法

若能住是甚深法

常樂修行菩薩行

爲欲利益諸羣生

大誓莊嚴無退轉

是則超過於世間

不起生死妄分別

了達其心如幻化

勤修眾行度羣生

菩薩正念觀世間

一切皆從業緣得

爲欲救度修諸行

普攝三界無遺者

了知眾生種種異

悉是想行所分別

於此觀察悉明了

而不壞於諸法性

智者了知諸佛法

以如是行而迴向

哀愍一切諸眾生

令於實法正思惟

第二應頌二十九偈分二。初說偈儀。初六偈。頌行

體。於中先二偈。所迴行體。後四迴向之行。三有十

六偈。頌離相迴向。於中先九頌對如廣辨。後七偈却頌約法直明。後六偈頌迴向成益。末一偈結迴向意。

大方廣佛華嚴經綱要卷第三十

大方廣佛華嚴經綱要卷第三十一

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

十迴向品第二十五之九

佛子。云何爲菩薩摩訶薩無著無縛解脫迴向。

第九無著無縛解脫迴向。長行中亦先位行。後位果。前中初牒名徵起。釋名者。謂理智無依。不爲能所見著相惑所縛。由此卽名解脫。此約行體釋之。故本業云。以諸法無二。般若無生。二諦平等。三世

一相合故。又解脫者。亦作用自在。如不思議等。此約行用。由攝善根。皆用迴向普賢三業無邊自在德用故。問於何無縛著耶。謂心等十。以自身有心身口業果。及所作佛事。有世界佛刹眾生法智等故。又問不爲何等所縛著耶。略如上說。別有十事五對。一由離凡故。不縛生死。以出小乘故。不著二乘。二離六識取。不縛外境。離第七執。不著於內。三離現行縛。無種子著。四不取有縛。不執空著。五無惑障縛。無智障著。皆縛麤著細。若約一事。由著故縛。義如總中。惑縛著一義。此約無礙大用受名。通

能所迴向。約脫惑障。無縛無著。卽是解脫。約用解脫。乃無縛著之解脫。若望心等。亦是無縛著之心。卽上體用。並爲其性。

佛子。是菩薩摩訶薩。於一切善根。心生尊重。所謂於出生死。心生尊重。於攝取一切善根。心生尊重。於希求一切善根。心生尊重。於悔諸過業。心生尊重。於隨喜善根。心生尊重。於禮敬諸佛。心生尊重。於合掌恭敬。心生尊重。於頂禮塔廟。心生尊重。於勸佛說法。心生尊重。於如是等種種善根。皆生尊重。隨順忍可。

第二廣釋中大文分三。一明所迴善根。二佛子下。

能迴向行。三菩薩摩訶薩如是迴向時如三世下
迴向成益。初中有六行經。初一句總標尊重。別有
十句。

佛子。菩薩摩訶薩於彼善根皆生尊重隨順忍可時
究竟欣樂。堅固信解。自得安住。令他安住。勤修無著。
自在積集。成勝志樂。住如來境。勢力增長。悉得知見。
以諸善根如是迴向。所謂以無著無縛解脫心。成就
普賢身業。以無著無縛解脫心。清淨普賢語業。以無
著無縛解脫心。圓滿普賢意業。以無著無縛解脫心。
發起普賢廣大精進。

第二迴向行中。初佛子於彼善根下三行經。仍前進修。擬將迴向。次正明願行中。義有十門。大文分二。第一廣顯其相。後佛子以彼善根如是迴向。所謂心無縛下。總結多門。前中分二。先明眾生及菩提迴向。後佛子以無著無縛解脫心迴向。不分別下。迴向實際。前明廣大。後顯甚深。前廣大迴向有六十一門。其甚深之內。有二十門。并前尊重進修。復二十門。總有一百一門。顯圓融無盡深廣無礙。爲大迴向。就廣大六十一門。廣顯普賢自在德用。大文爲二。今初云以諸善根下四門內。前三成就。

三業。以下諸門。不出三業故。後一精進。通策萬行。故於中無著無縛解脫心。是能迴之心。成就普賢身業。正是所迴。他皆倣此。前諸善根。卽是所迴。故以諸善根之言。下流八十門內。此一迴向。不願成佛。願成普賢者。以普賢通於位前位後。得道不捨因行。窮盡生界。利樂有情。故願成普賢。卽兼菩提眾生二迴向故。下別顯中。一一門內。皆攝法界自在德用。或理或行。或智或境。或自行。或他生。或體或用。或因或果。或人或法。皆各總攝一切法。故不相從。上一段經。總有四門。總敘科義。下別明。

以無著無縛解脫心。具足普賢無礙音聲陀羅尼門。
其聲廣大。普徧十方。以無著無縛解脫心。具足普賢
見一切佛。陀羅尼門。恆見十方一切諸佛。以無著無
縛解脫心。成就解了一切音聲。陀羅尼門。同一切音
說無量法。以無著無縛解脫心。成就普賢一切劫住
陀羅尼門。普於十方修菩薩行。

別科畧分爲二。初二十三門。顯普賢自分究竟。卽
位中普賢。後三十四門。顯普賢勝進究竟。卽位後
普賢。二分無礙。是普賢德。前卽因圓果滿。後卽得
道不捨因行。故二段中皆含因果。今初分三。初四

成普賢總持德。二有十二門。成普賢自在力。用三有七門。願成普賢行。然諸門德多約三業。今初總持。亦具三業。一語業總持。二身業見佛。三意業解了。後一三業用之時處。

以無著無縛解脫心。成就普賢自在力。於一眾生身中。示修一切菩薩行。盡未來劫常無間斷。如一眾生身。一切眾生身。悉亦如是。以無著無縛解脫心。成就普賢自在力。普入一切眾道場。普現一切諸佛前。修菩薩行。以無著無縛解脫心。成就普賢佛自在力。於一門中。示現經不可說不可說劫。無有窮盡。令一切

眾生皆得悟入。以無著無縛解脫心。成就普賢佛自在力。於種種門中。示現經不可說不可說劫。無有窮盡。令一切眾生皆得悟入。其身普現一切佛前。以無著無縛解脫心。成就普賢自在力。念念中令不可說不可說眾生住十力智。心無疲倦。以無著無縛解脫心。成就普賢自在力。於一切眾生身中。現一切佛自在神通。令一切眾生住普賢行。以無著無縛解脫心。成就普賢自在力。於一切眾生語言中。作一切眾生語言。令一切眾生一一皆住一切智地。以無著無縛解脫心。成就普賢自在力。於一一眾生身中。普容納

一切眾生身。令皆自謂成就佛身。以無著無縛解脫心。成就普賢自在力。能以一華莊嚴一切十方世界。以無著無縛解脫心。成就普賢自在力。出大音聲。普徧法界。周聞一切諸佛國土。攝受調伏一切眾生。以無著無縛解脫心。成就普賢自在力。盡未來際不可說不可說劫。於念念中。悉能徧入一切世界。以佛神力。隨念莊嚴。以無著無縛解脫心。成就普賢自在力。盡未來際所住之劫。常能徧入一切世界。示現成佛。出興於世。以無著無縛解脫心。成普賢行。一光普照。盡虛空界一切世界。以無著無縛解脫心。成普賢行。

得無量智慧。具一切神通。說種種法。以無著無縛解脫心。成普賢行。入於如來盡一切劫不可測量神通智慧。以無著無縛解脫心。成普賢行。住盡法界諸如來所。以佛神力修習一切諸菩薩行。身口意業會無懈倦。以無著無縛解脫心。成普賢行。不違於義。不壞於法。言詞清淨。樂說無盡。教化調伏一切眾生。令其當得一切諸佛無上菩提。以無著無縛解脫心。修普賢行。入一法門時。放無量光照。不思議一切法門。如一法門。一切法門。皆亦如是。通達無礙。究竟當得一切智地。以無著無縛解脫心。住菩薩行。於法自在。到

於普賢莊嚴彼岸。於一一境界。皆以一切智觀察。悟入。而一切智亦不窮盡。

第二有十二門。成普賢自在力用。於中二。先九願。一多攝入自在。次出大音聲。下三願。明廣大自在。第三有七願。成普賢行。於中二。初云成普賢行。一光普照。下四願。成神通。次成普賢行。不違於義。下三願。成四辯。卽顯果滿究竟。上二十三門。明普賢自分究竟竟。

以無著無縛解脫心。始從此生。盡未來際。住普賢行。常不休息。得一切智。悟不可說不可說眞實法。於法。

究竟無有迷惑。以無著無縛解脫心。修普賢業。方便自在。得法光明。於諸菩薩所行之行。照了無礙。以無著無縛解脫心。修普賢行。得一切方便。智知一切方便。所謂無量方便。不思議方便。菩薩方便。一切智方便。一切菩薩調伏方便。轉無量法輪方便。不可說時方便。說種種法方便。無邊際無畏藏方便。說一切法無餘方便。以無著無縛解脫心。住普賢行。成就身業。令一切眾生見者歡喜。不生誹謗。發菩提心。永不退轉。究竟清淨。以無著無縛解脫心。修普賢行。得了一切眾生語言清淨智。一切言詞。具足莊嚴。普應眾生。

皆令歡喜。以無著無縛解脫心。住普賢行。立殊勝志。具清淨心。得廣大神通。廣大智慧。普詣一切廣大世間。廣大國土。廣大眾生所。說一切如來不可說廣大法。廣大莊嚴圓滿藏。以無著無縛解脫心。成滿普賢迴向行願。得一切佛清淨身。清淨心。清淨解。攝佛功德。住佛境界。智印普照。示現菩薩清淨之業。善入一切差別句義。示諸佛菩薩廣大自在。爲一切眾生現成正覺。以無著無縛解脫心。勤修普賢諸根行願。得聰利根。調順根。一切法自在根。無盡根。勤修一切善根根。一切佛境界平等根。受一切菩薩不退轉記大

精進根。了知一切佛法金剛界根。一切如來智慧光
照金剛燄根。分別一切諸根。自在根。安立無量眾生
於一切智根。無邊廣大根。一切圓滿根。清淨無礙根。
以無著無縛解脫心。修普賢行。得一切菩薩神力。所
謂無量廣大力。神力。無量自在智神力。不動其身普
現一切佛刹神力。無礙不斷自在神力。普攝一切佛
刹置於一處神力。一身徧滿一切佛刹神力。無礙解
脫遊戲神力。無所作一念自在神力。住無性無依神
力。一毛孔中次第安立不可說世界徧遊法界諸佛
道場。示諸眾生。皆令得入大智慧門神力。

大文第二。明勝進究竟。有三十四門。於中分三。初有九門。攝法廣大自在德。次有十五門。相卽相入重重德。三有十門。明微細容持甚深德。初中分六。一云始從此。生下有二願成智。次云成就身業。下有二願成利益。三云立殊勝志。下有一願廣大三業。四云成滿普賢。下有一願清淨三業。五云勤修普賢。下有一願種諸善根。於中三業別有十四根。皆以勝用增上光顯義故。立以根名。初聰利等三根。約眼等六。兼五受根。餘約信等五根。一無盡信根。亦兼命根。勤修進根。次一切佛念根。次不退轉。

是定根。餘七皆慧。六一願云。修普賢行。得一切菩薩神力。卽願神力三業。上九門攝法廣大自在德竟。

以無著無縛解脫心。入普賢門。生菩薩行。以自在智。於一念頃。普入無量諸佛國土。一身容受無量佛刹。獲能嚴淨佛國土智。恆以智慧觀見無邊諸佛國土。永不發起二乘之心。以無著無縛解脫心。修普賢方便行。入智慧境界。生如來家。住菩薩道。具足不可說不可說無量不思議殊勝心。行無量願。未曾休息。了知三世一切法界。以無著無縛解脫心。成就普賢清

淨法門。於一毛端量處。悉包容盡。虛空徧法界。不可說不可說。一切國土。皆使明見。如一毛端量處。徧法界。虛空界。一一毛端量處。悉亦如是。以無著無縛解脫心。成就普賢深心。方便於一念心中。現一眾生。不可說不可說劫念心。如是乃至現一切眾生。爾許劫念心。以無著無縛解脫心。入普賢迴向行方便地。於一身中。悉能包納盡法界。不可說不可說身。而眾生界無所增減。如一身。乃至周徧法界。一切身。悉亦如是。以無著無縛解脫心。成就普賢大願方便。捨離一切想倒心。倒見倒。普入一切諸佛境界。常見諸佛虛

空界等清淨法身。相好莊嚴。神力自在。常以妙音開
示演說。無礙無斷。令其聞者。如說受持。於如來身。了
無所得。以無著無縛解脫心。修普賢行。住菩薩地。於
一念中。入一切世界。所謂入仰世界。覆世界。不可說
不可說十方網。一切處廣大世界。以因陀羅網。分別
方便。普分別一切法界。以種種世界。入一世界。以不
可說不可說無量世界。入一世界。以一切法界所安
立無量世界。入一世界。以一切虛空界所安立無量
世界。入一世界。而亦不壞安立之相。悉令明見。以無
著無縛解脫心。修習普賢菩薩行願。得佛灌頂。於一

念中入方便地。成滿安住眾行智寶。悉能了知一切諸想。所謂眾生想法。想刹想。方想。佛想。世想。業想。行想。界想。解想。根想。時想。持想。煩惱想。清淨想。成熟想。見佛想。轉法輪想。聞法解了想。調伏想。無量想。出離想。種種地想。無量地想。菩薩了知想。菩薩修習想。菩薩三昧想。菩薩三昧起想。菩薩成想。菩薩壞想。菩薩歿想。菩薩生想。菩薩解脫想。菩薩自在想。菩薩住持想。菩薩境界想。劫成壞想。明想。暗想。晝想。夜想。半月一月一時一歲變異想。去想。來想。住想。坐想。睡想。覺想。如是等想。於一念中悉能了知。而離一切想。無所

分別。斷一切障。無所執著。一切佛智。充滿其心。一切佛法。長其善根。與諸如來等同一身。一切諸佛之所攝取。離垢清淨。一切佛法。皆隨修學。到於彼岸。以無著無縛。解脫心。爲一切眾生修普賢行。生大智寶。於一一心中。知無量心。隨其依止。隨其分別。隨其種性。隨其所作。隨其業用。隨其相狀。隨其思覺。種種不同。靡不明見。以無著無縛。解脫心。成就普賢大願智寶。於一處中。知於無量不可說處。如於一處。於一切處。悉亦如是。以無著無縛。解脫心。修習普賢行業智地。於一業中。能知無量不可說不可說業。其業各以種

種緣造明了知見。如於一業。於一切業。悉亦如是。以無著無縛解脫心。修習普賢知諸法智。於一法中。知不可說不可說法。於一切法中。而知一法。如是諸法。各各差別。無有障礙。無違無著。以無著無縛解脫心。住菩薩行。得具普賢無礙耳根。於一言音中。知不可說不可說言音。無量無邊種種差別。而無所著。如於一言音。於一切言音。悉亦如是。以無著無縛解脫心。修普賢智。起普賢行。住普賢地。於一一法中。演說不可說不可說法。其法廣大。種種差別。教化攝受。不可思議。方便相應。於無量時。於一切時。隨諸眾生所有。

欲解隨根隨時。以佛音聲而爲說法。以一妙音。令不可說道場眾會無量眾生。皆悉歡喜。一切如來所無量菩薩。充滿法界。立殊勝志。生廣大見。究竟了知一切諸行。住普賢地。隨所說法。於念念中。悉能證入。一刹那頃。增長無量不可說不可說大智慧聚。盡未來劫。如是演說。於一切刹。修習廣大虛空等行。成就圓滿。以無著無縛解脫心。修習普賢諸根行門。成大神王。於一一根中。悉能了知無量諸根。無量心樂。不思議境界所生妙行。

第二有十五門。明相卽相入。重重廣大德。於中分

六。初有三門。入普賢門。一行門。二智門。三法門。次云成就普賢深心方便。下有三門。願成普賢方便。一深心方便。二迴向方便。三大願方便。三有二門。入普賢之位。於中初一住菩薩地。始入。次云得佛灌頂。明終成。於中三。初標能所知。次所謂下。列所知。想有五十二。其業行界解根等皆十力智所知。持謂執持善惡。地謂斷證分齊。菩薩成者。解行正命。菩薩壞者。戒見邪命。餘可知。四云爲一切眾生修普賢行。生大智寶。下有四門。成普賢大智。一。成行智。無機不知。以化眾生爲其行故。二。大願智。無

處不知。願徧化故。三窮業智。了因緣故。四如法智。知化法故。五云得具普賢無礙耳。下有二門。成普賢聽說。初耳無不聽。次舌無不演。六云修習普賢諸根行門。下一門。成知根德。一攝一切故。於中言大行王者。以徧知根於化行自在故。上有二十四門。

以無著無縛解脫心。住普賢行大迴向心。得色甚微細智。身甚微細智。刹甚微細智。劫甚微細智。世甚微細智。方甚微細智。時甚微細智。數甚微細智。業報甚微細智。清淨甚微細智。如是等一切甚微細於一念

中悉能了知。而心不恐怖。心不迷惑。不亂不散。不濁不劣。其心一緣。心善寂定。心善分別。心善安住。以無著無縛解脫心。住菩薩智修普賢行。無有懈怠。能知一切眾生趣甚微細。眾生死甚微細。眾生生甚微細。眾生住甚微細。眾生處甚微細。眾生日類甚微細。眾生境界甚微細。眾修行甚微細。眾生取甚微細。眾生攀緣甚微細。如是等一切甚微細於一念中。悉能了知。以無著無縛解脫心立深志樂修普賢行。能知一切菩薩從初發心爲一切眾生修菩薩行甚微細。菩薩住處甚微細。菩薩神通甚微細。菩薩遊行無量佛

利甚微細。菩薩法光明甚微細。菩薩清淨眼甚微細。
菩薩成就殊勝心甚微細。菩薩往詣一切如來道場
眾會甚微細。菩薩陀羅尼門智甚微細。菩薩無量無
畏地一切辯才藏演說甚微細。菩薩無量三昧相甚
微細。菩薩見一切佛三昧智甚微細。菩薩甚深三昧
智甚微細。菩薩大莊嚴三昧智甚微細。菩薩法界三
昧智甚微細。菩薩大自在神通三昧智甚微細。菩薩
盡未來際廣大行住持三昧智甚微細。菩薩出生無
量差別三昧智甚微細。菩薩出生一切諸佛前勤修
供養恆不捨離三昧智甚微細。菩薩修行一切甚深

廣博無障無礙三昧智甚微細。菩薩究竟一切智地。
住持行智地。大神通地。決定義地。離翳三昧智甚微
細。如是等一切甚微細悉能了知。以無著無縛解脫
心。修普賢行。悉知一切菩薩安立智甚微細。菩薩地
甚微細。菩薩無量行甚微細。菩薩出生迴向甚微細。
菩薩得一切佛藏甚微細。菩薩觀察智甚微細。菩薩
神通願力甚微細。菩薩演說三昧甚微細。菩薩自在
方便甚微細。菩薩印甚微細。菩薩一生補處甚微細。
菩薩生兜率天甚微細。菩薩住止天宮甚微細。菩薩
嚴淨佛國甚微細。菩薩觀察人中甚微細。菩薩放大

光明甚微細。菩薩種族殊勝甚微細。菩薩道場眾會甚微細。菩薩徧一切世界受生甚微細。菩薩於一身示現一切身命終甚微細。菩薩入母胎甚微細。菩薩住母胎甚微細。菩薩在母胎中自在示現一切法界道場眾會甚微細。菩薩在母胎中示現一切佛神力甚微細。菩薩示現誕生事甚微細。菩薩師子遊行七步智甚微細。菩薩示處王宮巧方便智甚微細。菩薩出家修調伏行甚微細。菩薩菩提樹下坐道場甚微細。菩薩破魔軍眾成阿耨多羅三藐三菩提甚微細。如來坐菩提座。放大光明。照十方界甚微細。如來示

現無量神變甚微細。如來師子吼大涅槃甚微細。如來調伏一切眾生而無所礙甚微細。如來不思議自在力如金剛菩提心甚微細。如來普護念一切世間境界甚微細。如來普於一切世界施作佛事。盡未來劫而無休息甚微細。如來無礙神力周徧法界甚微細。如來於盡虛空界一切世界普現成佛。調伏眾生甚微細。如來於一佛身現無量佛身甚微細。如來於去來今三世中皆處道場自在智甚微細。如是等一切微細。悉能了知。成就清淨。普能示現一切世間。於念念中增長智慧。圓滿不退。善巧方便修菩薩行。無

有休息。成就普賢迴向之地。具足一切如來功德。永不厭捨菩薩所行。出生菩薩現前境界。無量方便。皆悉清淨。普欲安隱一切眾生。修菩薩行。成就菩薩大威德地。得諸菩薩心之樂欲。獲金剛幢迴向之門。出生法界諸功德藏。常爲諸佛之所護念。入諸菩薩深妙法門。演說一切真實之義。於法善巧。無所違失。起大誓願。不捨眾生。於一念中。盡知一切心非心地境界之藏。於非心處。示生於心。遠離語言。安住智慧。同諸菩薩所行之行。以自在力。示成佛道。盡未來際。常無休息。一切世間眾生劫數妄想言說之所建立。神

通願力。悉能示現。以無著無縛解脫心。修普賢行。得一切眾生界甚微細智。所謂眾生界分別甚微細智。眾生界言說甚微細智。眾生界執著甚微細智。眾生界異類甚微細智。眾生界同類甚微細智。眾生界無量趣甚微細智。眾生界不思議種種分別所作甚微細智。眾生界無量雜染甚微細智。眾生界無量清淨甚微細智。如是等一切眾生境界甚微細。於一念中能以智慧。皆如實知。廣攝眾生而爲說法。開示種種清淨法門。令修菩薩廣大智慧。化身無量見者歡喜。以智日光。照菩薩心。令其開悟。智慧自在。以無著

無縛解脫心爲一切眾生於一切世界修普賢行得
盡虛空界法界一切世界甚微細智所謂小世界甚
微細智大世界甚微細智雜染世界甚微細智清淨
世界甚微細智無比世界甚微細智種種世界甚微
細智廣世界甚微細智狹世界甚微細智無礙莊嚴
世界甚微細智徧一切世界佛出現甚微細智徧一
切世界說正法甚微細智徧一切世界普現身甚微
細智徧一切世界放大光明甚微細智盡一切世界
示現諸佛自在神通甚微細智盡一切世界以一音
聲示一切音甚微細智入一切世界一切佛刹道場

眾會甚微細智。以一切法界佛刹作一佛刹甚微細智。以一佛刹作一切法界佛刹甚微細智。知一切世界如夢甚微細智。知一切世界如像甚微細智。知一切世界如幻甚微細智。如是了知出生一切菩薩之道。入普賢行智慧神通。具普賢觀。修菩薩行。常無休息。得一切佛自在神變。具無礙身。住無依智。於諸善法。無所取著。心之所行。悉無所得。於一切處。起遠離想。於菩薩行。起淨修想。於一切智。無取著想。以諸三昧。而自莊嚴。智慧隨順一切法界。以無著無縛解脫心。入普賢菩薩行門。得無量法界甚微細智。演說一

切法界甚微細智。入廣大法界甚微細智。分別不思議法界甚微細智。分別一切法界甚微細智。一念徧一切法界甚微細智。普入一切法界甚微細智。知一切法界無所得甚微細智。觀一切法界無所礙甚微細智。知一切法界無有生甚微細智。於一切法現神變甚微細智。如是等一切法界甚微細。以廣大智皆如實知。於法自在。示普賢行。令諸眾生皆悉滿足。不捨於義。不著於法。出生平等無礙之智。知無礙本。不住一切法。不壞諸法性。如實無染。猶若虛空。隨順世間。起於言說。開真實義。示寂滅性。於一切境。無依

無住。無有分別。明見法界。廣大安立。了諸世間。及一切法。平等無二。離一切著。以無著無縛解脫心。修普賢行。生諸劫甚微細智。所謂以不可說劫爲一念甚微細智。以一念爲不可說劫甚微細智。以阿僧祇劫入一劫甚微細智。以一劫入阿僧祇劫甚微細智。以長劫入短劫甚微細智。以短劫入長劫甚微細智。入有佛劫無佛劫甚微細智。知一切劫數甚微細智。知一切劫非劫甚微細智。一念中見三世一切劫甚微細智。如是等一切諸劫甚微細。以如來智於一念中。皆如實知。得諸菩薩圓滿行。王心。入普賢行心。離一

切分別異道戲論心。發大願無懈怠心。普見無量世界網。無量諸佛充滿心。於諸佛善根諸菩薩行。能聞持心於安慰。一切眾生廣大行。聞已不忘心。能於一切劫現佛出世心。於一一世界盡未來際行不動行。無休息心。於一切世界中。以如來身業充滿菩薩身心。以無著無縛解脫心。修普賢行。成不退轉。得一切法甚微細智。所謂甚深法甚微細智。廣大法甚微細智。種種法甚微細智。莊嚴法甚微細智。一切法無有量甚微細智。一切法入一法甚微細智。一法入一切法甚微細智。一切法入非法甚微細智。無法中安立。

一切法而不相違甚微細智。入一切佛法方便無有餘甚微細智。如是等一切世界一切言說所安立法。諸微細智與彼同等。其智無礙。皆如實知。得入無邊法界心。於一一法界。深心堅住。成無礙行。以一切智充滿諸根。入諸佛智正念方便。成就諸佛廣大功德。徧滿法界。普入一切諸如來身。現諸菩薩所有身業。隨順一切世界言詞。演說於法。得一切佛神力所加智慧。意業。出生無量善巧方便。分別諸法。薩婆若智。以無著無縛解脫心。修普賢行。出生一切甚微細智。所謂知一切利。甚微細智。知一切眾生甚微細智。知

一切法果報甚微細智。知一切眾生心甚微細智。知一切說法時甚微細智。知一切法界甚微細智。知一切盡虛空界三世甚微細智。知一切語言道甚微細智。知一切世間行甚微細智。知一切出世行甚微細智。乃至知一切如來道。一切菩薩道。一切眾生道甚微細智。修菩薩行。住普賢道。若文若義皆如實知。生如影智。生如夢智。生如幻智。生如響智。生如化智。生如空智。生寂滅智。生一切法界智。生無所依智。生一切佛法智。

第三有十門。明微細容持甚深德。謂願得普賢微

細智法。以所知之事微細故。能知之智微細。微細有二。一難知故。二就經宗。於一法中有一切法炳然齊現故。如文云。眾生業報微細等十門。卽爲十段。初知世間法微細智。文中分三。初言大迴向心。卽標德所依。次云得色甚微細下。列所得法。後如是等一切甚微細下。結能知德。不怖甚深。不迷事理。亂謂錯謬。散爲不專。濁謂垢染。劣無堪任。今皆反此。上明離過。下顯成德。一緣謂專注一境。故不散。善寂謂心境兩忘。故不亂。卽定而知名善分別。故不迷。卽照而止。名善住。故不怖。此能知之德以

在初門。義通下九。二云無有懈倦下。知眾生趣微細智。三云立深志樂下。知菩薩行德微細智。列所得中二十句。前十別顯。後十同明三昧。四知菩薩位德大用智。於中二。初以無著心修普賢行。標也。次云悉知一切下。列所得法。有四十一種。初十一事。位成行滿。次云菩薩生兜率天下有三十事。明位滿大用現八相等。其中有菩薩佛名因果之異。皆是用中之事耳。三云如是等一切微細下。結能知德。謂成普賢自在之德。德亦名益。此通後諸智而生。有十二行經。五知眾生界微細智有三。初以

無著下一句。標德所依。前第二云知眾生趣。卽十力中自業智境。此知眾生界。卽界是性。故不同耳。故晉經云。入眾生性微也。次云得一切眾生界下。列所得智。於中十句。初總。所謂下別。言眾生界分別等者。亦可言眾生分別界等。三云如是等一切下。結所知德。六知世界微細智有三。初以無著下。總標。次云所謂小世界甚微細智下。別顯。有二十一智。初九直語器界。次九明其受用。其一多相作。亦是菩薩受用。後三正知無取著。三云如是了知下。結顯能知德。七知三界微細智。此顯卽理之事。

法界故云一切法界。卽事之理。復云不生等。亦初標所依。次云得無量下。列所得智。初句總。餘別。後云如是等下。結能知之德。八知入劫微細智亦三。初以無著下。標德所依。次云所謂下列所得智。三如是等下。結能知德。九知法無礙微細智。初標。二所謂下。列所得智。文有十句。義有四重。一法體具德。二一切入一等。明法用卽入。三入非法等明理事相卽。四入方便無餘。是體用善巧。後如是等下。結能知德。十總知一切盡無餘微細智。晉經十句。皆有無餘之言。文中分四。初以無著下。總標所依。

二所謂下。別列所得法。卽牒前十門。名或小變。次或不等。會義皆同。三云乃至知一切下。結所不說。四如幻下。顯能知之德。亦有通別。通從前生。別則次第對前十句。一外刹是心之影像故。今能知刹。則知影像。二眾生想現。故云如夢。三者果報幻生。故如幻。四心性寂然。緣感成異。故云如響。五說時如化。六卽空界。七言語本寂。八卽法界。九世間無依。十出世間行。卽是佛法。上通前總明迴向。菩提眾生竟。下迴向實際。卽離相行。

佛子。菩薩摩訶薩。以無著無縛。解脫心迴向。不分別。

若世間。若世間法。不分別。若菩提。若菩提薩埵。不分別。若菩薩行。若出離道。不分別。若佛。若一切佛法。不分別。若調伏眾生。若不調伏眾生。不分別。若善根。若迴向。不分別。若自。若他。不分別。若施物。若受施者。不分別。若菩薩行。若等正覺。不分別。若法。若智。

大文第二迴向實際。文有十對。初假實對。二卽人法。三卽體用。於中五對。皆約能所。第九因果。等正覺。約人契法。異前菩提。十卽教法。教智以不分別故。一一入實。上廣顯其相。

佛子。菩薩摩訶薩。以彼善根如是迴向。所謂心無著

無縛解脫。身無著無縛解脫。口無著無縛解脫。業無著無縛解脫。報無著無縛解脫。世間無著無縛解脫。佛刹無著無縛解脫。眾生無著無縛解脫。法無著無縛解脫。智無著無縛解脫。

大文第二佛子下總結多門。由心無縛故。令身等皆無縛著也。

菩薩摩訶薩如是迴向時。如三世諸佛爲菩薩時。所修迴向。而行迴向。學過去諸佛迴向。成未來諸佛迴向。住現在諸佛迴向。安住過去諸佛迴向道。不捨未來諸佛迴向道。隨順現在諸佛迴向道。勤修過去諸

佛教成就未來諸佛教。了知現在諸佛教。滿足過去諸佛平等。成就未來諸佛平等。安住現在諸佛平等。行過去諸佛境界。住未來諸佛境界。等現在諸佛境界。得三世一切諸佛善根。具三世一切諸佛種性。住三世一切諸佛所行。順三世一切諸佛境界。

大文第三菩薩下。明迴向成益。初牒。後顯。顯有十句。初總餘別。別中一迴向者。正起修行。二道者。常遊法徑。三迴向教。四平等智。五所緣境。六功行絕。修是佛善根。七了見本源。成如來性。八無礙悲智。是所行。九無盡體用。是分齊境。

佛子。是爲菩薩摩訶薩第九無著無縛解脫心迴向。
第三結名。從初廣說。故有心言。

菩薩摩訶薩住此迴向時。一切金剛輪圍山所不能
壞。於一切眾生中。色相第一。無能及者。悉能摧破諸
魔邪業。普現十方一切世界。修菩薩行。爲欲開悟一
切眾生。以善方便。說諸佛法。得大智慧。於諸佛法。心
無迷惑。在在生處。若行若住。常得值遇。不壞眷屬。三
世諸佛所說正法。以清淨念。悉能受持。盡未來劫。修
菩薩行。常不休息。無所依著。普賢行願。增長具足。得
一切智。施作佛事。成就菩薩自在神通。

第二位果成三種果。一現成果。於中先自利。後爲欲下。利他。二在在下。成當得果。初自利。後盡未來下。兼於自他。三普賢下。明終成果。因果無礙。爾時金剛幢菩薩承佛神力。普觀十方而說頌言。

普於十方無等尊

未曾一起輕慢心

隨其所修功德業

亦復恭敬生尊重

所修一切諸功德

不爲自己及他人

恆以最上信解心

利益眾生故迴向

未嘗暫起高慢心

亦復不生下劣意

如來所有身等業

彼悉請問勤修習

所修種種諸善根

悉爲利益諸含識

安住深心廣大解

迴向人尊功德位

世間所有無量別

種種善巧奇特事

麤細廣大及甚深

靡不修行皆了達

世間所有種種身

以身平等入其中

於此修行得了悟

慧門成就無退轉

世間國土無量種

微細廣大仰覆別

菩薩能以智慧門

一毛孔中無不見

眾生心行無有量

能令平等入一心

以智慧門悉開悟

於所修行不退轉

眾生諸根及欲樂

上中下品各不同

一切甚深難可知

隨其本性悉能了

眾生所有種種業

上中下品各差別

菩薩深入如來力

以智慧門普明見

不可思議無量劫

能令平等入一念

如是見已徧十方

修行一切清淨業

過去未來及現在

了知其相各不同

而亦不違平等理

是則大心明達行

世間眾生行不同

或顯或隱無量種

菩薩悉知差別相

亦知其相皆無相

十方世界一切佛

所現自在神通力

廣大難可得思議

菩薩悉能分別知

一切世界兜率中

自然覺悟人師子

功德廣大淨無等

如其體相悉能見

或現降神處母胎

無量自在大神變

成佛說法示滅度

普徧世間無暫已

人中師子初生時

一切勝智悉承奉

諸天帝釋梵王等

靡不恭敬而瞻侍

十方一切無有餘

無量無邊法界中

無始無末無遐邇

示現如來自在力

人中尊導現生已

遊行諸方各七步

欲以妙法悟羣生

是故如來普觀察

見諸眾生沈欲海

盲闇愚癡之所覆

人中自在現微笑

念當救彼三有苦

大師子吼出妙音

我爲世間第一尊

應然明淨智慧燈

滅彼生死愚癡闇

人師子王出世時

普放無量大光明

令諸惡道皆休息

永滅世間眾苦難

或時示現處王宮

或現捨家修學道

爲欲饒益眾生故

示其如是自在力

如來始坐道場時

一切大地皆動搖

十方世界悉蒙光

六趣眾生咸離苦

震動一切魔宮殿

開悟十方眾生心

昔曾受化及修行

皆使了知真實義

十方所有諸國土

悉入毛孔無有餘

一切毛孔剎無邊

於彼普現神通力

一切諸佛所開演

無量方便皆隨悟

說諸如來所不說

亦能解了勤修習

徧滿三千大千界

一切魔軍與鬪諍

所作無量種種惡

無礙智門能悉滅

如來或在諸佛刹
或復現處諸天宮

或在梵宮而現身
菩薩悉見無障礙

佛現無量種種身
轉於清淨妙法輪

乃至三世一切劫
求其邊際不可得

寶座高廣最無等
徧滿十方無量界

種種妙相而莊嚴
佛處其上難思議

諸佛子眾共圍繞
盡於法界悉周徧

開示菩提無量行
一切最勝所由道

諸佛隨宜所作業
無量無邊等法界

智者能以一方便
一切了知無不盡

諸佛自在神通力

示現一切種種身

或現諸趣無量生

或現綵女眾圍繞

或於無量諸世界

示現出家成佛道

乃至最後般涅槃

分布其身起塔廟

如是種種無邊行

導師演說佛所住

世尊所有大功德

誓願修行悉合盡

以彼善根迴向時

住於如是方便法

如是修習菩提行

其心畢竟無厭怠

如來所有大神通

及以無邊勝功德

乃至世間諸智行

一切悉知無不盡

如是一切人中主 隨其所有諸境界
於一念中皆了悟 而亦不捨菩提行
諸佛所有微細行 及一切剎種種法
於彼悉能隨順知 究竟迴向到彼岸
有數無數一切劫 菩薩了知卽一念
於此善入菩提行 常勤修習不退轉
十方所有無量剎 或有雜染或清淨
及彼一切諸如來 菩薩悉能分別知
於念念中悉明見 不可思議無量劫
如三世無有餘 具足修治菩薩行

於一切心平等入

入一切法亦平等

盡空佛剎斯亦然

彼最勝行悉了知

出生眾生及諸法

所有種種諸智慧

菩薩神力亦復然

如是一切無窮盡

諸微細智各差別

菩薩盡攝無有餘

同相異相悉善知

如是修行廣大行

十方無量諸佛剎

其中眾生各無量

趣生族類種種殊

住行力已悉能知

過去未來現在世

所有一切諸導師

若人知此而迴向

則與彼佛行平等

若人能修此迴向 則爲學佛所行道

當得一切佛功德 及以一切佛智慧

一切世間莫能壞 一切所學皆成就

常能憶念一切佛 常見一切世間燈

菩薩勝行不可量 諸功德法亦如是

已住如來無上行 悉知諸佛自在力

第二應頌有五十一偈。分二。先頌位行。後頌位果。

前中三。初三頌所迴善根。二所修下四十四頌頌

迴向行。三過去下二頌頌行成利益。頌迴向行中。

初所修下一偈。頌普賢自分究竟。餘頌勝進究竟。

前長行有三。一攝法廣大德。二卽入重重德。三微細容持德。今通頌之。但顯微細。於中分十。第一有三偈。頌世間微細智。二有一偈。頌眾生趣。由行別故。三有二偈。頌第五眾生界。界卽根性。四有三偈。頌第三菩薩行德。菩薩亦受眾生之稱。五十方下有二十七偈。頌第四位德。大用於中。三。初一偈總次。二十三別。頌因果八相等。後三偈。頌能知之德。六有數。下一偈。頌第八知劫智。七。十方下。一偈。頌第六世界智。八於念念下。二偈。頌第七法界智。九。出生下。一偈。頌第九知法智。十諸微細下。二偈。頌

一切法智。過去未來。下四偈。頌成益位果可知。

大方廣佛華嚴經綱要卷第三十一

大方廣佛華嚴經綱要卷第三十二

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

十迴向品第二十五之十

佛子。云何菩薩摩訶薩等法界無量迴向。

第十等法界無量迴向。於中長行先位行。後位果。前牒名廣釋中。釋名謂稱法界起大用故。等者入義。故本分中名入法界。法界無量卽是所入。何法能入。略有其四。一所迴行法。謂法施之行。稱法界

施故。二所行行體。廣大無邊故。三能迴之智。四所迴之德。謂以稱法界之大智。迴等法界之善根。向同法界之大用。成法界之行體。此則位滿至極。故標法界之名。當法受稱。等何法界。此通四義。一。等理法界。故經云。如法界性。二。等事法界。經云。欲見等法界。無量諸佛。調伏等法界。無量眾生。三。等理事無礙法界。經云。願一切眾生。作修行無相道法。師以諸妙相。而自莊嚴。則相無相。無礙。皆其類也。四。等事事無礙法界。經云。一切佛刹中。現一切佛刹。然其四事。全等。四種法界。融而無二。故此能等。

卽是所等。非有二物而可依之。故上稱入。入無所入。本業但云法界。無等入言。卽斯意也。釋云。覺一切法第一義諦中道無相。一切法皆一相照。故第一中道卽是所入。皆一相照。卽是能入。此二無二。卽是法界。故不可但以事法界爲名。言無量者。約理則無分量。約事則無數量。前迴向明依體起用。此明體用無礙。圓極自在。卽以法施及諸相應普賢自在大善巧德爲其位體。

佛子。此菩薩摩訶薩。以離垢縉而繫其頂。住法師位。第二廣釋中。大文分三。初明所迴善根。二以此善

根下攝將迴向。三佛子菩薩摩訶薩如是迴向時安住下迴向成益。初中先明行依身位。第二廣行下依位起行。今初言離垢等者。如十地得離垢三昧。受智職位。內得此定。灌心首故。外示表彰。白繒繫頂。法從喻稱。名離垢繒。但有此相。知得彼定。表位成滿。方能雲雨說法。以益羣生。名法師位。然此位滿。總有五重。一信滿。如賢首品說。便得灌頂而昇位等。二約解滿。如灌頂住。三約行滿。如第十行入因陀羅網法界等。四善巧願滿。如此位辨。五約證滿。如十地說。此五重內。隨一成處。必具理行。內

相應故。皆名位滿。若約圓融。但一位滿。卽是究竟。更不待餘。又若得一。卽得餘位。總一法界受職之位。隨門差別。五位不同。法體融通。全攝無礙。

廣行法施。起大慈悲。安立眾生於菩提心。常行饒益。無有休息。以菩提心長養善根。爲諸眾生作調御師。示諸眾生一切智道。爲諸眾生作法藏日。善根光明。普照一切。於諸眾生。其心平等。修諸善行。無有休息。心淨無染。智慧自在。不捨一切善根道業。作諸眾生大智商主。普令得入安隱正道。爲諸眾生而作導首。令修一切善根法行。爲諸眾生作不可壞堅固善友。

令其善根增長成就佛子。此菩薩摩訶薩以法施爲首。發生一切清淨白法。攝受趣向一切智心。殊勝願力。究竟堅固。成就增益。具大威德。依善知識。心無詔誑。思惟觀察。一切智門無邊境界。

二依位起行中二。先明起行。後佛子下顯其行成。又前卽利他。後明自利。又前明自分。後顯勝進。今初中十一句。初總餘別。別顯慈等皆是法施。夫法施者。生解之妙方。起行之根本。入聖道之階。漸越苦海之津梁。古德云。此經中託人以弘道多歎法師之勝德。寄行以表法。每引普賢爲末篇。故知法

施之功。過財施之難喻。於中十句。一慈悲安物。二益物無息。此二卽廣大心。三大心長養。四究竟調御。此二卽第一心。五法日普照。六等勸修善。此二卽常心。常愛眾生同於己。故名爲平等。七心淨無礙。卽不顛倒心。八示果寶渚。故云商主。然寶渚卽涅槃菩提之果。九導以萬行之因。此二卽第一心。十增長不壞。爲護念也。始令發心。終令成就。有始有卒者。其唯聖人乎。次云佛子。此菩薩以法施爲首。下顯其行成。初牒前法施。攝受下五句。正顯成相。然所向者。特此善根耳。

以此善根如是迴向。願得修習成就增長廣大無礙一切境界。願得於佛正教之中乃至聽聞一句一偈受持演說。願得憶念與法界等無量無邊一切世界去來現在一切諸佛。既憶念已。修菩薩行。又願以此念佛善根。爲一眾生。於一世界。盡未來劫。修菩薩行。如於一世界。盡法界虛空界一切世界。皆亦如是。如爲一眾生。爲一切眾生。亦復如是。以善方便。一一皆爲盡未來劫。大誓莊嚴。終無離佛善知識想。常見諸佛。現在其前。無有一佛出興於世。不得親近。一切諸佛及諸菩薩。所讚所說清淨梵行。誓願修行。悉令圓

滿。所謂不破梵行。不缺梵行。不雜梵行。無玷梵行。無失梵行。無能蔽梵行。佛所讚梵行。無所依梵行。無所得梵行。增益菩薩清淨梵行。三世諸佛所行梵行。無礙梵行。無著梵行。無諍梵行。無滅梵行。安住梵行。無比梵行。無動梵行。無亂梵行。無恚梵行。佛子菩薩摩訶薩若能爲己修行如是清淨梵行。則能普爲一切眾生。令一切眾生皆得安住。令一切眾生皆得開曉。令一切眾生皆得成就。令一切眾生皆得清淨。令一切眾生皆得無垢。令一切眾生皆得照明。令一切眾生離諸塵染。令一切眾生無諸障翳。令一切眾生離

諸熱惱。令一切眾生離諸纏縛。令一切眾生永離諸惡。令一切眾生無諸惱害。畢竟清淨。何以故。菩薩摩訶薩。自於梵行不能清淨。不能令他而得清淨。自於梵行而有退轉。不能令他無有退轉。自於梵行而有失壞。不能令他無有失壞。自於梵行而有遠離。不能令他常不遠離。自於梵行而有懈怠。不能令他不生懈怠。自於梵行不生信解。不能令他心生信解。自於梵行而不安住。不能令他而得安住。自於梵行而不能證入。不能令他心得證入。自於梵行而有放捨。不能令他恆不放捨。自於梵行而有散動。不能令他心不

散動。何以故。菩薩摩訶薩住無倒行。說無倒法。所言誠實。如說修行。淨身口意。離諸雜染。住無礙行。滅一切障。菩薩摩訶薩自得淨心。爲他演說清淨心法。自修和忍。以諸善根調伏其心。令他和忍。以諸善根調伏其心。自離疑悔。亦令他人永離疑悔。自得淨信。亦令他得不壞淨信。自住正法。亦令眾生安住正法。

第二攝將迴向下文。總有二十一門。大文分三。初九門別對十一句善根以明迴向。卽自分。次四門通顯迴向之意。三有八門。更以異門別明迴向。卽勝進。今初卽爲九段。第一願聞法見佛修二利行。

對前二句。於中初一願總明。餘皆別顯。今初初句。牒前。次願得已下。正顯願辭。一切境界者。文局初段。義總該於二十一段。迴向皆一切境。此一切境。廣大如法界。理事事事。皆無障礙。如此境界。皆得增長成就。次別顯中二。初云願得於佛正教之中。一行經願聞法受持。卽成上廣行法施之義。次云願得憶念下一行半經。願念佛修行。成上饒益無休。於中先正明念佛之行。次又願以此善根下四行經。迴念佛善。成二利行。於中亦二。先總爲一切。徧於時處修菩薩行。後一切諸佛下。別明修行。梵

行爲萬行之本。故偏明之。於中有三。初一行餘經。總舉所願。次所謂不破梵行。下四行半經。列所修之行。於中有二十梵行。與智論所列十戒多同。謂不缺。不破。不穿。不雜。隨道。無著。智所讚。自在。隨定。具足。通用。性戒。而爲根本。今開十爲二十一。疏依經次第。會論十戒。經不破在初者。謂持四重十重。若犯此者。猶破器無用故。二不缺者。謂持僧殘。殘如器缺。猶可修補。三不雜者。謂持方便。若念破戒事。染心共語。聞環釧聲。皆名爲雜。四無玷者。謂持波逸提。如白圭之玷。雖則可磨。亦不爲也。六無失。

者。定心相應。乃至吉羅。亦不誤失。六緣不能壞。上
三皆不穿戒。穿如漏器。不堪受道。前六皆律儀。七
卽智所讚。八無依者。不依名利果報。九無得。謂不
得能持所持。次增益下三。皆隨道戒。十揀小道。十
一顯是佛行。十二兼能通達非道。故云無礙。十三
無著。卽見真成聖。次無諍。下四。卽具足戒。謂觀中
道。具事理故。一事理無違。二順理而行。則心常不
滅。三心能詣理。故云安住。四對餘超勝。故云無比。
次無動已下。皆隨定戒。謂首楞嚴定。不起滅定。現
諸威儀。雖示十法界像。無戒不行。而寂然不動。順

境不能亂。違境而無恙。次云佛子菩薩摩訶薩若能爲己下七行經第三通難釋成。有伏難云。菩薩期心先人後己。今先自行。豈不相違。故下釋云。但自修行。卽爲益物。此亦成上安立眾生於菩提心。及以菩提心長養善根。文中二。初正明。二重徵釋。今初若能一句。總明。次令一切下。別顯。有十二句。總顯持犯。次何以故下。徵釋中二。初正徵反釋。後重徵順釋。今初正釋中有八行經。文有十句。徵意云。自他行異。如何自行。便是爲他。釋意云。自身不正。其令不從。故上自行。便爲利物。次何以故下。重

徵順釋。有六行經。徵意云。石雖不利而能利刀。自雖不行。何妨利物。今云不能益者。其故何耶。釋意云。若自犯教他。便成顛倒。菩薩無倒。必言行相符。故要如說而行。方能如行如說。文中先總明。後菩薩下別顯。初門竟。

佛子。菩薩摩訶薩。復以法施所生善根。如是迴向。所謂願我獲得一切諸佛無盡法門。普爲眾生分別解說。皆令歡喜。心得滿足。摧滅一切外道異論。願我能爲一切眾生演說三世諸佛法海。於一一法生起。一一法義理。一一法名言。一一法安立。一一法解說。一

一法顯示。一一法門戶。一一法悟入。一一法觀察。一
一法分位。悉得無邊無盡法藏。獲無所畏。具四辯才。
廣爲眾生分別解說。窮未來際而無有盡。爲欲令一
切眾生立勝志願。出生無礙無謬失辯。爲欲令一切
眾生皆生歡喜。爲欲令一切眾生成就一切淨法光
明。隨其類音演說無斷。爲欲令一切眾生深信歡喜
住一切智。辯了諸法。俾無迷惑。作是念言。我當普於
一切世界。爲諸眾生精勤修習。得徧法界無量自在
身。得徧法界無量廣大心。具等法界無量清淨音聲。
現等法界無量眾會道場。修等法界無量菩薩業。得

等法界無量菩薩住。證等法界無量菩薩平等。學等法界無量菩薩法。住等法界無量菩薩行。入等法界無量菩薩迴向。是爲菩薩摩訶薩以諸善根而爲迴向。爲令眾生悉得成就一切智故。

第二門願得廣演以益自他。亦成上文爲調御師示一切智道。文中有三。初以法施一句。牒前起後。次所謂下。正明中有二。初一願總明得法。文有四節。一得法。二解脫。三益機。四摧滅。次云願我能爲下。別明演法。釋前文四義。文有五節。初二句總明。次於一一法下。明得法。三獲無所畏。下明能演。四

爲欲令一切下四行經。明所爲機。五作是念下。五行半經。明自修成德。卽爲物勤修。自成己德。成十種德。初二云徧徧於理事。餘八云等兼等無礙。次云是爲菩薩摩訶薩。以諸善根下。總結中。上成自德。亦爲攝生。故復重云。爲令眾生成一切智。上

第二門竟。

佛子。菩薩摩訶薩。復以善根如是迴向。所謂爲欲見等法界無量諸佛。調伏等法界無量眾生。住持等法界無量佛刹。證等法界無量菩薩智。獲等法界無量無所畏。成等法界無量諸菩薩陀羅尼。得等法界無

量諸菩薩不思議住。具等法界無量功德。滿等法界無量利益眾生善根。又願以此善根。故令我得福德平等。智慧平等。力平等。無畏平等。清淨平等。自在平等。正覺平等。說法平等。義平等。決定平等。一切神通平等。如是等法。皆悉圓滿。如我所得。願一切眾生亦如是得。如我無異。

第三門願得二利行圓。成上作法藏日獲智見佛等。皆普照故。文中二。初有五行餘經。先通二利。次云。又願以此。下四行經。別明二利。卽成上文於諸眾生。其心平等。初以自等於理。後我所得。下合物。

等自。第三門竟。

佛子。菩薩摩訶薩復以善根如是迴向。所謂如法界無量。善根迴向。亦復如是。所得智慧終無有量。如法界無邊。善根迴向。亦復如是。見一切佛。無有其邊。如法界無限。善根迴向。亦復如是。詣諸佛刹。無有齊限。如法界無際。善根迴向。亦復如是。於一切世界修菩薩行。無有涯際。如法界無斷。善根迴向。亦復如是。住一切智。永不斷絕。如法界一性。善根迴向。亦復如是。與一切眾生同一智性。如法界自性清淨。善根迴向。亦復如是。令一切眾生究竟清淨。如法界隨順。善根

迴向亦復如是。令一切眾生悉皆隨順普賢行願。如法界莊嚴。善根迴向亦復如是。令一切眾生以普賢行而爲莊嚴。如法界不可失壞。善根迴向亦復如是。令諸菩薩永不失壞諸清淨行。

第四門願行稱法界。成上心淨無染。及智慧自在。以動合法界。故無所染。是以末云永不失壞諸清淨行。此章多同理法界。如智因理發。故同法界。卽向實際也。第四門竟。

佛子。菩薩摩訶薩復以此善根如是迴向。所謂願以此善根承事一切諸佛菩薩。皆令歡喜。願以此善根

速得趣入一切智性。願以此善根。徧一切處。修一切智。願以此善根。令一切眾生常得往覲一切諸佛。願以此善根。令一切眾生常見諸佛。能作佛事。願以此善根。令一切眾生恆得見佛。不於佛事生怠慢心。願以此善根。令一切眾生常得見佛。心喜清淨。無有退轉。願以此善根。令一切眾生常得見佛。心善解了。願以此善根。令一切眾生常得見佛。不生執著。願以此善根。令一切眾生常得見佛。了達無礙。願以此善根。令一切眾生常見諸佛。成普賢行。願以此善根。令一切眾生常見諸佛。現在其前。無時暫捨。願以此善根。

令一切眾生常見諸佛。出生菩薩無量諸力。願以此善根。令一切眾生常見諸佛。於一切法。永不忘失。

第五門願得見佛解法。有十四行半經。列十四願。成上大智商主。初三自成智性。是商主德。餘爲眾生。是商主事。五門竟。

佛子。菩薩摩訶薩。又以諸善根。如是迴向。所謂如法界無起性迴向。如法界根本性迴向。如法界自體性迴向。如法界無依性迴向。如法界無忘失性迴向。如法界空無性迴向。如法界寂靜性迴向。如法界無處所性迴向。如法界無遷動性迴向。如法界無差別性。

迴向。

第六門願解法界卽理法界。豈以此文而名隨相。然此中云如。晉經云解。解契於理。故名爲如。卽是成前安隱正道。文有十句。一不隨緣變。二不守自性。故爲法本。三如亦復。如是其自體。四非是能依。五不暫離如。六隨緣無性。卽是如性。七無性亦無。本來寂靜。八無二性。離能所故。九不隨三世。十一味平等。第六門竟。

佛子。菩薩摩訶薩。復以法施。所有宣示。所有開悟。及因此起一切善根。如是迴向。所謂願一切眾生成菩

薩法師常爲諸佛之所護念。願一切眾生作無上法
師。方便安立一切眾生於一切智。願一切眾生作無
屈法師。一切問難莫能窮盡。願一切眾生作無礙法
師。得一切法無礙光明。願一切眾生作智藏法師。能
善巧說一切佛法。願一切眾生成諸如來自在法師。
善能分別如來智慧。願一切眾生作如眼法師。說如
實法。不由他教。願一切眾生作憶持一切佛法法師。
如理演說不違句義。願一切眾生作修行無相道法
師。以諸妙相而自莊嚴。放無量光。善入諸法。願一切
眾生作大身法師。其身普徧一切國土。與大法雲雨。

諸佛法。願一切眾生作護法藏法師。建無勝幢。護諸佛法。令正法海無所缺減。願一切眾生作一切法日。法師得佛辯才。巧說諸法。願一切眾生作妙音方便。法師善說無邊法界之藏。願一切眾生作到法彼岸。法師以智神通開正法藏。願一切眾生作安住正法。法師演說如來究竟智慧。願一切眾生作了達諸法。法師能說無量無盡功德。願一切眾生作不誑世間。法師能以方便令入實際。願一切眾生作破諸魔眾。法師善能覺知一切魔業。願一切眾生作諸佛所攝受法師。離我我所攝受之心。願一切眾生作安隱一。

切世間法師。成就菩薩說法願力。

第七門願眾生成法師。卽成上而作導首。導首卽是法師。上爲他作。今令他作。有廿二行經列二十法師。七云如眼者。現證非聞見故。九無相之相。是妙相故。二十唯有說法能安世間。第七門竟。

佛子。菩薩摩訶薩復以諸善根如是迴向。所謂不以取著業故迴向。不以取著報故迴向。不以取著心故迴向。不以取著法故迴向。不以取著事故迴向。不以取著因故迴向。不以取著語言音聲故迴向。不以取著名句文身故迴向。不以取著迴向故迴向。不以取

著利益眾生故迴向。

第八門不取著迴向卽向實際。此及第九。成上作不可壞堅固善友。文有十句。明堅固緣。第八門竟。佛子。菩薩摩訶薩復以善根如是迴向。所謂不爲耽著色境界故迴向。不爲耽著聲香味觸法境界故迴向。不爲求生天故迴向。不爲求欲樂故迴向。不爲著欲境界故迴向。不爲求眷屬故迴向。不爲求自在故迴向。不爲求生死樂故迴向。不爲著生死故迴向。不爲樂諸有故迴向。不爲求和合樂故迴向。不爲求可樂著處故迴向。不爲懷毒害心故迴向。不壞善根故

迴向。不依三界故迴向。不著諸禪解脫三昧故迴向。
不住聲聞辟支佛乘故迴向。但爲教化調伏一切眾
生故迴向。但爲成滿一切智智故迴向。但爲得無礙
智故迴向。但爲得無障礙清淨善根故迴向。但爲令
一切眾生超出生死證大智慧故迴向。但爲令大菩
提心如金剛不可壞故迴向。但爲成就究竟不死法
故迴向。但爲以無量莊嚴莊嚴佛種性。示現一切智
自在故迴向。但爲求菩薩一切法明大神通智故迴
向。但爲於盡法界虛空界一切佛刹行普賢行。圓滿
不退。被堅固大願鎧。令一切眾生住普賢地故迴向。

但爲盡未來劫度脫眾生常無休息。示現一切智地。無礙光明恆不斷故迴向。

第九門離過成德。於中分二。先十七句離過。卽離可壞緣。後但爲下成德。明其所爲。爲不壞堅固善友。今初前十五事護煩惱行。其第十六。若解脫三昧。唯小乘因。諸禪三昧。通生死因。未得不求。已得不著。誰復求死。所謂求生。生必死故。求和合者。除涅槃樂。皆有合故。沙彌求龍。是懷毒迴向。願爲魔王。卽壞善迴向。次云。但爲教化調伏下九行半經。顯成德。明其所爲。亦是所求。第九門竟。上初九

門別對十句善根迴向竟。

佛子。菩薩摩訶薩。以彼善根迴向時。以如是心迴向。所謂以本性平等心迴向。以法性平等心迴向。以一切眾生無量平等心迴向。以無諍平等心迴向。以自性無所起平等心迴向。以知諸法無亂心迴向。以入三世平等心迴向。以出生三世諸佛種性心迴向。以得不退失神通心迴向。以生成一切智行心迴向。又爲令一切眾生永離一切地獄故迴向。爲令一切眾生不入畜生趣故迴向。爲令一切眾生不往閻羅王處故迴向。爲令一切眾生除滅一切障道法故迴向。

爲令一切眾生滿足一切善根故迴向。爲令一切眾生能應時轉法輪。令一切歡喜故迴向。爲令一切眾生入十力輪故迴向。爲令一切眾生滿足菩薩無邊清淨法願故迴向。爲令一切眾生隨順一切善知識教菩提心器得滿足故迴向。爲令一切眾生受持修行甚深佛法。得一切佛智光明故迴向。爲令一切眾生修諸菩薩無障礙行。常現前故迴向。爲令一切眾生常見諸佛現其前故迴向。爲令一切眾生清淨法光明常現前故迴向。爲令一切眾生無畏大菩提心常現前故迴向。爲令一切眾生菩薩不思議智常現

前故迴向。爲令一切眾生普救護眾生。令清淨大悲
心常現前故迴向。爲令一切眾生以不可說不可說
勝妙莊嚴具莊嚴一切諸佛刹故迴向。爲令一切眾
生摧滅一切眾魔鬪諍羅網業故迴向。爲令一切眾
生於一切佛刹皆無所依修菩薩行故迴向。爲令一
切眾生發一切種智心入一切佛法廣大門故迴向。
大文第二四門總顯迴向之意。故初不云復以善
根。但云以彼善根迴向時。居然揀別。初一門明應
向實際及向眾生。第二門明應向菩提。第三門明
應離過。第四門明有成益。初門有二。初明應向實

際。後爲令下。明應向眾生。初中十句有十種心。言
本性卽不變性。法性卽隨緣性。眾生是人。無諍是
法。理事不乖自性。則起無所起。諸法則橫該本寂。
三世則豎入無差。以知法性爲緣。則生起佛種。依
性依用。無退失時。照斯實際。實智行立。次云又爲
令一切眾生下。明應向眾生。有十八行餘經。列二
十所爲。七云十力輪者圓滿摧伏故。十四云無畏
菩提心者。不畏生死長遠。眾生難度。轉依難證。萬
行難修。菩提曠遠故。次四門中初門竟。

佛子。菩薩摩訶薩。又以此善根正念清淨迴向。智慧

決定迴向。盡知一切佛法方便迴向。爲成就無量無礙智故迴向。爲欲滿足清淨殊勝心故迴向。爲一切眾生住大慈故迴向。爲一切眾生住大悲故迴向。爲一切眾生住大喜故迴向。爲一切眾生住大捨故迴向。爲永離二著住勝善根故迴向。爲思惟觀察分別演說一切緣起法故迴向。爲立大勇猛幢心故迴向。爲立無能勝幢藏故迴向。爲破諸魔眾故迴向。爲得一切法清淨無礙心故迴向。爲修一切菩薩行不退轉故迴向。爲得樂求第一勝法心故迴向。爲得樂求諸功德法。自在清淨。一切智智心故迴向。爲滿一切

願除一切諍得佛自在無礙清淨法爲一切眾生轉不退法輪故迴向。爲得如來最上殊勝法智慧日百千光明之所莊嚴普照一切法界眾生故迴向。爲欲調伏一切眾生隨其所樂常令滿足不捨本願盡未來際聽聞正法修習大行得淨智慧離垢光明斷除一切憍慢消滅一切煩惱裂愛欲網破愚癡闇具足無垢無障礙法故迴向。爲一切眾生於阿僧祇劫常勤修習一切智行無有退轉。一一令得無礙妙慧示現諸佛自在神通無有休息故迴向。

第二門應向菩提中有二十二迴向初三句少爲

字。欲成二十故。於中前二十迴向。明因圓果滿。後
二明得果不捨因。窮未來際以化物故。第二門竟。
佛子。菩薩摩訶薩以諸善根如是迴向時。不應貪著
三有五欲境界。何以故。菩薩摩訶薩應以無貪善根
迴向。應以無瞋善根迴向。應以無癡善根迴向。應以
不害善根迴向。應以離慢善根迴向。應以不諂善根
迴向。應以質直善根迴向。應以精勤善根迴向。應以
修習善根迴向。

第三門明應離過。

佛子。菩薩摩訶薩如是迴向時。得淨信心。於菩薩行。

歡喜忍受。修習清淨大菩薩道。具佛種性。得佛智慧。捨一切惡。離眾魔業。親近善友。成己大願。請諸眾生設大施會。

第四門明有成益。上四門顯迴向之意竟。

佛子菩薩摩訶薩復以此法施所生善根如是迴向。所謂令一切眾生得淨妙音。得柔輭音。得天鼓音。得無量無數不思議音。得可愛樂音。得清淨音。得周徧一切佛刹音。得百千那由他不可說功德莊嚴音。得高遠音。得廣大音。得滅一切散亂音。得充滿法界音。得攝取一切眾生語言音。得一切眾生無邊音聲智。

得一切清淨語言音聲智。得無量語言音聲智。得最自在音。入一切音聲智。得一切清淨莊嚴音。得一切世間無厭足音。得究竟不繫屬一切世間音。得歡喜音。得佛清淨語言音。得說一切佛法。遠離癡翳名稱。普聞音。得令一切眾生得一切法陀羅尼莊嚴音。得說一切無量種法音。得普至法界無量眾會道場音。得普攝持不可思議法金剛句音。得開示一切法音。得能說不可說字句差別智藏音。得演說一切法無所著不斷音。得一切法光明照曜音。得能令一切世間清淨究竟。至於一切智音。得普攝一切法句義音。

得神力護持自在無礙音。得到一切世間彼岸智音。又以此善根。令一切眾生得不下劣音。得無怖畏音。得無染著音。得一切眾會道場歡喜音。得隨順美妙音。得善說一切佛法音。得斷一切眾生疑念。皆令覺悟音。得具足辯才音。得普覺悟一切眾生長夜睡眠音。佛子。菩薩摩訶薩復以諸善根如是迴向。所謂願一切眾生得離眾過惡清淨法身。願一切眾生得離眾過惡淨妙功德。願一切眾生得離眾過惡清淨妙相。願一切眾生得離眾過惡清淨業果。願一切眾生得離眾過惡清淨一切智心。願一切眾生得離眾過

善屬經要卷三十一
三十一
惡無量清淨菩提心。願一切眾生得離眾過惡。了知諸根清淨方便。願一切眾生得離眾過惡。清淨信解。願一切眾生得離眾過惡。清淨勤修無礙行願。願一切眾生得離眾過惡。清淨正念智慧辯才。

大文第三有八門。更以異門別明迴向。卽是勝進。文分四別。第一有二門。迴向眾生。二有三門。迴向菩提。三有二門。總顯所爲。四有一門。迴向實際。今初分二。前門願得圓音。後門總合具德。今初以法師位故。欲令物同得圓音。演法要故。有二十行經。列四十五種音聲。疏有多釋。次云佛子。復以此善。

根下。明總合眾生具德。文有十句。前五句果滿。後五句因圓。八中初二門迴向眾生竟。

佛子。菩薩摩訶薩復以諸善根爲一切眾生如是迴向。願得種種清淨妙身。所謂光明身。離濁身。無染身。清淨身。極清淨身。離塵身。極離塵身。離垢身。可愛樂身。無障礙身。於一切世界現諸業像。於一切世間現言說像。於一切宮殿現安立像。如淨明鏡。種種色像。自然顯現。示諸眾生大菩提行。示諸眾生甚深妙法。示諸眾生種種功德。示諸眾生修行之道。示諸眾生成就之行。示諸眾生菩薩行願。示諸眾生於一世界

一切世界佛興於世。示諸眾生。一切諸佛神通變化。示諸眾生。一切菩薩不可思議解脫威力。示諸眾生。成滿普賢菩薩行願。一切智性。菩薩摩訶薩以如是等微妙淨身。方便攝取一切眾生。悉令成就清淨功德。一切智身。

第二三門迴向菩提分三。初一門得正果。次一門。二果因圓。後一門依報果滿。今初。然上眾生得果。有其十句。各應有多。今但廣初一身。則餘可例取。文中三。初明得身。次顯身用。後結所成。今初中初句總相。所謂下別相。身是同相。餘是異相。成壞可

知。然此十身。通法通智。一光明者。身光智光無不照故。二體無闇障。能鑒徹故。三體不受染。四淨德內充。如玉無瑕翳。五非暫時淨。上三就體辨。次三對境以明。六不爲塵壅。對上清淨。七極微不著。對上極清淨。八垢穢無污。對上不染。若就內德。卽煩惱障盡。名爲離塵。習氣亦亡。名極離塵。所知不住。名離心垢。九具相具德。十形充法界。智遍十方。山河事理。不能障礙。次云於一切世界下。明依身起用。前四色身用。前三羅一身於法界。後一收萬象於一身。次示諸眾生下五句。智身用。後示菩薩行。

願下。通二身用。後云菩薩摩訶薩以如是等下。總結所成。二向菩提中初門竟。

佛子。菩薩摩訶薩復以法施所生善根如是迴向。願身隨住一切世界。修菩薩行。眾生見者皆悉不虛。發菩提心。永無退轉。順真實義。不可傾動。於一切世界。盡未來劫住菩薩道。而無疲厭。大悲均普。量同法界。知眾生根。應時說法。常不休息。於善知識。心常正念。乃至不捨一刹那頃。一切諸佛。常現在前。心常正念。未曾暫懈。修諸善根。無有虛偽。置諸眾生於一切智。令不退轉。具足一切佛法光明。持大法雲。受大法雨。

修菩薩行。入一切眾生。入一切佛刹。入一切諸法。入一切三世。入一切眾生業報智。入一切菩薩善巧方便智。入一切菩薩出生智。入一切菩薩清淨境界智。入一切佛自在神通。入一切無邊法界。於此安住修菩薩行。

第二有一門。願二果圓滿中分二。初卽理起用行。後入一切下。卽事入玄行。今初。初成行緣。身隨住故。後眾生見下。利他不空。後於善知識下。兼通二利。次云入一切眾生下。卽事入玄行中。智契名入無邊法界。通身智入。上八中二迴向菩提一門二

果因圓竟。後卷初菩提中後一門。明依報果滿。

大方廣佛華嚴經綱要卷第三十二

大方廣佛華嚴經綱要卷第三十三

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

十迴向品第二十五之十一

佛子。菩薩摩訶薩復以法施所修善根如是迴向。願一切佛刹皆悉清淨。以不可說不可說莊嚴具而莊嚴之。一一佛刹其量廣大。同於法界。純善無礙。清淨光明。諸佛於中現成正覺。一佛刹中。清淨境界悉能顯現一切佛刹。如一佛刹。一切佛刹亦復如是。

第三一門。願成依果。文分爲二。先總明。後其一。一下別顯。今初十句。先一句牒前起後。次云願一切佛刹下。正顯願相。一願清淨。二願莊嚴。三分量普周。四純善。五無障礙。六具淨光。七有佛現。八融攝。九舉一例餘。一刹之展。量同法界。一刹之卷。顯現無餘。展卷無礙。是一佛刹。如一佛刹。刹刹皆然。準後人嚴塵塵尙然。况復刹刹。

其一。一刹悉以等法界無量無邊清淨妙寶莊嚴之具而爲嚴飾。所謂阿僧祇清淨寶座。敷眾寶衣。阿僧祇寶帳。寶網垂布。阿僧祇寶蓋。一切妙寶互相映徹。

阿僧祇寶雲。普雨衆寶。阿僧祇寶華。周徧清淨。阿僧祇衆寶所成欄楯軒檻。清淨莊嚴。阿僧祇寶鈴常演。諸佛微妙音聲。周流法界。阿僧祇寶蓮華。種種寶色。開敷榮耀。阿僧祇寶樹。周而行列。無量妙寶。以爲華果。阿僧祇寶宮殿。無量菩薩。止住其中。阿僧祇寶樓閣。廣博崇麗。延袤遠近。阿僧祇寶却敵。大寶所成莊嚴妙好。阿僧祇寶門闈。妙寶纓絡。周而垂布。阿僧祇寶牕牖。不思議寶。清淨莊嚴。阿僧祇寶多羅。形如半月。衆寶集成。如是一切。悉以衆寶而爲嚴飾。離垢清淨。不可思議。無非如來善根所起。具足無數寶藏莊

嚴。

第二別顯中先顯寶嚴。後如寶莊嚴下類餘嚴。今初分三。初其一下。總標。次所謂下。別顯。三是爲菩薩下。總結。今別顯中分二。先通顯寶嚴。後佛子於彼一切下。別明人寶嚴。前中以阿僧祇數。但有九十四數。以晉經皆云無量阿僧祇。初有數事。但云無量。則阿僧祇言。非是數中之一。但是無數之言。若定是數。則爲限局。今就九十四內寶樹之中。有無量妙寶。以爲華果。爲一。宮殿中有無量菩薩。爲二。初段顯因之後。有無數寶藏。爲三。一一瓔珞。

中有千菩薩。上妙莊嚴爲四。下寶枝中有不思議鳥爲五。寶華中有無量菩薩爲六。足滿百數。文中分二。初十八事略明顯勝。先列事略明。次如是一切下舉因顯勝。

復有阿僧祇寶河。流出一切清淨善法。阿僧祇寶海。法水盈滿。阿僧祇寶芬陀利華。常出妙法芬陀利聲。阿僧祇寶須彌山。智慧山王。秀出清淨。阿僧祇八楞妙寶。寶線貫穿。嚴淨無比。阿僧祇淨光寶。常放無礙大智光明。普照法界。阿僧祇寶鈴鐸。更相扣擊。出妙音聲。阿僧祇清淨寶。諸菩薩寶。具足充滿。阿僧祇寶

繒絲處處垂下。色相光潔。阿僧祇妙寶幢。以寶半月
而爲嚴飾。阿僧祇寶旛。悉能普雨無量寶旛。阿僧祇
寶帶垂布空中。莊嚴殊妙。阿僧祇寶敷具。能生種種
微細樂觸。阿僧祇妙寶旋。示現菩薩一切智眼。阿僧
祇寶纓絡。一一纓絡百千菩薩。上妙莊嚴。阿僧祇寶
宮殿。超過一切妙絕無比。阿僧祇寶莊嚴具。金剛摩
尼以爲嚴飾。阿僧祇種種妙寶莊嚴具。常現一切清
淨妙色。阿僧祇清淨寶。殊形異彩。光鑒映徹。阿僧祇
寶山以爲垣牆。周而圍繞。清淨無礙。阿僧祇寶香。其
香普熏一切世界。阿僧祇寶化事。一一化事。周徧法

界。阿僧祇寶光明。一一光明。現一切光。

次復有下八十二事。廣顯於中分五。第一二十四事。唯以外寶爲嚴。其間三兩。亦標以事名。釋以法門。且從多判。

復有阿僧祇寶光明。清淨智光。照了諸法。復有阿僧祇無礙寶光明。一一光明。周徧法界。有阿僧祇寶處。一切諸寶。皆悉具足。阿僧祇寶藏。開示一切正法。藏寶。阿僧祇寶幢。如來幢相。迥然高出。阿僧祇寶賢。大智賢像。具足清淨。阿僧祇寶圍。生諸菩薩三昧快樂。阿僧祇寶音。如來妙音。普示世間。阿僧祇寶形。其一

一形皆放無量妙法光明。阿僧祇寶相。其一一相悉超眾相。阿僧祇寶威儀。見者皆生菩薩喜樂。阿僧祇寶聚。見者皆生智慧寶聚。阿僧祇寶安住。見者皆生善住寶心。阿僧祇寶衣服。其有著者。生諸菩薩無比三昧。阿僧祇寶袈裟。其有著者。纔始發心。則得善見陀羅尼門。

二復有阿僧祇寶光明。下有五十事。標以事名。釋以法門。欲顯卽事成法門故。

阿僧祇寶修習。其有見者。知一切寶皆是業果。決定清淨。阿僧祇寶無礙知見。其有見者。得了一切清淨。

法眼。阿僧祇寶光藏。其有見者。則得成就大智慧藏。
三寶修習下三事。唯約法門顯。卽法可貴。非要託
事。

阿僧祇寶座。佛坐其上。大師子吼。阿僧祇寶燈。常放
清淨智慧光明。阿僧祇寶多羅樹。次第行列。繚以寶
繩。莊嚴清淨。其樹復有阿僧祇寶幹。從身聳擢。端直
圓潔。阿僧祇寶枝。種種眾寶。莊嚴稠密。不思議鳥。翔
集其中。常吐妙音。宣揚正法。阿僧祇寶葉。放大智光。
徧一切處。阿僧祇寶華。一一華上。無量菩薩結跏趺
坐。徧遊法界。阿僧祇寶果。見者當得一切智智。不退

轉果。阿僧祇寶聚落。見者捨離世聚落法。阿僧祇寶
都邑。無礙眾生。於中盈滿。阿僧祇寶宮殿。王處其中。
具足菩薩那羅延身。勇猛堅固。被法甲冑。心無退轉。
阿僧祇寶舍。人者能除戀舍宅心。阿僧祇寶衣。著者
能令解了無著。阿僧祇寶宮殿。出家菩薩。充滿其中。
阿僧祇寶珍玩。見者咸生無量歡喜。阿僧祇寶輪。放
不思議智慧光明。轉不退輪。阿僧祇寶跋陀樹。因陀
羅網。莊嚴清淨。阿僧祇寶地。不思議寶。間錯莊嚴。阿
僧祇寶吹。其音清亮。充滿法界。阿僧祇寶鼓。妙音克
諧。窮劫不絕。

四寶座下二十七事。約於事實。能成法門。或顯依
中有正。明雜莊嚴。

阿僧祇寶。眾生盡能攝持。無上法寶。阿僧祇寶身。具
足無量功德妙寶。阿僧祇寶口。常演一切妙法寶音。
阿僧祇寶心。具清淨意。大智願寶。阿僧祇寶念。斷諸
愚惑。究竟堅固。一切智寶。阿僧祇寶明。誦持一切諸
佛法寶。阿僧祇寶慧。決了一切諸佛法藏。阿僧祇寶
智。得大圓滿。一切智寶。阿僧祇寶眼。鑒十力寶。無所
障礙。阿僧祇寶耳。聽聞無量盡法界聲。清淨無礙。阿
僧祇寶鼻。常嗅隨順清淨寶香。阿僧祇寶舌。能說無

量諸語言法。阿僧祇寶身。徧遊十方而無罣礙。阿僧祇寶意。常勤修習普賢行願。阿僧祇寶音。淨妙音聲徧十方界。阿僧祇寶身業。一切所作。以智爲首。阿僧祇寶語業。常說修行無礙智寶。阿僧祇寶意業。得無障礙。廣大智寶。究竟圓滿。

五寶眾生下十八事。顯於內身六根三業。皆名爲寶。並圓明可貴故。此上諸事。或純或雜。或依正無礙。皆以事事無礙。因所感故。若將一因各對一事。如以寂忍爲因。所感寶衣等。恐繁不顯。復將一因成一切果。四句融通。意如常說。

佛子。菩薩摩訶薩於彼一切諸佛刹中於一佛刹一方一處一毛端量。有無量無邊不可說數諸大菩薩皆悉成就清淨智慧。充滿而住。如一佛刹一方一處一毛端量。如是盡虛空徧法界一一佛刹一一方一一處一一毛端量。悉亦如是。

第二人寶者。法華云。彼國何故名曰大寶莊嚴。彼國中以菩薩爲大寶故。所以楚魏之朝亦不以金玉爲珍。而以賢臣爲寶。徧法界微塵之處。有多菩薩。可謂大心嚴刹也。

是爲菩薩摩訶薩以諸善根而爲迴向。普願一切諸

佛國土。悉具種種妙寶莊嚴。

三結成寶嚴。

如寶莊嚴。如是廣說。如是香莊嚴。華莊嚴。鬘莊嚴。塗香莊嚴。燒香莊嚴。末香莊嚴。衣莊嚴。蓋莊嚴。幢莊嚴。旛莊嚴。摩尼寶莊嚴。次第乃至過此百倍。皆如寶莊嚴。如是廣說。

第二類顯餘嚴。有十一事。一一皆有上之百事。并前一百。則一千二百。言次第乃至過此百倍者。若言嚴事過百。則不應言皆如寶嚴。若準晉經云。衣蓋幢旛。乃至百事莊嚴。則以香等爲百。然過此倍。

之三字。譯者不妙。若別理通者。以前寶嚴。但列百事。非止唯百。應過百倍。則百百爲萬。表圓融萬行。則應迴文云。摩尼寶嚴。皆如寶莊嚴。如是廣說次第。乃至過此百倍。理則無違。上迴向菩提中一門。依報果圓。

佛子。菩薩摩訶薩。以法施等所集善根。爲長養一切善根。故迴向。爲嚴淨一切佛刹。故迴向。爲成就一切眾生。故迴向。爲令一切眾生。皆心淨不動。故迴向。爲令一切眾生。皆入甚深佛法。故迴向。爲令一切眾生。皆得無能過清淨功德。故迴向。爲令一切眾生。皆得

不可壞清淨福力故迴向。爲令一切眾生皆得無盡
智力。度諸眾生。令入佛法故迴向。爲令一切眾生皆
得平等無量清淨言音故迴向。爲令一切眾生皆得
平等無礙眼。成就盡虛空徧法界等智慧故迴向。爲
令一切眾生皆得清淨念。知前際劫一切世界故迴
向。爲令一切眾生皆得無礙大智慧。悉能決了一切
法藏故迴向。爲令一切眾生皆得無限量大菩提。周
徧法界無所障礙故迴向。爲令一切眾生皆得平等
無分別同體善根故迴向。爲令一切眾生皆得一切
功德。具足莊嚴清淨身語意業故迴向。爲令一切眾

生皆得同於普賢行故迴向。爲令一切眾生皆得入一切同體清淨佛刹故迴向。爲令一切眾生悉觀察一切智皆趣入圓滿故迴向。爲令一切眾生皆得遠離不平等善根故迴向。爲令一切眾生皆得平等無異相深心次第圓滿一切智故迴向。爲令一切眾生皆得安住一切白法故迴向。爲令一切眾生皆於一念中證一切智得究竟故迴向。爲令一切眾生皆得成滿清淨一切智道故迴向。

大文第三二門迴向所爲中初一門應爲眾生後一門應爲菩提。今初有二十三句。初之二句。文雖

在初義通二處。第三成就眾生。是爲總句。下皆是別。始自信心。終成種智。其文並顯。

佛子。菩薩摩訶薩。以諸善根。普爲一切眾生。如是迴向。已復以此善根。欲普圓滿演說一切清淨行法力。故迴向。欲成就清淨行威力。得不可說不可說法海。故迴向。欲於一一法海。具足無量等法界清淨智光。明故迴向。欲開示演說一切法差別句義。故迴向。欲成就無邊廣大一切法光明三昧。故迴向。欲隨順三世諸佛辯才。故迴向。欲成就去來現在一切佛自在身。故迴向。爲尊重一切佛可愛樂無障礙法。故迴向。

爲滿足大悲心。救護一切眾生。常無退轉。故迴向。欲
成就不思議差別法。無障礙智。心無垢染。諸根清淨。
普入一切眾會道場。故迴向。欲於一切若覆若仰。若
麤若細。若廣若狹。小大染淨。如是等諸佛國土。常轉
平等不退法輪。故迴向。欲於念念中得無所畏。無有
窮盡種種辯才。妙法光明。開示演說。故迴向。爲樂求
眾善發心修習。諸根轉勝。獲一切法大神通智。盡能
了知一切諸法。故迴向。欲於一切眾會道場。親近供
養。爲一切眾生演一切法。咸令歡喜。故迴向。

二應向菩提中。明因果滿。大用無盡。亦顯可知。

佛子。菩薩摩訶薩。又以此善根。如是迴向。所謂。以住法界無量住迴向。以住法界無量身業迴向。以住法界無量語業迴向。以住法界無量意業迴向。以住法界無量色平等迴向。以住法界無量受想行識平等迴向。以住法界無量蘊平等迴向。以住法界無量界平等迴向。以住法界無量處平等迴向。以住法界無量內平等迴向。以住法界無量外平等迴向。以住法界無量發起平等迴向。以住法界無量深心平等迴向。以住法界無量方便平等迴向。以住法界無量信解平等迴向。以住法界無量諸根平等迴向。以住法

界無量初中後際平等迴向。以住法界無量業報平等迴向。以住法界無量染淨平等迴向。以住法界無量眾生平等迴向。以住法界無量佛刹平等迴向。以住法界無量法平等迴向。以住法界無量世間光明平等迴向。以住法界無量諸佛菩薩平等迴向。以住法界無量菩薩出離平等迴向。以住法界無量菩薩教化調伏平等迴向。以住法界無量法界無二平等迴向。以住法界無量如來眾會道場平等迴向。

第四迴向實際。有二十九句。皆言法界者。理事無

礙法界也。皆云住者智契卽事之理。無所住故。住卽入義。以安住故。法界無二。卽是等義。初云無量住者。一切善根。皆是所住。今以無住之住。便同法界無量。他皆倣此。上八門竟。

佛子。菩薩摩訶薩如是迴向時。安住法界無量平等清淨身。安住法界無量平等清淨語。安住法界無量平等清淨心。安住法界無量平等諸菩薩清淨行願。安住法界無量平等清淨眾會道場。安住法界無量平等爲一切菩薩廣說諸法清淨智。安住法界無量平等能入盡法界一切世界身。安住法界無量平等。

一切法光明清淨無畏。能以一音盡斷一切眾生疑網。隨其根欲。皆令歡喜。住於無上一切種智力無所畏。自在神通廣大功德出離法中。

大文第三迴向成益。文有十句。皆言安住者。由上智契故。能得安也。身等卽差別事法。今卽平等清淨。平等清淨卽是法界無盡法界清淨。卽是所得。智能安住。全同法界。由八安住。成後二用。一一音普斷物疑。二上住佛德。佛德雖多。略舉其四。謂十力。四無畏。十自在。六神通。名廣大德。對上種智。爲佛二嚴。是出離法。

佛子。是爲菩薩摩訶薩第十住等法界無量迴向。

三依釋結名 上位行竟。

菩薩摩訶薩以法施等一切善根如是迴向時。成滿
普賢無量無邊菩薩行願。悉能嚴淨盡虛空等法界
一切佛刹。令一切眾生亦得如是具足成就無邊智
慧。了一切法。於念念中見一切佛出興於世。於念念
中見一切佛無量無邊自在力。所謂廣大自在力。無
著自在力。無礙自在力。不思議自在力。淨一切眾生
自在力。立一切世界自在力。現不可說語言自在力。
隨時應現自在力。住不退轉神通智自在力。演說一

作所應作清淨。如是等皆得具足。皆得成就。皆已修治。皆得平等。皆悉現前。皆悉知見。皆悉悟入。皆已觀察。皆得清淨。到於彼岸。

大文第二位果分三。初標得因。次云成滿普賢下。別列所得三種果滿。一因果利益滿。次於念念下。見佛自在滿。先標所謂廣大下。別顯有七行經。皆以體用理量俱無障礙。是佛自在。三又得無量清淨。下有六行經。清淨果滿。由淨惑障。見性淨故。亦先標。所謂下列。次云如是等下。二行經。結能得之相。平等者。離能所知故。上文通前正說分竟。

下六證成。前五科在十迴向初。

爾時佛神力故。十方各百萬佛刹微塵數世界。六種震動。所謂動。徧動。等徧動。起。徧起。等徧起。踊。徧踊。等徧踊。震。徧震。等徧震。吼。徧吼。等徧吼。擊。徧擊。等徧擊。佛神力故。法如是故。雨眾天華。天鬘。天末香。天諸雜香。天衣服。天珍寶。天莊嚴具。天摩尼寶。天沉水香。天梅檀香。天上妙蓋。天種種幢。天雜色旛。阿僧祇諸天身。無量百千億不可說天妙法音。不可思議天讚佛音。阿僧祇天歡喜音。咸稱善哉。無量阿僧祇百千那由他諸天。恭敬禮拜。無數天子。常念諸佛。希求如來。

無量功德。心不捨離。無數天子。作眾妓樂。歌詠讚歎。供養如來。百千阿僧祇諸天。放大光明。普照盡虛空。徧法界。一切佛剎。現無量阿僧祇諸佛境界。如來化身。出過諸天。

大文第六從爾時佛神力下。瑞應分。於中二。先動地生信。次云佛神力故。法如是故下。與供表行。於中三。初二句興供因。二兩眾天華下。外事供。次云阿僧祇諸天身下。六行經內事三業供。

如於此世界兜率陀天宮說如是法。周徧十方。一切世界兜率天宮悉亦如是。

大文第七如於此世界下結通十方。以是通方之說。準上諸會。或結瑞應。今此結說。故別開章。

爾時復以佛神力故。十方各過百萬佛刹微塵數世
界外。各有百萬佛刹微塵數諸菩薩而來集會。周徧
十方。咸作是言。善哉善哉。佛子。乃能說此諸大迴向。
佛子。我等皆同一號。名金剛幢。悉從金剛光世界。金
剛幢佛所來詣此土。彼諸世界。悉以佛神力故。而說
是法。眾會眷屬。文辭句義。皆亦如是不增不減。我等
皆承佛神力。從彼土來。爲汝作證。如我來此眾會。爲
汝作證。十方所有一切世界。兜率天宮寶莊嚴殿諸

菩薩眾來爲作證。亦復如是。

大文第八爾時復以佛神力下。證成分。云百萬者。位過前故。上長行竟。

爾時金剛幢菩薩承佛神力。觀察十方一切眾會。暨于法界已。善知文義。增廣大心。大悲普覆一切眾生。繫心安住三世佛種。善入一切佛功德法。成就諸佛自在之身。觀諸眾生心之所樂及其所種一切善根。悉分別知。隨順法身。爲現清淨妙色之身。卽於是時而說頌曰。

大文第九爾時金剛下偈讚勸修分。於中二。先敘

意

菩薩成就法智慧

悟解無邊正法門

爲法光明調御師

了知無礙真實法

菩薩爲法大導師

開示甚深難得法

引導十方無量眾

悉令安住正法中

菩薩已飲佛法海

法雲普雨十方界

法日出現於世間

闡揚妙法利羣生

常爲難遇法施主

了知入法巧方便

法光清淨照其心

於世說法恆無畏

善修於法自在心

悉能悟入諸法門

成就甚深妙法海

普爲眾生擊法鼓

宣說甚深希有法

以法長養諸功德

具足清淨法喜心

示現世間佛法藏

諸佛法王所灌頂

成就法性智藏身

悉能解了法實相

安住一切眾善法

菩薩修行第一施

一切如來所讚喜

所作皆蒙佛忍可

以此成就人中尊

菩薩成就妙法身

親從諸佛法化生

爲利眾生作法燈

演說無量最勝法

隨所修行妙法施

則亦觀察彼善根

所作眾善爲眾生

悉以智慧而迴向

所有成佛功德法

悉以迴施諸羣生

願令一切皆清淨

到佛莊嚴之彼岸

十方佛刹無有量

悉具無量大莊嚴

如是莊嚴不可思

盡以莊嚴一國土

如來所有清淨智

願令眾生皆具足

猶如普賢真佛子

一切功德自莊嚴

成就廣大神通力

往詣世界悉周徧

一切眾生無有餘

皆使修行菩薩道

諸佛如來所開悟

十方無量諸眾生

一切皆令如普賢

具足修行最上行

諸佛菩薩所成就

種種差別諸功德

如是功德無有邊

願使眾生悉圓滿

菩薩具足自在力

所應學處皆往學

示現一切大神通

普詣十方無量土

菩薩能於一念頃

覲等眾生無數佛

又復於一毛端中

盡攝諸法皆明見

世間眾生無有量

菩薩悉能分別知

諸佛無量等眾生

大心供養咸令盡

種種名香上妙華

眾寶衣裳及旛蓋

分布法界咸充滿

發心普供十方佛

一毛孔中悉明見

不思議數無量佛

一切毛孔皆如是

普禮一切世間燈

舉身次第恭敬禮

如是無邊諸最勝

亦以言辭普稱讚

窮盡未來一切劫

一如來所供養具

其數無量等眾生

如是供養一如來

一切如來亦復然

供養讚歎諸如來

盡彼世間一切劫

世間劫數可終盡

菩薩供養無休懈

一切世間種種劫

於爾所劫修諸行

恭敬供養一如來

盡一切劫無厭足

如無量劫供一佛

供一切佛皆如是

亦不分別是劫數

於所供養生疲厭

法界廣大無邊際

菩薩觀察悉明了

以大蓮華徧布中

施等眾生無量佛

寶華香色皆圓滿

清淨莊嚴甚微妙

一切世間無可喻

持以供養人中尊

眾生數等無量刹

諸妙寶蓋滿其中

悉以供養一如來

供一切佛皆如是

塗香無比最殊勝

一切世間未曾有

以此供養天人師

窮盡眾生數等劫

末香燒香上妙華

眾寶衣服莊嚴具

如是供養諸最勝

歡喜奉事無厭足

等眾生數照世燈

念念成就大菩提

亦以無邊偈稱述

供養人中調御者

如眾生數佛世尊

皆修無上妙供養

如眾生數無量劫

如是讚歎無窮盡

如是供養諸佛時

以佛神力皆周徧

悉見十方無量佛

安住普賢菩薩行

過去未來及現在

所有一切諸善根

令我常修普賢行

速得安住普賢地

一切如來所知見

世間無量諸眾生

悉願具足如普賢

爲聰慧者所稱讚

此是十方諸大士

共所修治迴向行

諸佛如來爲我說

此迴向行最無上

十方世界無有餘

其中一切諸眾生

莫不咸令得開覺

悉使常如普賢行

如其迴向行布施

亦復堅持於禁戒

精進長時無退怯

忍辱柔和心不動

禪定持心常一緣

智慧了境同三昧

去來現在皆通達

世間無有得其邊

菩薩身心及語業

如是所作皆清淨

一切修行無有餘

悉與普賢菩薩等

譬如法界無分別

戲論染著皆永盡

亦如涅槃無障礙

心常如是離諸取

智者所有迴向法

諸佛如來已開示

種種善根悉迴向

是故能成菩薩道

佛子善學此迴向

無量行願悉成滿

攝取法界盡無餘

是故能成善逝力

若欲成就佛所說

菩薩廣大殊勝行

宜應善住此迴向

是諸佛子號普賢

正說偈中亦二。先明第十迴向。後歎勝勸修。前中三十六偈分三。初九偈頌所迴善根。次七偈頌迴向行分三。初隨所修行。下二偈總頌前九段迴向。二。十方佛刹。下一偈頌迴向嚴刹。三。如來所有。下四偈頌迴向所爲。三菩薩具足。下有二十偈頌位果分三。初一偈頌見佛自在。由已自在。方見佛自在。二菩薩能於一念下十七偈頌得清淨中。一念中普入三世一切諸佛眾會道場智清淨。上云入者。必在供養。故此廣顯。此是力能。亦可頌前願成。

所爲。三過去未來下二偈總結第十迴向。然上且依麤相而分。菩薩縱任辯才。體勢包攝。大旨無異。故不委論。上別頌竟。下第二歎勝勸修。通於十向。於中九偈分二。初此是十方下。六偈舉入就行以歎勝。謂是菩薩所行。如來所說六度隨相等行。法界離相等行。故是超勝。後智者所有下三偈結歎勸修。

一切眾生猶可數

三世心量亦可知

如是普賢諸佛子

功德邊際無能測

一毛度空可得邊

眾刹爲塵可知數

華嚴經疏卷第三十三
三
如是大仙諸佛子 所住行願無能量

大文第十末後二偈。較量功德。德既無限。宜可修行。然此顯德深勝高遠者。一圓融教故。二約殊勝願力故。登地已上。寄位階差。故每結云。若以殊勝願力。復過於此。不可數知。勿謂此深。便言地劣。

上第五會竟

大方廣佛華嚴經綱要卷第三十三

大方廣佛華嚴經綱要卷第三十四

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺憨山沙門德清提挈

第六會他化自在天宮金剛藏菩薩說

十地品第二十六之一

初來意者。爲遠答普光十地問故。夫功不虛設。終必有歸。前明解導行願。賢位因終。今明智冥真如。聖位果立。故有此會來也。前是教道。此是證道。教爲證因。證卽證前。三心之教。故無性攝論云。此聞

熏習。雖是有漏。而是出世心種子性。卽斯義也。然會來卽是品來。一會之中。唯一品故。故釋名宗趣。亦品會無差。次釋名者。會名有三。一約人名。金剛藏會。二約處名。他化自在天會。謂他化作樂具。自得受用。表所入地證。如無心不礙。後得而起用故。因他受用而有所作。非自事故。自他相作。皆自在故。將證離欲之實際故。三約法名。十地會。卽同名。所以得此名者。地名爲持。持百萬阿僧祇功德。亦名生成一切因果。故名爲地。生成佛智住持故。有別行譯本。名十住經。復有別譯名。漸備一切智。

德經以後後過前前故云漸備。三宗趣者。先總後別。總有二義。一以地智斷證寄位修行爲宗。以顯圓融無礙行相爲趣。二前二皆宗。爲成佛果爲趣。後別者。別於上總。略有十義。一約本。唯是果海不可說性。以離能所證故。雖通一部。此品正明。二所證是離垢真如。三約智。謂根本後得。亦通方便。四約所斷。謂離二障種現。五約所修。初地修願行。二地修戒行。三禪行。四道品行。五四諦行。六緣生行。七菩提行。八淨土行。九說法行。十受位行。六約修成有四行。謂初地信樂行。二戒行。三定行。四地已

上皆慧行。於中四五六地是寄二乘行。七地已去是菩薩慧。七約寄位行。十地各寄一度。八約法有三德。謂證德。阿含德。及不住道。是十地之德故。九約寄乘法。謂初二三地寄人天乘。四五六七寄出世三乘。八地已上出世間。是一乘法。故以諸乘爲此地法。十撮要爲六決定。宗辨此故。本分當明於此十中。二三四八十通於圓融行布。初一雙非以離言故。餘皆行布。多約寄位顯淺深故。若以圓融融彼行布。則無不圓融。故以別從總。皆十地宗。若別中之別。則地地別宗。別論其趣。不異總趣。問

何以地前顯圓融德。地上行布彰淺劣耶。答。顯一乘故。云何顯耶。三乘之位。地前行布。地上圓融。今一乘位。地前地上。俱有行布圓融。若俱雙辨。則前後不異。若地前行布。地上圓融。則全同三乘前淺後深故。又似行布圓融。各別教行。不知法性教行。非卽非離。故於地前但顯圓融。已過三乘。地上多明行布。以顯超勝。勝相云何。謂賢位始終已圓融自在。登地已去。則甚深甚深。言所不至。若不寄位。何以顯深。若不包三乘。何以顯廣。故虛空鳥迹。迹迹合空。大海十德。德德若海。地地之中。具攝一切。

諸地功德。文文之中。皆云若以殊勝願力。復過於此。不可數知。故剛藏俟五請而方說。世親以六相而圓融。意在斯矣。又此一會文爲一品。關於方便及勝進者。正是斯義。所以闕方便者有二義。一表正法無二。離方便故。二總攝三賢。皆爲入地之方便故。闕勝進者。亦有二義。一十地如佛更無趣故。二以十定等品。卽此勝進故。若爾。何以別會說耶。舍二義故。一開此勝進。成等覺故。二勝進趣佛。行深遠故。若別立方。便勝進。則不得包攝前後。顯地圓融。十地甚深。良在於此。地前乃我地之前。安得

云深異於地上。此解尤妙。學者應思。

補義云。佛於天宮會。應如前三會。天王設座請佛。偈讚之儀。而今無者。有三義故。一此天以他化樂具爲己受用。天旣如此。而佛亦隨所變化。故座與供不必設也。二顯地智高出世間。無心成事。離施作故。三以前三賢功行蘊積於此。以成地德。如他化故。經特無者。有此義故。

向下經文隨釋。大科總有十分。一序分。二三昧分。三加分。四起分。五本分。六請分。七正說分。八影像分。九利益分。十重頌分。今初

爾時世尊在他化自在天王宮摩尼寶藏殿。與大菩薩眾俱。其諸菩薩皆於阿耨多羅三藐三菩提不退轉。悉從他方世界來集。住一切菩薩智所住境。入一切如來智所入處。勤行不息。善能示現種種神通諸所作事。教化調伏一切眾生而不失時。爲成菩薩一切大願。於一切世。一切劫。一切刹。勤修諸行。無暫懈怠。具足菩薩福智助道。普益眾生而恆不匱。到一切菩薩智慧方便究竟彼岸。示入生死及以涅槃。而不廢捨修菩薩行。善入一切菩薩禪定解脫三昧三摩鉢底神通明智。諸所施爲。皆得自在。獲一切菩薩自

在神力。於一念頃無所動作。悉能往詣一切如來道場。眾會爲眾上首。請佛說法。護持諸佛正法之輪。以廣大心。供養承事一切諸佛。常勤修習一切菩薩所行事業。其身普現一切世間。其音普及十方世界。心行無礙。普見三世一切菩薩所有功德。悉已修行而得圓滿。於不可說劫說不能盡。

今初序分。亦不離而昇也。言爾時者。謂初成正覺之時。十身初滿。無盡身雲。普周法界。故不動而昇。論云。此法勝故。故時主處眾皆勝也。謂初成之時。故時勝。世尊爲主。中主。剛藏爲說主。以初成尊特

之佛加大菩薩說此勝法。故主勝。他化超下五天。居欲界頂。故處勝。與大菩薩俱。揀異地。前言從他方來。俱是新集。故眾勝。下云住一切菩薩。云等。歎德勝。歎德之文有二十句。初住一切智所住境。二句略明。初句自分行滿。謂權實無礙之智。住真俗雙融之境。境智一如。無住住故。次句勝進行滿。證佛所證。則是如來。勤行不息。故名菩薩。次善能示現。下十六句。前三句廣自分。後三句廣勝進。前中二。初三句明行修具足。餘具足菩薩下十句。歎德用圓備。次其身普現。下三句。廣勝進。卽三業。

廣大。後悉已下二句結文。

其名曰。金剛藏菩薩。寶藏菩薩。蓮華藏菩薩。德藏菩薩。蓮華德藏菩薩。日藏菩薩。蘇利耶藏菩薩。無垢月藏菩薩。於一切國土普現莊嚴藏菩薩。毗盧遮那智藏菩薩。妙德藏菩薩。栴檀德藏菩薩。華德藏菩薩。俱蘇摩德藏菩薩。優鉢羅德藏菩薩。天德藏菩薩。福德藏菩薩。無礙清淨智德藏菩薩。功德藏菩薩。那羅延德藏菩薩。無垢藏菩薩。離垢藏菩薩。種種辯才莊嚴藏菩薩。大光明網藏菩薩。淨威德光明王藏菩薩。金莊嚴大功德光明王藏菩薩。一切相莊嚴淨德藏菩

薩。金剛燄德相莊嚴藏菩薩。光明燄藏菩薩。星宿王
光照藏菩薩。虛空無礙智藏菩薩。妙音無礙藏菩薩。
陀羅尼功德持一切眾生願藏菩薩。海莊嚴藏菩薩。
須彌德藏菩薩。淨一切功德藏菩薩。如來藏菩薩。佛
德藏菩薩。解脫月菩薩。如是等無數無量無邊無等
不可數不可稱不可思不可量不可說諸菩薩摩訶
薩眾。

其名下依德立名。有四十眾。前金剛藏爲說主。後
解脫月爲請主。中三十八眾同名藏者。表地法有
含攝眾德。出生果用故。後一名解脫月者。卽請法

上首脫眾疑暗。如夜月故。於中蘇利耶者。此云月也。俱蘇摩者。悅意也。卽是華名。如是等下。結數難測。

金剛藏菩薩而爲上首。

五標說主。問云。菩薩眾多。何故唯金剛藏說。答云。一切煩惱難壞。此法能破。善根堅固。猶如金剛。故不異名說。問云。何名金剛藏。此釋藏義也。答謂藏卽名堅。其猶樹藏。謂如樹心堅密。能生長枝葉華實。地智亦爾。能生因果。此就能藏名藏。又如懷孕在藏。是故堅如金剛。如金剛藏。此謂子孕在胎藏。

善屬經卷之三十四
中善業所持。堅不可壞。而得生長。此就所藏名藏。
二喻俱有生長義。

補義云。金剛藏說地法者。以金輪持世界種故。大
地以金剛爲體。故地最下爲金剛際。表根本智爲
地法體故。藏者。楞伽云。識藏如來藏。謂識藏有三
藏義。謂能藏。所藏。我愛執藏。以藏識能藏一切染
淨種子。又是彼種子所藏之處。長劫以來。不失不
壞。以我愛執藏故。今識藏卽如來藏。如來藏乃法
身智藏名。一切種智。以佛地一切淨妙功德。唯此
智能持。亦是彼諸功德所蘊積。爲眞常淨妙四德。

盡未來際不失不壞故。是藏義故。此菩薩名依法立。乃說自證所得法故。又是表金剛心智破一切堅固無明故。雖多眾獨此說也。疏義未及此。上序分竟。

爾時金剛藏菩薩承佛神力。入菩薩大智慧光明三昧。

第二三昧分也。爾時者眾已集時。剛藏入定者。以既爲眾首。知己當說。故先入定。以妙契佛心。故承佛力。大智慧光明者。三昧名也。三昧是通稱。智慧是體。光明是用。證如名慧。照事名智。此二無礙。能

破見惑及無明故。故名光明。能斷大惑。證大理。成大果。故云大智與理冥。故稱爲入。

入是三昧已。

第三入是三昧下。加分有六。一辨加所因。二卽時下。能加佛現。三作如是下。讚其得定。四善男子。此是下。雙辨加定因緣。五欲令下。辨加所爲。六善男子下。別顯加相。今初入是三昧已者。若未入定。佛不加故。所以偏加金剛藏者。得此三昧故。

卽時十方各過十億佛刹微塵數世界外。各有十億佛刹微塵數諸佛。同名金剛藏而現其前。

第二能加佛現中有五義。一佛現時卽入定時。二十方下來處遠近。三各有下能加佛數。四同名金剛藏名同所加顯道同故。五現其前。現身生信故。言十億者。謂以圓數顯無盡故。同名同時現前者。意顯地法諸佛同證同說。人異道同故。亦遮那本願故。

作如是言。善哉善哉。金剛藏乃能入是菩薩大智慧光明三昧。

第三同讚得定。顯有加因。

善男子。此是十方各十億佛刹微塵數諸佛。共加於

汝以毗盧遮那如來應正等覺本願力故。威神力故。亦是汝勝智力故。

第四雙辨加定因緣於中四句。有四因緣。一伴佛同加故。二主佛本願故。三主佛現威故。四定者智力故。加有二種。一冥加。二顯加。冥加在前。顯居定後。

欲令汝爲一切菩薩說不思議諸佛法光明故。所謂令入智地故。攝一切善根故。善簡擇一切佛法故。廣知諸法故。善能說法故。無分別智清淨故。一切世法不染故。出世善根清淨故。得不思議智境界故。得一

切智人智境界故。又令得菩薩十地始終故。如實說
菩薩十地差別相故。緣念一切佛法故。修習分別無
漏法故。善選擇觀察大智光明巧莊嚴故。善入決定
智門故。隨所住處次第顯說無所畏故。得無礙辯才
光明故。住大辯才地。善決定故。憶念菩薩心不忘失
故。成熟一切眾生界故。能徧至一切處決定開悟故。
第五明加所爲文。有二十句。初十句依自利行。後
十利他行。今初總顯加意有三。初爲一切菩薩是
所被機。二說不思議諸佛法光明是所說法。三令
入智地等是說之益。二又令得菩薩十地下十句。

依利他行是增數十。經有十二句。論經合七八二句。故唯十一。以初句爲總。餘十爲別。

善男子。汝當辯說此法門差別善巧法。所謂承佛神力。如來智明所加故。淨自善根故。普淨法界故。普攝眾生故。深入法身智身故。受一切佛灌頂故。得一切世間最高大身故。超一切世間道故。清淨出世善根故。滿足一切智智故。

第六別顯加相有三。初口加。次意加。後身加。今初有十一句。初總餘別。總中令以樂說辯說十地法門差別相。不違理事善巧成立。故云汝當辯說。所

謂十句別中疏有多義。

爾時十方諸佛。與金剛藏菩薩無能映奪身。與無礙
樂說辯。與善分別清淨智。與善憶念不忘力。與善決
定明了慧。與至一切處開悟智。與成道自在力。與如
來無所畏。與一切智人觀察分別諸法門辯才智。與
一切如來上妙身語意具足莊嚴。何以故。得此三昧
法如是故。本願所起故。善淨深心故。善淨智輪故。善
積集助道故。善修治所作故。念其無量法器故。知其
清淨信解故。得無錯謬總持故。法界智印善印故。

二意加中有二。初正顯。次徵釋。偏加所以前中十

句。初總餘別。初中與無能暎奪身。身業。一與無礙
樂說辯。口業。與善分別清淨智等。與意業。故末句
云與一切如來上妙身語意業具足莊嚴。疏釋有
多義。今但略出其相。次何以故。下釋偏加所以。以
顯自力堪加。偏就意業釋者。意爲本故。初徵意云。
諸佛慈力若隨缺者。可許偏加。既有力能與。有慈
能普。何以上十偏加剛藏而不加餘。下釋文有十
句。初總餘別。總明得此三昧。法合偏加。剛藏得此
餘不得故。何以得此三昧。下別顯中有二因故。一
本願所致故。二善淨下三昧身攝功德故。此復八

種淨。以自利利他故。謂前四自利。後四利他。

爾時十方諸佛各申右手。摩金剛藏菩薩頂。

三身加。增威令起故。言各申者。不離本處而申。卽延促無礙。諸佛皆摩。故云各申。卽一多無礙。卽四通中如意通也。

摩頂已。金剛藏菩薩從三昧起。

第四摩頂已下起分。所以起者。三昧事訖。已得勝力。說時至故。以定無言說。故須起也。

第五普告下本分。略示綱要。爲廣本故。文分爲三。初明六決定。以爲地體。次佛子何等下。標列十名。

以顯定相。三佛子我不見下。舉十方同說。彰地要勝。

普告一切菩薩眾言。諸佛子。諸菩薩願善決定。無雜不可見。廣大如法界。究竟如虛空。盡未來際。徧一切佛刹。救護一切眾生。爲一切諸佛所護。入過去未來現在諸佛智地。

今初地體文中。初句標告。諸佛子下。正顯於中。初句總明。後無雜下。別顯。總中言菩薩願善決定者。標人顯法。故云菩薩於大菩提立誓。趣求。故名爲願。卽下初地中發菩提心也。此願所以名善決定。

者。以真實智攝故。謂攝導此願。皆令順理。決擇楷
定故。此已入初地。是證決定。非是地前信地所攝
之願。受決定名。後別中此善決定有六種。卽經六
句。一無雜者。卽觀相善決定。眞如觀一味相故。謂
正體緣如。境智一味。爲觀之相。則無帶相之雜。二
不可見者。是眞實善決定。非一切世間境界。出世
間故。謂此眞智超出世間可壞之法。故云眞實。眞
實故。非世智所見。三廣大如法界者。勝善決定。論
總釋云。大法界故。一切諸佛根本故。四究竟如虛
空盡未來際。是因善決定。以此智寂而常用故。爲

無常因。用而常寂。故爲常果。因。謂涅槃永寂。而智體不無。故窮未來際。五徧一切佛刹。救護一切眾生者。是大善決定。謂隨順作利益他行故。卽普覆名大。謂由前因善。則大智不住生死。由此大善。則大悲不住涅槃。六爲一切下。是不怯弱決定。上入智地。不怯弱故。六相圓融。類前可知。上六決定以顯地體。下徵列地相。

佛子。何等爲菩薩摩訶薩智地。

次列地相。中文有四節。初寄問徵起。次佛子下。舉數顯同。三何等下。徵數列名。四佛子此菩薩下。結

名顯勝。且初。

佛子。菩薩摩訶薩智地。有十種。過去未來現在諸佛已說。當說。今說。我亦如是說。

二舉數顯同。以生成住持故。三世同說。同說之言。文在地相。義兼地體。明是三世同說。地體六決定也。

何等爲十。一者歡喜地。二者離垢地。三者發光地。四者燄慧地。五者難勝地。六者現前地。七者遠行地。八者不動地。九者善慧地。十者法雲地。

三列地名中。爲對治十障。證十眞如。成十勝行。說

於十地。疏引論文廣釋其義。今略取十障者。一凡夫我相障。二邪行障。三闇鈍障。四解法慢障。五身淨慢障。六微細煩惱障。七細相習障。八無相有加行障。九不能善利益眾生障。十於諸法中不得自在障。唯識論說一一障中各有二愚。除障斷愚。證十真如。至下別釋。今依本論略釋地名。論云。一成就無上自利利他行。初證聖處。多生歡喜。名歡喜地。由前三位修習。今得初成。聖位新得。故生歡喜也。二離能起誤心犯戒煩惱垢故。清淨戒具足。故名離垢地。三隨聞思修等。照法顯現。故爲明地。謂

得四地。慧光明相。故名明地。唯識此經。皆名發光。謂成就勝定大法。總持能發無邊妙慧光故。此約後位得名。四不忘煩惱薪。智火能燒。故名燄地。燄乃慧燄。卽根本智火。能燒前地。聞持不忘。恃以成慢之煩惱薪故。五得出世間智方便善巧。能度難度。故名難勝。謂真俗無違。極難勝故。既能出世。又能隨俗。巧達五明。能度偏滯。實爲難勝。六般若波羅密行。有間大智現前。故名現前地。謂妙達緣生引無分別。名般若行。親如目覩。名曰現前。七善修無相行。功用究竟。能過世間二乘出世間道。故名

遠行。此有三義。一善修無相。到無相邊。二功用至極。三望前超過故。入報行純熟。無相無間。故名不動。此有三義。一捨三界行生。受變易果。故云報行。依此起行。任運而成故。功用不動。二得無生忍。無相妙慧。則有相不動。三此二無間故。煩惱不動。九得無礙力。說法成就。利他行故。名善慧地。得無礙慧。尙未稱善。徧說徧益。方名爲善。十得大法身。具足自在。故名法雲。此有二義。一得大法身如雲。能說法如雨。自在用故。二諸佛大法雲雨。悉能受故。佛子。此菩薩十地。三世諸佛已說。當說今說。

四結名顯勝

佛子。我不見有諸佛國土。其中如來不說此十地者。釋文第三舉十方同說彰地要勝。為欲令物生渴仰故。文中二。初云不見不說。反顯十方報化皆說。何以故。此是菩薩摩訶薩向菩提最上道。亦是清淨法光明門。所謂分別演說菩薩諸地。佛子。此處不可思議。所謂諸菩薩隨證智。

二徵釋所由也。徵云。佛國不同。化儀亦異。如何十地要皆說耶。釋意云。此最勝故。謂萬法皆如。體如成聖。離斯證智。皆是隨宜。故為要勝。已上本分竟。

第六爾時金剛藏菩薩說此下請分中三。初說已默住。二是時下三家五請。三爾時金剛藏觀察下許說分齊。所以默者。將欲說之。必固默之。欲令大眾渴仰請說故。所以俟請者。略有二義。一增諸菩薩尊敬法故。二前舉地歎勝。爲增樂欲。令此請中生解勝故。云何生解。謂由請故。得說默之由。顯地體甚深。離於言念。令眾先解。後聞說分。不隨聲取。離謬解故。卽復由此故。有第三示說分齊。今初爾時金剛藏菩薩說此菩薩十地名已。默然而住。不復分別。

此初說已默住。第二請中三家請殊。卽分三段。謂初解脫月請。二大眾請。三如來請。所以要三家者。眾首顯揚。當機渴仰。化主加勸。事方周故。又佛請者。卽名爲加。謂眾雖已請。要假主佛威光。方堪說故。亦名爲教。如來教說。顯剛藏說。傳佛教故。又前二家請。顯此地法。因人修故。後一家請。顯此地法。佛所證故。三請三止。文有六段。止請相乘。且爲五段。一怪默騰疑請。二法深難受止。三歎眾堪聞請。四不堪有損止。雖有堪者。亦有不堪故。五雙歎人法請。謂不堪聞者。以法深故。亦得佛護。固應爲說。

於是剛藏理窮。更無違請。

是時一切菩薩眾。聞菩薩十地名。不聞解釋。咸生渴仰。作如是念。何因何緣。金剛藏菩薩唯說菩薩十地名。而不解釋。

就初請中分二。初明大眾覩默生疑。二解脫月下騰疑爲請。今初言何因何緣者。疑怪之辭。爲因說者不能說耶。爲緣聽者不堪聞耶。

解脫月菩薩知諸大眾心之所念。以頌問金剛藏菩薩曰

二騰疑爲請。初敘請因。領眾疑念。

何故淨覺人 念智功德具 說諸上妙地

有力不解釋 一切咸決定 勇猛無怯弱

何故說地名 而不爲開演 諸地妙義趣

此眾皆欲聞 其心無怯弱 願爲分別說

眾會悉清淨 離懈怠嚴潔 能堅固不動

具功德智慧 相視咸恭敬 一切悉專仰

如蜂念好蜜 如渴思甘露

二以頌正請文有五偈。顯說聽無過。是以應說。初
一偈說者無過。遣大眾何因之疑。後四偈聽者無
過。亦遣大眾何緣之疑。今初歎說者淨覺無過。何

故不解釋耶。然說法之過有三種。一慳嫉不說。二懈怠不說。三無辯力不樂說。今離此三過。謂由無瞋等功德具故。離慳嫉過。二由前已說上妙地名。故無說法懈怠。三由有樂說辯力。無不樂說過。二歎聽者。無過中四偈。初二偈歎同生眾。次一偈歎異生眾。後一偈雙歎。今初二偈歎根欲。前偈歎根。故云決定。次偈歎欲。故云欲聞。若有欲無根。雖聞不解。有根無欲。設聞不受。故須雙歎。此中意明。但有根而無欲。不堪聞法。今前偈於教決解於理決證。具二決定。爲非現前之根。復有今偈現前之欲。

教證決定。故堪受也。根欲雙具。諸地妙義。願爲說之。第二一偈。歎異生眾。但云眾會故。雙歎根欲。初句爲總。心無濁故。名爲清淨。後三句爲別。別離六濁。一不欲濁。謂無心餐采故。離懈怠治之。二威儀濁。不恭肅故。嚴整治之。三五蓋濁。貪名等故。潔淨治之。四異想濁。謂貢高雜染。輕慢雜染等。皆名異想。今說行堅固不動治之。五不足功德濁。善根微少。於彼說不樂住。具功德治之。六愚癡濁。謂愚暗不了故。智慧治之。後一偈。雙歎二眾。瞻侍則徧四偈。然蜂之念蜜。渴之思漿。喻希法喜解脫之味。復

言好蜜甘露顯法之妙。思渴情深。大眾如此。故應說也。

爾時大智無所畏。金剛藏菩薩聞說是已。欲令眾會心歡喜故。爲諸佛子而說頌言。

第二法深難受止。先敘意。令眾歡喜。是總酬答相。菩薩行地事。最上諸佛本。顯示分別說。

第一希有難。微細難可見。離念超心地。

出生佛境界。聞者悉迷惑。

酬中五偈。分四。初二頌明法難說。遣上何因之疑。於中難者是總相。云何難。謂難得難證故。難得有。

四。一微細難得。顯非聞慧境故。二難見難得。亦非思慧心眼見故。三離念難得。亦非世間修慧境故。以地智是真修故。非地前分別心數緣修之境。四超心地故難得。非唯非地前之境。亦非登地已上報生善得修道智境。謂變易所起異熟心識。名爲報生。生便能知無常等。故名善得修道智。以非照實之智。故亦不測地智。知無常等。未忘心境。名爲心地。以七地已前皆容出觀故。又善得修道智。卽後得智。非根本智。旣非四心之境。是誰境耶。卽佛智故。何者是智。見實義故。所以難說者。恐聞者隨

聞取著。生迷惑故。

持心如金剛 深信佛勝智 知心地無我

能聞此勝法

第二一頌。顯難聞者。舉具德能聞。反顯難聞。兼欲使人學能聞故。初句爲總。謂持聽法心堅如金剛。則能得聞。第二句卽決定信堅。深信者。謂於佛智設心智不及。仰推佛智非我境界。是深信相。佛勝智卽法華所說權實二智。經云。諸佛智慧甚深無量。其智慧門難解難入。故云勝智。第三句卽證得堅有二義。一知是能證。二心地是所證。卽二空真

理所依之事。謂唯識相。言無我者。通能所證。於此
二類如實了知。我法二空。成無我智。未句結成。既
知難聞之義如是。具上二堅。方聞上來微細勝智。
如空中彩畫。如空中風相。牟尼智如是。

分別甚難見

第三一頌。喻難說聞。

補義云。此二喻疏取論有多釋。今約義總釋。空喻
佛無依智。經云。佛智如空。無所依故。畫喻說相。風
喻音聲聞相。二者皆無所依。以喻地智難聞。故合
云牟尼智如是。分別甚難見。

我念佛智慧 最勝難思議 世間無能受

默然而不說

第四一頌。舉難結默。意云說聞本在證見。難見說之何益。况復難信。故我默然。

爾時解脫月菩薩聞是說已。白金剛藏菩薩言。

第三解脫月歎眾堪聞請。前已歎竟。此復歎者。由聞上言證信。難得顯示。此眾有信有證有堪能故。長行先敘請。

佛子。今此眾會。皆悉已集。善淨深心。善潔思念。善修諸行。善集助道。善能親近。百千億佛。成就無量功德。

善根

此下發言正請於中三。初陳眾集。次云善淨下歎德。文有十句。初句爲總。餘九爲別。初善淨。深心離教證過。故名善淨心。一具修諸善行故。卽下教淨。二與理相應故。卽下證淨。善潔思念。下九句前五句教淨。後捨離。下四句證淨。謂順教修行。名爲教淨。證理起行。名爲證淨。今初五句中。一善潔思念。卽欲淨。二善修諸行。求淨三業。三善集助道。卽生得淨。四善能等。卽受持淨。五成就善根。卽行淨。捨離癡惑。無有垢染。深心信解。於佛法中不隨他教。

次此四句證淨也。一捨離癡惑法得淨現智善決定故。皆破無明。二無有垢染。卽不行淨。修道中一切煩惱不行故。煩惱卽是垢染。不行卽是無有。三深心信解。卽無厭足淨。謂不樂小乘。決定信佛勝功德故。四於佛法下。不隨他教淨。謂於趣菩薩地盡道中。自正行故。歎德竟。

善哉佛子。當承佛神力而爲演說。此諸菩薩於如是等甚深之處。皆能證知。

二結請

爾時解脫月菩薩欲重宣其義而說頌曰。

願說最安隱 菩薩無上行 分別於諸地

智淨成正覺 此眾無諸垢 志解悉明潔

承事無量佛 能知此地義

二重頌中二偈。初偈直舉法請。次偈重頌前義。

爾時金剛藏菩薩言。佛子。雖此眾集。善淨思念。捨離愚癡。及以疑惑。於甚深法。不隨他教。

第四不堪有損止。長行中先領所歎。對下有損。所以言雖。

然有其餘劣解。眾生聞此甚深難思議事。多生疑惑。於長夜中。受諸衰惱。我愍此等。是故默然。

後正舉損違請劣解之人。通凡小等皆是迷法之器。故多生疑者。正行相違。猶豫義故。惑者心迷於理。能破壞善法故。此明現損。長夜下。明其當損。我愍此下。結默違請。

爾時金剛藏菩薩欲重宣其義而說頌曰。

雖此眾淨廣智慧 甚深明利能決擇

其心不動如山王 不可傾覆猶大海

有行未久解未得 隨識而行不隨智

聞此生疑墮惡道 我愍是等故不說

偈中亦二。前一偈頌前段。後一偈頌後段。不堪有

損。下文第五雙歎人法請中。復重請者。示彼疑惑。應須斷之。豈可避之。避之不說。有多過咎。何等過咎。不得成就一切佛法。

爾時解脫月菩薩重白金剛藏菩薩言。佛子。願承佛神力。分別說此不思議法。此人當得如來護念而生信受。何以故。說十地時。一切菩薩法應如是得佛護念。得護念故。於此智地能生勇猛。何以故。此是菩薩最初所行。成就一切諸佛法故。譬如書字數說。一切皆以字母爲本。字母究竟無有少分離字母者。佛子。一切佛法皆以十地爲本。十地究竟修行成就。得一

切智。是故佛子。願爲演說。此人必爲如來所護。令其信受。爾時解脫月菩薩欲重宣其義而說頌曰。

善哉佛子願演說

趣入菩提諸地行

十方一切自在尊

莫不護念智根本

此安住智亦究竟

一切佛法所從生

譬如書數字母攝

如是佛法依於地

第五雙歎人法請中亦二。先長行中。初標請。何以故下。釋請。是故下結請。

補義云。此段長行有多釋。大義謂雖有不堪之機。今說此大法。佛必護念。若得護念。亦令信受故。所

以佛必護念者。以諸佛之法。必以教證爲本。故設字喻。今說地智。是佛法之本。必爲如來所護念也。次重頌義。亦可知。

爾時諸大菩薩眾。一時同聲向金剛藏菩薩而說頌言。

上妙無垢智 無邊分別辯 宣暢深美言

第一義相應 念持清淨行 十力集功德

辯才分別義 說此最勝地 定戒集正心

離我慢邪見 此眾無疑念 唯願聞善說

如渴思冷水 如饑念美食 如病憶良藥

如蜂貪好蜜 我等亦如是 願聞甘露法

善哉廣大智 願說入諸地 成十力無礙

善逝一切行

第二海會大眾同請者。自陳有根有欲。於中前有
四偈半。歎人。後善哉。下有一偈。歎法成益。初中前
二偈。初五句歎說者。自成教證。後三句歎能令他
入。後二偈半。歎聽者。初定戒。下一偈。歎眾有根。後
如渴下一偈半。歎眾有欲。顯示大眾求法轉深。後
善哉一偈。歎法利益。

自下如來加請。前雖二家四請。爲顯法勝。復待佛

加。前來爲分主伴。主佛唯明意加。今欲具於身口。故佛重加。又前默與威神。令有加請。今加爲說。不與前同。上力被下。說以爲加。因加勸說。目之爲請。加卽是請。前加分中。不加大眾。今此加者。前若卽加。說主無由三止。此若不加。請主前言得佛護念。便爲無驗。上敘科意。

爾時世尊從眉間出清淨光明。名菩薩力燄明。百千阿僧祇光明以爲眷屬。普照十方一切世界。靡不周徧。三惡道苦皆得休息。又照一切如來眾會。顯現諸佛不思議力。又照十方一切世界一切諸佛所加說。

法菩薩之身。作是事已。於上虛空中。成大光明雲網臺而住。

初主佛光加。文中通有八業二身。先長行有七業二身。頌中但明請業。先此佛光照十方。後十方佛放光照此方。二光互照。必互相見。二段皆有二身七業。今初先明光體業用。作是事已下。正明所作。今初先明光本。上加於下。多用眉間之光。亦表將說中正之道。出清淨下。正明體用。文有六業。一覺業。卽光明體。謂光照菩薩身已。自覺如來力加故。覺照光明。故曰發明。二百千下。因業。能生眷屬故。

三普照下。卷舒業。舒則普照十方。卷則還入常光。今文略無卷業。四三惡下。止業。皆息苦故。五降伏業。論經一切魔宮隱蔽不現。今經闕此。六又照一切下。敬業。顯現佛會。令物敬故。七又照十方下。示現業。正爲令眾見說聽者皆得佛加。堪說聽故。長行受身加之名。偏從此立作是已下。二正顯所作。卽二身之一。言二身者。一流星身。往來他方世界。故。二如日身。謂如日處空。卽此所作。於上空中爲臺是也。以身約有體業約有用。

時十方諸佛悉亦如是。從眉間出清淨光明。其光名

五履經要卷三十四
三十一
號眷屬作業悉同於此。又亦照此娑婆世界佛及大眾并金剛藏菩薩身師子座已於上虛空中成大光明雲網臺。

二十方佛放光照此者。正爲照此。然其作業亦周十方。七業二身不殊。此佛故云悉同。

時光臺中以諸佛威神力故而說頌言。

第二頌明請業所依。望前猶屬於身。

佛無等等如虛空
十力無量勝功德

人間最勝世中上
釋師子法加於彼

正請中五偈分二。前四加請所說。後一教說分齊。

前中先二偈舉法請。後二偈舉益請。前中初正顯作加。後一偈顯加所爲。初中言世中上者。具四種勝義。故云世中上。四勝者。一者自在勝。所作無礙。故謂不爲他屈。他卽二障。由離二障。解脫自在。不染如空。卽經云無等等。二力勝。卽經十力。能伏邪智之冤敵。故三眷屬勝。卽無量勝功德。人間最勝。四種姓勝。謂家姓勝。卽釋師子。以釋姓爲輪王貴胄。故由上四義。故稱法王名世中上。今具勝德之人。加金剛藏。

佛子當承諸佛力

開此法王最勝藏

諸地廣智勝妙行 以佛威神分別說

第二一偈加所爲者。欲令開曉法藏義故。勝藏有二種。一義藏。二字藏。義藏卽勝妙行。行者諸菩薩行。所謂助道法故。妙者真實證故。卽是證道。勝者神力勝故。是不住道。染淨無礙。故云神力。如是顯示深妙勝上之義。二字藏者。卽諸地廣智及分別說。上舉法請

若爲善逝力所加 當得法寶入其心

第二舉益請者。顯所說法利他有三時益故。之偈分三。初半偈聞時益。若得上加。則法寶入心。成聞

持益。卽上解脫月請云。此不思議法。當得如來護念而生信受。

諸地無垢次第滿

亦具如來十種力

次半偈修時益。上句修時因圓。下句所修果滿。

雖住海水劫火中

堪受此法必得聞

其有生疑不信者

永不得聞如是義

後一偈顯轉生益。卽具堅種人。上半順明有信之益。下半反顯舉無信之損。堅種人者。謂具金剛種。雖在八難而得聞。故地獄天子。三重頓圓。此中意顯有信受者。雖在惡道難處而得聞經。以難不障。

聞。故言雖也。海水劫火。是轉生難處。大海龍宮。卽是惡道畜生趣。故劫火中者。卽是善趣。指色界二禪。以火燒初禪。二禪不壞。而二禪已上天人。爲長壽天難。亦得聞經。

補義云。總顯法勝。聞種堅固。故經有如人食少金剛之喻。而疏多義。槩不出此。

應說諸地勝智道

入住展轉次修習

從行境界法智生

利益一切眾生故

第二一偈教說分齊中。應說諸地者。總勸也。說地何義。謂說前字藏之中。諸地廣智三漸次相。故云。

何爲三。一觀漸次。二證漸次。三修漸次。此卽十地之中。加行根本。後得。三智。爲地地中初中後相。勝智道者卽觀漸次。道者因也。以加行智爲正證。勝智之漸次故。次入住展轉者。是證漸次。入者入地心。住卽住地心。未轉向餘地故。展轉卽出地心。地地轉所住處故。卽此三心證智。自爲漸次。第三句卽修行漸次。以後得智要由證真修行方能了俗。故言法智者。正辨後得智體。緣法別故。名爲法智。此智從二境生。一由證真。故云從行生。二外能了俗。故云從境界生。謂以正證之行。行於俗境。是後

得也。利益眾生一句。結說之益。亦是後得智境。
爾時金剛藏菩薩觀察十方。欲令大眾增淨信。故而
說頌曰。

此下第三許說分齊。謂所說不過義說二大。是地
分齊。於中先敘說儀。後正顯偈辭。今初。觀察十方
是敘說儀。觀十方佛。將欲承力。故無我慢。觀十方
機。擬將普被。故無偏心。故上下文皆云承佛神力
普觀十方也。欲令大眾增淨信者。是敘說意。謂眾
先有信。深渴所聞。今更示說正地二大。增益聞者
堪受正義。不如言取名增淨信。義名所以深廣稱。

大卽是當法受名。說名詮表。因於此說。得彼義故。依於彼義。說名爲大。大之說故。依他受稱。於中先就義大。次爲說大。後辨雙融。義中有三。一約果海。可以總標。令人知有名爲可說。不可指斥示人。名不可說。二約證處。旣所證理離相離名。還云此法不可說聞。以此遣言之言當彼法故。名爲可說。有言斯遣。名不可說。三約本智。謂以遮詮易解。故名可說。直詮不逮。故不可說。此三大義也。次就說中亦三。一約後得智。隨事行相。可以言辭分別。是則可說。是出世間。故不可說。二約加行智。謂是意言。

觀故是則可說。觀中行相言不至故。名不可說。三約所倚法。可以寄此表示。令人解十地故。名爲可說。不可以此卽爲十地名不可說。後約雙融中。此上六法各說果海。卽是無說。無說之說。無二俱融。準思可知。上來敘意竟。

如來大仙道 微妙難可知 非念離諸念
求見不可得 無生亦無滅 性淨恆寂然
離垢聰慧人 彼智所行處

第二正顯偈辭。有十二偈。分爲二段。前七偈顯義大。後五偈明說大。前中分四。初四偈總顯地智微。

妙。二一偈類地行微。三一偈寄對彰微。四一偈喻顯地微。初中有二。初二偈總顯。次二偈別顯。今初正顯地智微妙之相。以依智地說故。謂聖道是體。難知故微也。大仙是佛。道者是因。修行證智之因。得大仙果故。下六句顯微所以。初句說時難知。言非念者。謂非念慮分別心者之境界也。以智體無念。故云離念。次五句明證時甚微。初句總求欲證見。難證得故。下四句別有四微。初卽功德甚微。不生不滅。謂無住涅槃。寂用無礙功德。次卽清淨甚微。謂性離煩惱。無不離之時。故恆寂然。卽性淨涅

槃。三言離垢者。卽觀行甚微。謂觀智中離無明垢故。四聰慧人下。卽依止甚微。聰慧人者。登地已上有智之者。此上四微並異凡小。總顯地智故。

自性本空寂。無二亦無盡。解脫於諸趣。
涅槃平等住。非初非中後。非言辭所說。
出過於三世。其相如虛空。

次二偈別顯微相。謂微之體相也。是智有二相。初二句明同相。智體空寂故。後六句不同相。智位差別故。初二句言自性等者。謂此智自體本空寂故。何以言同。此卽性淨涅槃。上同諸佛。下同眾生。一

切眾生皆有此故。橫同諸法。諸法如故。此如卽是自體空故。一切皆以空爲自性。智性。色性。本無差別。一切皆有安樂性故。下句別釋空義。疏依論經云。有不二不盡。釋約此句。離三種空攝。是真空相。三種空者。卽地前空。亂意菩薩有三種疑。一疑空減色。取斷滅空。此失空如來藏。卽損滅謗也。二疑空異色。取色外空。三疑空是物。取空是有。今言有卽非斷滅。故云色卽是空。言不二者。謂不異此空智。更有異空。言不盡者。謂空非有物之可轉滅。故云空卽是色。非別有空。離此三空。卽見自性本空。

空如來藏矣。此疏依論經釋。次解脫下有六句。卽方便淨涅槃。謂不同凡小修斷故。卽智之性爲性淨。以智出惑障爲方便淨。解脫於諸趣者。謂於諸趣。得以離諸趣雜染爲解脫。故言平等者。世間之性。卽涅槃故。以生死卽涅槃。非若二乘背生死也。謂三時無斷。方說斷惑。故云非初中後。非言辭下三句。明三德。初句卽般若德。是觀行相。謂無分別觀。體絕名言。眞智內發。次句卽法身德。是轉依相。謂轉無常依。故出過三世。三其相如虛空。卽解脫相。謂不同聲聞。猶有智障。今此二障雙亡。故如空。

無礙。此不同相。由得前同。成斯不同。能顯前同。令離障清淨。無別不同。如融金成像。像非金外。

寂滅佛所行 言說莫能及 地行亦如是

難說難可受

第二一偈類地行微。於中上半牒前地智離言。以爲能類。下半正舉地行。以爲所類。謂以上地智類顯地行爲甚微妙。寂卽同相。性淨涅槃自性寂故。滅卽不同相。方便淨涅槃。要智緣滅非約性滅故。此二涅槃。是佛所行。故言不及。行者證也。言不及者。說聽皆難也。下半所類者。謂非唯證智如是深。

玄。而令智眷屬行亦難說受。檀等六度是智眷屬。設地是地體。意在舉地取行。故云地行。將此地智修行檀等。故名同行。同彼事而行故。斯卽後得爲證智眷屬也。

智起佛境界 非念離心道 非蘊界處門
智知意不及

第三一偈寄對彰微者對聞思等以顯微故。初句舉法體。智卽所起地智。卽前五偈所明根本之智。起者卽加行後得。二皆觀如。如卽佛境。次非念下二句明難說於中初句非心數故難說。非念者非

思慧境故。離心道者。非報生識智境故。報生識者。如上違請中辨。次句明不同三科。有色心根境。故不可說。經文無說字。以門卽是說。故法華以說爲智慧門。下句不可聞。智知者。唯證智知故。意不及者。如聞取故。卽依智不依識。

如空中鳥迹 難說難可示 如是十地義
心意不能了

第四一偈喻顯地微。上半喻。下半合。此中喻者。不取餘處虛空。亦不取沙土之迹。正取空中鳥迹。以空中鳥迹不可說示故。前風畫喻是顯默不說意。

此中喻及難說。誠眾捨著。許爲宣說。意不同也。以著心隨聲取義。有多過故。意令大眾自知離過。所以明難說聞。

慈悲及願力 出生入地行 次第圓滿心

智行非慮境 是境界難見 可知不可說

自此下第二復顯說大。令生正信。五偈分三。初一偈半正顯說大三成就義。二有三偈彰已無過。誠眾除失。三有半偈示說分齊。但是說因。今初言三成就者。一因成就大。謂慈悲願力爲起行本。故名爲因。二因漸成就大。謂聞思慧等爲出世智因。起

之不頓。故名爲漸。三教說修成就大。謂卽修慧。真修契實。如於正證。可寄言詮。故名教說。教說二字。正揀義大。非如果分不可說。故因成就大者。卽初二句。慈悲是利他。願通二利。力通上三。以二利熏修。不同二乘。故名爲力。下句卽二利之功。出生地行。正是因義。二因漸成就大。卽次第二字。三圓滿下。明教說修成就大。此有二種。一滿足修。卽初入字。二者觀修。卽後兩句。真修位極。世慮都寂。能滿地智。名滿足修。真智內發。寂照分明。名爲觀修。如瑩明鏡。垢無不淨。如滿足修。鑒無不徹。如彼觀修。

二修如於出世。但是因分之終。正證捨修方名果分。文中慮卽聞思。智卽真修之智。心卽真修心體。謂若無聞思緣慮之心。方名真修之心圓滿。故唯真修之智所能行耳。故云智行非慮境。次觀修中是境界者。卽真修之境。難見者非聞思能見。可知者唯真修自心寂照方知。知卽見也。旣難可見。亦難可說。而隨修以顯說。大中收不同果分。但是深義。

佛力故開演 汝等應敬受 如是智入行
億劫說不盡 我今但略說 眞實義無餘

一心恭敬待 我承佛力說 勝法微妙音

譬喻字相應 無量佛神力 咸來入我身

第二佛力下彰已無過。誠眾無失。有三偈。初半偈。總明。後二偈半。別顯。今初。由說聽者各有二過。不能得證。故並彰離說者二過。一佛不隨喜說。今云佛力開演。則知佛已隨喜。二不平等。今云汝等應受。則情無彼此。聽二過者。一見諍過。言我法是他法。非如是執著種種諸見。二於說法者不生恭敬。今令敬受。則雙離二過。以敬法故無諍過。以敬人故無後過。次別顯中二偈半。廣上承力開演敬受。

三十一
分三段。初一偈顯開演。次一偈顯敬受。後半偈顯承力。

此處難宣示 我今說少分

第三示說分齊。半偈言此處者。卽牒上義說。二大爲此處也。少分者。但是說因耳。謂果分則不可說也。因果有二義。一就十地。以證智爲果分。方便寄法等爲因分。謂寄法可說。而證智則不可說也。又以地法爲趣究竟果海之因。所趣果海離言。故不可說。故今地法。但說因耳。若以普賢行願廣大如空。冥同果海。皆不可說也。空中鳥迹喻正顯此。

自下大文第七明說分中。三門分別。一來意。二釋名。三釋文。今初來意者。請儀既終。已示分齊。彰其地實。地實難明。寄顯在相。相卽因分。從此已下。廣明地相。今尋相得實。故有此來。又請分生其正解。此後顯其行修。故次來也。二釋名。演暢宣陳十地差別。故名說分。三釋文者。十地卽爲十段。就初地中。七門分別。一來意。二釋名。三斷障。四證理。五行。六得果。七釋文。初來意者。十地之中。最初斷障證理。得聖性故。二釋名者。唯識論云。初獲聖性。具證二空。能益自他。生大歡喜故。此有三義。一得位。

二證理。三成行。由此三故。名極歡喜。三障斷者。唯識論云。異生性障。是其所斷。異生卽是凡夫。名凡夫。我相障。障於初地。是其所斷。由斯初地說斷二愚及彼麤重。一執著我法愚。卽異生障。二惡趣雜染愚。卽惡趣諸業果等。此雖非愚。愚品類攝。下九地各有二愚。四所證理者。由斷前障。證徧行真如。謂此真如。二空所顯。無有一法而不在故。五所成行者。略有四種。一約增勝。修成施行。二約所成。起十大願。三約修成。謂信等十行。四約實行。謂十度等無不皆修。六所得果者。略有四種。一得當地滿。

時調柔等四果。二得檀行。成大財果。三通達障空。得一切障滅果。四得三性三無性理智等果。然上諸門多約行布。若約圓融。一斷一切斷。一證一切證。一行一切行。一得一切得也。七釋文分二。先長行。後偈頌。前中若直就經文。應分爲二。初明地法。後佛子菩薩住此地多作閻浮提王下地果。前中先廣明。後佛子是名下總結。前中有三。初明入心。次佛子此菩薩以大悲爲首下。明住地心。後佛子菩薩住此歡喜地。已以大願力得見多佛下。明其出心。十地之文。大體皆爾。今且依論判長行中分

二。先明初地說分。後佛子菩薩住此下。校量勝分。前中依論總有一百句。分爲三段。初四十句明住分。二佛子菩薩住歡喜地下三十句。釋名分。後佛子菩薩住大悲下三十句。安住分。若通校量勝。卽爲初地四分。初云住者。出世菩提心生。堅守初地。更不退失。故稱爲住。然十地之中。旣三心齊證。則地地之中。皆攝前之三位。此中住分。攝發心住。其釋名分。攝歡喜行。後之二分。攝救護眾生離眾生相。迴向。今長行一百句中。初四十句明住分。

佛子。若有眾生深種善根。善修諸行。善集助道。善供

養諸佛。善集白淨法。爲善知識。善攝。善清淨。深心。立
廣大志。生廣大解。慈悲現前。

今初住分中。文分爲二。初別顯住法。後菩薩住如
是下。結住入位。前中四十句。分四。初十句。依何身。
次十句。爲何義。三有十句。以何因。四有十句。有何
相。初謂深種善根十句。爲所依身。次爲求佛智爲
所緣境義。三以大悲爲首。爲發心之因。四以過凡
得聖。爲發心福利之相。今初依何身十句。初若有
眾生深種善根。此句爲總。眾生卽解行之人。言深
種者。約行布則經一僧祇。已積資糧。故云深種論。

經名厚集。別有九句。有九種集。前六護煩惱行。後三護二乘行。言九集者。一行集。卽善修諸行。善作眷屬。持戒故三聚非一。故名爲諸。不淨尸羅。不生三昧。故首明之。二定集。卽善集助道。善作眷屬。三昧故。以定資慧。故名眷屬。三親近集。卽善供養諸佛。供佛欲集聞慧故。四聚集。卽善集白淨法。謂依聞思彼若名若義。自性差別。有上下故。成煖頂位。治諸蔽漏故。云白淨。五護集。卽爲善知識善攝。由內修實證。得外教授故。修行實證。卽如實智。亦分上下。立於忍位及世第一。上五皆同加行。下四皆

已入地。六淨心集。卽善清淨深心。以得出世間正智。於所緣境無分別智。都無所得。不取種種戲論相故。名爲善淨。智能契理。故曰深心。七廣集。卽立廣大志。深心廣利故。八信心集。卽生廣大解。以求一切智智故。九現集。卽慈悲現前。以多行慈悲。無時暫捨。故云現前。以小乘無求佛志。無利生心。故後三護之也。上十句明依何身竟。下明爲何義。

爲求佛智故。爲得十力故。爲得大無畏故。爲得佛平等法故。爲救一切世間故。爲淨大慈悲故。爲得十方

無餘智故。爲淨一切佛刹無障礙故。爲一念知一切三世故。爲轉大法輪無所畏故。佛子。菩薩起如是心。第二有十句。爲何義者。爲求佛果故。先別顯求果之相。後佛子下。總結發心。今初十句。初總餘別。總云佛智。謂無上智。知斷證修故。此智差別有九種。皆悉求之。一力佛智。問記爲業。以十種力隨機答。故二無畏佛智。破邪見業。揀異菩薩。復稱爲大。三平等佛智。得人法無我教授眾生證入之業。四救佛智。以四攝法化眾生業。五淨佛智。能爲救攝因業。慈悲淨瞋恚故。六無餘佛智。常以佛眼觀世間。

眾生業。十方徧觀。故云無餘。七無染佛智。以無障礙智嚴其依報。自然應化。令其信樂爲業。八覺佛智。一念知三世眾生心心數法爲業。九轉法輪佛智。解脫方便善巧業。然上九句。皆先總標智體。後顯其業。初三自利。後六利他。利他之中。四攝是利他之行。慈悲是利他之心。後四利他之智。二總結發心中。言起如是心者。卽指前十心。是爲發菩提心。而論云卽是本分中願善決定者。上求佛智。卽是願故。前本分中云願善決定者。如初地中發菩提心。卽指此文。前指於此。卽攝上之十句佛智。此

指於前。卽攝前文六決定義。下說以何因

以大悲爲首。智慧增上。善巧方便所攝。最上深心所持。如來力無量。善觀察分別。勇猛力。智力無礙。智現前。隨順自然。智能受一切佛法。以智慧教化。廣大如法界。究竟如虛空。盡未來際。

第三以大悲下。明以何因生如是心。謂以大悲爲眾生故。文有十句。初總餘別。別有九種。一增上大。細行苦智慧增上。生故。若了苦苦壞苦。智非增上故。二善巧等。卽攝大。四攝曲巧。隨宜攝故。三最上下。淳至大。淳至卽最上義。謂向發大心。許盡眾生。

界無盡利益。故曰深心。四如來力無量者。無量大。攝取如來無量神力。生物信故。五善觀等。卽決定大。於上妙法。決定信解。名善觀分別。於諸眾生。決定能度。爲勇猛力。於所治障。決能對治。爲智力。無礙智現前。通結上句。六隨順自然智。卽隨順大。七能受等。卽受持大。能取大勝法。授與眾生故。八廣大如法界。卽是最妙大。九究竟下。卽是住盡大。

佛子。菩薩始發如是心。卽得超凡夫地。入菩薩位。生如來家。無能說其種族過失。離世間趣。入出世道。得菩薩法。住菩薩處。人三世平等。於如來種中。決定當

得無上菩提。

第四佛子菩薩下有何相。正顯得位福利之相。文有九句。初總餘別。總云始發如是心者。指前二段。卽得超凡夫地者。以得出世間聖道故。二入菩薩位下。別有八種過。論皆先法後喻。此入聖位。生如來家。如世王子。生王家故。故句句皆有相似法。一入位過。初成出世間心。如始住胎相似法。二生如來家者。卽生家過相似法。三無能下種姓過。子相似法。大乘行生故。四離世下道過。以非有漏故。如王之體相似法故。五得菩薩法。卽法體過。以同體

大悲爲菩薩體。如王以治國爲體相似。六住菩薩處者。處過。謂不住道是其住處。不同凡小。如世王子不處鄙陋。七入三世平等者。業過。謂證平等眞如。以資慧命。如無滋味則壽命天促。不堪紹繼相似。八於如來下。畢定過。佛種不斷得無上道。如世王子志氣成立。決定紹位。名成就相似。總顯與地前不相似也。

菩薩住如是法。名住菩薩歡喜地。以不動相應故。

第二菩薩住下。結住入位。住如是法者。指上四段名住歡喜地者。是初住地義。以不動相應故者。釋

成住義。一證真理不復失故。二乘異道不能動故。上初四十句明住分竟。下三十句釋名分。

佛子。菩薩住歡喜地。成就多歡喜。多淨信。多愛樂。多適悅。多欣慶。多踊躍。多勇猛。多無鬪諍。多無惱害。多無瞋恨。

大文第二釋名分中有三十句。初句總標。次有十句明喜相。後有二十句明喜因。今別顯成就下釋喜相中十句。初總有三喜。云多歡喜。一心喜。謂入觀之心適悅。二體喜。出觀喜受相應。三根喜。由前心喜內充。外及五根輕安調暢。故此喜相亦名爲

樂。別中九句。前六自利。喜行之體。後三化他。顯於喜能。以內及觀心。卽無喜之喜。不同二禪淨動之喜。故名極喜。喜之極故。上釋喜相。

佛子。菩薩住此歡喜地。念諸佛。故生歡喜。念諸佛法。故生歡喜。念諸菩薩。故生歡喜。念諸菩薩行。故生歡喜。念清淨諸波羅蜜。故生歡喜。念諸菩薩地。殊勝。故生歡喜。念菩薩不可壞。故生歡喜。念如來教化眾生。故生歡喜。念能令眾生得利益。故生歡喜。念入一切如來智方便。故生歡喜。

二彰喜所因。有二十句。先念當得故喜。後念現得

故喜。各有十句。今初。初句總。餘別。總云念諸佛者。謂如諸佛所得。我亦當得。故判爲念當得也。別有九種。一念佛法。二念佛菩薩。三念佛行。四念佛淨。五念佛勝。六念佛不壞。七念佛教化。八念佛利益。九念佛入。以總該別。皆名佛者。爲成佛故。

復作是念。我轉離一切世間境界。故生歡喜。親近一切佛。故生歡喜。遠離凡夫地。故生歡喜。近智慧地。故生歡喜。永斷一切惡趣。故生歡喜。與一切眾生作依止處。故生歡喜。見一切如來。故生歡喜。生佛境界中。故生歡喜。入一切菩薩平等性中。故生歡喜。遠離一

切怖畏毛豎等事故。生歡喜。

第二念現得中二。初正明所念。二何以故。下隨難徵釋。前中十句。初總餘別。總云我轉離一切世間境界者。轉離一切凡夫取著事故。然事有麤有細。麤則外六塵境。通是一切凡夫取著境故。細謂現前立少物。謂是唯識性。亦爲地前凡夫取著境故。別有九種轉離。對前有何相中總別九句。文雖不次。法體全同。以是念前福利相故。揀異地前不相似故。疏各配釋。

何以故。此菩薩得歡喜地已。所有怖畏。悉得遠離。所

謂不活畏。惡名畏。死畏。惡道畏。大眾威德畏。如是怖畏。皆得永離。

二隨難徵釋。由捨轉離文義廣故。重徵釋之。義有四重。謂怖畏與離各有因果。而文分五節。一總徵。二列名總答。三轉徵。四舉因顯相。五菩薩如是下。結酬初徵。今初徵意云。何以此中說離畏耶。後答意云。以五怖畏是初地障。得初地時。法爾離故。又離此卽是此地利益。翻畏名喜。此相最顯。

何以故。此菩薩離我想故。尚不愛自身。何況資財。是故無有不活畏。不於他所希求供養。唯專給施一切。

眾生是故無有惡名畏。遠離我見無有我想。是故無有死畏。自知死已。決定不離諸佛菩薩。是故無有惡道畏。我所志樂。一切世間無與等者。何況有勝。是故無有大眾威德畏。

三轉徵者。釋離畏所以也。此之一徵。文含四意。一云。何以名爲不活畏耶。二云。何因而有此五畏耶。此二是怖畏因果。三云。何以名爲永離耶。四云。因何令此得永離耶。此二是離畏因果。若得因離。自然無果。次四舉因顯相以答者。謂正舉離因。顯離果相。反顯畏因及畏果相。故通有四意。酬前四徵。

如不愛自身。何況資財。是離不活因。則反顯愛身資財。是不活畏因。若不畏不活。卽是離畏因。則反顯畏於不活。是此畏果。餘四例然。又此離因卽是能治。其怖畏卽是所治。

菩薩如是遠離驚怖毛豎等事。

五菩薩如是下。結酬初徵。前云何以能離。今酬云。如上三段。所以能離。上三十句釋名竟。下三十句安住分。

佛子。此菩薩以大悲爲首。廣大志樂。無能沮壞。轉更勤修一切善根。而得成就。

自下大文第三佛子此菩薩以大悲下安住地分
中有三。初總明安住。二所謂下別顯安住。三佛子
菩薩以成下總結安住。今初文有三句。一大悲爲
首。是安住因。菩薩所行皆爲眾生悲爲行本。故云
爲首。二廣大志樂無能沮壞。是安住觀。謂契理深
心爲大。故煩惱不能壞。悲化兼物爲廣。故小乘不
能壞。三更勤修一切善根而得成就是安住行。
下別顯安住有三十句。卽爲三段。

所謂信增上故。多淨信故。解清淨故。信決定故。發生
悲愍故。成就大慈故。心無疲懈故。慚愧莊嚴故。成就

柔。和。故。敬。順。尊。重。諸。佛。教。法。故。

二。別。顯。安。住。卽。顯。前。勤。修。善。根。云。何。勤。修。文。有。三。十。句。顯。三。種。成。就。一。信。心。成。就。二。修。行。成。就。三。迴。向。成。就。信。爲。行。始。次。依。信。起。行。後。迴。行。成。德。以。爲。行。修。次。第。今。初。信。心。十。句。增。上。者。謂。下。所。列。諦。寶。等。境。深。信。決。定。名。爲。增。上。別。中。有。九。初。六。始。起。信。心。後。三。信。增。成。欲。前。中。初。二。自。利。後。四。利。他。

日。夜。修。習。善。根。無。厭。足。故。親。近。善。知。識。故。常。愛。樂。法。故。求。多。聞。無。厭。足。故。如。所。聞。法。正。觀。察。故。心。無。依。著。故。不。耽。著。利。養。名。聞。恭。敬。故。不。求。一。切。資。生。之。物。故。

生如寶心無厭足故。

第二日夜下修行成就中九句。總云無厭足者。卽無間修。別有八集。前七教行。後一證行。前中初二攝法方便。一親近集。近善友。意在不_レ忘諸法故。二樂法集。於問答中論議解釋。心喜樂故。後五句次第修行。於中前三內觀順理之行。一多聞集。卽聞慧。二正觀集。卽思慧。三不著集。卽修慧。於三昧中無依著故。後二隨緣離著行。謂六不貪集。七不求集。是少欲行。未得不求故。八如寶心集。卽證行。圓明常現前故。

求一切智地故。求如來力無畏不共佛法故。求諸波羅蜜助道法故。離諸諂誑故。如說能行故。常護實語故。不汙如來家故。不捨菩薩戒故。生一切智心如山王不動故。不捨一切世間事成就出世間道故。集助菩提分法無厭足故。常求上上殊勝道故。

第三求一切智下迴向成就。謂求一切智是迴向菩提。有十二句。初句卽所求之事。名之爲家。一切智地是求處故。下十一句。卽能求之因。初句求如來力等顯能求之觀。餘十句能求之行。初求諸度名無障求。謂求諸度無著法故。能除蔽障。下九句

別。別治諸障故。一離求。治於詔曲。見乞求者。詐現方便。一向無心與故。二如說能行求。是治妄語。謂許而不與等。此治檀中二垢。三者護求。治戒一垢。犯不覆藏故。四不污求。治忍一垢。謂惱亂他業。是污如來利益家故。五不捨求。治進一垢。六不動求。治禪二垢。一者亂心外攀。如山治之。二者不能調伏憶想分別。一切智心治之。下三句治般若三垢。謂七不捨成就求。治障不住道垢。八者集求。治障助道垢。九者常求求。治障證道垢。於上勝妙證法之中。願欲心薄故。上來迴向成就竟。下總結。

佛子。菩薩成就如是淨治地法。名爲安住菩薩歡喜地。

第三總結者。上三十句廣勤行具足成就。此勤行有四。一信。二欲。三精進。四方便。信謂忍受決定。欲謂希求趣彼行故。初十句中。前七是信。後三是欲。次十是精進。對行造修。後十是方便。行成巧求故。是名此地說分中安住。故云成就如是淨治地法。名爲安住。上安住分竟。

下第四校量勝分。謂住此地中。勝二乘故。然其勝義。乃有眾多。統而收之。不出三種。謂願行。智。此三

歷位。故有眾多。略明十位。一初發心勝。二信勝。三解勝。四行勝。五願勝。上卽六證入勝。六證入勝。七從七地去。權實自智勝。入無功起行勝。九上等諸佛勝。十究竟勝。所謂諸佛三心果滿故。今此正明願行勝也。文分爲三。初願勝爲標志遐廣。二修行勝。依願造修。三果益勝。卽位行成就。今初二義。故勝二乘。一常勤修習無量行故。二與一切眾生同行故。同行卽是十無盡句。言圓融者。以稱性故。一願之中。具一切願。卽入重重。六相圓融。正在此文。

佛子菩薩住此歡喜地。能成就如是大誓願。如是大

勇猛。如是大作用。

釋此願勝中分二。初顯十願彰自利行。後明十盡句與眾生共。今初分四。初總標。二所謂下別列。三佛子菩薩住此歡喜地下。總結四。以此十願門爲首下。明攝眷屬。初十願彰自利行。初總標也。能成就言。該下三句。如是一句。始起要期。次大勇猛。乃起方便。三大作用。願遂行成。

所謂生廣大清淨決定解。以一切供養之具。恭敬供養一切諸佛。令無有餘。廣大如法界。究竟如虛空。盡未來際。一切劫數。無有休息。

二別列中十願不同。卽爲十段。初供養願。總明供養。論云供養勝田。通師及三寶。今從勝故。但云供佛。次云廣大如法界下。彰願德。言如法界。攝功德大。如虛空。因大。盡未來時大。一切劫下。明願分齊。又發大願。願受一切佛法輪。願攝一切佛菩提。願護一切諸佛教。願持一切諸佛法。廣大如法界。究竟如虛空。盡未來際。一切劫數。無有休息。

二受持願。初句標願。此受持。亦名護法願。次願行相四句。皆通二利。受謂受領。攝謂攝屬。謂攝受正法。護謂防護。持謂任持。謂護持正法。次廣大下。願

德能。一切劫下。願分齊。

又發大願。願一切世界。佛興於世。從兜率天宮。沒入胎。住胎。初生。出家。成道。說法。示現涅槃。皆悉往詣親近。供養。爲眾上首。受行正法。於一切處。一時而轉。廣大如法界。究竟如虛空。盡未來際。一切劫數。無有休息。

三轉法輪願。初句標。次一切世界轉處。從兜率下。轉時。謂現入相時。皆悉下二句。攝法方便。次於一切處。下二句。明轉法頓周。次廣大下。願德。一切劫下。轉分齊。

又發大願。願一切菩薩行。廣大無量。不壞不雜。攝諸波羅密。淨治諸地。總相。別相。同相。異相。成相。壞相。所有菩薩行。皆如實說。教化一切。令其受行。心得增長。廣大如法界。究竟如虛空。盡未來際。一切劫數。無有休息。

四修行二利願。願一切下。明行相。攝諸波羅密。卽是行體。次淨治諸業。卽是行業。總相下。明行方便。六相圓融。自利。如實說。利他。次教化一切下。明心得增長。廣大下。願德。末句願分齊。

又發大願。願一切眾生界。有色。無色。有想。無想。非有。

想非無想。卵生。胎生。溼生。化生。三界所繫。入於六趣。一切生處。名色所攝。如是等類。我皆教化。令入佛法。令永斷一切世間趣。令安住一切智智道。廣大如法界。究竟如虛空。盡未來際。一切劫數。無有休息。

五成熟眾生願。就行相中。初明所化眾生。通有十類。該盡三界。但麤細不同。有色爲麤。無色爲細。有想爲麤。無想爲細。非有想爲細。非無想爲麤。四生該於六道。人傍生具四。地獄及諸天。中有唯化生。鬼通胎化二。人有卵生者。毗舍佉夫人生三十二卵。卵各出一兒。般遮羅王如生五百卵。卵各一子。

溼生如頂生王從頂炮而生。化生者如劫初起。人皆化生。我皆教化。令入下。別明所爲。謂未信者。令信入佛法。已信者。令證入。言斷世間趣。謂業惑苦。三。道通因果。次廣大下。德能。一切劫下。分齊。

又發大願。願一切世界。廣大無量麤細。亂住。倒住。正住。若入。若行。若去。如帝網差別。十方無量種種不同。智皆明了。現前知見。廣大如法界。究竟如虛空。盡未來際。一切劫數。無有休息。

六承事願。願往諸佛土。常見諸佛。恆敬事聽受。故願一切下。承事行相。初明所知。次辨能知。前中廣

大下別有三種。一一切相。二真實義相。三無量相。今初界相不同。故云一切。小中含大。故云無量。麤細者明體質麤妙。謂應報等殊。亂住下。謂安立不同。亂則不依行伍。倒卽覆刹。正卽仰刹。若入若行。若去二意。一成前安立。二者順後。入卽攝他入己。去卽爲他所攝。行卽往來不已。故如帝網差別。卽真實義相。土土同體。不守自性。互相涉入。如帝珠網。故名真實。智皆明了者。辨能知也。謂真實義相。唯智能知故。廣大下。願德。一切下。分齊。

又發大願。願一切國土入一國土。一國土入一切國

土。無量佛土。普皆清淨。光明眾具以爲莊嚴。離一切煩惱。成就清淨道。無量智慧眾生。充滿其中。普入廣大諸佛境界。隨眾生心而爲示現。皆令歡喜。廣大如法界。究竟如虛空。盡未來際。一切劫數。無有休息。

七淨土願。願清淨自土。安立正法。及能修行眾生。故於行相中。總有七淨。一同體淨。以同法性。故令一多互相卽入。二普皆嚴淨者。卽自在淨。如摩尼珠。美惡斯現。淨穢圓通。故云普皆清淨。三光明眾具下。明莊嚴淨。卽相淨也。四離一切下。明受用淨。謂受用此土。離過成德故。五無量智慧下。住處眾

生淨。謂具德人居故。六普入下。因淨。謂鏡智淨識。及後智通慧爲依。故云是諸佛境界。七隨眾生下。果淨。卽臨機示現。末二句德能分齊。

又發大願。願與一切菩薩同一志行。無有怨嫉。集諸善根。一切菩薩平等一緣。常共集會。不相捨離。隨意能現種種佛身。任其自心。能知一切如來境界。威力智慧。得不退如意神通。遊行一切世界。現形一切眾會。普入一切生處。成就不思議大乘。修菩薩行。廣大如法界。究竟如虛空。盡未來際。一切劫數。無有休息。八不離願。願於一切眾生處。恆不離佛菩薩。得同

意行故。行相中有十二句。初一句總。後句結。中下別明菩薩行。前五修行同。後得不退下五。德用同。修菩薩行。結也。廣大下。德能分齊。

又發大願。願乘不退輪。行菩薩行。身語意業。悉不唐捐。若暫見者。則必定佛法。暫聞音聲。則得實智慧。纔生淨信。則永斷煩惱。得如大藥王樹身。得如如意寶身。修行一切菩薩行。廣大如法界。究竟如虛空。盡未來際。一切劫數。無有休息。

九利益願願於一切時。恆作利益眾生事。無有空過。故行相中二。先總明。謂乘念不退圓滿教輪。三

業皆益。若暫見下。別顯有二不空。一作業必定不空。三業能安樂故。謂見身行行。聞口說法。能生智慧。念意實德。諸惑不生。得如大藥王樹下。次利益不空。二喻皆喻救苦。樹拔病苦。寶拔貧苦。廣大下德能分齊。

又發大願。願於一切世界。成阿耨多羅三藐三菩提。不離一毛端處。於一切毛端處。皆悉示現初生。出家詣道場。成正覺。轉法輪。入涅槃。得佛境界。大智慧力。於念念中。隨一切眾生心。示現成佛。令得寂滅。以一三菩提。知一切法界。卽涅槃相。以一音說法。令一切

眾生心皆歡喜。示入大涅槃。而不斷菩薩行。示大智
慧地。安立一切法。以法智通。神足通。幻通。自在變化。
充滿一切法界。廣大如法界。究竟如虛空。盡未來際。
一切劫數。無有休息。

十成正覺。願與一切眾生同時得無上菩提。恆
作佛事故。行相中二。初成菩提體。卽自運已圓。次
不離一毛下。菩提作業。卽運他不息。今初。菩提亦
是總相。一切世界卽得菩提處。謂徧於十方同類
異類。一切諸刹。真則稱性。應則隨機。故無不在。後
菩提作業中有七種業。一從不離一毛至入涅槃。

是示成正覺業。一切毛端是成佛處。上云一切世界。乃平漫徧於十方。此徧法界中。一一毛端極小量處。皆於其中。八相成道。以彼皆有可化眾生故。二得佛境界下。說實諦業。謂說四真諦。令悟實故。三以一三菩提下。證教化業。以一極無二之菩提契差別之性。淨涅槃。則不復更滅。說此證法。令物生信。名教化業。四以一音下。種種說法業。一音稱機故。五示入下。不斷佛種業。涅槃常住。動寂無二。雙林應盡。增物悲戀。故云示入。既非永滅。常作佛事。故佛種不斷。此亦得果不捨因也。六示大智下。

法輪復住業。大智慧地。唯一事實。卽是佛智。能生萬物。終歸於此。故名爲地。示物同歸。而智慧門。隨機萬差。名安立一切。前卽涅槃能建大事。此卽於一佛乘。分別說三。對實施權。故名復住。七以法智下自在業。三種通卽自在所依。法智通者。觀一切法無性相故。神足通者。自身現生住滅。修短隨心自在故。幻通者。轉變外事。無不隨意故。廣大下彰德能分。上來別顯十願竟。

佛子。菩薩住歡喜地。發如是大誓願。如是大勇猛。如是大作用。

第三總結十願。

以此十願門爲首。滿足百萬阿僧祇大願。

第四以此下明攝眷屬。謂此十大願。一一願中有百千萬阿僧祇大願。以爲眷屬。則此十願。攝無不盡。如成正覺。則攝藥師十二上願。如淨土願。則攝彌陀四十八願等。上明十願。彰自勤行竟。

佛子。此大願以十盡句而得成就。何等爲十。所謂眾生界盡。世界盡。虛空界盡。法界盡。涅槃界盡。佛出現界盡。如來智界盡。心所緣界盡。佛智所入境。界盡。世間轉。法轉。智轉。界盡。若眾生界盡。我願乃盡。若世

界乃至世間轉法轉智轉界盡。我願乃盡。而眾生界不可盡。乃至世間轉法轉智轉界不可盡。故我此大願善根。無有窮盡。

二以十盡句與眾生共。謂前十願皆為眾生。由十無盡。成前大願皆無盡也。文分為二。初總標舉。後何等下。徵以別顯。於中先顯上十盡。有十句。眾生為總。餘九為別。皆集成度生義。故皆云盡者。無斷盡。故後若眾生界下。顯前大願成就中。先反顯。而眾生下。順明無盡所以。上校量勝中。初願勝。竟佛子。菩薩發如是大願已。則得利益心。柔軟心。隨順。

心。寂靜心。調伏心。寂滅心。謙下心。潤澤心。不動心。不
濁心。

第二佛子。下修行勝。卽行校量。有十種行。就文分
三。初明行所依心。二成淨信下。顯所成行相。三佛
子菩薩如是下。結十名體。今初。由先大願熏心故。
則得利益等。十心爲起行依。於後十行起作自在
故。十行分九。慈悲合故。

第二別顯行相。列有十門。一信行。二悲。三慈。四施。
五無疲厭。六知經論。七了世法。八慚愧莊嚴。九堅
固力。十供養佛。

成淨信者。有信功用。能信如來本行所入。信成就諸波羅蜜。信入諸勝地。信成就力。信具足無所畏。信生長不可壞。不共佛法。信不思議佛法。信出生無中邊佛境界。信隨入如來無量境界。信成就果。舉要言之。信一切菩薩行。乃至如來智地說力故。

初信行分二。初成淨二句。攝德成人。次能信下。正顯信相。有十一句。文分三別。初能信如來一句。總信因果。次信成就下九句。別明因果。九中初二句爲因。餘七爲果。舉要下一句。總信一切因果。

佛子。此菩薩復作是念。諸佛正法。如是甚深。如是寂

靜。如是寂滅。如是空。如是無相。如是無願。如是無染。如是無量。如是廣大。

第二雙辨慈悲二行中有二。先明三觀爲方便。後菩薩見諸眾生下。明所起之行。前中三觀卽爲三段。諸佛正法下九句。明遠離最上第一義樂觀。初總云佛法者。唯佛教證所能顯故。具下諸義所以甚深。別有九種甚深。今經闕論第九難得甚深。

而諸凡夫。心墮邪見。無明覆翳。立憍慢高幢。入渴愛網中。行詔誑稠林。不能自出。心與慳嫉相應。不捨恚造諸趣受生因緣。貪恚愚癡。積集諸業。日夜增長。以

忿恨風吹心識火熾然不息。凡所作業皆顛倒相應。欲流有流無明流見流相續起心意識種子。

第二具足諸苦觀約十二因緣明之。然十二因緣具業惑苦。今但云苦觀者業惑是苦因故。文分爲二。初明前際三支。後於三界田下顯中後九支。今初三支文有十句。初總餘別。總云邪見者迷彼實義。理外謬取。皆名邪見。通於業惑。非獨撥無因果。涅槃亦云。一切煩惱邪見攝盡。本在其中。云何言墮。此有二義。一約始起一分。名之爲墮。二約迷真隨妄。義說爲墮。後無明覆翳下。別有九種邪見。初

五無明。卽具五種邪見。次三是行。後一是識支。業及識種。亦名邪見者。邪見俱故。邪見引故。所以無明具多句者。一切煩惱皆能發潤而發業位。無明力增。故委明之。憍慢諂誑慳嫉俱如論釋。次三句明行支。初貪恚一句。集業邪見。次以忿恨風下二句。別明行支。初句吹心識火。熾然邪見。卽內心思業爲煩惱風動。次凡所作業。卽作業邪見。卽兼動身口。三欲流下。第九心意識邪見。明所引識支。

於三界田中。復生苦芽。所謂名色共生不離。此名色增長生六處聚落。於中相對生觸。觸故生受。因受生

愛。愛增長故生取。取增長故生有。

二明中後九支。文分三段。初於三界下至生有。明自相。言自相者。謂現在名色等支。體狀別故。次有生下。至長苦聚。明同相。言同相者。謂未來二支。亦同現在有名色等故。三是中下至如影像。明顛倒相。今初自相。言三界乃所生之處。復生苦芽。卽名色也。言共生不離者。謂與阿賴耶識共生不離也。攝論云。本識有三種相。一自相。謂本識自體。二因相。謂種子識。三果相。謂異熟識。以有三相共通因果。今言共生不離者。意謂本識以所持雜染種子。

爲因卽感名色爲異熟果。是則識支因相。一半在過去持餘雜染因。一半與後名色所依。故云共彼生。謂名色但從種子依識而生。不雜本識生也。故過去三支。唯有二支半。中後有九支半。如此方顯相續義也。名色增長成餘八支。非別有體。

有生故有生老死憂悲苦惱。如是眾生生長苦聚。

二同相。生及老死。正顯同相。言同相者。謂未來二支亦同現在有名色等。生死旣同。則苦亦同也。如是下。結前十二。前二支及半。爲能生長。後九支半。爲所生長。

是中皆空。離我我所。無知無覺。無作無受。如草木石壁。亦如影像。

三顛倒相中。言是中者。是前十二因緣中。皆空已下。明倒所以。由空謂有。所以名倒。以緣生無性。故空。離我我所。釋成空義。離我人空。離所法空。無知下。釋無我所以。知覺通外小。外道僧佉說覺以爲神相。衛世說知以爲神相。皆執神爲我。今無知覺。成上自體本無有我。若約小乘。就五蘊說受蘊名覺。三蘊名知。約六根說身識名覺。餘五名知。五陰造業。故云作者。當陰招報。故云受者。今並遣之。故

都云無。如草木下。喻無知覺義。

然諸眾生不覺不知。

第三彼二顛倒觀。妄苦本空。得而不覺。眞樂本有。失而不知。遠樂就苦。名彼顛倒。上三觀爲方便竟。

菩薩見諸眾生於如是苦聚。不得出離。是故卽生大悲智慧。復作是念。此諸眾生。我應救拔。置於究竟安樂之處。是故卽生大慈光明智。

第二正起慈悲。初明興悲。謂見苦應拔。次復作下興慈。謂無樂應興。旣言具苦。必不知樂故。十行

中上合二三慈悲行竟 下施行

佛子。菩薩摩訶薩隨順。如是大悲大慈。以深重心住。初地時。於一切物無所吝惜。求佛大智。修行大捨。

第四施行。於中三段。初總明施行。二別顯施物。三總結行成。今初文有五句。一明施所依。卽大慈悲。二以深重下彰其施位。以初地檀度得圓滿故。於一切下明施體相。求佛大智。顯施所爲。修行大捨。結施行名。

凡是所有。一切能施。所謂財穀倉庫金銀摩尼真珠。瑠璃珂貝璧玉珊瑚等物。珍寶瓔珞嚴身之具。象馬

車乘奴婢人民城邑聚落園林臺觀妻妾男女內外眷屬及餘所有珍玩之具。頭目手足血肉骨髓一切身分。皆無所惜。

二凡是所有下。別明施物。偏顯上文一切無吝。施有二種。一外施。謂財穀四事等。二內施。卽頭目等。爲求諸佛廣大智慧。是名菩薩住於初地。大捨成就。三爲求下。總結行成。先結所爲。是名下。正結行成。然初地行。應具三施。從增勝說。但舉於財。二三地中。方得無畏。四地已上。乃行法施。四施行竟。佛子。菩薩以此慈悲大施心。爲欲救護一切眾生。轉

更推求世出世間諸利益事。無疲厭故。卽得成就無疲厭心。

第五無疲厭行中有三。初牒前起後。次轉更下。正顯行相。三卽得下。結其行成。五無疲厭行竟。得無疲厭心已。於一切經論心無怯弱。無怯弱故。卽得成就一切經論智。

六成知經論智行。

獲是智已。善能籌量。應作不應作。於上中下一切眾生。隨應隨力。隨其所習。如是而行。是故菩薩得成世智。

七成就世智行。言隨應者。隨機所應。宜以何法。隨力者。隨己智力所能。隨他智力所堪。隨其所習者。約機現作。論釋隨宜。

成世智已。知時知量。以慚愧莊嚴。勤修自利利他之道。是故成就慚愧莊嚴。

八慚愧行。知時下。正顯行相。時有三種。一者念時。如是時中。宜修定等。刹那不間故。二日夜時。晝則存心。初中後夜。亦勿廢故。三所作必不斷時。此卽知量。則量力所能。亦愛亦策。勿令過分。後休廢故。以此之時。修前八科二利之行。煩惱睡蛇。晝夜不

雜。爲慚愧服而自莊嚴。八慚愧行。

於此行中。勤修出離。不退不轉。成堅固力。

第九成堅固力。謂此卽前慚愧。二利行中。欲早求度。應當精勤。不退自分。不轉勝進。九堅固力行。得堅固力已。勤供諸佛。於佛教法。能如說行。

第十供養行。利養供養。通二供養。

佛子。菩薩如是成就十種淨諸地法。所謂信悲慈捨。無有疲厭。知諸經論。善解世法。慚愧堅固力。供養諸佛。依教修行。

大文第三佛子下。結十名體用。先結體用。所謂下

結名。言體用者。此十卽是淨諸地法。以治十障故。障如前說。問前安住地分有三十句亦名信慈悲等。與此何異。論答云。前是清淨此地法。以局初地。今是盡淨諸地障故。此十種法於一切地能淨修治故。上第二修行勝依願造修竟。

大文第三果利益校量勝。卽位果。有四種果。一調柔果。二發趣果。三攝報果。四願智果。通稱果者。地中滿足故。別言調柔者。謂調鍊柔熟。以供養攝化等。爲能調鍊。信等十行爲所調鍊。由行供等。令信等調柔。隨意堪用。故名調柔。下鍊金喻其義甚顯。

二發趣者。發謂發進。趣謂趣向。發自此地。趣向後後。爲所發趣。下商人喻。義甚相似。三攝報果者。王位之身。酬因名報。因成納果。故名爲攝。四內證願力教智自在。令業用無邊。故名願智果。發趣文局初地。義通十地。餘三義局初地。文通十地。

佛子。菩薩住此歡喜地。已以大願力得見多佛。所謂見多百佛。多千佛。多百千佛。多億佛。多百億佛。多千億佛。多百千億佛。多億那由他佛。多百億那由他佛。多千億那由他佛。多百千億那由他佛。

第五四果卽爲四別。今初調柔果。文有法喻合。法

中四者。一見佛爲鍊行緣。二悉以下所鍊行體。三以前二下。別地行相。四是菩薩隨所下。鍊行成熟。初中以大願力。是見佛因。力兼神力。故論云。以勝通力。見色身佛。以正願力。見法身佛。卽功德法身。言多百者。是多箇百。多箇千。然一中已攝於多。理實入華藏刹海。見法界身雲也。

悉以大心深心。恭敬尊重。承事供養。衣服飲食臥具醫藥。一切資生。悉以奉施。亦以供養一切眾僧。以此善根。皆悉迴向無上菩提。佛子。此菩薩因供養諸佛。故得成就眾生法。

二所鍊行體中。以行入行。故名爲鍊。如金入火。然有三種入。一入功德。卽供佛行。去薄福垢。二以此善根下入。無上果。卽迴向行。去下劣垢。三佛子此菩薩下入大悲心。卽利生行。去懈怠垢。

以前二攝攝取眾生。謂布施愛語。後二攝法。但以信解力故行。未善通達。是菩薩十波羅蜜中。檀波羅蜜增上。餘波羅蜜非不修行。但隨力隨分。

三別地行相中。先約四攝。然四攝望前。猶是利生法。望後爲別地行相。以因利生之便。故此明之。愛語是法施。初地檀滿。故說二增。爲別地證相。各說

一增。以十地難分。故寄十度以顯差別。其實地地具修。稱性圓融。一具一切。

是菩薩隨所勤修。供養諸佛。教化眾生。皆以修行清淨地法。所有善根。悉以迴向一切智地。轉轉明淨。調柔成就。隨意堪用。

四所鍊行成熟中。總收三入。初牒供佛化生以爲能鍊。信等淨法以爲所鍊。後舉前迴向能鍊。信等淨也。言轉轉者。此之信等於初地中三節。淨謂初住地時。證前緣修。令成眞修。已是一淨。二行校量中。對除障法。復一度淨。今此地後。更歷三修。故云

轉轉。

佛子。譬如金師善巧鍊金。數數入火。轉轉明淨。調柔成就。隨意堪用。

第二喻中。金師喻菩薩。金喻信等。火喻供等。三行。三行非一名數。數入。調柔成就。喻鍊行成就。信等眾行。未證真前。但約緣修。爲對治行。妄識爲體。證真之後。乃知信等非是。今有卽如來藏中恆沙佛法。真心爲體。今已證真。寄相顯真。故分能所。

菩薩亦復如是。供養諸佛。教化眾生。皆爲修行清淨地法。所有善根。悉以迴向一切智地。轉轉明淨。調柔

成就。隨意堪用。

第三法合。準喻可知。

佛子。菩薩摩訶薩。住於初地。應從諸佛菩薩善知識。所推求。請問於此地中。相及得果。無有厭足。爲欲成就。此地法故。亦應從諸佛菩薩善知識。所推求。請問第二地中。相及得果。無有厭足。爲欲成就。彼地法故。亦應如是推求。請問第三。第四。第五。第六。第七。第八。第九。第十地中。相及得果。無有厭足。爲欲成就。彼地法故。

第二發趣果中。二。初。正明發趣果。後佛子是名下。

總結地相。前中有四。一法。二喻。三合。四結。法中亦四。一問。二知。三行。四到。知是明解。正能發趣。然由問故知。所以先問。知意在行。行必能到。初地已滿。而更問者。一問勝進。二問一地之中。具攝一切諸地功德。故問中相及得果者。相卽隨諸地中所有諸障。及對治相。故謂諸地能所觀相。得者卽正證出世間智。故果者。因證智力。得世間出世間智。故相卽方便智。得是根本智。果卽後得。後得緣俗。故名世間。無分別。故復名出世。

是菩薩善知諸地障對治。善知地成壞。善知地相果。

善知地得修。善知地法清淨。善知地地轉行。善知地地處非處。善知地地殊勝智。善知地地不退轉。善知淨治一切菩薩地。乃至轉入如來地。

第二明知。由問故知。知不異問故。

佛子。菩薩如是善知地相。始於初地。起行不斷。如是乃至入第十地。無有斷絕。由此諸地。智光明故。成於如來智慧光明。

第三佛子下行。第四由此下。到並可知。

佛子。譬如商主。善知方便。欲將諸商人。往詣大城。未發之時。先問道中功德過失。及住止之處。安危可不。

然後具道資糧。作所應作。佛子。彼大商主。雖未發足。能知道中。所有一切安危之事。善以智慧籌量觀察。備其所須。令無乏少。將諸商眾。乃至安隱到彼大城。身及眾人。悉免憂患。

第二喻中。初喻前問有二方便。一不迷方便。道中喻行因。住止喻得地。各有障治。故曰安危。二資具方便。具資糧故。不迷多約利他。資具多明自利。次佛子。彼大商主下。喻知善以智慧下。喻行。四乃至下。喻到。

佛子。菩薩商主。亦復如是。住於初地。善知諸地障對。

治乃至善。知一切菩薩地清淨。轉入如來地。然後乃具福智資糧。將一切眾生。經生死曠野險難之處。安隱得至薩婆若城。身及眾生。不經患難。

第三合中。初合知。然後下。合行安隱下。合到喻中略行。合中略問。欲影顯耳。

是故菩薩常應匪懈。勤修諸地殊勝淨業。乃至趣入如來智地。

第四結勸可知。

佛子。是名略說菩薩摩訶薩。入菩薩初地門。廣說則有無量無邊百千阿僧祇差別事。

第二佛子下。總結地相。行修已竟。故於此結。前說分齊深故。說其一分。此中廣故。說所不盡。

佛子。菩薩摩訶薩住此初地。多作閻浮提王。豪貴自在。常護正法。

大文第三攝報果利益勝中分二。先明在家果。後是菩薩若欲下出家果。前中復二。初上勝身顯其報勝。後能以大施下。明上勝果。今初。閻浮提王者。卽鐵輪王。常護正法。應是行勝。

能以大施攝取眾生。善除眾生慳貪之垢。常行大施。無有窮盡。布施愛語。利行同事。

二上勝果者。依前王報起於勝行。是身之果。於中
二初行。後願前中亦二。一大悲利他。謂若施若攝。
如是一切諸所作業。皆不離念佛。不離念法。不離念
僧。不離念同行菩薩。不離念菩薩行。不離念諸波羅
蜜。不離念諸地。不離念力。不離念無畏。不離念不共
佛法。乃至不離念具足一切種一切智智。

二不失自利。正作利他業時。卽不離念佛等故。謂
利他事中。迴向菩提故。成大功德事。不生分別故。
除諸妄想。順理合體故。云不離。

復作是念。我當於一切眾生中。爲首。爲勝。爲殊勝。爲

妙。爲微妙爲上。爲無上。爲導。爲將。爲帥。乃至爲一切智智依止者。

二復作下。明願。有十一句。前七自德。後四攝化。首唯是總。謂大菩提。位尊高故。妙等唯別。勝大亦總。亦別。導。謂分別法義。將者。令他得證義。滅諸煩惱。故。後二約智。前因後果。帥者。教令入正道故。後句以大菩提而教化故。

是菩薩若欲捨家。於佛法中。勤行精進。便能捨家。妻子五欲。依如來教。出家學道。既出家已。勤行精進。於一念頃。得百三昧。得見百佛。知百佛神力。能動百佛。

世界。能過百佛世界。能照百佛世界。能教化百世界。眾生。能住壽百劫。能知前後際各百劫事。能入百法門。能示現百身。於一一身。能示百菩薩以爲眷屬。

第二出家果中。初捨俗出家。後既出已。下修行剋證禪定勝業。勝業有二。一者三昧勝。卽勝定體。二三昧所作勝。謂因三昧得見佛等。文有十一句。明其二利。初二句自利。一見百佛者。十方各十他受用身。二知神力。取其所加。次四句利他。初一有信機者。動刹現通。次三有悟機者。往刹光照。正授以法。次有二句。豎論二利。一攝生。二照物。後三句二

第二應頌四十六偈半。大段分二。初正頌前。次二結說。前中分四。初十一偈頌住分。又四。初二頌依何身。

淨一切智力	及以無所畏	成就諸佛法
救攝羣生眾	爲得大慈悲	及轉勝法輪
嚴淨佛國土	發此最勝心	一念知三世
而無有分別	種種時不同	以示於世間
略說求諸佛	一切勝功德	發生廣大心
量等虛空界		

次四偈。頌爲何義。

悲先慧爲主 方便共相應 信解清淨心

如來無量力 無礙智現前 自悟不由他

具足同如來 發此最勝心

次二偈。頌以何因。

佛子始發生 如是妙寶心 則超凡夫位

入佛所行處 生在如來家 種族無瑕玷

與佛共平等 決成無上覺 纔生如是心

卽得入初地 志樂不可動 譬如大山王

後三偈。頌有何相。

多喜多愛樂 亦復多淨信 極大勇猛心

華嚴經疏卷三十四
一五
及以慶躍心 遠離於鬪諍 惱害及瞋恚
慚敬而質直 善守護諸根 救世無等者
所有眾智慧

第二五偈。頌釋名分。先二偈半頌喜相。

此處我當得 憶念生歡喜

餘頌喜因。於中先半偈頌念當得。

始得入初地 卽超五怖畏 不活死惡名
惡趣眾威德 以不貪著我 及以與我所
是諸佛子等 遠離諸怖畏

第二偈頌念現得。

常行大慈愍 恆有信恭敬 慚愧功德備
日夜增善法 樂法真實利 不愛受諸欲
三有六偈。頌安住地分。初一偈半。頌信心成就。
思惟所聞法 遠離取著行 不貪於利養
唯樂佛菩提 一心求佛智 專精無異念
次一偈半。頌修行成就。

修行波羅蜜 遠離諂虛誑 如說而修行
安住實語中 不汙諸佛家 不捨菩薩戒
不樂於世事 常利益世間 修善無厭足
轉求增勝道 如是好樂法 功德義相應

後三偈頌迴向成就。

恆起大願心 願見於諸佛 護持諸佛法

攝取大仙道 常生如是願 修行最勝行

成熟諸羣生 嚴淨佛國土 一切諸佛刹

佛子悉充滿 平等共一心 所作皆不空

一切毛端處 一時成正覺 如是等大願

無量無邊際 虛空與眾生 法界及涅槃

世間佛出興 佛智心境界 如來智所入

及以三轉盡 彼諸若有盡 我願方始盡

如彼無盡期 我願亦復然

第四恆起下二十二偈半。頌校量勝分。於中三。初六偈半頌願校量。

如是發大願	心柔軟調順	能信佛功德
觀察於眾生	知從因緣起	則興慈念心
如是苦眾生	我今應救脫	爲是眾生故
而行種種施	王位及珍寶	乃至象馬車
頭目與手足	乃至身血肉	一切皆能捨
心得無憂悔	求種種經書	其心無厭倦
善解其義趣	能隨世所行	慚愧自莊嚴
修行轉堅固	供養無量佛	恭敬而尊重

次六偈頌行校量。

如是常修習 日夜無懈倦 善根轉明淨

如火鍊真金 菩薩住於此 淨修於十地

所作無障礙 具足不斷絕

後十偈頌果校量。初二偈頌調柔果。

譬如大商主 爲利諸商眾 問知道險易

安隱至大城 菩薩住初地 應知亦如是

勇猛無障礙 到於第十地

次二偈頌發趣果。

住此初地中 作大功德王 以法化眾生

慈心無損害 統領閻浮地 化行靡不及
皆令住大捨 成就佛智慧 欲求最勝道
捨己國王位 能於佛教中 勇猛勤修習
則得百三昧 及見百諸佛 震動百世界
光照行亦爾 化百土眾生 入於百法門
能知百劫事 示現於百身 及現百菩薩
以爲其眷屬

次五偈頌攝報果。

若自在願力 過是數無量

後半偈頌願智果。

我於地義中 略述其少分 若欲廣分別

億劫不能盡 菩薩最勝道 利益諸羣生

如是初地法 我今已說竟

二偈結說 初歡喜地竟

大方廣佛華嚴經綱要卷第三十四

大方廣佛華嚴經綱要卷第三十五

唐于闐國三藏沙門實叉難陀譯經

唐清涼山大華嚴寺沙門澄觀疏義

明匡山法雲寺慈山沙門德清提挈

十地品第二十六之二

第二離垢地。所以來者。論云。如是已證正位。依出世間道。因清淨戒。說第二菩薩離垢地。言正位者。卽初地見道。是出世間。依此修於三學。戒最在初。前地雖證真有戒。未無誤犯。又以十度寄明地位。前施此戒。故次明之。下八準此。言離垢者。慈氏云。

由極遠離犯戒垢故。謂性戒成就。非如初地思擇護戒。亦名增上戒佳。此地斷邪行障。證最勝真如。言邪行障者。謂所知障中俱生一分。及彼所起誤犯三業能障二地。由斯二地說斷二愚及彼麤重一微細誤犯愚。卽上俱生一分。此能起業。二種種業趣愚。卽彼所起誤犯三業。言最勝真如者。謂此真如具無邊德。於一切法最爲勝故。此亦由翻破戒之失爲無邊德。以成於戒得最勝故。

諸菩薩聞此 最勝微妙地 其心盡清淨
一切皆歡喜 皆從於座起 踊住虛空中

普散上妙華 同時共稱讚

次正釋文分三分。初讚請分。二正說分。三重頌分。今初五頌分二。初三慶聞初地。二請說二地。今初。前二經家敘其三業慶喜。

善哉金剛藏 大智無畏者 善說於此地
菩薩所行法

後一發言申讚。領前請後。

解脫月菩薩 知眾心清淨 樂聞第二地
所有諸行相 卽請金剛藏 大慧願演說
佛子皆樂聞 所住第二地

後二初序。後請。

爾時金剛藏菩薩告解脫月菩薩言。佛子。菩薩摩訶薩已修初地。欲入第二地。當起十種深心。

第二正說分中。先明地相。後彰地果。前中分二。一發起淨。卽是入地心。二佛子菩薩住離垢下。卽住地心。三聚無誤。地中正行。名自體淨。直心起彼。名發起淨。初中有三。謂標列結。今初標也。深心者。深契理事。故標深列。直義一名異。言直心者。則令自體淨。中性戒成就。性戒有二。一久積成性。二眞如性中無破戒垢。今稱如持。使得性成。故云成就。

何等爲十。所謂正直心。柔軟心。堪能心。調伏心。寂靜心。純善心。不雜心。無顧戀心。廣心。大心。

二徵列中有十句。初句爲總。餘九爲別。別中前四律儀。次三攝善。後二饒益有情。

菩薩以此十心得入第二離垢地。

第三結行入位。由上十心。成就上品極圓滿故。入斯戒住。以此十心爲發起淨。下文第二自體淨中。明三聚淨戒。卽分爲三。初攝律儀戒。二攝善法戒。三攝眾生戒。此三聚戒。攝前三位。初攝治地住。次攝饒益行。思彼眾生墮惡等故。後攝不壞迴向。謂

有智願等於法寶等皆不壞故。律儀通於止作。攝善唯約善行。此二自利。後一唯約利他。

佛子。菩薩住離垢地。

今初律儀分三。初標所依。謂離垢地。戒增上故。

性自遠離一切殺生。不畜刀杖。不懷怨恨。有慚有愧。仁恕具足。於一切眾生有命之者。常生利益慈念之心。是菩薩尚不惡心惱諸眾生。何況於他起眾生想。故以重意而行殺害。

二正顯戒相。中有十善業道。卽爲十段。今初離殺分二。初總明。次不畜下。別顯。今初性自遠離。文屬

殺生。義該下九。謂自性成就十善業道。卽自性戒。然離有三種。一要期離。謂諸凡夫。二方便離。所謂二乘。三自體離。謂諸菩薩契窮實性。自體無染。然離亦有四。地前離。現行。登地離。種子。除誤犯。顯性淨。正當二地。次別顯。中有三種離。一因離。謂離殺。因緣。二於一切下。對治離。謂離殺法。三是菩薩下。果行離。卽離殺業。今正不殺。故名果離。

性不偷盜。菩薩於自資財。常知止足。於他慈恕。不欲侵損。若物屬他。起他物想。終不於此而生盜心。乃至草葉。不與不取。何況其餘資生之具。

第二離盜。初句總。非理損財。不與而取。故名爲盜。別中亦三。一因離。二於他下。對治離。三若物下。果行離。因中止。謂少欲。足。謂自足。自之所有。尙生止足。故無盜因。

性不邪淫。菩薩於自妻知足。不求他妻。於他妻妾。他所護女。親族媒定。及爲法所護。尙不生於貪染之心。何況從事。况於非道。

第三離邪淫。乖理曰邪。深愛曰淫。別中亦三。一因離。謂自妻知足。此亦二意。一內心知足。離於起因。二自足妻色。離受畜因故。此由寄報輪王。相同世。

間。故得示有妻妾耳。二對治離。謂不求他妻。現在
梵行淨故。不求未來妻色。他人之妻。蓋不在言。三
於他妻下。明果行離。亦有麤細。細約起心。麤約從
事。

性不妄語。菩薩常作實語。真語時語。乃至夢中。亦不
忍作覆藏之語。無心欲作。何況故犯。

第四離妄語。違想背心。名之爲妄。別中分二。初對
治離。次乃至下。果行離。今初對治。卽是因離。不別
明因。有二義故。一無外事。謂無刀杖妻財之外事
故。無受畜因。二無異因故。謂但用誑他思心。卽妄

語因。無別貪等以爲異因。異因卽起因故。離彼誑心。卽誠實語。實語卽是誑心對治故。對治離卽是因離。不同身三各具三離。口四唯二。意三唯一。

性不兩舌。菩薩於諸眾生。無離間心。無惱害心。不將此語爲破彼故。而向彼說。不將彼語爲破此故。而向此說。未破者不令破。已破者不增長。不喜離間。不樂離間。不作離間語。不說離間語。若實若不實。

第五言不乖離。名離兩舌。兩舌事成。能令離間。別中亦二。初對治離。後未破下。果行離。對治離者。謂不破壞行。此唯約心。果行離者。通心及事。卽是差

別。

性不惡口。所謂毒害語。麤獷語。苦他語。令他瞋恨語。現前語。不現前語。鄙惡語。庸賤語。不可樂聞語。聞者不悅語。瞋忿語。如火燒心語。怨結語。熱惱語。不可愛語。不可樂語。能壞自身他身語。如是等語。皆悉捨離。常作潤澤語。柔軟語。悅意語。可樂聞語。聞者喜悅語。善入人心語。風雅典則語。多人愛樂語。多人悅樂語。身心踊悅語。

第六言不麤鄙。名離惡口。別中分二。初果行離。後常作下。對治離。前後諸業。治望果行。非全次第。故

先顯治。後能離果。今此先明果行中。先明所離。後明能離。初中有十七語。句各一義。前四總顯惡言體用。後十三語。重顯前四。疏有多義。

性不綺語。菩薩常樂思審語。時語。實語。義語。法語。順道理語。巧調伏語。隨時籌量決定語。是菩薩乃至戲笑。尙恆思審。何況故出散亂之言。

第七言辭不正。故云綺語。其猶綺文。總離可知。別中亦二。先對治。後果行。前中八語。初一爲總。故下結云戲笑尙恆思審。是以菩薩常樂三思而後言。則無散亂矣。下七語別。時之一字。亦總亦別。總者

上言思審者。思合其時。語默得中也。別者下七種語。皆明其時。略有三義。一教化時。謂稱適其機。二教授時。卽實義法三種語。三教誡時。卽順道理等三種語。卽律中五義。一制。謂有罪者治。二聽。謂無罪者聽。三舉。謂有過者舉。四折伏。謂折攝合宜。故云巧調伏。五合喜。謂有實德者稱揚令喜。故云決定。隨時籌量者。若制若聽。若舉若折。皆須適時。故總結之。一是菩薩下。果行離中。亦以輕沉重。

性不貪欲。菩薩於他財物。他所資用。不生貪心。不願不求。

第八離貪。此下意三。但有對治者。以貪等是業有之本。更無所依。故非果行。非果則不可更立異因。故但有其一。今初離貪。謂離求欲心。別中有三。一於他財物是事。二他所資用是體。三不生貪等明差別。初始欲名求。次希得屬己爲願。

性離瞋恚。菩薩於一切眾生。恆起慈心。利益心。哀愍心。歡喜心。和潤心。攝受心。永捨瞋恨。怨害。熱惱。常思順行仁慈。祐益。

第九離於忿怒含毒。故云離瞋。別中有三。一別顯能治。二永捨下。總顯所治。三常思下。類通治益。別

中六種心論攝爲五。一於怨生慈心治。二於惡行
生利益心治。三於貧苦生哀愍歡喜心治。四於樂
眾生和潤心論名利潤。治彼染著無利潤故。五
於發菩提心人起攝受心。攝令成故。

又離邪見。菩薩住於正道。不行占卜。不取惡戒。心見
正直。無誑無諂。於佛法僧起決定信。

第十離於乖理推求。不言性離者。蓋文略耳。別中
治七種邪見。一住正道者。治異乘見。小乘對大。非
正道故。二不行占卜。治虛妄分別見。卽是邪見。夫
吉凶悔吝。由愛惡生。故云邪見。三不取惡戒。治於

戒取。四心見正直。治於見取。五無誑者。治覆藏見。六無諂。治詐現不實見。七於佛法下。治非清淨見。佛子。菩薩摩訶薩如是護持十善業道。常無間斷。

第三佛子下。結成增上戒。上攝律儀竟。

復作是念。一切眾生墮惡趣者。莫不皆以十不善業。第二復作是念下。攝善法戒。謂非唯律儀不闕不。斷常攝善法。亦無斷闕。文中分三。初略觀不善起。攝善行。次佛子下。廣觀障治起攝善行。三如是方便下。總結勸修。今初分二。先明觀智。後是故下。明起願行。且初。

是故我當自修正行。亦勸於他令修正行。何以故。若自不能修行正行。令他修者。無有是處。

後起願行者。由念眾生惡因果故。便起大悲修二利行。

佛子。此菩薩摩訶薩。復作是念。十不善業道。是地獄畜生餓鬼受生因。

第二廣觀障治。起攝善法中。謂觀五重善法。謂人天聲聞緣覺菩薩佛也。意於上上清淨佛善。起增上心。求學修行攝善法戒清淨行故。今先觀不善十善業道。是人天乃至有頂處受生因。

後攝觀十善。具諸法門。然通相而辨。善皆能治。以順理益物。正反惡故。又有五重。今初人天十善。

又此上品十善業道。以智慧修習。心狹劣故。怖三界故。闕大悲故。從他聞聲而解了故。成聲聞乘。

第二辨三乘善。各有三段。今初聲聞乘善。初標所修善。次以智慧下。顯所用功異。三成聲聞乘。結成自乘。

又此上品十善業道。修治清淨。不從他教。自覺悟故。大悲方便不具足故。悟解甚深。因緣法故。成獨覺乘。第三緣覺善。所用異中。初句總明。以能修習名修。

清淨。未能圓修。不名具足。方便。謂教法。以緣覺出世。無九部法故。

又此上品十善業道。修治清淨。心廣無量故。具足悲愍故。方便所攝故。發生大願故。不捨眾生故。希求諸佛大智故。淨治菩薩諸地故。淨修一切諸度故。成菩薩廣大行。

第四菩薩十善所用異中。修治清淨。是自利。心廣是利他。無量卽大乘心。是二利行體。具足悲愍。是菩薩用。方便所攝。卽四攝攝生。是彼悲力。略舉三地。一發生大願。卽淨深心。當初地。二不捨眾生。卽

不退轉地。雖得寂滅。不捨眾生。卽八地。三希求佛智等。卽受大位地。卽當第十地。

又此上上十善業道。一切種清淨故。乃至證十力四無畏故。一切佛法。皆得成就是故。我今等行十善。應令一切具足清淨。

第五佛善。上上是總。一切下別。有四種義。顯上上事。前三屬佛。後一菩薩思齊。一切智中自在純熟。方名具足。亦滅習氣。故云清淨。

如是方便。菩薩當學。

結勸可知。

佛子。此菩薩摩訶薩。又作是念。十不善業道。上者地獄因。中者畜生因。下者餓鬼因。

第三十不善業道下。利益眾生戒。長文分二。初廣明攝生。後如是護持於戒下。結成益生之戒。前中顯此戒增上有五種義。一智。二願。三行。四集。五集果。今初言智者。謂善知眾生苦因果故。文分爲三。初總明知因。二於中下。別顯知果。三佛子下。結成苦因。今初總中。果有三塗不同。因有三時階降。論名時差別。疏有多義。

於中。殺生之罪。能令眾生墮於地獄畜生餓鬼。若生

人中得二種果報。一者短命。二者多病。

二別顯知果十。初殺生中。殺令夭折。不終天年。故得短命。卽正惡等流。二未死受苦。故獲多病。卽方便等流。怖無精光。感外增上資具等物。乏少光澤。偷盜之罪。亦令眾生墮三惡道。若生人中。得二種果報。一者貧窮。二者共財不得自在。

二盜損彼財。故獲貧窮。令其不得稱意受用。故共財不得自在。感外田苗霜雹損耗。

邪淫之罪。亦令眾生墮三惡道。若生人中。得二種果報。一者妻不貞良。二者不得隨意眷屬。

三姪中。令其妻不貞。良方便詿誘故。姪之穢污。感外臭惡塵空。

妄語之罪。亦令眾生墮三惡道。若生人中。得二種果報。一者多被誹謗。二者爲他所誑。

四妄語等流。又誹謗約違境。被誑約違心。言無實故。

兩舌之罪。亦令眾生墮三惡道。若生人中。得二種果報。一者眷屬乖離。二者親族弊惡。

五兩舌中。令他離間。親友成怨故。

惡口之罪。亦令眾生墮三惡道。若生人中。得二種果

報。一者常聞惡聲。二者言多諍訟。

六惡口中。語體惡故。語用惡故。言恆有諍。違惱他人。

綺語之罪。亦令眾生墮三惡道。若生人中。得二種果報。一者言無人受。二者語不明了。

七綺語。言無人受。機不領故。語不明了。自綺錯故。貪欲之罪。亦令眾生墮三惡道。若生人中。得二種果報。一者心不知足。二者多欲無厭。

八貪欲中。已得不足故。未得欲求故。

瞋恚之罪。亦令眾生墮三惡道。若生人中。得二種果

報。一者常被他人求其長短。二者恆被於他之所惱害。

九瞋恚中。二種等流。似前輕後重。見其不可意故。求其長短。二惱害彼故。

邪見之罪。亦令眾生墮三惡道。若生人中。得二種果報。一者生邪見家。二者其心諂曲。

十邪見。還生邪見之家。心見不正。故多諂曲。

佛子。十不善業道。能生此等無量無邊眾大苦聚。

三結成苦因。無邊苦聚。由此生故。

是故菩薩作如是念。我當遠離十不善道。以十善道

法苑珠林卷三十一
三十一
爲法園苑。愛樂安住。

第二是菩薩下。明願。依智起願。願爲眾生。自修善故。但離惡因。惡果自亡。願修善因。善果自至。

自住其中。亦勸他人令住其中。

第三自住下。明行。依願起行。如誓修故。於中初依前願以起自行。後亦勸下。依於自行正攝眾生。

佛子。此菩薩摩訶薩復於一切眾生。生利益心。安樂心。慈心。悲心。憐愍心。攝受心。守護心。自己心。師心。大
師心。

第四佛子下。明集者。依增上悲。念眾生故。生十種

心。謂依前攝善。起悲攝生。名戒增上。今依上悲。欲拔眾生。悲心能起利眾生事。故名爲集。集者益物之心。就中別相爲八種眾生。一於惡行眾生。令住善行。故名利益。二爲苦眾生。令得安樂。三於冤憎眾生。慈不加報。四於貧苦者。悲欲拔之。五於樂眾生。愍其放逸。六於外道。攝令正信。七於同行者。護令不退。八於攝一切菩提願眾生。取如自己。九觀彼眾生。乘大乘道進趣之者。敬之如師。十觀集具足功德者。敬如大師。後三通攝爲一菩提。故唯有八。

第五作是念下。集果。依前悲心起勝上欲。欲拔濟故。約前拔濟。通有四種眾生。一化顛倒眾生。二化欲求眾生。三化有求眾生。四化梵行求眾生。文中爲十類。初有一類。二有五類。三有二類。四有二類。皆言又作是念。文各有二。先觀所化。次我當下。與拔濟心。前卽所治。後卽能治。今十類生。一一生所容。有如前十心拔濟。十中初一解邪。餘九行邪。且初。

作是念言。眾生可愍。墮於邪見。惡慧惡欲。惡道稠林。我應令彼住於正見。行真實道。

第一化顛倒眾生。先所化中。邪見爲總。謂四顛倒。理外推求。故名邪見。常樂二倒。名爲惡慧。我淨二倒。名爲惡欲。惡道稠林者。結其邪見爲諸過。因上爲所治。後能治。住於正見。翻上邪見。眞實道。翻上惡道稠林。

又作是念。一切眾生分別彼我。互相破壞。鬪諍瞋恨。熾然不息。我當令彼住於無上大慈之中。

第二化欲求眾生中有五類。分二。初三化現得五欲。受用生過。後二化未得五欲。追求時過。前中卽分三段。一受用不共財。二受無厭足財。三受貯積

財。今初。已得之物。不與他共。於費用時。生瞋過也。先明所治。互相破壞有二。一鬪諍於言中。二分別彼我。乃對寃於心中。瞋恨已下。結其增長。由瞋恨故。思念作報。身心惡行。熾然不息。能治中。以慈治瞋。如來之慈。乃名無上。

又作是念。一切眾生。貪取無厭。唯求財利。邪命自活。我當令彼住於清淨身語意業正命法中。

二化無厭財眾生。求時無厭。以生貪過。初所治中。有二。一貪取無厭。明內心難滿。二唯求財利者。形於身口。邪命自活。結上三業。次三業正命以爲能。

治。

又作是念。一切眾生常隨三毒。種種煩惱。因之熾然。不解志求出要方便。我當令彼除滅。一切煩惱大火。安置清涼涅槃之處。

三化受貯積財眾生積而不散。順生三毒增煩惱。過初治中染著生貪。散用生瞋。癡迷上二。言種種煩惱。因之熾然者。謂寶玩受用。數爲煩惱之所燒。故癡迷於此。無求出意。故云不知出要。能治中涅槃清涼。煩惱火滅故。

又作是念。一切眾生爲愚癡重闇妄見厚膜之所覆

故入陰翳稠林。失智慧光明。行曠野險道。起諸惡見。我當令彼得無障礙清淨智眼。知一切法如實相。不隨他教。

次二有二願。化未得五欲進求時過。卽造業眾生。分二。初一明追求現報造諸惡行。後一明追求後報。造有漏善因。今初。先所治中有四種過。一愚癡覆心過。二入陰翳下。增惡遠善過。三行曠野險道。明受苦報過。四起惡見者。卽無正對治過。後能治中。先得淨慧眼。以所見如實。故不隨他教。

又作是念。一切眾生。在於生死險道之中。將墮地獄。

畜生餓鬼。入惡見網中。爲愚癡稠林所迷。隨逐邪道。行顛倒行。譬如盲人。無有導師。非出要道。謂爲出要。入魔境界。惡賊所攝。隨順魔心。遠離佛意。我當拔出。如是險難。令住無畏。一切智城。

二化追求後報。習有漏善。隨順險道。過謂以迷。出世勝義。愚造福不動業。求未來報。則常在險道前。所治中文有十句。分三。初生死卽自體。人天報危。故名險道。二將墮下。險道中事。文有八句。迷於苦集滅道。如次各二。初將墮明有苦。二入惡見網。正明迷苦。三爲愚下。迷於集因。隨逐下。明其造集。如

三身經卷之三十一
十一
盲下顯無道體。無有導師。明闕道緣。正明迷道。非
出要道下。正迷於滅。入魔一句。顯有滅障。謂入六
塵如惡賊劫。隨順下二句。明失。次能治中。拔出險
道。總離前惡。住無畏城。是離惡處。上化欲求眾
生竟。

又作是念。一切眾生。爲大瀑水波浪所沒。入欲流。有
流。無明流。見流。生死洄復。愛河漂轉。湍馳奔激。不暇
觀察。爲欲覺。恚覺。害覺。隨逐不捨。身見羅刹。於中執
取。將其永入愛欲稠林。於所貪愛。深生染著。住我慢
原阜。安六處聚落。無善救者。無能度者。我當於彼起

大悲心。以諸善根而爲救濟。令無災患。離染寂靜。住於一切智慧寶洲。

第三化有求眾生有二段。初一道差別。五趣流轉。後一界差別。三界繫閉。今初先過後治。過中初句爲總。入欲下別。總卽沒在大河過。請六道漂溺。如彼大河。求有沒中。所以是過。次入欲流下。別顯。大瀑水波浪有三種相。一自體漂流卽五趣因果。二身見下。爲因起難。謂處之多害。三安六處下。便成大失。失出離道。今初自體有五種相。一深。二流。三名。四漂。五廣。一深者。具足四流無量水故。爲煩惱。

河。二生死洄復者。流也。上總四流煩惱因深。故此苦果常流不竭。上二卽漂溺處。於此生死而漂溺。故三愛河漂轉者。名也。前明四流雖無惑不攝。愛潤生死。此由漂溺。徧受河名。四湍馳等者。漂也。此有二義。一顯河急。故云湍馳奔激。謂雖實愛身。欲令長久。而念念不住。是漂溺時。二由急。故不能如實知其過失。亦復不見涅槃彼岸。故云不暇觀察。五爲欲覺等隨逐者。廣也。謂隨欲等覺徧覺五塵。故名爲廣。依此漂溺。第二起難有四。一者執。執著我我所窟宅。不能動發。故云身見羅刹。於中執取。

言於中者於陰窟之中。執取之言亦含戒取。二將
其下轉還。謂先捨欲已。得生上界。由身見執。還生
下界。欲念之中。若準涅槃。愛見皆爲羅刹。三於所
貪下。中著。謂於受用時。求欲等樂著故。四住我慢
原阜者。增慢。謂於受用事時中。我慢。大慢。憍慢。自
高輕彼故慢。合心高故。喻原阜。三明大失有三。一
善道無出意失。此無善因。安六處聚落故。二惡道
無救失。此無救緣。三無能度者異處去失。謂離自
善行生諸難處。不值佛故。此雙闕因緣。通善惡道。
後能治中。初起化心。次以諸下。成化行。化行有六。

一與善因。謂六度萬行以爲船筏。二作救緣。三令無苦患。四令離集染。五證涅槃寂靜。六令得菩提大智。皆翻上思之。

又作是念。一切眾生處世牢獄。多諸苦惱。常懷愛憎。自生憂怖。貪欲重械之所繫縛。無明稠林以爲覆障。於三界內。莫能自出。我當令彼永離三有。住無障礙大涅槃中。

第二明界差別。先過後治。過中初句爲總。三界繫縛。猶如牢獄。求有處之。所以爲過。次多諸下。別明世獄有五過。隨逐。一苦事。卽種種諸苦。二財盡。謂

愛資生。求之不得。憎貧窮。遠之不能。三愛離。謂親愛別離。常生憂怖。四有縛。謂雖生上界。還爲貪械所縛。五障礙。謂雖得四禪八定。亦爲無明所覆。與正見相違。次能治中。若如實了知三界之相虛妄。則自無障礙。果證涅槃。

又作是念。一切眾生執著於我。於諸蘊窟宅。不求出離。依六處空聚。起四顛倒行。爲四大毒蛇之所侵惱。五蘊怨賊之所殺害。受無量苦。我當令彼住於最勝無所著處。所謂滅一切障礙無上涅槃。

第四化梵行求眾生有二。初化邪梵行求。令捨邪

歸正。次段化同法小乘。令捨權歸實。今初。先明過中。初句爲總。謂執著於我過。然外道執著雖多。以我爲本。斷常等見。皆因此生。次於諸蘊下。別明有六句。前三句失道故。遠第一義樂。後三句失滅故。具足諸苦。初中外道計我。故云諸蘊。不求出離。徧計六根。起四顛倒。故云顛倒行。後三中。一。四大乖違苦。謂生老病死苦。二。五陰隨逐苦。五蘊具諸結過。常能害人善法。故云怨賊。三。受無量苦。謂外道著我故。不能得出。後治中。上由計我故。處處生著。唯大涅槃是無著處。菩薩教之觀過。知其實性人。

法皆空。故云最勝無著處。無上涅槃。

又作是念。一切眾生。其心狹劣。不行最上一切智道。雖欲出離。但樂聲聞辟支佛乘。我當令住廣大佛法。廣大智慧。

二化同法小乘。初起過中有三。初不求大因過。利生懈怠爲狹。佛法無邊。退沒不證爲劣。二不行下。不願大果過。三雖欲下明修行過。不定聚眾生。實有大乘出離之法。而修小乘。後治中。廣大佛法。卽諸度萬行。登地已上。名爲廣大。皆佛因法。智慧通因果。翻前狹劣。總名廣大。

佛子。菩薩如是護持於戒。善能增長慈悲之心。

第二結成攝生之戒。護持於戒。卽前律儀及攝善法故。能增長慈悲之心。卽益生戒。上相地竟

下地果

佛子。菩薩住此離垢地。以願力故。得見多佛。所謂見多百佛。多千佛。多百千佛。多億佛。多百億佛。多千億佛。多百千億佛。如是乃至見多百千億那由他佛。

第二位果。唯無發趣。三果同前。皆勝初地。初調柔果有三。謂法喻合。法中有三。初見佛爲鍊行緣。

於諸佛所。以廣大心。深心。恭敬尊重。承事供養。衣服

飲食臥具醫藥。一切資生。悉以奉施。亦以供養一切眾僧。以此善根。迴向阿耨多羅三藐三菩提。於諸佛所以尊重心。復更受行十善道法。隨其所受。乃至菩提。終不忘失。

二於諸佛下。明能鍊行。於中先供佛。後於諸佛下受法。更受十善。卽學佛十善也。是戒地故。

是菩薩於無量百千億那由他劫。遠離慳嫉。破戒垢故。布施持戒。清淨滿足。

三是菩薩下。所鍊淨中。對前勝者。以離慳嫉。破戒。二種垢故。

譬如真金置礬石中。如法鍊已。離一切垢。轉復明淨。
二喻中。前初地菩薩。戒未淨故。施亦未淨。今離二
垢。說名離故。初地金。但火鍊以除外垢。今此置礬
石中。兼內淨體明。云一切淨。

菩薩住此離垢地。亦復如是。於無量百千億那由他
劫。遠離慳嫉。破戒垢故。布施持戒。清淨滿足。

法合可知。

佛子。此菩薩四攝法中。愛語偏多。十波羅蜜中。持戒
偏多。餘非不行。但隨力隨分。

二別地行中。以離語四過。說愛語偏多。

佛子。是名略說菩薩摩訶薩第二離垢地。

三總結地。

菩薩住此地。多作轉輪聖王。爲大法主。具足七寶。有自在力。

二菩薩住此下。攝報果。先明在家。後若欲下。出家。在家中。二。先上勝身。卽金輪王。

能除一切眾生慳貪破戒垢。以善方便。令其安住十善道中。爲大施主。周給無盡。布施愛語利行同事。如是一切諸所作業。皆不離念佛。不離念法。不離念僧。乃至不離念具足一切種一切智智。又作是念。我當

於一切眾生中爲首爲勝。爲殊勝。爲妙。爲微妙。爲上。爲無上。乃至爲一切智智依止者。

後能除下。明上勝果。

是菩薩若欲捨家。於佛法中勤行精進。便能捨家。妻子五欲。既出家已。勤行精進。於一念頃。得千三昧。得見千佛。知千佛神力。能動千世界。乃至能示現千身。於一一身。能示現千菩薩。以爲眷屬。

二出家。

若以菩薩殊勝願力。自在示現。過於是數。百劫千劫。乃至百千億那由他劫。不能數知。

三若以菩薩下願智果並如初地。

爾時金剛藏菩薩欲重宣其義而說頌曰。

質直柔軟及堪能 調伏寂靜與純善

速出生死廣大意 以此十心入二地

第三重頌中有十五偈。分三。初十頌行位。於中有

四。初一頌。頌十種心。

住此成就戒功德 遠離殺生不惱害

亦離偷盜及邪淫 妄惡乖離無義語

不貪財物常慈愍 正道直心無詔偽

離險捨慢極調柔 依教而行不放逸

二有二偈。頌攝律儀戒。

地獄畜生受眾苦

餓鬼燒然出猛燄

一切皆由罪所致

我當離彼住實法

人中隨意得受生

乃至頂天禪定樂

獨覺聲聞佛乘道

皆因十善而成就

如是思惟不放逸

自持淨戒教他護

二有二偈。半頌攝善法戒。

復見羣生受眾苦

轉更增益大悲心

凡愚邪智不正解

常懷忿恨多諍訟

貪求境界無足期

我應令彼除三毒

愚癡大闇所纏覆

入大險道邪見網

生死籠檻怨所拘

我應令彼摧魔賊

四流漂蕩心沒溺

三界焚如苦無量

計蘊爲宅我在中

爲欲度彼勤行道

設求出離心下劣

捨於最上佛智慧

我欲令彼住大乘

發勤精進無厭足

四有四偈半。頌攝眾生戒。

菩薩住此集功德

見無量佛咸供養

億劫修治善更明

如以好藥鍊真金

佛子住此作輪王

普化眾生行十善

所有善法皆修習

爲成十力救於世

欲捨王位及財寶

卽棄居家依佛教

勇猛精勤一念中

獲千三昧見千佛

所有種種神通力

此地菩薩皆能現

願力所作復過此

無量自在度羣生

二有四偈頌位果。

一切世間利益者

所修菩薩最勝行

如是第二地功德

爲諸佛子已開演

三有一偈結歎所說。

上第二離垢地竟

第三發光地。所以來者前戒此定義次第故。又前

三地寄同世間施戒修法。前二地施戒竟。今此顯修。故深密云。前位能持微細戒品。未得圓滿世間等持。等至及圓滿聞法總持。爲令得此。因說此地。令勸修學。言發光者。智論名爲光地。本論名明地。光之與明。眼目殊稱。皆略無發字。仁王名明慧地。慧亦是明。義旨皆同。今統收下經及諸經論。總有三義。立發光名。一以初住地十種淨心爲能發。勝定聞持爲所發光。以安住地竟。方始聞法。修得定。故瑜伽云。由聞行正法光明。等持光明之所顯示。故名發光地。二以聞持爲能發。勝定爲所發。三以

勝定總持並爲能發。彼四地證光明相爲所發。唯識云。成就勝定大法總持。能發無邊妙慧光故。故十淨心。唯是能發。證光明相。唯是所發。言所離障者。唯識名暗鈍障。謂所知障中俱生一分。令聞思修法忘失。彼障三地勝定總持。入三地時。便能永斷。由斯三地說斷二愚及彼麤重。一欲貪愚。此障勝地及彼修慧。二圓滿陀羅尼愚。此障聞思慧及障彼陀羅尼故。若約所證。唯就總持名證勝流。眞如。唯識云。謂此眞如所流教法。於餘教法極爲勝故。其所成行。亦唯禪及求法。其所得果。亦法及禪。

下四無量五神通等。皆定所攝。上釋名竟。

佛子得聞此地行

菩薩境界難思議

靡不恭敬心歡喜

散華空中爲供養

次正釋文。總分三分。初讚請分。二正說分。三重頌分。今初六偈。分二。前三慶前後三請後。前中初偈集經者敘。

讚言善哉大山王

慈心愍念諸眾生

善說智者律儀法

第二地中之行相

是諸菩薩微妙行

眞實無異無差別

爲欲利益諸羣生

如是演說最清淨

後二偈讚說。前偈有慈。後偈有悲。故云利益。又前
偈教相。故云律儀。後偈證相。故云微妙。眞實者。契
理故。無異者。干聖同轍故。無差別者。理貫事故。

一切人天供養者

願爲演說第三地

與法相應諸智業

如其境界希具闡

大仙所有施戒法

忍辱精進禪智慧

及以方便慈悲道

佛清淨行願皆說

後三偈請中。初二偈大眾請。前偈總請三地之法。
謂如彼教法相應三智之業。後偈別請十度行法。
以地地通有故。慈悲是願。道謂道力。佛清淨行。卽

無漏智。

時解脫月復請言

無畏大士金剛藏

願說趣入第三地

柔和心者諸功德

爾時金剛藏菩薩告解脫月菩薩言。佛子。菩薩摩訶薩已淨第二地。欲入第三地。當起十種深心。

第二正說分中。先明地行。後明地果。前中四分。一起厭行分。二厭行分。三厭分。四厭果分。此地修禪。厭伏煩惱。亦厭於禪。故名厭地。正住地心。住於入禪。故但名厭。初入地心。觀修彼行。名厭行分。趣地方便。起彼厭行。地滿心中。得無量等。是厭之果。今

初分中有三。初結前生後。次何等下。徵列十心。三菩薩以是下。結行入位。初中標起云十種深心。論經云深念心。則異二地。單云深心。謂更以十心念前十深心故。

何等爲十。所謂清淨心。安住心。厭捨心。離貪心。不退心。堅固心。明盛心。勇猛心。廣心。大心。

二徵列十心。義分四對。初二句一對。謂根本建立。次三句一對。謂方便發修。次三句一對。謂修已成。就。後二句一對。謂德用自在。此四對中。皆前離過。後明成善。初言淨心者。離過也。謂依二地淨心。趣

此地淨心故。二安住心。依不捨自乘及前十故。此
二依前。故云根本建立。次第二對方便修者。於中
前二句離過。一懸離當欲。二離於現貪。後一造行
進善。第三對中。初一句離過。謂自地煩惱不能壞
故。名堅固心。後二句成善。明盛。謂入禪出入自在。
勇猛。謂不退失。第四對中。謂不樂狹小。故云廣。依
他自在。不捨眾生。故云大。

菩薩以是十心。得入第三地。

三結行入地。謂於前十心作意思惟。便入增上心
住。

佛子。菩薩摩訶薩住第三地已。觀一切有爲法如實相。所謂無常。苦。不淨。不安隱。敗壞。不久住。剎那生滅。非從前際生。非向後際去。非於現在住。

第二厭行分中有三。一修行護煩惱行。以觀有爲可厭患故。二見如是下。修行護小乘行。求一切智深念眾生捨狹劣心故。三菩薩如是厭離下。修行方便攝行。欲攝眾生不離無障礙智究竟方便等故。又此三段攝前三位。初及第二一半攝修行住。次護小乘狹劣心下。攝無悲恨行。以慈悲故。後段攝等一切佛迴向。思惟佛智度眾生故。今初文有

二十句分二。初十句觀無常。卽知有爲體性。後十句觀無救者。卽就人彰過。今初分三。初顯觀無常時。謂住地已。次觀一切下。總辨所觀。謂有爲法。後所謂下。別示其相。文有十句。初總。餘別。總云無常。論云是中命行不住故。命行是所無常法。不住是無常義。別中九句。通顯此無常義。謂無我我所故。又觀此法無救。無依。與憂。與悲。苦惱同住。愛憎所繫。愁感轉多。無有停積。貪恚癡火。熾然不息。眾患所纏。日夜增長。如幻不實。

第二又觀下十句。明其無救。初句總顯。言此法者。

卽前無常。今又觀之。不出生老病死。如四方山來。無逃避處。無能救者。別有九句。約生老病死。初四約死。以顯無救。此相顯故。所以先明。一無依者。於無常未至。中無所依。告救令不至。二與憂者。無常既至。無能救者。意地懼死。所以懷憂。三與悲者。生陰轉壞。死相現前。於此中間。彌增涕泗。四苦惱同住者。正捨壽時。四大分散。則憂苦轉增。心生熱惱。次二約資生事。不知是苦。妄生樂想。謂五追求資生。境有違順。故愛憎所繫。六於受用時。苦多樂少。云愁感轉多。謂受而不散。眾禍皆集。用而毀損。如

損身命。故曰苦多。此二含生一種。七於身老時盛
年壯色。不可救令停集。後二約病。初一病因。謂八
於少壯時具樂等三受。故貪等常燒。不容法水。熾
然難救。九於年衰時。眾患所纏。如樹將朽。日夜增
長。無能令免。老卽病緣。如幻不實。總結前九。上
護煩惱行。

見如是已。於一切有爲。倍增厭離。趣佛智慧。見佛智
慧。不可思議。無等。無量。難得。無雜。無惱。無憂。至無畏
城。不復退還。能救無量苦難眾生。

第二護小乘行。文有三十句。初十句護小心。後二

十句護狹心。今初句總。先結前。謂先觀無常。已厭有爲。次觀無救。故倍增厭。趨佛智慧。明其生後。正護小心。求佛大智。故。次見佛下。別有十句。分二。前五攝功德大。卽求佛菩提。後五清淨大。卽求涅槃果。菩提修成名攝。涅槃本有。離障稱淨。今初攝功德大。一智用不測。故不可思議。二妙用無比。故無等。三純以利他。故無量。四無譏嫌。故難得。五不同外道。故無雜。總攝五種功德大。後五清淨大。義攝有三。一無惱。卽離惑習。無明不雜。故。二無憂者。離苦。苦依根本亡。故。三得涅槃有二義。一得體。謂至

無畏城。二得用。謂能建大事。不住生死。故云不復退還。不住涅槃。故能救無量苦難眾生。

菩薩如是見如來智慧無量利益。見一切有爲無量過患。則於一切眾生。生十種哀愍心。

第二護狹心。文有二十句。前十悲其淪溺。後十決志救濟。前中先牒。謂見佛智勝利。傷物不得。有爲過患。愍物處之。此是牒前。則起悲心。是爲生後。

何等爲十。所謂見諸眾生孤獨無依。生哀愍心。見諸眾生貧窮困乏。生哀愍心。見諸眾生三毒火然。生哀愍心。見諸眾生諸有牢獄之所禁閉。生哀愍心。見諸

眾生煩惱稠林恆所覆障。生哀愍心。見諸眾生不善
觀察。生哀愍心。見諸眾生無善法欲。生哀愍心。見諸
眾生失諸佛法。生哀愍心。見諸眾生隨生死流。生哀
愍心。見諸眾生失解脫方便。生哀愍心。是爲十。

二何等下。正顯悲行。文有十句。初總。餘別。總由孤
獨無依。故生哀愍。今眾生上遠慈尊。下不利物。故
云孤獨。別有九種孤獨無依。初二依欲求眾生。一
已得心無厭足。故貧窮無依。二未得求無休息。故
三毒火然。言多欲多求。次三依有求眾生。一閉苦
果獄。二集因覆障。故云煩惱稠林。三無觀察道。由

生八難。不聞法故。安能證滅。後四依梵行求眾生。前三小乘。一行小因。不求大因勝善之法。二保小果。不求菩提。爲失佛法。三不得大涅槃。長隨變易生死。後一外道。雖求解脫。以邪行故。失於方便。

菩薩如是見眾生界無量苦惱。發大精進。作是念言。此等眾生。我應救。我應脫。我應淨。我應度。應著善處。應令安住。應令歡喜。應令知見。應令調伏。應令涅槃。第二菩薩如是下。決志救度中。初結前生後。作是念下。正顯救心。文有十句。對前十類。生此十心。一救孤獨故。二脫貧窮故。三淨三毒故。四度有獄故。

五著無障處露地坐故。六住善觀察故。七得善法欲。生歡喜故。八知見性相。同佛法故。九調伏諸根不隨流故。十應令涅槃得解脫方便故。科第二
厭行分中有三。前護煩惱行。護小乘行已竟。下第三修方便攝行。

菩薩如是厭離一切有爲。如是愍念一切眾生。知一切智智有勝利益。

第三修行方便攝行。謂修攝生方便之行。故下經云以何方便而能拔濟。卽知不離佛智等。卽是攝生之方便也。文有四段。初發起攝行之因。三作是

思惟下。思求方便攝行。三便作是念下。思得攝生方便。四菩薩如是下。依思修行。今初分二。先牒前二行以爲三因。後欲依下。依前三因以明發起。今初。一如是厭離一切有爲。是牒護煩惱行爲離妄想因。次如是愍念一切眾生。是牒護狹心爲不捨一切世間因。三知一切智智有勝利益。是牒護小心爲發精進因。謂旣知佛智勝益。則修行彼道以趣入故。三因之中。初後是智。中一是悲。悲智爲因。能求方便。

欲依如來智慧救度眾生。

後發起者。既思三因。欲將有益之智。救可愍眾生。作是思惟。此諸眾生。墮在煩惱大苦之中。以何方便。而能拔濟。令住究竟涅槃之樂。

第二思求方便攝行者。亦只思前眾生墮有爲惑業苦中。欲令永滅。得大涅槃。未知方便。故思求之。便作是念。欲度眾生。令住涅槃。不離無障礙解脫智。無障礙解脫智。不離一切法如實覺。一切法如實覺。不離無行無生行慧光。無行無生行慧光。不離禪善巧決定觀察智。禪善巧決定觀察智。不離善巧多聞。第三思得攝生方便中。方便有五。一佛無礙智。二

八地如實覺。三四地無行慧。四三地禪定。五亦三地多聞。然此五中。從微至著。則後後起於前前。今觀求逆。尋其本。展轉相因。並云不離。此五之中。多聞唯能起。佛智唯所起。中間三種。通能所起。菩薩如是觀察。了知己。倍於正法。勤求修習。

第四依思修行。上既逆推。本由多聞。今則順行。先求聞慧。而起聞行。文中先結前生後。下正起求行。日夜唯願聞法。喜法。樂法。依法。隨法。解法。順法。到法。住法。行法。

後日夜下正起求行。於中二。先明求法行。後菩薩

如是下。明求行因。今初文有十句。卽是三慧而有四節。初三唯聞。第四五六通聞思慧。第七唯思。後三唯修。於中初日夜常聞以顯勤行。喜法等九。顯正修行。上求法行。下求因行。

菩薩如是勤求佛法。所有珍財。皆無吝惜。不見有物難得可重。但於能說佛法之人。生難遭想。

二求行因中。有二。初常勤求因。後菩薩如是下。正修行因。今初。彼常勤求。以何爲因。示現恭敬重法。畢竟盡故。於中分六。一總明輕財重法。

是故菩薩於內外財。爲求佛法。悉能捨施。

二雙捨內外。

無有恭敬而不能行。無有憍慢而不能捨。無有承事而不能作。無有勤苦而不能受。

三內財敬事。謂心則恭敬。捨慢身則承事忘苦。

若聞一句未曾聞法。生大歡喜。勝得三千大千世界滿中珍寶。

四况捨外財。

若聞一偈未聞正法。生大歡喜。勝得轉輪聖王位。若得一偈未曾聞法。能淨菩薩行。勝得帝釋梵王位。住無量百千劫。

五輕位重法。人天王位。終是無常。句偈教義。法王爲果。

若有人言。我有一句佛所說法。能淨菩薩行。汝今若能入大火坑。受極大苦。當以相與。菩薩爾時作如是念。我以一句佛所說法。淨菩薩行故。假使三千大千世界大火滿中。尙欲從於梵天之上。投身而下。親自受取。况小火坑而不能入。然我今者爲求佛法。應受一切地獄眾苦。何况人中諸小苦惱。

六甘苦重法。以一句之法。能盡苦源。地獄多劫。誠可甘也。

菩薩如是發勤精進。求於佛法。如其所聞。觀察修行。後正修行因中。初結前。如其下。正顯因相。謂靜處。思惟正觀。爲修行之因也。若順經文。此是後文標舉耳。

此菩薩得聞法已。攝心安住。於空閑處。作是思惟。如說修行。乃得佛法。非但口言而可清淨。

大文第三厭分。束爲七。修相者前明聞思。今顯修慧。卽五種方便中。第四禪善巧決定觀察智也。論云。云何厭分。是菩薩聞諸法已。知如說行。乃得佛法。入禪無色無量神通。彼非樂處。於中不染。必定

應作故。謂不樂不染。卽是厭義。其無量神通。是厭之果。經文修有七相。一依何修。二云何修。三何處修。四何故修。五何時修。六何所修。七何爲修。東此七相。大爲三段。初四修行。次二正入。後一入意。今初。此菩薩得聞法已。卽依何修。以依正法故。次攝心安住。卽云何修。攝散住法。是修相故。次於空閑處。卽何處修。次作是思惟下。卽何故修。要必修行。方證得故。此於七相中。已具四相。然非但口言。通於說聽。謂非但聽聞文字音聲而得清淨也。然皆卽妄卽真。圓融自在。任運而發。不同欣厭。

佛子。是菩薩住此發光地時。

第二證入中。初結前。卽何時修證。謂在三昧時。是修行時。正修行竟。是證入時。後文卽離欲惡下。卽何所修。修何所證。謂證入定。入定之義。廣有多釋。今疏略以四門分別。一入意。二釋名。三體性。四釋文。今初入意者。下經云。但隨順法。故行而無所染著。論云。以何義故。入禪無色無量神通。爲五種眾生故。一爲禪樂。憍慢眾生故。入諸禪。謂得世禪。恃以生慢。二爲無色解脫。憍慢眾生故。入無色定。謂外道證此。以爲涅槃。恃以生慢。菩薩示入八禪。一

一過彼。故攝伏之。三爲苦惱眾生。入慈悲無量。令
安善處。永與樂故。入慈無量。應解彼苦。令不受故。
入悲無量。四爲得解脫眾生故。入喜捨無量。謂喜
其所得。自離動亂故。五爲邪歸依眾生故。入勝神
通力。令正信故。又示入禪定。令物做故。善自調鍊。
寄位次第法。應爾故。尙不同二乘。自爲。豈與凡外
同年。次釋名者。禪那西音。此云靜慮。靜謂寂靜。慮
謂審慮。是以靜能斷結。慮能正觀。諸無色定。有靜
無慮。雖能斷結。不能正觀。欲界等持。有慮無靜。雖
能正觀。不能斷結。故唯色界獨受斯稱。次無色定。

者。此四地中。超過一切有色法故。違害一切有色法故。色法於彼無容生故。俱舍云。無色謂無色。皆無色故。受無色名。次別名者。初四禪者。一初禪有尋有伺靜慮具五支。謂尋伺喜樂定。亦名離生喜樂地。謂離欲界生得喜樂故。二禪無尋無伺靜慮具四支。謂內淨喜樂定故。三禪離喜靜慮具五支。謂捨念慧樂定。亦名離喜妙樂地。謂離下界喜樂。得妙樂故。四禪離樂靜慮具四支。謂捨念中受定。亦名捨念清淨地。無色別名。至下當辨。三釋體性者。婆沙云。靜慮有二種。一修得。是善性攝。心一境。

性以善等持爲自性故。二生得隨地所繫五蘊爲性。無色體性。但除於色。餘義同前。大乘宗中亦無異轍。若會相歸性。則入定支林。一切皆空。若事盡理現。皆如來藏。泯絕無寄。則定亂兩亡。若事理圓融。一卽一切。四釋文。初明四禪。後說四空。四禪之中。並勒爲四。一離障。二對治。三利益。四彼二依止三昧。

卽離欲惡不善法。有覺有觀。離生喜樂。住初禪。

今釋初禪。一卽離欲惡不善法者。此明離障。以一卽離。貫於下三。離五欲故。名爲離欲。斷十惡故。名

爲離惡。除五蓋故。名離不善法。言離惡不善者。煩惱欲因所生種種惡不善法。卽身口惡行。總辨欲界諸不善法。已明離障。二有覺有觀。此有二支。是修行對治。新譯名尋伺。皆初麤。後細。尋謂尋求。伺謂伺察。心之麤性。名之爲尋。心之細性。名之爲伺。三離生喜樂者。是修行利益。慶離欲惡等。是故生喜。身心猗息。及得解脫之樂。故名爲樂。由此名利益支。四住初禪者。是彼二依止。三昧。謂於所緣。審正觀察。心一境性。爲彼對治。及利益支之所依止。依止定力。尋等轉故。其所離障。以無行體。非是支。

故不爲彼依。而言初者。欲界上進。此最初故。而言住者。卽安住義。

滅覺觀。內淨一心。無覺無觀。定生喜樂。住第二禪。

第二禪中。一滅覺觀。是所離障。覺觀初動發生三識。亂於二禪。如淨水波動則無所見故。初禪能治此爲所治。則病盡藥亡。二內淨一心無覺無觀者。是修行對治。言內淨者。謂信平等。令內心淨。言一心者。釋於內義。唯緣法塵。不同初禪有三識故。故阿毗曇云。欲界地中心行六處。初禪地中心行四處。謂無鼻舌。二禪已上。心行一處。唯意識身。緣法

塵故。無覺無觀。釋於淨義。不同初禪有覺觀故。前滅覺觀。顯於所治。此復言無顯能治無。故非重也。三言定生喜樂者。此二支是修行利益。初禪慶背欲惡。故名離生。今慶覺觀心息。故名定生。如淨鑑止水。故身心適悅。四住第二禪。卽彼二依止三昧離喜。住捨有念。正知。身受樂。諸聖所說能捨有念受樂。住第三禪。

第三禪中。一離喜者。是所離障。謂二禪利益支。喜心分別。想生亂動。三禪轉寂。故須除遣。二住捨有念。正知。三支者。是修行對治。一住捨者。卽是捨數。

揀非捨受。論名行捨。行心調停。捨彼喜過。故顯揚云。住捨者。已生喜不忍可故。平等正直。無動安住。二有念者。於喜不行中。不忘明記故。三正知者。或時失念喜行。於此分別正知而住。謂住於捨。上三卽前內淨漸修轉勝。至此別開深細寂靜。故能治下地喜踊浮動。三身受樂下。是利益支。初身受樂。正顯支體。謂離二禪浮動喜心。最極寂靜。得大輕安。身心俱樂。以身在樂中。是故心樂亦名身受。次諸聖所說捨有念受樂者。釋成勝義。謂諸下地無如是樂。及無間捨。上有捨而復無樂。故諸佛及佛

弟子說第三禪具有能捨及念正知而復受樂。故諸樂中。三禪樂勝。四住第三禪。卽彼二依止三昧斷樂。先除苦喜憂滅。不苦不樂。捨念清淨。住第四禪。第四禪斷樂先除苦喜憂滅者。卽是離障。三禪勝樂。於此爲害。如重病人。觀妙音樂。爲障四禪。故須除遣。故云斷樂。得此定者。所有苦樂皆得超越。故總集說先除苦等。先之一字。總貫下三。謂二禪先除苦受。三禪先滅喜受。初禪先滅憂受。并今斷樂已滅四受。二不苦不樂者。是利益支。餘禪皆先明治。今此先明益者。乘前總無四受。便舉不苦不樂。

明五受內。唯有一捨是不動故。三捨念清淨。此二是對治支。亦卽名地。三禪捨念。與樂受俱。此斷樂受。故云清淨。喜心浮動。常須正知。樂受深細。但須捨念。若遠顯清淨者。瑜伽云。一切下地災患已斷。以離八災患。謂尋伺。苦樂憂喜出息入息。是故此中捨念清淨。由是此禪心住無動。四住第四禪卽彼二依止。然入上色定。其身相狀。如處室中。入下四空。如處空中。上四禪竟。下四空先敘意。第二四空定。空處等名。同心一境性。有何差別。俱舍定品顯此差別。由離下地染。故立四名。謂離第

四禪立空無邊處。離空無邊處立識無邊處。差別
既爾。從何得名。復次頌云。空無邊等三。名從加行
立。非想非非想。昧劣故立名。謂修定前起加行位。
厭壞色故。作勝解想。思無邊空。加行成時。名空無
邊處。厭空想識。厭識想無所有。準此可知。其第四
空。由想昧劣。謂無下地明慧勝想。得非想名。有昧
劣想。名非非想。前三無色。加行受名。第四無色。當
體受稱。然此四空。亦各有四。謂離障等。而經文但
有三句。義含有四。謂初離障。具對治義。若依纓絡
本業。四無色定。各有五支。謂想護止觀一心。如初

空定。厥色相起於空想。卽今對治。護彼色相。令不現前。若超色相。卽名爲止。是今離障。空無邊行。照了分明。卽是觀義。是初利益。一心。卽是彼二所依。超一切色想。滅有對想。不念種種想。入無邊虛空。住虛空無邊處。

今初空處。謂觀虛空作無邊行相。能滅色想。心安空定。名空無邊處。四空名處者。謂有情生長處。故文中三句。卽爲三別。初明離障。二辨利益。三明依止。今初以經三想句。連爲義句。故曲有三。言離障者。謂離三有對等色。一有見有對色。謂色界。此一

有見。謂爲眼根所觀照故。名爲有見。五根五境。此之十界。有色有對。以此體是色故。極微所成。更相障礙。故名有對。二不可見有對色者。謂眼等五根對聲香味觸也。三無見無對色者。謂無表法處色也。今言超一切色想者。過眼識相。此明超可見有對。二滅有對想者。耳鼻舌身識和合想滅故。此滅不可見有對。三不念種種者。不念意識和合想故。意識分別一切法故。說名種種。此滅不可見無對。意識雖緣非色之境。今但取緣色。自有種種。皆云想者。小乘以在色欲修此定。未捨形色。故不言滅。

色。但言滅想。想取色相。故偏滅之。大乘之中。決唯
滅想。若超色想。說無色者。後滅空識。應無識空。若
於色界頓修空定。則六識行境。並皆得滅。已明離
障。云何對治。前三句中。不念之言。含於對治。謂不
分別色等境故。何以不念。見無我故。約菩薩實治。
故云無我。若依有漏。但厭苦麤。以爲加行。二入無
邊虛空者。是修行利益。謂三色想絕。則入空理廓
爾無邊故。三住虛空無邊處者。是彼二依止。三昧
後之三定。一同於此。

超一切虛空無邊處。入無邊識。住識無邊處。

二識無邊處。心緣內識作無邊行相。故以爲名。初超虛空無邊處。是明離障。彼何所障。外念爲麤故。云何對治。見彼外念麤。分別過患故。二入無邊識。是修行利益。前明捨外。今辨緣內。正理云。謂於純淨六識身。能了知中。善取相已。安住勝解。由假想力。思惟觀察無邊識相。由此加行爲先。得入根本。後依止可知。

超一切識無邊處。入無少所有。住無所有處。

第三無所有處者。卽內外皆無也。初超無邊識。是明離障。何過須超。事念麤故。云何對治。見麤念事

分別過患。次入無少所有者。修行利益。前以捨外緣內。故爲麤念。旣無所取。能取亦無。故內外俱無。斯爲利益。瑜伽云。從識處上進時。離其識外。更求餘境。都無所得。此意明識旣爲麤識。外復無。故無所有。住無所有處。是二依止。

超一切無所有處。住非有想非無想處。

四非想中。無下七地。明了之想。有昧劣想。故以爲名。超一切無所有處。是所離障。云何對治。無彼無所有。以見分別麤念過患。故爲能治。旣寂無所有。云何名麤。猶有無所有想。故經闕一句。論經則具。

彼云。知非有想非無想安隱。則修行利益。卽入非有想非無想處。行是二依止。瑜伽云。先入無所有想定。超過一切有所有想。今復超過無所有想。故言非想。又言非無想者。非如無想及滅盡定。一切諸想皆悉滅盡。唯有微細想。緣無想境轉故。卽於此處起勝解。則超近分而入根本。此中所以不出三界者。由緣無想境卽是細想。外道不了。謂爲涅槃。未能無緣。豈離心境。况計此爲我。故法華喻頭上火然。若知此患。更求上進。求上所緣。竟無所得。無所得故。滅而不轉。則得滅受想定也。若未得此。

定。厭相爲先。後想不行。卽入無想定。今更約第一義修。略示四空。謂觀色卽空。心安於空。是空處定。次知空色不出於心。是識處定。次心境兩忘。爲無所有。次亦亡無所有想。緣無想處。名非想非非想。若不緣此無想。則諸漏永寂。

但隨順法故行。而無所樂著。

第三入意。但順化眾生法。不同凡小有愛味等。

三厭分竟

佛子。此菩薩心隨於慈。廣大無量不二。無怨無對。無障。無惱。徧至一切處。盡法界虛空界。徧一切世間。

大文第四。明其厭果。卽前八定之所等引。故名爲果。文分爲三。初四無量。卽行方便果。次五神通。卽行用果。三此菩薩於諸禪下。總結自在。今初。所以先明者。凡夫味定。三界輪迴。二乘上升。多皆趣寂。菩薩因定。發生慈悲。準瑜伽四種無量。爲四有情。緣求樂。眾生與慈。有苦與悲。有善隨喜。有感不染。此四皆緣無量境。故名無量。若總相說。皆以定慧爲體。若別明之。慈卽與樂。無瞋爲體。悲則拔苦。不害爲體。喜則慶他。不嫉爲體。自他捨惑。卽是喜捨。文中分二。初別顯慈行。後住悲下。類顯餘三。初中

有十二句。心隨於慈。此句爲總。隨有二義。一心不
趣寂。動皆含慈。二以慈心隨逐於物。如犢隨母。慈
之種類。總有其三。謂一眾生緣慈。二法緣慈。三無
緣慈。緣謂緣念。初緣假者。欲與其樂。此通凡夫。次
緣人空。但有蘊等善惡行法。以用教化。此通小乘。
三緣眾生體空。欲令悟入。此通大乘。今初。又此七
句。含有八義。曲攝爲四。初四句言與樂。正顯行相。
廣者。與欲界樂。欲境廣多故。大者。與同喜樂。謂初
二禪喜受俱故。高出名大。無量者。三禪已上。離苦
離喜故。深故名無量。不二者。三樂平等與故。次二

治障。不愛之冤亦與其樂。故無冤障。是愛之親。亦與其樂。非是偏情。故無對礙中。人無愛不愛。故非障也。次一清淨。謂無身心不調五蓋等障。是行清淨慈。後無惱一句。攝果。慈定起於色界正果。慈之餘勢。起欲界習果。皆無苦惱之事。故修慈經說。修慈有十五利。謂臥安覺安。天護人護。眠無惡夢。寤常歡喜。水不能漂。火不能燒。刀不能傷。毒不能害。常生善處。鎮受快樂。正報梵世。殘報人王。遠果信佛。然此中有多種果。初現報果。常生下。後報果。正報梵世。望上生報。望下正報。殘報人王。卽是習果。

又初士用果。水不能漂等。是增上果。常生下異熟果。殘報等流果。作佛。是離繫果。修一慈心。三報不斷。五果俱圓。無費一毫。而功報無極。幸諸後學。思而修之。上釋眾生緣慈。次徧至一切處。卽法緣慈。橫徧十方。豎通三界。彼中所有一切諸法。皆能緣念。法者。謂聖凡五蘊之法。及眾生所有分別作業之法。名爲法緣。後二句無緣者。無緣有二。一自體無緣。豎窮法空。故云盡法界。二徧至無緣。顯空無分齊。橫盡虛空。末句云。徧一切世間者。總結上慈。成無量義也。

住悲喜捨亦復如是。

結類三可知。上明四無量果

佛子。此菩薩得無量神通力。能動大地。以一身爲多身。多身爲一身。或隱或顯。石壁山障。所往無礙。猶如虛空。於虛空中。加跌而去。同於飛鳥。入地如水。履水如地。身出烟燄。如火聚。復雨於水。猶如大雲。日月在空。有大威力。而能以手捫摸摩觸。其身自在。乃至梵世。

第二佛子。下得五神通。明行功用果。前內懷慈濟之心。此外現救生之用。妙用難測。曰神自在無壅。

曰通。文中。有五。一。神境。二。天耳。三。他心。四。宿住。五。天眼。寄同世間。故。但得五。外色。內身。皆神之境。轉變多種。受神之名。亦名神足。依欲勤心觀之所成。故。亦名如意。隨意成。故。餘名易了。今約利生三業。初一約身到機所。次二口業。天耳聞佛說法。聞眾方言。以他心智通。隨種種言音。皆盡知己。將前所聞之法。隨其方言之異。復宜用何言之異。而授與之。後二意業。宿住。知其過去。是何界種。天眼。見其未來。遠近成益。隨應化之。今初身通。初總明。後能動下。別顯。總中云。得者。總修總得。然通依四禪多。

依第四別中得三種自在。一世間自在。動大地故。二以一身下。身自在。三石壁下。作業自在。

此菩薩天耳清淨。過於人耳。悉聞人天。若近若遠。所有音聲。乃至蚊蚋虻蠅等聲。亦悉能聞。

第二天耳通。初總標其體。謂天耳清淨。清淨有二義。一離欲界法。得靜慮。引生清淨。大種所造。二離於障礙。審諦聞故。由此過於人耳。悉聞下。顯用。釋過人義。遠細皆知故。

此菩薩以他心智。如實而知他眾生心。所謂有貪心。如實知有貪心。離貪心。如實知離貪心。有瞋心。離瞋

心。有癡心。離癡心。有煩惱心。無煩惱心。小心。廣心。大
心。無量心。略心。非略心。散心。非散心。定心。非定心。解
脫心。非解脫心。有上心。無上心。雜染心。非雜染心。廣
心。非廣心。皆如實知。菩薩如是以他心智。知眾生心。
第三他心通中三。初總知他心者。通於王所。次所
謂下別。後菩薩如是下結。別中二十六心。行相各
異。然除小等四心。餘皆障治間明。善惡對顯。總攝
爲九。一以初六心。明隨煩惱。謂隨緣現起煩惱相
應。故名爲隨。非約小惑名隨也。言有貪等。卽三不
善根。及三善根。以爲能治。二有煩惱等二心。明使

卽是隨眠。三小等四心名生。約無記報心。人心小。欲天廣。色天大。無色二解脫。無量。以作空識無邊行相故。上二不爾。四有四心。學三昧行。略者謂由止行。於內所緣。繫其心故。非略者。太沈昧故。或不一所緣故。散者太舉。於五妙欲境。隨順流散故。非散者。於妙所緣。明了顯現故。前一約定。後二約慧。五有二心。明得三昧。定者。正入根本定故。不定者。未入及起時故。六有二心。明得解脫。有縛無縛故。七有二心。餘凡夫增上慢。卽前類之餘。以得四禪。謂爲四果。卽麤習行名上。無此卽細習行名無上。

八有二心。妄行正行。論經名求不求。希求名聞。卽是雜染。反此非染。九有二心。大乘得失。悲智兼濟。爲廣。隨闕非廣。上之九類。不出三種。初二煩惱。次一是苦。餘皆是業。業有善惡耳。皆如實知者。審於事實。見理實故。亦非心外見法。亦非無境可知。若自他相絕。則與眾生心同一體。故無心外也。不壞能所。故能知也。又他心是總。餘皆是別。六相圓融。一乘之實知也。

此菩薩念知無量宿命差別。所謂念知一生。念知二生。三生。四生。乃至十生。二十。三十。乃至百生。無量百

生。無量千生。無量百千生。成劫。壞劫。成壞劫。無量成
壞劫。我曾在某處。如是名。如是姓。如是種族。如是飲
食。如是壽命。如是久住。如是苦樂。我於彼死。生於某
處。從某處死。生於此處。如是形狀。如是相貌。如是言
音。如是過去無量差別。皆能憶念。

第四宿住智通。初總標。誰能念。卽宿住之智。次所
謂下。別顯。後如是過去下。總結。別中初念何事。謂
一生乃至多劫中事。此顯念時。次我曾下。云何念。
卽念相差別也。念彼因中名字不同。姓謂父母家
姓。如迦葉等。種族卽刹利貴賤等。餘可知。

此菩薩天眼清淨。過於人眼。見諸眾生。生時死時。好色惡色。善趣惡趣。隨業而去。若彼眾生成就身惡行。成就語惡行。成就意惡行。誹謗賢聖。具足邪見。及邪見業因緣。身壞命終。必墮惡趣。生地獄中。若彼眾生成就身善行。成就語善行。成就意善行。不謗賢聖。具足正見。正見業因緣。身壞命終。必生善趣。諸天之中。菩薩天眼。皆如實知。

第五天眼通。論明生死智通。約根約境異故。初總顯能見。誰能見。天眼故。清淨者。審見故。過人者。遠見故。次見諸下。別顯所見。初見生死本有之果。隨

業之因。若彼眾生下。云何見。別見因果不同。如二地攝善戒中辯菩薩下。結。

此菩薩於諸禪三昧。三摩鉢底能入能出。然不隨其力受生。但隨能滿菩提分處。以意願力而生其中。

第三總結自在。近結厭果。遠結前厭。於何自在。卽前禪等。禪謂四禪。三昧者。四無量慈等三昧故。三摩鉢底。此云等至。此應譯者之誤。合云三摩呬多。以此云等引。五通卽所引故。云何自在。謂智能出入。則散動不能縛。卽心生時。隨心用現在前故。大悲方便。不隨受生。則定不能縛。若不隨禪生。當何

所生。不揀淨穢。但能滿菩提分處。卽生其中。謂諸佛菩薩共生一處。是能滿處。以願力者。非業繫生故。上地行竟。下地果。

佛子。是菩薩住此發光地。以願力故。得見多佛。所謂見多百佛。見多千佛。見多百千佛。乃至見多百千億那由他佛。

第二位果。三界卽爲三別。初調柔果中。有法喻合。今初鍊行緣。次悉以下。明能鍊行。後見縛下。明所鍊淨。

悉以廣大心。深心。恭敬尊重。承事供養。衣服。飲食。臥

具湯藥。一切資生。悉以奉施。亦以供養一切眾僧。以此善根。迴向阿耨多羅三藐三菩提。於其佛所恭敬聽法。聞已受持。隨力修行。此菩薩觀一切法不生不滅。因緣而有。

次明鍊行中。先福行。次迴向行。後修智行。言觀一切法不生不滅者。卽法性觀。於清淨法中。不見增故不生。煩惱妄想中。不見減。故不滅。因緣而有者。謂淨法從緣生。故無可增。妄法從緣滅。故無可減。又此三地。世間滿故。於禪定爲此實觀。起後地無生行。慧亦卽善巧決定觀察智也。

見縛先滅。一切欲縛色縛有縛無明縛。皆轉微薄。於無量百千億那由他劫。不積集故。邪貪邪瞋。及以邪癡。悉得除斷。所有善根。轉更明淨。

二所鍊淨中。先明斷惑。後揀細異麤。前中五縛卽五住煩惱。若合色有。卽是四縛。亦名四流。見縛先滅者。初地見道已斷分別惑故。一切欲等者。論云。一切修道中。三縛及彼因。同無明習氣。皆悉微薄。謂煩惱障三縛現行及種。故云彼因。與當地所知障種同滅。故云同無明習氣。習氣卽種義。次於無量下。揀細異麤。卽是斷細以多劫不積。三不善根

故。細種漸斷。善根轉淨。言多劫者。仁王經說初地經四阿僧祇劫。後地倍增。以細障難斷。經劫轉多。多劫不積。故邪貪等斷。然但細習。以初地見道。二地修道。已斷麤故。善根轉淨。卽前信等。

佛子。譬如眞金。善巧鍊治。秤兩不減。轉更明淨。

喻言秤兩不減者。厭離世間。勝於前地。信等入於厭火。故自在不失減也。

菩薩亦復如是。住此發光地。不積集故。邪貪邪瞋。及以邪癡。皆得除斷。所有善根。轉更明淨。此菩薩忍辱心。柔和心。諧順心。悅美心。不瞋心。不動心。不濁心。無

高下心。不望報心。報恩心。不諂心。不誑心。無險誑心。皆轉清淨。

三合中二。先正合前行淨。後此菩薩下。別顯忍淨。此地忍增。故偏明之。有十三心。初二句爲總。一他加惡辱。能忍受故。二善護他心。謂他陵我以剛強。我則騁之以柔和故。下諸句別釋此二。別中。初有二心。分別善護他心。一諧順心。以他於菩薩作惡。疑菩薩瞋恨。菩薩現同伴侶。與之諧和。二悅美心者。愛語誨誘。次以三心分別加惡忍受。謂身加惡而不瞋。口毀辱而不動。心嫉害而憂惱不能濁。次

三心出上二因。無高下者過去久離憍慢故。不自
高舉。輕下於彼。由此能柔和護他。後二卽加惡不
改之因。一不望報恩故。益他被辱而忍受。二受恩
常念。小恩大報故。眾生於我有恩。法爾應忍。後三
心顯上二心離障。雖柔順護他而非諂實爲利益
故不誑。心無隱覆諂佞故無險詖。險詖者諂佞也。
此菩薩於四攝中。利行偏多。十波羅蜜中。忍波羅蜜
偏多。餘非不修。但隨力隨分。

此菩薩下第二別地行相。

佛子。是名菩薩第三發光地。

第三結說地相。

菩薩住此地。多作三十三天王。

二攝報果。此下諸地攝報。文皆分二。初上勝身。

能以方便。令諸眾生捨離貪欲。布施愛語。利行同事。如是一切諸所作業。皆不離念佛。不離念法。不離念僧。乃至不離念具足一切種一切智智。

次上勝果中。先自分行。

復作是念。我當於一切眾生中。爲首。爲勝。爲殊勝。爲妙。爲微妙。爲上。爲無上。乃至爲一切智智依止者。若勤行精進。於一念頃。得百千三昧。得見百千佛。知百

千佛神力。能動百千佛世界。乃至示現百千身。一一身百千菩薩以爲眷屬。

次勝進行。

若以菩薩殊勝願力。自在示現。過於此數。百劫千劫。乃至百千億那由他劫。不能數知。

三願智果。

爾時金剛藏菩薩欲重宣其義。而說頌曰。

清淨安住明盛心 厭離無貪無害心

堅固勇猛廣大心 智者以此入三地

第三重頌十八偈分五。初一頌起厭行分。

菩薩住此發光地

觀諸行法苦無常

不淨敗壞速歸滅

無堅無住無來往

觀諸有爲如重病

憂悲苦惱惑所纏

三毒猛火恆熾然

無始時來不休息

二有十二偈頌厭行分。於中初二護煩惱行。

厭離三有不貪著

專求佛智無異念

難測難思無等倫

無量無邊無逼惱

見佛智已愍眾生

孤獨無依無救護

三毒熾然常困乏

住諸有獄恆受苦

煩惱纏覆盲無目

志樂下劣喪法寶

隨順生死怖涅槃

我應救彼勤精進

次三偈頌護小乘行。

將求智慧益眾生

思何方便令解脫

不離如來無礙智

彼復無生慧所起

心念此慧從聞得

如是思惟自勤勵

日夜聽習無間然

惟以正法爲尊重

國城財貝諸珍寶

妻子眷屬及王位

菩薩爲法起敬心

如是一切皆能捨

頭目耳鼻舌牙齒

手足骨髓心血肉

此等皆捨未爲難

但以聞法爲最難

設有人來語菩薩

孰能投身大火聚

我當與汝佛法寶

聞已投之無怯懼

假使火滿三千界

身從梵世而投入

爲求法故不爲難

况復人間諸小苦

從初發意至得佛

其間所有阿鼻苦

爲聞法故皆能受

何况人中諸苦事

後七偈頌方便攝行。

聞已如理正思惟

獲得四禪無色定

四等五通次第起

不隨其力而受生

三一偈頌厭分及果。

菩薩住此見多佛

供養聽聞心決定

斷諸邪惑轉清淨

如鍊真金體無減

住此多作忉利王

化導無量諸天眾

令捨貪心住善道

一向專求佛功德

佛子住此勤精進

百千三昧皆具足

見百千佛相嚴身

若以願力復過是

四三偈頌位果。

一切眾生普利益

彼諸菩薩最上行

如是所有第三地

我依其義已解釋

五一偈頌結說。第三發光地竟。

大方廣佛華嚴經綱要卷第三十五

大方廣佛華嚴經綱要（第一冊、第五冊）功德主名錄

法印文號：104101

一、五〇〇元：徐永禮、黃英妹。

五二六、五〇七元：佛陀教育基金會。

以上計新台幣：五二九、五〇七元，恭印一、〇〇〇套。

回向：天下和順，日月清明，風雨以時，災厲不起，國豐民安，兵戈無用，

崇德興仁，務修禮讓，國無盜賊，無有冤枉，強不凌弱，各得其所。

祝願法界一切有情，所有六道四生，宿世冤親，現世業債，咸憑法力，悉得解脫。

祝願現生者增福延壽，發菩提心，常隨佛學，勤修精進，利濟群生。

祝願已故者往生淨土，同出苦輪，共登覺岸。

附記：本會接受善信委託，代印經書、佛像，其必要之費用，均經本會審慎評估；若有結餘，均續作本會之印（購）經書及運費，為施主廣積陰德，歡迎十方大德善加利用。

普為出資及讀誦受持
輾轉流通者回向偈曰

願以此功德

消除宿現業

增長諸福慧

圓成勝善根

所有刀兵劫

及與饑饉等

悉皆盡滅除

人各習禮讓

讀誦受持人

輾轉流通者

現眷咸安樂

先亡獲超昇

風雨常調順

人民悉康寧

法界諸含識

同證無上道

佛曆二五六〇年／西元二〇一六年二月

大方廣佛華嚴經網要(第二冊)

發行人：簡豐文

出版者：財團法人佛陀教育基金會

地址：100 台北市杭州南路一段五十五號十一樓

網址：<http://www.budaedu.org>

E-mail：budaedu@budaedu.org

電話：(02) 2395 1198 傳真：(02) 2399 1345

劃撥戶名：財團法人佛陀教育基金會 郵局劃撥帳號：〇七六九九七九

銀行名稱：台灣銀行城中分行（請於電匯或轉帳後告知本會用途）

銀行帳號：〇四五〇〇四五九七五〇三

本會經書免費結緣之請取方式如下：

(一) 親臨本會三樓講堂。(二) 利用傳真：(02) 23965959

(三) 撥打電話：(02) 23951198 分機：11、12

(四) 網址：<http://www.budaedu.org/books/>。(五) 寫信指定：本會法寶流通股。

為提高服務效率，請您嚴謹考量，慎選所需經書；儘量少用電話，多利用文字方式請取，並請詳寫經書名稱、冊數及收件人姓名、地址、電話、郵遞區號，以減少本會之處理時間；若大量申請，請註明用途，且避免姓名、地址等文字上書寫之錯誤。

◎本會經書，歡迎翻印(請勿增刪)，贈送流通，功德無量。

◎本會交通一

※捷運：善導寺站5號出口，至杭州南路右轉，過兩個紅綠燈。

※公車站牌：審計部站→212、289、232、205、276、605、257、262

台北商業技術學院→253、297、237 仁愛路一段→253、297 開南商工→208

仁愛路、杭州南路(紹興街)口→630、270、263、245、621、651、37、261

行政院新聞局出版事業登記證局版臺業字第三八六九號

恭印：一〇〇〇本
流水號：13854
書號：CH342-95

